

Komentari na Mahubiri Juu ya Kitabu cha Ufunuo

***JE, NYAKATI ZA
MPINGA KRISTO,
KUFIA-DINI,
KUNYAKULIWA
NA
UFALME WA
MILENIA
ZINAKUJA?
(II)***

PAUL C. JONG

Msukumo wa

Kuandika Kitabu Hiki

Msukumo wa kuandika kitabu hiki kwanza kabisa unalenga katika kutoa usahihi na kuushuhudia ukweli wa Biblia unaoungojea ulimwengu huu katika nyakati za mwisho—katika msukumo huu wa kwanza ninalenga kuelezea kwa kina juu ya Mpinga Kristo, alama ya 666, kufia-dini kwa watakatifu, kunyakuliwa kwao, Ufalme wa Milenia na Mbingu na Nchi Mpya.

Msukumo wangu wa pili ni kuwakomboa waamini kutoka katika fundisho baya la kiimani la kunyakuliwa kabla ya dhiki, fundisho linalowapotosha na kuwapeleka katika maangamizi.

Msukumo wa mwisho wa kuandika kitabu hiki ni kutoa mwanga juu ya ukweli wa kitabu cha Ufunuo ili kwamba ule ukweli halisi wa nyakati za mwisho uweze kufahamika na ili kwamba imani ya waamini wa kweli isiibiwe.

Mambo haya yote ndiyo yale ambayo Mungu ameniruhusu kuandika kwa ajili ya mema ya kila mmoja anayeishi katika wakati huu wa sasa.

Kitabu hiki kitayaweka wazi yale yote yanayoungojea ulimwengu huu hapo baadaye kama ilivyoandikwa katika Kitabu cha Ufunuo, pia kitayajibu maswali yako yote juu ya nyakati za mwisho, na kitakubariki kwa imani ya kweli. Mungu na akupatie baraka zake zote.



JE, NYAKATI ZA MPINGA KRISTO, KUFIA-DINI, KUNYAKULIWA NA UFALME WA MILENIA ZINAKUJA?

(III)



Hephzibah

***JE, NYAKATI ZA
MPINGA KRISTO,
KUFIA-DINI,
KUNYAKULIWA
NA
UFALME WA
MILENIA
ZINAKUJA?
(II)***

PAUL C. JONG



Hephzibah Publishing House

**A Ministry of THE NEW LIFE MISSION
SEOUL, KOREA**

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Komentare na Mahubiri Juu ya Kitabu cha Ufunuo
JE, NYAKATI ZA MPINGA KRISTO, KUFIA-DINI,
KUNYAKULIWA NA UFALME WA MILENIA ZINAKUJA? (II)

Hakimiliki © 2002 na Kampuni ya Uchapaji ya Hephzibah

Haki zote zimehifadhiwa. Hairuhusiwi kunakiri kubadili sehemu ya kitabu hiki kwa njia yoyote ile ikiwa ni pamoja na kunakiri, kurekodi, au kukidurufu bila ya ridhaa ya maandishi toka kwa mmiliki wa kitabu hiki.

Nukuu za Maandiko ya Biblia zinatoka katika Tafsiri ya Ushirikiano wa Makanisa – Kenya (Nairobi) na Tanzania (Dodoma).

(Swahili Union version)

ISBN 978-89-282-0761-9

Jalada limebuniwa na Min-soo Kim

Vielelezo vimetolewa na Young-ae Kim

Kimechapishwa nchini Korea

Hephzibah Publishing House

A Ministry of THE NEW LIFE MISSION

Seoul, Korea

♠ Website: <https://www.nlmission.com>

<https://www.bjnewlife.org>

<https://www.nlmbookcafe.com>

♠ E-mail: newlife@bjnewlife.org

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Shukrani

Ni Kwa neema ya Mungu kwamba toleo la pili la *Komentare na Mahubiri Juu ya Kitabu cha Ufunuo* limechapishwa.

Kwanza kabisa, ninapenda kumshukuru Mungu kwa kuniruhusu kulieneza Neno la Ufunuo katika ulimwengu mzima, hali nikiwa nimeangaziwa na Maandiko yote na kuongozwa na Roho Mtakatifu, katika kipindi hiki kinachosubiria ujio wa wakati wa farasi wa kijivujivu. Ninaamini kuwa sasa ni wakati muhimu kwa kila nafsi kuzaliwa tena upya kwa kupitia injili ya maji na Roho, kusikia kile ambacho Neno la Ufunuo linasema kuhusu nyakati za mwisho, na kisha kutii mafundisho yake kwa imani.

Kwa kweli sina maneno yanayotosha kuelezea shukrani zangu za dhati kwa watumishi wote na wanachama wa Huduma ya Utume wa Maisha Mapya, ambao wamefanya kazi pamoja katika kukifanikisha kitabu hiki na wale ambao wameiunganisha mioyo yao pamoja nami katika kuieneza injili hata sasa. Kwa kweli kila mmoja wao ni mchapishaji halisi wa kitabu hiki.

Pia ninapenda kumshukuru Mchungaji Sangchan Lee na Mchungaji John Shin, watumishi wenzangu ambao wameyafanya majukumu yote kwa uaminifu katika uchapishaji wa kitabu hiki. Pia ninatoa shukrani zangu za dhati kwa Ndugu Youngwon Cho kwa kukitafsiri kitabu hiki kwenda katika lugha ya Kiingereza. Kwa kweli nasikitika sana kwamba siwezi kutoa shukrani zangu kwa kila mtenda kazi binafsi aliyeshiriki katika kukihariri na kukichapa kitabu hiki.

Ninamrudishia Mungu utukufu, ambaye ameturuhusu kuzaliwa tena upya katika injili ya maji na Roho, na ambaye ametufanya tuliweke tumaini letu kwenye Ufalme wa Milenia na Mbingu na Nchi Mpya, kwa kulieneza Neno la Ufunuo katika kizazi hiki kiovu na kisha kuilinda imani yetu. ☒

PAUL C. JONG

YALIYOMO

Dibaji ----- 11

SURA YA 8

Matarumbeta Yanayoyatangaza Mapigo Saba

(Ufunuo 8:1-13) ----- 17

Je, Mapigo ya Matarumbeta Saba ni Halisi? ----- 24

SURA YA 9

Pigo Toka Shimo Lisilo na Mwisho

(Ufunuo 9:1-21) ----- 45

Uwe na Imani Imara Katika Nyakati

za Mwisho ----- 53

SURA YA 10

Je, Unafahamu Wakati wa Kuniyakuliwa ni Lini?

(Ufunuo 10:1-11) ----- 67

Je, Unafahamu Kuniyakuliwa Kwa Watakatifu

Kutatokea Lini? ----- 75

SURA YA 11

Mizeituni Miwili na Manabii Wawili ni Akina Nani?	
(Ufunuo 11:1-19) -----	93
Wokovu wa Watu wa Israeli -----	114

SURA YA 12

Kanisa la Mungu Ambalo Litadhuriwa Sana Hapo Baadaye	
(Ufunuo 12:1-17) -----	127
Pokea Kuuawa kwa Kuifia-Dini Kwa Imani Thabiti -----	136

SURA YA 13

Kutokea Kwa Mpinga Kristo	
(Ufunuo 13:1-18) -----	149
Kuonekana Kwa Mpinga Kristo -----	166

SURA YA 14

Sifa za Wafia-dini Waliofufuka na Kunyakuliwa	
(Ufunuo 14:1-20) -----	187
Watakatifu Wafanye Nini Mara Mpinga Kristo	
Atakapoonekana? -----	203

SURA YA 15

Watakatifu Wanaoyasifia Matendo ya Bwana ya	
Kushangaza Angani (Ufunuo 15:1-8) -----	215

Kituo cha Kugawa Hatma ya Milele -----	227
--	-----

SURA YA 16

Mwanzo wa Mapigo ya Mabakuli Saba (Ufunuo 16:1-21) -----	233
Unachopaswa Kukifanya Kabla ya Kumiminwa Kwa Mabakuli Saba Ni... -----	244

SURA YA 17

Hukumu ya Kahaba Akaaye Katika Maji Mengi (Ufunuo 17:1-18) -----	253
Umakini Wetu Uzingatie Mapenzi ya Mungu -----	266

SURA YA 18

Ulimwengu wa Babeli Umeanguka (Ufunuo 18:1-24) -----	271
“Tokeni Kwake, Enyi Watu Wangu, Wala Msipokee Mapigo Yake” -----	285

SURA YA 19

Ufalme Utakaomilikiwa Na Mwenyezi (Ufunuo 19:1-21) -----	295
---	-----

Ni Wenye Haki Tu Ndio Wanaoweza Kusubiria Kurudi Kwa Kristo Katika Tumaini -----	307
---	-----

SURA YA 20

Joka Atafungwa Katika Shimo la Kuzimu Lisilo na Mwisho (Ufunuo 20:1-15) -----	323
Tutawezaje Kupita Toka Mautini Kwenda Uzimani? -----	334

SURA YA 21

Mji Mtakatifu Unaoshuka Toka Mbinguni (Ufunuo 21:1-27) -----	351
Ni Lazima Tuwe na Imani Iliyothibitishwa na Mungu -----	367

SURA YA 22

Mbingu na Nchi Mpya, Ambapo Maji ya Uzima Yanatiririka (Ufunuo 22:1-21) -----	389
Uwe na Furaha na Thabiti Katika Tumaini la Utukufu -----	405

Kiambatanisho

Maswali & Majibu -----	429
------------------------	-----



Omba kitabu cha bure katika tovuti ya www.nlmission.com

Dibaji

Je, Unafahamu Ni Lini Unyakuo wa Watakatifu Utatokea?

Katika toleo langu la kwanza juu ya Kitabu cha Ufunuo, niliandikwa kuwa Mungu amezipanga nyakati saba katika Majaliwa yake, na kwamba wakati wa farasi wa kijivujivu utatujia kwa haraka sana, na kwamba watu watateseka sana chini ya ukatili wa Mpinga Kristo; lakini watakatifu waliozaliwa tena upya wataweza kumshinda huyo Mpinga Kristo na kisha kuupata Ufalme wa Milenia na Mbingu na Nchi Mpya kwa kupitia imani yao sahihi iliyotolewa na Mungu.

Sasa, kwa kupitia toleo hili linalofuata, utaweza kuutambua ufahamu sahihi wa Neno hasa kuhusiana na sehemu zilizobakia za Kitabu cha Ufunuo, kuanzia sura ya 8 hadi ya 22.

Kwanza kabisa, ninakushauri kuwa na imani imara katika ukweli kwamba unabii wote wa Kitabu cha Ufunuo utakuja kutimia: Hivi punde kutatokea mapigo ya matarumbeta saba; Mpinga Kristo atatokea, mauaji makubwa ya Mpinga Kristo kwa watakatifu wakiifia-dini; ufufuo na kunyakuliwa kwa watakatifu waliozaliwa tena upya katikati ya Dhiki Kuu; mapigo ya mabakuli saba yakimiminwa juu ya maadui wa Mungu; kuja kwa Ufalme wa Milenia; ufufuo wa pili wa wenye dhambi kwa ajili ya adhabu yao ya milele; watakatifu kuishi pamoja na Mungu katika Ufalme wa Mbinguni wa milele.

Miongoni mwa mambo haya yatakayokuja, kunyakuliwa kwa watakatifu kunapaswa kuwa ni jambo la kuzingatia kwa Wakristo wote. Je, unyakuo huu utatokea lini, na ni nani

atakayeshiriki katika baraka hii?

Wakristo wa nyakati za kale waliamini juu ya nadharia ya kunyakuliwa baada ya dhiki, lakini Wakristo wengi siku hizi wanaitetea nadharia ya kunyakuliwa kabla ya dhiki. Lakini ukweli ni kwamba kunyakuliwa kwa watakatifu kutatokea kwa hakika baada ya miaka mitatu na nusu katika ile miaka saba ya Dhiki Kuu.

Katika sura ya 10 ya kitabu cha Ufunuo, wakati Bwana alipozungumza na Yohana kupitia malaika wake aliyekuwa amesimama katika bahari na katika nchi, na wakati Yohana alipojaribu kuandika aliyoyaona, Mungu alimwambia usiyaandike. Hili lilikuwa ni fumbo halisi ambalo Mungu atalifunua kwetu sisi tu ambao ni wakatifu wa nyakati za mwisho.

Fumbo hili si jingine zaidi ya kunyakuliwa kwetu. Ili kuweza kufahamu kwamba ni wakati gani hasa unyakuo utatokea, basi ni lazima tutambue kwamba tarumbeta la saba la Mungu ndilo litakaloamua katika kulitatua fumbo hili. Ufunuo 10:7 inaeleza kwamba, wakati malaika wa saba atakapokuwa tayari kulipiga tarumbeta, *“hapo ndipo siri ya Mungu itakapotimizwa.”* Sasa, ni lini au ni wakati gani basi ambapo tarumbeta la saba litakapopigwa? Litapigwa mwaka wa tatu na nusu katika ile miaka saba ya Dhiki Kuu. Hapa ndipo wakati ambapo ufufuo wa watakatifu na kunyakuliwa kwao kutakapotokea. Na baada ya kukamilika kwa unyakuo, basi mapigo ya mabakuli saba yatafuata.

Hivyo, sasa ni wakati wa wenye dhambi wote kutubu na kuiamini injili ya maji na Roho, kwa kuwa wale waliozaliwa tena upya ndio watakaoweza kumshinda Mpinga Kristo na kisha kushiriki katika ufufuo wa kwanza na unyakuo. Pamoja na kuwa mateso ya yule Mnyama yatakuwa ya kutisha, watakatifu waliozaliwa tena upya hawataipokea alama ya Mnyama, na kwa

sababu hiyo watauawa na kuifia-dini na hivyo kuilinda imani yao ya kweli. Kisha watanyakuliwa na Bwana na kuingia katika chakula cha harusi cha Mwana-kondoo.


Bwana wetu Yesu anakualika katika Neno la kweli akisema, *“Yeye aliye na sikio, na alisikie neno hili ambalo Roho ayaambia makanisa” (Ufunuo 2:29).*

Baraka nyingi za Bwana wetu ziwe pamoja nawe! ☒

Paul C. Jong

SURA YA

8



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Matarumbeta Yanayoyatangaza Mapigo Saba

< Ufunuo 8:1-13 >

“Hata alipoifungua muhuri ya saba, kukawa kimya mbinguni kama muda wa nusu saa. Nami nikawaona wale malaika saba wasimamao mbele za Mungu, nao wakapewa baragumu saba. Na malaika mwingine akaja akasimama mbele ya madhabahu, mwenye chetezo cha dhahabu, akapewa uvumba mwingi, ili autie pamoja na maombi ya watakatifu wote juu ya madhabahu ya dhahabu, iliyo mbele ya kiti cha enzi. Na moshi wa ule uvumba ukapanda mbele za Mungu pamoja na maombi ya watakatifu, kutoka mkononi mwa malaika. Na huyo malaika akakitwaa kile chetezo, akaijaza moto wa madhabahu, akautupa juu ya nchi, kukawa radi na sauti na umeme na tetemeko la chi. Na wale malaika saba wenye baragumu saba wakajifanya tayari ili wazipige. Malaika wa kwanza akapiga baragumu, kukawa mvua ya mawe na moto vilivyotangamana na damu, vikatupwa juu ya nchi; theluthi ya nchi ikateketea, na theluthi ya miti ikateketea, na majani mabichi yote yakateketea. Malaika wa pili akapiga baragumu, na kitu, mfano wa mlima mkubwa uwakao moto, kikatupwa katika bahari; theluthi ya bahari ikawa damu. Wakafa theluthi ya viumbe vilivyomo baharini, vyenye uhai; theluthi ya merikebu zikaharibiwa. Malaika wa tatu akapiga baragumu, nyota kubwa ikaanguka kutoka mbinguni,

iliyokuwa ikiwaka kama taa, ikaanguka juu ya theluthi ya mito, na juu ya chemchemi za maji. Na jina lake ile nyota yaitwa Pakanga; theluthi ya maji ikawa pakanga, na wanadamu wengi wakafa kwa maji hayo, kwa kuwa yalitiwa uchungu. Malaika wa nne akapiga baragumu, theluthi ya jua ikapigwa, na theluthi ya mwezi, na theluthi ya nyota, ili kwamba ile theluthi itiwe giza, mchana usiangaze theluthi yake, wala usiku vivyo hivyo. Kisha nikaona, nikasikia tai mmoja akiruka katikati ya mbingu, akisema kwa sauti kuu, Ole, ole, ole wao wakaa juu ya nchi! Kwa sababu ya sauti zisaliazo za baragumu za malaika watatu, walio tayari kupiga.”

Mafafanuzi

Ufunuo 8 inaeleza juu ya mapigo ambayo Mungu atayaleta juu ya dunia hii. Moja kati ya maswali ya msingi hapa ni kwamba watakatifu watahusishwa ama kutohusishwa katika kuteseka chini ya mapigo hayo. Biblia inatueleza kuwa watakatifu pia, watayapitia mateso ya matarumbeta saba. Kati ya mapigo saba, watakatifu watayapitia mapigo yote isipokuwa ni lile pigo la mwisho. Mapigo haya saba ya matarumbeta yanayoonekana katika sura hii ni mapigo halisi ambayo Mungu atayaleta duniani. Mungu anatueleza kuwa atauadhibu ulimwengu kwa mapigo ambayo yataanza kwa sauti za matarumbeta saba ya malaika.

Aya ya 1: Hata alipoifungua muhuri ya saba, kukawa kimya mbinguni kama muda wa nusu saa.

Aya hii inaeleza juu ya ukimya kabla hasira ya Mungu haijamiminwa kwa wanadamu. Mungu atakaa kimya kwa

muda kabla ya kuyaleta mapigo yake makali na ya kutisha hapa duniani. Hii inatuonyesha jinsi ambavyo mapigo ya Mungu ya matarumbeta saba yatakavyokuwa. Wakati wanadamu watakaposimama mbele za Mungu baada ya mapigo haya, basi wale waliookoka watapokea uzima wa milele, lakini wale ambao hawajaokoka watapokea adhabu ya milele. Hivyo, tukikitambua aina ya kipindi tunachoishi, basi tunapaswa kuwa macho na kuifanya kazi ya uinjilisti.

Aya ya 2: Nami nikawaona wale malaika saba wasimamao mbele za Mungu, nao wakapewa baragumu saba.

Mungu aliwatumia malaika saba kuifanya kazi yake. Lakini tuisahau kwamba katika kipindi cha sasa, Mungu anafanya kazi kupitia wenye haki wanaoamini katika Neno la injili ya maji na Roho.

Aya ya 3: Na malaika mwingine akaja akasimama mbele ya madhabahu, mwenye chetezo cha dhahabu, akapewa uvumba mwingi, ili autie pamoja na maombi ya watakatifu wote juu ya madhabahu ya dhahabu, iliyo mbele ya kiti cha enzi.

Hii inatuonyesha kuwa Mungu atayaleta mapigo yake yote duniani, baada ya kuwa ameyasikia maombi ya watakatifu yaliyotolewa katikati ya mateso na mapigo toka kwa Shetani na wafuasi wake. “Chetezo cha dhahabu” kina maanisha ni maombi ya watakatifu, na hii ina maanisha kuwa kadri maombi yao yanavyotolewa kwa Mungu, basi kazi zote za Mungu zititimizwa. Mungu anafanya kazi kwa kuyasikia maombi ya watakatifu.

Aya ya 4: Na moshi wa ule uvumba ukapanda mbele za Mungu pamoja na maombi ya watakatifu, kutoka mkononi mwa

malaika.

Hii inaonyesha ni kwa kiasi gani Mpinga Kristo amewatesa watakatifu katika dunia hii. Kutokana na mapigo ya nyakati za mwisho, watakatifu watamwomba Mungu ili kumwondoa Mpinga Kristo, kuyafanya mapigo yawapite kwa haraka, na kisha kuwaonyesha wanaowaua jinsi hasira ya Mungu ilivyo kali juu yao. Aya hii inaonyesha kuwa Mungu atayapokea maombi ya watakatifu wote. Baada ya kuyapokea maombi haya ya watakatifu, basi hapo ndipo Mungu atakapoanza kumhukumu Mpinga Kristo na wafuasi wake kwa mapigo saba ya matarumbeta na yale ya mabakuli saba. Hukumu ya Mungu kwa Mpinga Kristo na wafuasi wake ni jibu la mwisho kwa maombi ya watakatifu.

Aya ya 5-6: Na huyo malaika akakitwaa kile chetezo, akaijaza moto wa madhabahu, akautupa juu ya nchi, kukawa radi na sauti na umeme na tetemeko la chi. Na wale malaika saba wenye baragumu saba wakajifanya tayari ili wazipige.

Mungu anayaandaa mapigo ya matarumbeta saba hapa duniani. Hivyo, ulimwengu huu hauwezi kukwepa kelele, ngurumo, radi, na matetemeko ya ardhi.

Aya ya 7: Malaika wa kwanza akapiga baragumu, kukawa mvua ya mawe na moto vilivyotangamana na damu, vikatupwa juu ya nchi; theluthi ya nchi ikateketea, na theluthi ya miti ikateketea, na majani mabichi yote yakateketea.

Pigo la kwanza ni la kuunguza theluthi ya dunia, ambapo theluthi ya miti na nyasi vitaungua. Pigo hili litaangukia juu ya misitu ya ulimwengu huu.

Ni kwa nini Mungu atalileta pigo la aina hii? Kwa sababu, pamoja na kuwa watu wameuona uzuri wa uumbaji wa Mungu kwa macho yao wenyewe, bado hawakumtambua Muumba

kuwa ni Mungu na kumwabudu yeye, na badala yake “waliabudu na kuutumikia uumbaji badala ya Muumbaji” (Warumi 1:25). Hivyo, Mungu anayaleta mapigo ya matarumbeta saba kwa wale wote wasiopatia Mungu utukufu na badala yake wanasimama kinyume na Mungu.

Aya ya 8-9: Malaika wa pili akapiga baragumu, na kitu, mfano wa mlima mkubwa uwakao moto, kikatupwa katika bahari; theluthi ya bahari ikawa damu. Wakafa theluthi ya viumbe vilivyomo baharini, vyenye uhai; theluthi ya merikebu zikaharibiwa.

Pigo la tarumbeta la pili linahusisha nyota inayoanguka na kuiangukia dunia. Nyota hii itaangukia baharini na kisha kuibadili theluthi ya bahari kuwa damu, itaua theluthi ya viumbe hai waishio baharini na kisha itaharibu theluthi ya merikebu. Wanadamu wamepokea baraka nyingi sana kupitia hali ya asili iliyoumbwa na Mungu, halafu wakawa waasi na kuwa kinyume na Mungu. Pigo hili la pili linawaadhibu wanadamu kwa sababu ya dhambi hii.

Aya ya 10: Malaika wa tatu akapiga baragumu, nyota kubwa ikaanguka kutoka mbinguni, iliyokuwa ikiwaka kama taa, ikaanguka juu ya theluthi ya mito, na juu ya chemchemi za maji.

Kwa nini Mungu aliiruhusu hii nyota kuanguka “juu ya theluthi ya mito na katika chemchemi za maji?” Ni kwa sababu, mwanadamu, pamoja na kuwa anaishi kwa msaada wa Bwana ambaye ndiye chanzo cha uhai, ukweli ni kuwa hakumwabudu na kumshukuru Mungu, na badala yake alimdharau huyu Bwana wa uzima.

Aya ya 11: Na jina lake ile nyota yaitwa Pakanga; theluthi

ya maji ikawa pakanga, na wanadamu wengi wakafa kwa maji hayo, kwa kuwa yalitiwa uchungu.

Kutokana na pigo hili theluthi ya mito na chemchem za maji zitageuka na kuwa pakanga, na watu wengi watakufa baada ya kuyanywa maji yake. Hili ni pigo la adhabu kwa kwenye dhambi ambao walikuwa wamesimama kinyume na Mungu na wakainyanyasa mioyo ya watakatifu. Hivyo, Mungu hataacha kuwalipiza wenye dhambi kwa matendo yao yote waliyoyafanya dhidi ya wenye haki. Wakati wenye dhambi wanapoleta mateso kwa wenye haki, basi ni hakika kuwa Mungu atawahukumu. Pia pigo hili la tatu ni pigo jingine juu ya hali ya asili; ni pigo lililoletwa kwa sababu ya dhambi za watu za kutotii kwa kutoiamini injili ya maji na Roho iliyotolewa na Mungu. “Pakanga” katika Biblia imekuwa ikimaanisha hukumu kwa wale wote wasiomtii na wanaompinga Mungu.

Aya ya 12: Malaika wa nne akapiga baragumu, theluthi ya jua ikapigwa, na theluthi ya mwezi, na theluthi ya nyota, ili kwamba ile theluthi itiwe giza, mchana usiangaze theluthi yake, wala usiku vivyo hivyo.

Pigo la nne ni la jua, mwezi, na nyota kutiwa giza. Katika kipindi hiki chote mwanadamu amekuwa akimfuata Shetani ana amelipenda giza. Wamekuwa wakiukataa mwanga wa wokovu unaoangazwa na injili ya maji na Roho iliyotolewa na Yesu Kristo. Kwa hiyo, ili kuwafundisha wanadamu jinsi ulimwengu wa gizo ulivyo wa kutisha, basi Mungu atawaletea pigo hili la kuleta giza. Pia pigo hili linaonyesha jinsi hasira ya Mungu ilivyo kali kwa ajili ya dhambi yao ya kumchukia Yesu Kristo na kuipenda giza. Hivyo, theluthi ya jua, mwezi, na nyota za ulimwengu huu zitapoteza nuru yake na kutiwa giza.

Aya ya 13: Kisha nikaona, nikasikia tai mmoja akiruka katikati ya mbingu, akisema kwa sauti kuu, Ole, ole, ole wao wakaao juu ya nchi! Kwa sababu ya sauti zisaliazo za baragumu za malaika watatu, walio tayari kupiga!”

Aya hii inatueleza kuwa bado kuna ole nyingine tatu zitakazokuja kwa wale wote wanaoishi katika ulimwengu huu. Hivyo, wenye dhambi wote, na wale wote wanaosimama kinyume na Mungu wanapaswa kukombolewa toka katika dhambi zao zote kwa kuamini katika injili ya maji na Roho mara moja. ☒

Je, Mapigo ya Matarumbeta Saba ni Halisi?

< Ufunuo 8:1-13 >

Katika Ufunuo 5 kunaonekana andiko liliwekwa mihuri saba, ambalo Yesu alilichukua. Hii ilimaanisha kwamba Yesu alipewa mamlaka yote na nguvu za Mungu, na kwamba atauongoza ulimwengu kwa mujibu wa mpango wa Mungu kuanzia hapo na kuendelea. Ufunuo 8 inaanza kwa kifungu hiki, *“Hata alipoifungua muhuri ya saba, kukawa kimya mbinguni kama muda wa nusu saa. Nami nikawaona wale malaika saba wasimamao mbele za Mungu, nao wakapewa baragumu saba.”* Hivyo, Yesu anaifungua muhuri ya saba, kisha anatuonyesha vitu vitakavyokuja.

Sura ya 8 inaanza kwa kutueleza kwamba mapigo ya matarumbeta saba yataanza kwa maombi ya watakatifu. Kuanzia aya ya 6 na kundelea, sura hii inaanza kuongelea juu ya mapigo ya matarumbeta saba ambayo yataletwa hapa ulimwenguni.

Pigo la Tarumbeta la Kwanza

Tarumbeta la Kwanza—Aya ya 7: *“Malaika wa kwanza akapiga baragumu, kukawa mvua ya mawe na moto vilivyotangamana na damu, vikatupwa juu ya nchi; theluthi ya*

nchi ikateketea, na theluthi ya miti ikateketea, na majani mabichi yote yakateketea.”

Kitu cha kwanza kukifahamu ni ule ukweli ikiwa watakatifu tutakuwepo katikati ya mapigo ya matarumbeta saba yatakapokuwa yakiletwa hapa duniani.

Hapa wanakuja malaika saba ili kuyapiga matarumbeta saba. Tunapaswa kutambua kwamba, kati ya haya mapigo saba, sisi tutabakia hapa duniani na kuyapitia mapigo sita ya kwanza. Pia tunapaswa kutambua kwamba wakati tarumbeta la saba litakapolia, tutanyakuliwa, na kwamba baada ya hapo itafuatiwa na mapigo ya mabakuli saba.

Aya ya 7 inatueleza kwamba wakati malaika wa kwanza alipolipiga tarumbeta lake, mvua ya mawe na moto vilivyochangamana na damu vilishuka duniani, vikaiunguza theluthi ya ulimwengu na theluthi ya miti. Kwa maneno mengine, theluthi ya mazingira ya asili ya ulimwengu yaliunguzwa.

Je, tunaweza kuishi katika ulimwengu ambao mazingira ya asili yameunguzwa na kuwa moshi kiasi hicho? Hali mvua ya mawe iliyochanganyikana na damu ikitunyeshea, na wakati miti ikiungua na kuwa majivu, je, tunaweza kweli kuishi hali tumezungukwa na aina hiyo ya mazingira ya asili yaliyounguzwa hadi ardhini? Wakati tutakapokuwa tukipambana kwa kupoteza makazi yetu kwa sababu ya mvua hii ya mawe na moto na iliyochangamana na damu, na wakati misitu minene na vilima vikiungua, ukweli ni kuwa hakuna miongoni mwetu atakayetamani kuendelea kuishi katika ulimwengu wa jinsi hiyo.

Usisahau kwamba wewe na mimi tunapaswa kulipitia hili pigo la kwanza. Itakapofikia kwamba ndio tunaingia katika pigo hili la kwanza, basi hapo tutapaswa kutambua kwamba Mpinga Kristo yupo tayari duniani. Kwa kuwa mapigo haya

yataanza kabla Mpinga Kristo hajatokea kikamilifu ili kudai umiliki kamili wa ulimwengu, basi viongozi wa ulimwengu watatengeneza muungano ili kukabiliana na mapigo, na kiongozi fulani atawakusanya viongozi wengine saba ili kutengeneza nguvu kuu.

Kisha Mpinga Kristo atatokea katika hali ya kawaida tu kama kiongozi katika mchakato huu. Kadri Mpinga Kristo atakavyoonyesha uwezo mkubwa wa kukabiliana na kuihuisha dunia toka katika uharibifu huu wa mazingira ya kiasili, basi watu wengi hali wakivutiwa na nguvu zake, wataanza kumfuata hali wakifikiri kuwa yeye ni kiumbe wa kiroho, na kwa sababu hiyo wafuasi wake watatokea.

Biblia inatueleza kwamba wakati malaika wa kwanza atakapolipiga tarumbeta lake, tarumbeta hilo litaleta pigo la kwanza kati ya yale mapigo saba ya matarumbeta, pigo hilo litaunguza theluthi ya dunia. Sisi watakatifu na watu wa ulimwengu huu tutakuwa tukiishi hapa duniani wakati pigo hili likipigwa. Ni nini basi kitatokea kwa ulimwengu? Machafuko yatakuwa mengi sana ulimwenguni, huku magofu, maiti, na majeruhi wakiwa wamelala sehemu mbalimbali; hali ya hewa itakuwa imejawa na moshi na gesi yenye sumu ikizalishwa na ziwa la moto ambalo litakuwa limeugubika ulimwengu wote; hewa itakosa oksijeni na ukuaji wa jangwa kutokana na moto utakuwa ni mkubwa kiasi kwamba utasababisha uwezo duni kwa sayari kuzalisha hewa ya oksijeni. Pigo la kwanza peke yake litauweka ulimwengu huu sehemu kubwa kuwa ni majivu, litaleta uharibifu mkubwa kiasi cha kutuondolea hamu ya kuendelea kuishi hapa duniani.

Hivyo, kutokana na pigo hili ni lazima tufanye chaguo la busara. Tukiwa tunaishi katika ulimwengu huu wa kawaida, basi tunaweza kuyahofia mapigo makuu na dhiki itakayokuja. Lakini tunaweza kuwekwa huru toka katika hofu hii na badala

yake kuwa na ujasiri, kwa kuwa mara baada ya theluthi ya mazingira ya ulimwengu kuungua huku watu wakipiga yote huku na kule, basi sisi tutambua kwamba hili pigo limekwisha na kwamba mapigo mengine bado yanakuja. Kwa kuwa tuna tumaini, basi tunaweza kujazwa na hili tumaini, lakini kwa kuwa pia tuna miili, wakati mwingine tunaweza kutikiswa na hofu. Lakini kwa kuwa tunaifahamu hatma ya dunia hii, basi hatuliweki tumaini letu katika dunia hii, bali katika Ufalme wa Mungu. Kwa imani kama hiyo, na kwa kudumu katika Roho Mtakatifu, tunaweza kuwa wajasiri na imara.

Kilio cha watu wa ulimwengu kitakuwa kikubwa sana, na sisi pia, tunaweza kujikuta tukiomboleza hasa ikiwa wanafamilia wetu watakuwa ni miongoni mwa wale ambao hawajapokea ondoleo la dhambi zao. Baadhi ya wanafamilia wetu katika mwili, ambao hawajakombolewa dhambi zao, wanaweza pengine kutuza kwa Mpinga Kristo ili wapate chakula. Kwa upande mwingine, wengine wanaweza kuja kwetu na kutuuliza jinsi wanavyoweza kupokea ondoleo la dhambi zao. Hili linawezekana kabisa, hii ni kwa sababu fursa ya wao kukombolewa itakuwa bado ipo. Biblia inatueleza kwamba wakati mapigo ya matarumbeta saba yatakapowadia, theluthi ya ulimwengu mzima itakufa. Hii pia ina maanisha kwamba theluthi mbili ya ulimwengu itakuwa hai. Wakati theluthi ya idadi ya watu ulimwenguni itakapokuwa imeungua na kufa, basi tutapaswa kutambua kwamba muda wa sisi kuuawa na kuifia-dini na wa kurudi kwa Bwana haupo mbali. Mungu alisema kwamba ataleta mvua ya mawe na moto ikiwa imechangamana na damu toka angani.

Wakati Mungu atakapouleta moto na mvua ya mawe juu yetu, ukweli ni kuwa hatutaweza kufanya lolote kuikwepa mvua hiyo. Haitawezekana pia, hata kwa kutumia mbinu za kisayansi, yaani kutengeneza ngao ya ulinzi angani ambayo

inaweza kuufunika ulimwengu mzima dhidi ya kumiminwa kwa mvua ya mawe na moto. Hata kama tutaweza kutengeneza chombo kama hicho, chombo hicho hakitaweza kabisa kulinganishwa na nguvu za hilo pigo toka kwa Bwana. Tunapaswa kupokea katika mioyo yetu kwamba ni kweli mapigo haya yatakuja kutoka kiuhalisia, na kisha tuishi maisha yetu ya sasa kwa kuamini katika ahadi zote za Neno la Mungu kwa mioyo yetu yote.

Hivi karibuni, nilisikia katika taarifa kwamba mawe yatokanayo na mvua ya mawe ambayo ni makubwa kama kichwa cha mtu, yakiwa na kipenyo cha sentimita 45 yalianguka huko China. Huku yakishuka kwa kasi toka huko juu, haya mawe ya mvua, yenye ukubwa kama kichwa cha mtu yalikuwa yakianguka kwa nguvu ya kushangaza, huku yakivunja mapaa na kuharibu kila kitu yalimopitia. Kile kitachoanguka na pigo la kwanza ni kikubwa kuliko nguvu ya haya mawe ya mvua. Tunapaswa kuamini kwa mioyo yetu kwamba moto utakaounguzwa theluthi ya dunia, ambao ni makubwa kuliko haya mawe ya mvua yaliyodondoka huko China, utakuja; na kwamba ni lazima tuitunze imani hii katika mioyo yetu; na kwamba ni lazima tutende kulingana na imani yetu mara pigo hili litakapowadia. Tunapaswa kuamini kwamba ulimwengu huu utaangamizwa hivi karibuni, na pia ni lazima tudhamirie kukabiliana na pigo lolote kwa imani hii, huku tukikubaliana na mauaji ya kuwa wafia-dini. Wakati matarumbeta saba yatakapolia, ukweli ni kwamba mapigo saba yataletwa hapa ulimwenguni. Hili ni pigo la kwanza kati ya haya mapigo saba.

Pigo la Tarumbeta la Pili Likiletwa na Mungu

Tarumbeta la Pili—Aya ya 8-9: *“Malaika wa pili akapiga*

baragumu, na kitu, mfano wa mlima mkubwa uwakao moto, kikatupwa katika bahari; theluthi ya bahari ikawa damu. Wakafa theluthi ya viumbe vilivyomo baharini, vyenye uhai; theluthi ya merikebu zikaharibiwa.”

Tunapaswa kuzingatia ukweli kwamba watakatifu wataishi na kupitia hili pigo la pili.

Hapa andiko linaeleza kwamba kitu kama mlima mkubwa kilitupwa baharini, na kubadili theluthi ya bahari kuwa damu na kuua theluthi ya viumbe hai baharini. Wakati nyakati za mwisho zitakapowadia, utaratibu wa ulimwengu utavunjika, hali ukizidhoofisha kundi la nyota na kuzifanya kugongana na kuvunjika, na kwa sababu ya hili vimondo vingi vitaangukia duniani na kusababisha mgongano mkubwa. Baadhi ya vimondo hivi vitaangukia baharini kwa nguvu kubwa, huku vikibadili theluthi ya bahari kuwa damu, na kisha kuua theluthi ya viumbe hai wa baharini, na kuharibu theluthi ya meli. Hili ni pigo la tarumbeta la pili kati ya mapigo ya matarumbeta saba.

Je, wakati hili litakapotokea tutaweza kula samaki toka baharini, au kuogelea ndani yake? Haitawezekana kamwe. Wakati kimondo kikubwa kama mlima mkubwa kitakapoangukia baharini, theluthi ya bahari itageuka na kuwa damu, theluthi ya viumbe wake hai watauawa, wataifanya bahari ioze kwa sababu ya mizoga yao iliyokufa, na mawimbi ya bahari na matetemeko yatawaangamiza watu wengi pamoja na meli.

Nakumbuka niliwahi kuiona sinema moja ambapo kimondo kinaangukia baharini na kusababisha mawimbi makubwa sana yanayoifunika dunia. Ninaamini kwamba watengenezaji wa sinema hii walikuwa na picha halisi kuhusu nyakati za mwisho katika fikra zao. Ni kweli kwamba machafuko makuu yataipiga dunia, na huu ni ukweli ambao hawa watu wasioamini wanautambua. Watu wengi sana

watauawa kwa pigo la kuanguka kwa vimondo. Lakini kwa kuwa ni theluthi tuya ulimwengu ndio itakayoharibiwa, wewe na mimi tutaendelea kuishi hapa duniani hadi mapigo ya mabakuli saba yatakapomiminwa.

Watu walizoea kuamini kwamba unyakuo utatokea baada ya kuisha kwa Dhiki Kuu, lakini baada ya kutokea nadharia ya kunyakuliwa kabla ya dhiki, wanatheolojia wengi walianza kuamini nadharia hii ya kunyakuliwa kabla ya dhiki. Mbaya zaidi, hivi sasa kuna nadharia ya Amilenia ambayo kimsingi inakana kuhusu Ufalme wa Milenia. Watheolojia, kutokana na kushindwa kwao kuliangalia vizuri Neno la Ufunuo, hivi sasa wanajaribu kulikimbia Neno la kitabu hiki. Wale ambao watalipoteza tumaini lao hapa duniani kuhusiana na mapigo yatakayokuja watakuwa ni wa kulinganishwa kivingine na watakatifu waliozaliwa tena upya na ambao watavamilia hali ilivyo, hali wakiwa wameliweka tumaini lao katika Ufalme wa Milenia katika Mbingu na Nchi Mpya vilivyoahidiwa na Bwana.

Tunapaswa kuiandaa imani yetu kadri nyakati za mwisho zinavyozidi kutukaribia, lakini badala ya kufanya hivyo, watu wengi wanapendelea kuongelea kuhusu kunyakuliwa kabla ya dhiki au kuhusu Amilenia, wakijaribu kukwepa kukabiliana na imani halisi. Kwa kuwa wanaamini kwamba Yesu atarudi katika mawingu hali wakiendelea katika shughuli zao za kila siku, wakiwa katika maisha yasiyo na bugudha, na kwa kuwa wanaamini kwamba watainuliwa moja kwa moja kwenda katika Ufalme wa Mungu pasipo kupitia mapigo yoyote, basi ukweli ni kwamba hawaiandai imani yao kukabiliana na Dhiki Kuu.

Kwa mtazamo wa haraka, wale waliotulia na wasiojiandaa kwa ajili ya Dhiki Kuu wanaweza kuonekana kuwa ni majasiri. Sababu inayowafanya wenye dhambi ambao hawajazaliwa tena

upya kuonekana kuwa ni majasiri mbele ya Dhiki Kuu ni kwa sababu nafsi zao, baada ya kuwa zimelewa kutokana na uongo wa manabii wa uongo, zimekwisha kufa, na hazina matamania yoyote ndani yao. Kwa sababu iyo hiyo, yaani kwamba nafsi zao zimekwisha kufa, ndio maana basi watu hao hawaisikii na wanaikataa injili ya maji na Roho inayowawezesha kuzaliwa tena upya kwa maji na Roho na kisha kuingia katika Ufalme wa Mungu (Yohana 3:5).

Lakini waliozaliwa tena upya ni lazima waziandae imani zao kwa ajili ya dhiki katika nyakati za mwisho, hii haijalishi kwamba maisha yao ya sasa yana raha kiasi gani. Wanapaswa kujiandaa mapema kwa ajili ya baadaye kwa kuweka katika akili zao nia ya kuihubiri injili kwa wale ambao watakuwa waaminifu kwa Mungu, ili kwamba waweze kuziokoa nafsi nyingi kadri itakavyowezezana utakapowadia wakati wa Dhiki.

Kudharau ujio wa karibu wa Dhiki Kuu ni jambo la kijinga kabisa. Wale watakaodharau watajikuta hawana la kufanya mbele ya hayo mapigo, kama kile kilichotokea katika Vita vya Wakorea. Kabla ya kuzuka kwa Vita vya Wakorea, Marekani ilikuwa imegundua uandaaji wa makundi makubwa ya jeshi la Korea ya Kaskazini na waliionya Korea Kusini kuhusu uvamizi unaoweza kujitokeza, lakini serikali ya Korea Kusini na jeshi lake walidharau onyo hilo, kiasi kuwa wakaruhusu hata majeshi kwenda likizo na kuwaruhusu maafisa wa mstari wa mbele kufurahia mapumziko ya mwisho wa wiki katika siku ambayo walivamiwa.

Kwa kuwa walikuwa hawajajiandaa kwa ajili ya vita basi hata baada ya uvamizi wa Korea Kaskazini kuthibitishwa, ukweli ni kwamba walishindwa kuzuia uvamizi wa Korea Kaskazini na wakasukumwa hadi kusini mwa nchi. Baada ya Korea Kusini kuviita vikosi vyake toka likizo ya mapumzika na kuviandaa kwa vita, askari wake wa mstari wa mbele

walikuwa wameshadhoofishwa, na kilichofuatia ilikuwa ni kurudi nyuma huku majeruhi wakiwa wengi sana.

Hii ndiyo aina ya ole ambayo itatukuta ikiwa hatutaliadini Neno ambalo Mungu ameliongea kwetu kuhusu nyakati za mwisho. Lakini kama tutaliadini Neno hilo kwa uaminifu, basi ni hakika kwamba tunaweza kuikwepa hiyo ole. Ufunuo inazungumzia juu ya kimbilio wakati wa Dhiki, lakini haituelezi juu ya eneo halisi ya kukimbilia. Hivyo, inatueleza kwamba watakatifu watalindwa na kutunzwa katika kimbilio. Hili kimbilio si jingine bali ni kanisa. Ni wapi mtu anapoweza kupata kimbilio hapa ulimwenguni? Baadhi ya watu wanasema kwamba wanaweza kuwa hai ikiwa watakimbia kwenda Israeli. Lakini huko Israeli watakabiliana na dhiku kuu zaidi. Unapaswa kutambua kwamba Mpinga Kristo mwenyewe ataweka makao makuu yake Israeli, basi mapigo yatakuwa ni mazito zaidi pale Israeli.

Ingawa hili Neno kuhusu dhiki linaweza lisionekana kuwa ni halisia hivi sasa, lakini unapaswa kulifahamu katika moyo wako na kisha ujiandae kwa ajili ya yatakayojiri hapo baadaye. Unapaswa kuliadini hili Neno kwa moyo wako wote, na ni lazima uihubiri injili hii kwa imani hii kwa watu wengine kana kwamba unaishi katika kipindi cha Dhiki Kuu. Unapaswa kuiandaa mioyo ya watu na kuiongoza kwenda katika kimbilio kwa kuwahubiria injili ya maji na Roho. Mungu ametuweka katika makanisa yake ili kwamba tuweze kuwahubiria watu mambo kama haya yatakayokuja na kisha kuwasaidia kuiandaa imani yao kwa ajili ya nyakati za mwisho.

Hii ndio sababu tunafanya hiki tunachokifanya—yaani, kuihubiri injili ya maji na Roho kwa nguvu zetu zote. Tunalihubiri Neno la Ufunuo nyakati hizi si kwa sababu ya kujisifu, bali kwa kuwa ni Neno ambalo ni la muhimu sana katika kipindi cha sasa kwa waadini na wasio waadini. Ni

kwa kuiandaa imani yetu sasa ndipo mioyo yetu inapoweza kutoyumbishwa wakati dhiki na mapigo yatakapotushukia.

Ni kweli, kwamba Mungu atatupatia ulinzi wake maalumu, lakini kwa kuwa tunaishi katika ulimwengu wa kutisha, na mgumu, basi ikiwa tutafahamu kile ambacho kitakuja katika nyakati za mwisho na kisha kuiandaa imani yetu ili kuishinda dhiki, basi tunaweza kuieneza injili zaidi na zaidi. Pia, kwa kuwa tutaweka tumaini letu lenye ujasiri katika Ufalme wa Mungu, basi ni kweli kwamba hatutafagiliwa mbali na ulimwengu wa sasa, wala hatutaiuza imani yetu, bali tutatenda zaidi matendo ya imani. Hii ndio sababu tunalihubiri Neno la Ufunuo na kuzifanya kazi nyingi za imani.

Pigo la Tarumbeta la Tatu

Tarumbeta la Tatu—Aya ya 10-11: *“Malaika wa tatu akapiga baragumu, nyota kubwa ikaanguka kutoka mbinguni, iliyokuwa ikiwaka kama taa, ikaanguka juu ya theluthi ya mito, na juu ya chemchemi za maji. Na jina lake ile nyota yaitwa Pakanga; theluthi ya maji ikawa pakanga, na wanadamu wengi wakafa kwa maji hayo, kwa kuwa yalitiwa uchungu.”*

Watakatifu wataishi hadi kulipitia hili pigo la tatu. Pigo katika tarumbeta la pili lililetwa juu ya bahari, lakini wakati huu tarumbeta la tatu litaleta pigo juu ya mito na chemichemi. Nyota kubwa ikaanguka kutoka mbinguni ina maanisha ni kimondo. Mito na chemichemi ambazo zitapigwa na hicho kimondo itageuka na kuwa michungu, maana itageuka na kuwa pakanga. Hapo zamani, watu walizoea kusaga pakanga na ule unga wake kwa madhumuni ya dawa, dawa ambayo ilikuwa ni chungu sana kupita maelezo. Biblia inatueleza kwamba kadri hii pakanga itakavyoenea katika maji ya ulimwenguni, basi

watu wengi sana watakufa baada ya kunywa maji hayo yenye pakanga.

Theluthi ya maji safi ulimwenguni yatageuka na kuwa pakanga, watu wengi watakufa kutokana na maji hayo, lakini Bwana atawalinda watu wake katika hili pigo. Huenda kitu ambacho kitasababisha vifo zaidi ni magonjwa yatokanayo na maji, pengine itakuwa ni kutokana na mabadiliko ya kemikali katika maji kutokana na kuangukiwa na kimondo. Kwa maneno mengine, watu hawatakufa ati kwa sababu tu maji yamekuwa ni machungu, bali ni kwa sababu ya kitu kingine zaidi. Tunafahamu na kuamini kwamba haya mambo yote ni halisi, na kwamba ni hakika kuwa yatakuja kutokea hapo baadaye.

Pigo la Tarumbeta la Nne

Tarumbeta la Nne—Aya ya 12: *“Malaika wa nne akapiga baragumu, theluthi ya jua ikapigwa, na theluthi ya mwezi, na theluthi ya nyota, ili kwamba ile theluthi itiwe giza, mchana usiangaze theluthi yake, wala usiku vivyo hivyo.”*

Usisahau kwamba watakatifu watakuwa bado wakiishi hapa duniani hadi katika hili pigo la nne.

Ikiwa theluthi ya mwanga wa mchana hauangazi, basi hii ina maanisha kwamba mchana utapungua kwa takribani masaa manne kati ya masaa saba hadi nane. Kwa kuwa mwezi pamoja na nyota zitapoteza theluthi ya nuru yake, basi ulimwengu wote utakuwa giza. Kwa maneno mengine, wakati ingalipaswa kuwa mchana angavu, badala yake kutakuwa na giza. Sinema inayoitwa *Unyakuo* inafuata nadharia ya kunyakuliwa kabla ya dhiki, lakini katika sinema hiyo unaweza kuuona ulimwengu mzima ukigeuka na kuwa giza wakati wa mchana, huku watu

wote wakipatwa na wasiwasi. Hebu fikiria wewe mwenyewe: inadhaniwa kuwa ni saa 5 kamili asubuhi, halafu fumba na kufumbua jua linatoweka na kunakuwa hakuna mwanga. Hata wewe pia utakumbwa na hofu kana kwamba umetembelewa na malaika wa mauti.

Tunafahamu kwamba tutapaswa kuishi na kukipitia kipindi chenye machafuko kama hicho, lakini usiogope. Mungu atatulinda na kutubariki zaidi na zaidi. Wakati huo, imani yako itakuwa na nguvu sana kiasi kwamba Mungu atajibu sara zako na kukusaidia mara utakapoomba kwake. Kwa kuwa Mungu ametuahidi wakati wote kuwa pamoja nasi hadi mwisho wa ulimwengu, basi ni hakika kwamba Mungu hatatuacha peke yetu katika nyakati za Dhiki Kuu. Pasipo shaka yoyote ile, Mungu atakuwa pamoja nasi wakati wote. Kwa hiyo, kwa kuwa Mungu atakuwa pamoja nasi wakati wote, basi tunapaswa kuamini kwamba atatulinda na kuturuhusu kuishi, na kwamba tunapaswa kuieneza imani hii kwa wengine na pia kuziandaa imani zao vilevile.

Mapigo Mengine Matatu Yatakayokuja

Aya ya 13 inasema, *“Kisha nikaona, nikasikia tai mmoja akiruka katikati ya mbingu, akisema kwa sauti kuu, Ole, ole, ole wao wakaao juu ya nchi! Kwa sababu ya sauti zisaliazo za baragumu za malaika watatu, walio tayari kupiga!”*

Kama vile malaika alivyosema ole kwa sauti kuu mara tatu, basi ni hakika kwamba kutakuwa na mapigo mengine matatu yatakayofuata hapa duniani. Kwa maneno mengine, kati ya mapigo ya matarumbeta saba, bado kuna mapigo mengine matatu yatakayofuata. Tunapaswa kutambua kwamba itakapofikia tarumbeta la saba basi unyakuo wetu utatokea.

Baada ya kuisha kwa mapigo sita, na wakati malaika wa saba atakapolipiga tarumbeta la saba, basi hapo watakatifu watafufuliwa na kunyakuliwa mara moja. Baada ya watakatifu wote kuinuliwa angani, basi hapo ndipo mapigo ya mabakuli saba yatakapomiminwa hapa duniani.

Tunapaswa kutambua kwamba dunia hii hivi punde itaingia katika mwanzo wa mapigo ya matarumbeta saba na yale ya mabakuli saba, ambao haya mapigo ya mabakuli saba yatamiminwa mara baada ya tarumbeta la saba kupigwa kwa mujibu wa mapenzi ya Mungu. Tunapawa kuyaamini hayo yote kwa mioyo yetu yote, na kisha kuilea imani yetu sasa ili kwamba imani yetu iweze kukua na kuweza kuyavumilia mapigo yote. Ikiwa watu wanaamini pasipo kuwa na ufahamu wa nyakati za mwisho, basi ni hakika kwamba wataogopa mara Dhiki itakapokuja, kiasi kwamba wataishia kuikana imani.

Kwa hiyo, ili tuweze kushinda katika nyakati za mwisho, basi imani yetu katika mambo haya ni lazima iambatane na ufahamu sahihi wa nyakati za mwisho. Leo hii, wakati mwisho unatukaribia, basi tunapaswa kutolidharau kanisa au kuangukia mbali na kanisa. Mioyo yetu yote ni lazima iungane katika kanisa, na bila kujalisha chochote kile tunapaswa kuendelea kuliadini Neno la Mungu linalohubiriwa kwetu kupitia kanisa, huku tukishikana na kuishi kwa imani.

Wakati mapigo haya yatakapokuja, baadhi ya watu ambao hawajaokoka toka katika familia yako, ukoo, au hata marafiki wanaweza kukugeukia. Hata katika nyakati za kawaida, tunapoulizwa kwamba ndugu zetu, kaka zetu, au wazazi wentu ni akina nani, tukumbuke kwamba Bwana wetu alitueleza kwamba wale wote wanaoyafuata mapenzi ya Baba hao ndio familia zetu, wazazi, na ndugu. Wakati ulimwengu wa dhiki utakapowadia, wale waliozaliwa tena upya watatambua kwa hakika kuwa ndugu, wanafamilia, na akina dada wa kweli ni

wepi. Kwa kuwa tunafahamu na kusaidiana kwa imani hii, na kwa kuwa Mungu amekwisha kukukomboa wewe na mimi toka katika mapigo haya, basi Mungu atatuchunga, na kutulinda toka katika mapigo, na atatutunza katika kanisa lake huku tukiwa kama watoto wake. Imani hii inapaswa kupandwa kikamlifu ndani yetu.

Wale ambao katika nyakati za mwisho watatuza kwa Mpinga Kristo wanaweza kwa hakika kuwa wale wanaotoka katika familia zetu za kimwili. Kwa hiyo, hata kama ni ndugu wa familia zetu, ukweli ni kuwa kama hawajazaliwa tena upya kwa maji na kwa Roho, basi tunapaswa kuwa na imani ya kuwaona ndugu hao kama ni wageni tu. Kwa maneno mengine, wanaweza kufanya mambo mabaya kwetu kuliko hata wageni. Haijalishi ikiwa watu hao ni ndugu wa familia zetu kimwili—ukweli ni kuwa kama hawajaokolewa, basi tunapaswa kuwatambua kwamba hao ni adui zetu. Ni lazima tuifungue mioyo yetu ili kusikia mara mara toka katika Neno la Mungu kuhusiana na jambo hili na kisha tuamini yale yanayoelezwa kuwa ni ukweli.

Kama vile Mungu alivyoigeuza Sodoma na Gomora kuwa ziwa la moto kwa kuwamiminia kibiriti na moto, ni hakikwa kwamba Mungu atayaleta mapigo kama hao katika nyakati za mwisho kwa wenye dhambi. Maangamizi ya Mungu ya Sodoma na Gomora ni ukweli uliothibitishwa na uchimbaji wa maeneo ya kale.

Katika siku hizi, sinema nyingi ambazo maelezo yake ni kuhusu kuangamizwa kwa mwanadamu kutokana na mgongano kati ya ya vimondo na dunia zimekwishatokea. Sinema kama hizo zimetengenezwa kwa kuzingatia Neno la Biblia linalozungumzia juu ya mapigo ya siku za mwisho ambayo yataishukia dunia hii. Uwezekano wa vimondo kuanguka duniani upo juu sana, kiasi kwamba mapigo haya

yanaweza kutokea katika ulimwengu huu wa sasa.

Mfano mzuri ni ushahidi wa elimu ya visukuku vya kale toka katika mabaki ya dinosauria, ambayo yanaonyesha kwamba ulimwengu ulipitia mabadiliko makubwa sana katika nyakati za kale. Mfumo wa maisha ulio tofauti unatuonyesha juu ya uwepo wao tofauti kupitia mabaki hayo ya visukuku. Baadhi ya wanasayansi wanapendekeza kwamba utofauti huu wa maisha ya kale, wakiwemo dinosauria, unaelezewa kutokana na mgongano mkubwa kati ya dunia na kimondo. Hivyo, pigo la vimondo linaloandikwa katika Ufunuo 8 linawezakana sana kutokea katika ulimwengu huu.

Muda si Mrefu Sana...

Tunapaswa kutambua kwamba mapigo ya jinsi hiyo yatakuja hapa duniani muda si mrefu sana. Baadhi ya wanasayansi wamekwisha jaribisha kufanya uzalishaji wa mwanadamu kwa kutumia seli za mwanadamu pasipo kujamiiana, hili ni jambo ambalo linaweza kuleta changamoto kubwa kwa Mungu. Kwa hiyo, mapigo haya yote yapo tayari kuletwa na Mungu katika kipindi hiki. Wanadamu wanapaswa kutomsahau Mungu ati kwa sababu tu ya kuzitegemea nguvu za kisayansi.

Hivi sasa, mwanadamu anajaribu kuyajibu mapigo yote juu ya ulimwengu kwa kutumia nguvu na ufahamu wa kisayansi. Lakini hakuna uvumbuzi wa kisayansi unaoweza kuzuia mapigo ya Mungu, kwa kuwa mapigo hayo ni ya kutisha kuliko machafuko yoyote yale yaliyowahi kutokea hapo kabla. Tunapoyaangalia mavumbuzi ya leo ya kisayansi yaliyofanywa na mwanadamu, tunaweza kuona kwamba mwanadamu anajaribu kuleta changamoto kwa mamlaka ya

Mungu, huku akitaka kuwa kama Mungu. Lakini haijalishi kwamba maendeleo ya kisayansi yatakuwa yamefikia kiwango gani, hakuna hata mmoja anayeweza kuyazuia mapigo yatakayoletwa na Mungu. Mapigo haya yote yameletwa si kwa sababu nyingine yeyote bali ni kwa sababu ya mwanadamu mwenyewe.

Njia pekee ya kuyakwepa mapigo yatakayoletwa na Mungu ni kuugundua ukweli wa wokovu kwa kupitia injili ya maji na Roho, na kisha kupata kimbilio katika mikono ya Bwana kwa kuiamini injili hiyo. Hebu uyakwepe mapigo haya kwa kutambua na kuamini kwamba njia pekee ya wewe kuyakwepa mapigo hayo ya kutisha ni imani yako katika injili ya maji na Roho.

Baraka zote na laana zimeshikiliwa katika mikono ya Mungu. Ikiwa Mungu anaamua kuihifadhi dunia hii, basi ni hakika kwamba dunia itaishi; lakini asipoamua, ni hakika kwamba dunia hii itaangamizwa. Kwa hiyo utakapokuwa ukiishi katika kipindi hicho, basi ikiwa unaamini na kulifuata Neno la Mungu huki ukimhofia Mungu, basi ni hakika kwamba Mungu atakuongoza kwenda katika injili ya maji na Roho ambayo itakulinda dhidi ya mapigo ya kutisha yatakayokuja.

Hata sasa, kuna watu wengi sana ulimwenguni kote wanaendelea kufa na kutetemeka kwa hofu kutokana na matetemeko ya ardhi, vimbunga, na magonjwa. Zaidi ya yote, vita haiishi kila mahali, huku mataifa yakisimama dhidi ya mataifa mengine, na huku tawala zikisimama dhidi ya tawala nyingine. Kwa hiyo, wakati Mpinga Kristo atakapotokea hivi karibuni na kisha kuyatatua matatizo ya machafuko kama hayo, basi watu wengi sana watamfuata. Hii itafuatiwa na kushuka kwa mapigo ya kutisha zaidi hapa duniani, na hatimaye ulimwengu huu utaangamizwa kikamilifu kwa mapigo haya yatakayoletwa na Mungu.

Mungu ataumba Mbingu na Nchi Mpya na kisha kuwapatia wale waliokombolewa toka katika dhambi. Dhumuni la uumbaji wa Mungu wa Mbingu na Nchi Mpya ni ili kuwapatia wale waliozaliwa tena upya kwa kuamini katika injili ya maji na Roho. Muda si mrefu, Mungu atauangamiza ulimwengu wa kwanza na kisha kuufungua ulimwengu wa pili. Kama vile ulimwengu wa kale wa dinosauria ulivyotoweka, basi vivyo hivyo ulimwengu huu wa sasa wenye ustaarabu wa kisayansi ndivyo utakavyotoweka, nasi tutashuhudia kwa macho yetu kuhusu mwanzo wa ulimwengu mpya ambao Mungu atauleta.

Hivyo ni lazima tufikirie jinsi tutakavyoishi sasa. Ni lazima tuamini juu ya mapigo yote yatakayokuja kama yalivyoandikwa katika kifungu cha leo cha maandiko, na kisha tuishi maisha yetu yaliyosalia kwa ajili ya haki ya Mungu, hali tukijiandaa kwa ajili ya ulimwengu ujao kwa imani. Ni lazima tuwe na ufahamu kuhusu Neno la unabii la Ufunuo. Ninasema hivi kwa sasa kwa kuwa siku itakapowadia, ufahamu wote ambao umeupata utakuwa ni wa faida kubwa kwa imani yako.

Vitu vyote katika anga ambavyo vinaweza kugongana na dunia, yaani kuanzia vimondo-sayari ambavyo vimetawanyika kati ya sayari ya Zuhura na ile ya Jupita hadi vimondo vingi ambavyo hata mzunguko wake haufahamiki vinaitwa kwa umoja wao “Vitu Vilivyo Karibu na Dunia (VIVIKADU).” Wakati fulani taasisi ya uchunguzi wa anga za mbali inayoitwa NASA iliwahi kuorodhesha VIVIKADU 893 vikiwemo katika mfumo wa anga peke yake. Ikiwa kimojawapo kati ya hivyo VIVIKADU kingeliigonga dunia, basi madhara ambayo yangeletwa kwa tukio hilo ni makubwa sana kuliko mtu anavyoweza kufikiri. Madhara yake yanaweza kuwa makubwa sana kuliko yale ya mabomu elfu moja ya nyuklia kwa pamoja.

Hebu fikiria ni kitu gani kingelitokea basi wakati huo. Ni

hakika kwamba misitu, maji, na meli zingeliharibiwa. Hivyo, wanadamu wote ni lazima waiamini injili ya maji na Roho na kisha waishi maisha yao huku wakijiandaa kwa ajili ya maisha ya milele.

Bwana ametueleza kwamba wakati mapigo ya kiasili yatakapo kuja hapa duniani, theluthi ya jua, mwezi, na nyote zote zitapoteza nuru yake. Lakini ni watu wachache sana wanaolifahamu hili, na watu wachache pia wanaoliamini hili. Kwa hiyo, ni idadi ndogo tu ya watu inayoamini katika injili ya maji na Roho na ndio hao wanaouhubiri ukweli wa injili hii.

Akili zetu ni lazima ziamke. Ni hakika kwamba mapigo yatakuja. Ni lazima tufahamu kwamba tunapaswa kuishi kwa imani gani katika maisha yetu yote yaliyosalia. Wewe na mimi ni lazima tutambue kwamba kipindi cha leo ni hatua chache sana hadi kuifikia Dhiki Kuu, hivyo ni lazima tuishi maisha yetu yaliyosalia katika imani, na pasipo kuwa na shaka katika mioyo yetu.

Ikiwa hatutaishi kwa kulihamini Neno la unabii kuhusu hii Dhiki, basi ni hakika kwamba mioyo yetu itakuwa mitupu, na madhumini yetu yatapotea, na hivyo tutagubikwa na mashaka ya maisha. Tujitahidi hali hii isitokee. Wakati huo huo, hatupaswi kuishi maisha yetu hali tukiliweka tumaini letu katika ulimwengu huu, kana kwamba hatutauacha ulimwengu huu. Wale walio na ufahamu wa kisayansi kwa kiwango kidogo wanafahamu wazi kwamba hakuna tumaini kwa ulimwengu huu. Ni hakika kwamba Mungu ataufanya ulimwengu huu kuwa kama uchafu.

Mungu ataufanya Ufalme mpya wa Yesu na kisha kuwaruhusu wenye haki kuishi ndani yake. Naye atawaruhusu wale wanaoamini katika injili ya maji na Roho kuishi pamoja naye milele.


Tunapaswa kuachilia mbali nia na mawazo yetu binafsi

mbele za Mungu, na kisha kwa unyenyekevu tulipokee na kuliadini Neno lake la unabii. Tunapaswa kuihubiri injili ya maji na Roho, ili tuweze tena kuonana na Bwana mara atakapokuja. Hebu tuishi kwa ajili ya kazi hii ya Mungu. Wakati Bwana atakaporudi hapa duniani, basi sisi tutapokea maisha mapya, miili yetu itabadilishwa na kuwa kama mwili wa Bwana, kisha tutaishi tena katika ulimwengu wake mpya, mambo haya yote yatatokea kama alivyotuambia.

Hatufahami siku halisi ambayo Bwana atarudi. Lakini kwa kuzianguka ishara za ulimwengu, basi tunafahamu wazi kwamba yale mapigo yote yaliyoandikwa katika Neno la Mungu yanatukaribia kwa karibu kabisa. Hivyo, sisi tunamwamini Mungu ambaye ametabiri mambo haya yote, na ambaye ametuonyesha njia ya wokovu. ☒

SURA YA

9



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Pigo Toka Shimo Lisilo na Mwisho

< Ufunuo 9:1-21 >

“Malaika wa tano akapiga baragumu, nikaona nyota iliyotoka mbinguni, imeanguka juu ya nchi; naye akapewa ufunguo wa shimo la kuzimu. Akalifungua shimo la kuzimu; moshi ukapanda kutoka mle shimoni kama moshi wa tanuru kubwa; jua na anga vikatiwa giza kwa sababu ya ule moshi wa shimoni. Nzige wakatoka katika ule moshi, wakaenda juu ya nchi, wapakewa nguvu kama nguvu waliyo nayo nge wa nchi. Wakaambiwa wasiyadhuru majani ya nchi, wala kitu cho chote kilicho kibichi, wala mti wowote, ila wale watu wasio na muhuri ya Mungu katika vipaji vya nyuso zao. Wapakewa amri kwamba wasiwaue, bali wateswe miezi mitano. Na maumivu yao yalikuwa kama kuumwa na nge, aumapo mwanadamu. Na siku zile wanadamu watatafuta mauti, wala hawataiona kamwe. Nao watatamani kufa, nayo mauti itawakimbia. Na maumbo ya hao nzige yalikuwa kama farasi waliowekwa tayari kwa vita, na juu ya vichwa vyao kama taji, mfano wa dhahabu, na nyuso zao zilikuwa kama nyuso za wanadamu. Nao walikuwa na nywele kama nywele za wanawake. Na meno yao yalikuwa kama meno ya simba. Nao walikuwa na dirii kifuani kama dirii za chuma. Na sauti ya mabawa yao ilikuwa kama sauti ya magari, ya farasi wengi waendao kasi vitani. Nao wana mikia kama ya nge, na miiba; na nguvu yao ya kuwadhuru wanadamu miezi mitano ilikuwa katika mikia yao. Na juu yao wanaye mfalme, naye ni

malaika wa kuzimu, jina lake kwa Kiebrania ni Abadoni, na kwa Kiyunani analo jina lake Apolioni. Ole wa kwanza umekwisha pita. Tazama, bado ziko ole mbili zinakuja baadaye. Malaika wa sita akapiga baragumu, nikasikia sauti moja iliyotoka katika zile pembe za madhabahu ya dhahabu iliyo mbele za Mungu, ikimwambia yule malaika wa sita aliyekuwa na baragumu, Wafungue hao malaika wanne waliofungwa kwenye mto mkubwa Frati. Wale malaika wanne wakafunguliwa, waliokuwa wamewekwa tayari kwa ile saa na siku na mwezi na mwaka, ili kwamba waue theluthi ya wanadamu. Na hesabu ya majeshi ya wapanda farasi ilikuwa elfu ishirini mara elfu kumi; nilisikia hesabu yao. Hiyo ndivyo nilivyowaona hao farasi katika maono yangu, nao waliokaa juu yao, wana dirii kifuani, kama za moto, na za samawi, na za kiberiti; na vichwa vya farasi hao ni kama vichwa vya simba, na katika vinywa vyao hutoa moto na moshi na kiberiti. Theluthi ya wanadamu wakauawa kwa mapigo matatu hayo, kwa moto huo na moshi huo na kiberiti hicho, yaliyotoka katika vinywa vyao. Kwa maana nguvu za hao farasi ni katika vinywa vyao, na katika mikia yao; maana mikia yao ni mfano wa nyoka, ina vichwa, nao wanadhuru kwa hivyo. Na wanadamu waliosalia, wasiouawa kwa mapigo hayo, hawakuzitubia zile kazi za mikono yao, hata wasiwasujudie mashetani, na sanamu za dhahabu na za fedha na za shaba na za mawe na za miti, zisizoweza kuona wala kusikia wala kuenenda. Wala hawakuutubia uuaji wao, wala uchawi wao, wala uasherati wao, wala wivi wao.”

Mafafanuzi

Aya ya 1: Malaika wa tano akapiga baragumu, nikaona nyota iliyotoka mbinguni, imeanguka juu ya nchi; naye akapewa ufunguo wa shimo la kuzimu.

Kile kitendo cha Mungu kumpatia malaika ufunguo wa shimo la kuzimu lisilo na mwisho maana yake ni kwamba aliamua kuleta pigo la kutisha kama kuzimu kwa mwanadamu.

Shimo lisilo na mwisho linafahamika kuwa ni kuzimu, maana yake ni sehemu ya kina kisicho na mwisho. Mungu atalifungua shimo hili la kuzimu ili kuleta mateso kwa Mpinga Kristo atakayekuwa akiishi duniani pamoja na wafuasi wake, na kwa wale wote wanaosimama kinyume dhidi ya wenye haki. Malaika wa tano alipewa ufunguo wa kulifungua shimo hili la kuzimu. Hili ni pigo la kutisha sana ambalo linatisha kama kuzimu inavyotisha.

Aya ya 2: Akalifungua shimo la kuzimu; moshi ukapanda kutoka mle shimoni kama moshi wa tanuru kubwa; jua na anga vikatiwa giza kwa sababu ya ule moshi wa shimoni.

Wakati Mungu aliporuhusu kufunguliwa kwa shimo lisilo na mwisho, ulimwengu mzima ulijazwa na vumbi kama majivu ya volkano, na hivyo kulileta pigo la giza. Pigo hili la giza limehifadhiwa kwa ajili ya wale wanaopenda giza. Mungu ni Mungu wa nuru anayetuangazia, akitupatia injili ya maji na Roho kwa kila mtu. Kwa wale wanaouamini ukweli huu, Mungu amewapatia neema ya wokovu na amewaruhusu kuishi katika nuru yake angavu. Lakini wale wasioupokea ukweli wanakabiliana na ghadhabu ya haki ya Mungu, kwa kuwa Mungu atawaletea pigo la giza na hukumu yake ya haki.

Kimsingi, wanadamu wanazaliwa wakiwa wenye dhambi, na wanapendelea giza kuliko nuru katika maisha yao. Hivyo

wanastahili kupokea pigo la giza toka kwa Mungu kwa kuikataa na kutoiamini injili ya maji na Roho iliyotolewa na Bwana.

Aya ya 3: Nzige wakatoka katika ule moshi, wakaenda juu ya nchi, wakapewa nguvu kama nguvu waliyo nayo nge wa nchi.

Mungu atawatuma nzige katika ulimwengu huu na kisha kuziadhibu dhambi za wale wanaoupinga ukweli wa Mungu katika mawazo yao ya kiasili. Pigo hili la nzige linaweza kuleta maumivu ya kutesa kama yale ya kuumwa na nge. Hivyo, wenye dhambi wote wa ulimwengu huu wanapaswa kuuamini upendo wa kweli wa Mungu. Na wale wasiouamini upendo huo wa Mungu, basi watapata uzoefu wa kuona jinsi maumivu ya ya kuukataa upendo wa Mungu ulivyo.

Mungu aliwatuma nzige hapa duniani na akawafanya watu kulipa mshahara wa dhambi zao kwa kusimama kinyume na Mungu wa kweli kwa mawazo yao ya kiasili. Gharama hii dhambi ni mateso toka katika pigo la nzige.

Aya ya 4: Wakaambiwa wasiyadhuru majani ya nchi, wala kitu cho chote kilicho kibichi, wala mti wowote, ila wale watu wasio na muhuri ya Mungu katika vipaji vya nyuso zao.

Wakati Mungu atakapolileta pigo la kutisha la nzige, hatasahau kuonyesha huruma yake kwa wale watakaokuwa wametiwa muhuri yake. Pia anawaamuru nzige wasiidhuru nchi na miti.

Aya ya 5: Wakapewa amri kwamba wasiwaue, bali wateswe miezi mitano. Na maumivu yao yalikuwa kama kuumwa na nge, aumapo mwanadamu.

Katika kitabu cha Wimbo Ulio Bora 8:6, Mungu

anazungumzia juu ya upendo wake na hasira yake, anasema, *“Kwa maana upendo una nguvu kama mauti, na wivu ni mkali kama ahera; mwako wake ni mwako wa moto, na miali yake ni miali ya Yahu.”* Vivyo hivyo, pigo hili linatueleza jinsi adhabu ya Mungu ilivyo kali kwa wale wanaoukataa upendo wa Mungu ulioonyeshwa kupitia injili ya maji na Roho. Pigo hili litawatesa watu kwa miezi mitano.

Aya ya 6: Na siku zile wanadamu watatafuta mauti, wala hawataiona kamwe. Nao watatamani kufa, nayo mauti itawakimbia.

Pigo la nzige litaleta mateso makubwa sana kiasi kwamba watu watatamani kufa kuliko kuishi kwa mateso hayo, lakini bado hawataweza kufa hata kama watakuwa wakitamani kufa. Pigo hili limekuja kwa sababu watu walimdharau Mungu. Wakidhani kuwa mwisho wa maisha ya kimwili ndio mwisho wa yote, wanamdharau Mungu, ambaye anatawala juu ya uzima na mauti. Lakini kwa kupitia pigo hili la nzige, Mungu anatuonyesha kuwa hata kifo hakiwezi kuja pasipo kibali cha Mungu.

Aya ya 7-12: Na maumbo ya hao nzige yalikuwa kama farasi waliowekwa tayari kwa vita, na juu ya vichwa vyao kama taji, mfano wa dhahabu, na nyuso zao zilikuwa kama nyuso za wanadamu. Nao walikuwa na nywele kama nywele za wanawake. Na meno yao yalikuwa kama meno ya simba. Nao walikuwa na dirii kifuani kama dirii za chuma. Na sauti ya mabawa yao ilikuwa kama sauti ya magari, ya farasi wengi waendao kasi vitani. Nao wana mikia kama ya nge, na miiba; na nguvu yao ya kuwadhuru wanadamu miezi mitano ilikuwa katika mikia yao. Na juu yao wanaye mfalme, naye ni malaika wa kuzimu, jina lake kwa Kiebrania ni Abadoni, na kwa

Kiyunani analo jina lake Apolioni. Ole wa kwanza umekwisha pita. Tazama, bado ziko ole mbili zinakuja baadaye.

Mikia ya nzige toka katika shimo lisilo na mwisho wana nguvu ya kuwadhuru watu kwa muda wa miezi mitano. Pamoja na kwamba mwonekano wa nzige hao ni kama wanawake, nzige hawa ni viumbe jasiri na katili sana. Hii inaonyesha dhambi kubwa ambayo wanaume wameifanya kwa kuwafuata wanawake kuliko kumfuata Mungu. Tasisahau kwamba Shetani anataka kutufanya tuanguke katika dhambi ya uasherati na kisha kutunyakulia mbali toka kwa Mungu, anafanya hivyo kwa kuleta dhambi ya tamaa ya mwili katika maisha yetu.

Aya ya 13-15: Malaika wa sita akapiga baragumu, nikasikia sauti moja iliyotoka katika zile pembe za madhabahu ya dhahabu iliyo mbele za Mungu, ikimwambia yule malaika wa sita aliyekuwa na baragumu, Wafungue hao malaika wanne waliofungwa kwenye mto mkubwa Frati. Wale malaika wanne wakafunguliwa, waliokuwa wamewekwa tayari kwa ile saa na siku na mwezi na mwaka, ili kwamba waue theluthi ya wanadamu.

Hukumu ya Mungu ya dhambi, ambayo ameingojea kwa muda mrefu kwa ajili ya mwanadamu itakuwa imeanza. Sasa ni pigo la vita ambalo litaua theluthi ya wanadamu katika Mto Frati.

Aya ya 16: Na hesabu ya majeshi ya wapanda farasi ilikuwa elfu ishirini mara elfu kumi; nilisikia hesabu yao.

Hapa, idadi ya jeshi la wapanda farasi imeelezwa. Vita hii inaonyesha juu ya vita ya kisasa inayotumia umeme. Pamoja na kuwa theluthi ya wanadamu itauawa katika vita hivi, bado wale watakaokuwa wamebaki wataendelea kuabudu miungu na kusimama kinyume na Mungu, na watakataa kuzitubia dhambi

zao. Hii inaonyesha jinsi ambavyo moyo wa kila mtu utakavyokuwa umefanywa mgumu kutokana na dhambi zake katika nyakati za mwisho.

Aya ya 17: Hiyo ndivyo nilivyowaona hao farasi katika maono yangu, nao waliokaa juu yao, wana dirii kifuani, kama za moto, na za samawi, na za kiberiti; na vichwa vya farasi hao ni kama vichwa vya simba, na katika vinywa vyao hutoa moto na moshi na kiberiti.

Alichokiona Mtume Yohana ilikuwa ni silaha ya maangamizi ya kutisha ya karne ya 21, kama vile vifaru, ndege za kivita, pamoja na silaha nyingine za kisasa.

Aya ya 18-19: Theluthi ya wanadamu wakauawa kwa mapigo matatu hayo, kwa moto huo na moshi huo na kiberiti hicho, yaliyotoka katika vinywa vyao. Kwa maana nguvu za hao farasi ni katika vinywa vyao, na katika mikia yao; maana mikia yao ni mfano wa nyoka, ina vichwa, nao wanadhuru kwa hivyo.

Vita kubwa inayotumia silaha za kisasa itakuja katika nyakati za mwisho. Na theluthi ya wanadamu watakufa kutokana na pigo la moto na moshi na kiberiti vitakavyotoka katika silaha hizo.

Aya ya 20: Na wanadamu waliosalia, wasiouawa kwa mapigo hayo, hawakuzitubia zile kazi za mikono yao, hata wasiwasujudie mashetani, na sanamu za dhahabu na za fedha na za shaba na za mawe na za miti, zisizoweza kuona wala kusikia wala kuenenda.

Pamoja na mapigo haya, wale waliosalia baada ya vita hiyo wataendelea kuabudu na kuziinamia sanamu zaidi, kwa kuwa watu hawa watakuwa wameandaliwa ili kuangamizwa.

Aya ya 21: Wala hawakuutubia uuaji wao, wala uchawi wao, wala uasherati wao, wala wivi wao.

Hii inatuonyesha kuwa nyakati za mwisho, mwanadamu hatazitubia dhambi zake mbele za Mungu. Hivyo, Mungu atawahukumu wenye dhambi, lakini atauruhusu ulimwengu mpya na ulio barikiwa kwa wenye haki. ☒

Uwe na Imani Imara Katika Nyakati za Mwisho

< Ufunuo 9:1-21 >

Kati ya mapigo ya matarumbeta saba, tumekwisha lipitia pigo pigo la tarumbeta la tano na la sita katika kifungu hicho hapo juu. Tarumbeta la tano litapigwa na kuleta pigo la nzige, na tarumbeta la sita linatangaza vita katika Mto Frati.

Kitu cha kwanza tunachopaswa kukichunguza ni ikiwa watakatifu watayapitia mapigo ya matarumbeta saba ua la. Hiki ni kitu cha kwanza ambacho tunapaswa kukisikia na kukifahamu na kisha kuamini.

Je, watakatifu watajikuta katikati ya mapigo ya matarumbeta saba? Ni hakika kwamba watakatifu watajikuta katikati ya mapigo haya. Theluthi ya misitu ya dunia itaunguzwa, theluthi ya bahari na mito itageuzwa na kuwa damu, na kisha jua, mwezi, na nyota zitapigwa na kuipoteza theluthi ya nuru yake. Pamoja na kuwa theluthi ya mazingira na vitu vya kiasili vitageuka na kuwa damu au kupoteza nuru yake, hii inaonyesha kuwa sehemu ya dunia bado itabakia.

Neno linatueleza kwamba, sisi watakatifu ambao tumeokolewa, tutajikuta katikati ya mapigo sita ya kwanza ambayo yataharibu theluthi ya ulimwengu. Hata hivyo, hatuyaogopi mapigo haya, kwa sababu Mungu amewaamuru nzige kuwadhuru “wale tu wasio na muhuri ya Mungu katika vipaji vya nyuso zao”, katika pigo lake la tano, Mungu atawalinda watakatifu walitiwa muhuri yake katikati ya mapigo haya ya matarumbeta saba.

Hata hivyo, hii inaonyesha kwamba watakatifu watayapitia mapigo haya yote. Wewe na mimi, tukiwa ni miongoni mwa wale waliokombolewa kwa kuamini katika injili ya maji na Roho, tutajikuta katikati ya pigo la kwanza, ambalo litaunguza theluthi ya ulimwengu wote kwa moto utakaotelemshwa na Mungu, pia tutajikuta katikati ya pigo la pili, ambalo litageuza theluthi ya bahari na mito kuwa damu kwa anguko la mlima uwakao, pia tutajikuta katikati ya pigo la tatu ambalo litageuza theluthi ya mito na chemichemi kuwa pakanga kwa anguko la nyota kubwa toka angani.

Watakatifu tutaendelea kuwa hai hadi wakati wa pigo la nne, ambalo litaleta giza na kuipiga theluthi ya jua, mwezi, na nyota; pia tutaendelea katikati ya mateso hadi kwenye pigo la tano, ambapo nzyme watawadhuru watu kwa nguvu kama za nge; pia tutajikuta tukiishi hadi wakati pigo la sita litakapoleta vita ya dunia katika Mto Frati, na kujikuta tukilipitia hili pigo lote. Hakuna mtu anayeweza kufanya lolote kuhusiana na mapigo haya, kwa sababu mapigo haya yanatokea kwa mujibu wa majaliwa ya Mungu. Kule kusema kwamba tutayapitia mapigo yote sita ya kutisha ni ukweli ulioandikwa katika Neno la Mungu.

Bwana wetu amekukomboa wewe toka katika dhambi zako zote. Bwana amezichukulia mbali dhambi zako zote kwa ubatizo wake, kwa damu yake Msalabani, na kwa kufufuka kwake toka kwa wafu. Tumepokeo upatanisho wetu wa dhambi kwa kuamini kile ambacho Yesu Kristo amekifanya kwa ajili yetu. Kwa wale waliopokea ondoleo la dhambi zao kwa kuamini katika injili ya maji na Roho, hata watakapokuwa wakiishi katikati ya mapigo sita ya kutisha, ulinzi maalumu wa Mungu utakuwa pamoja nao. Kwa maneno mengine, Neno la Mungu linatueleza kwamba neema maalumu ya Mungu itaturuhusu kuendelea kuishi. Tunapaswa kufahamu jinsi ilivyo

stahiki kwa Mungu kupokea shukrani zetu zote kwa kutupatia neema na ulinzi maalumu katikati ya mapigo, hasa kwetu sisi tuliookolewa.

Wakati malaika wa tano alipolipiga tarumbeta lake, Yohana aliona “nyota ikianguka toka mbinguni hadi duniani,” naye “akapewa funguo wa shimo la kuzimu.” Nyota inayotajwa hapa ina maanisha ni malaika; maana ya kiroho ya nyota za Mungu; ina maanisha kuwa nyota hizo zote ni watumishi wa Mungu na watakatifu wake. Wakati malaika huyu alipoanguka duniani aliupokea ufunguo ya shimo la kuzimu na kisha akalifungua kwa ufunguo huo, moshi ukatoka katika lile shimo kama moshi wa tanuru kubwa.

“Shimo la Kuzimu” ina maanisha ni shimo lisilo na mwisho. Pia linajulikana kama Lindi-kuu, ni shimo lenye kina kisicho na mwisho. Wakati malaika wa tano alipolipiga tarumbeta lake, na baada ya kuipokea ile funguo ya shimo hili la kuzimu, alilifungua shimo hili kwa kutumia ufunguo huo. Baada ya kulifungua shimo hilo moshi mkubwa ulitoka ndani yake kama moshi wa moto mkubwa. Moshi huu toka katika lindi-kuu ulilifunika jua na anga, na kuufanya ulimwengu kuwa giza.

Moshi haukuwa kitu pekee kilichotoka katika hilo shimo la kuzimu; pia nzige walitoka katika shimo hilo lilipokuwa limefunguliwa. Hawa “nzige” waliopanda hadi duniani walipewa nguvu kama ile ya nge walioko duniani, wakawauma watu kwa mikia yao. Biblia inawaeleza nzige hao kama waliokuwa na sura kama za binadamu, na maumbile yao yalikuwa ni kama ya farasi aliyeandaliwa kwa vita, na meno yao yalikuwa kama meno ya simba, na nywele zao zilikuwa kama nywele za wanawake.

Neno “nzige” lililotumika hapa linaonyesha lugha ya wingi, hii ndio maana Biblia inaonyesha kwamba

kinachozungumziwa hapa ni nzige wengi na wala si wachache au nzige mmoja, bali ni wingu kubwa la nzige, kama wale nzige ambao huwa wanavamia maeneo ya kitropiki kwa nyakati mbalimbali, huku wakila mimea yote wanapopitia na kutobakiza kitu isipokuwa mizizi yake. Nzige wa jinsi hiyo watatoka katika lile shimo la kuzimu lisilo na mwisho na kuwatesa wanadamu kwa miezi mitano.

Wale watakaopigwa na pigo la tano kati ya mapigo ya matarumbeta saba ni wale tu ambao watakuwa hawajazaliwa tena upya. Pigo hili la nzige litawaruka wale waliozaliwa tena upya. Bwana wetu hatalileta pigo la nzige juu yetu, hii ni kwa sababu anafahamu wazi kwamba ikiwa waliozaliwa tena upya wangeliumwa na hao nzige, basi wangeluweza kuitema injili ya wokovu huku wakishangaa, “ni kwanini niliokolewa?” Tunaweza kulihakikisha hili katika aya ya 4: *“Wakaambiwa wasiyadhuru majani ya nchi, wala kitu chochote kilicho kibichi, wala mti wowote, ila wale watu wasio na muhuri ya Mungu katika vipaji vya nyuso zao.”*

Tunafahamu kwamba watu 114,000 wa Israeli watatiwa muhuri na Mungu, lakini Biblia haiwataji Wamataifa. Je, hii ina maanisha kwamba tutateswa na hao nzige kama watakavyoteswa wenye dhambi? Hapana kabisa! Kama vile Waisraeli 144,000 watakavyotiwa muhuri, vivyo hivyo na sisi pia—yaani, mioyo ya wale waliopokea ondoleo la dhambi zao wametiwa muhuri mbele za Mungu na Roho Mtakatifu. Je, hauna Roho Mtakatifu katika moyo wako? Kwa sababu wale ambao mioyo yao inakaliwa na Roho Mtakatifu ni dhahiri kwamba wametiwa muhuri kama watoto wa Mungu, hivyo, sisi pamoja na Waisraeli 144,000 tutalikwepa pigo la nzige tukiwa watu wake.

Kwa kuwa pigo la nzige litawadhuru wale ambao hawajazaliwa tena upya, basi ni hakika kwamba watu

watatuchukia na pengine kututesa zaidi. Wakati wa kipindi cha miezi mitao ya pigo hili, ni wale tu ambao hawajazaliwa tena upya ndio watakao dungwa na nzige hawa, watateswa kwa maumivu makuu lakini hawataweza kufa. Sura za nzige hawa zinaonekana ni kama sura za wanadamu, na nywele zao ni kama nywele za wanawake, na meno yao yanatisha kama meno ya simba, na maumbo yao ni kama farasi walioandaliwa kwa vita, na wana mikia ya nge. Nzige hawa watamtisha kila mtu kwa vichwa vyao katika maeneo yote wanayopita, watawauma kwa meno yao, na watawadunga kwa mikia yao yenye sumu, na kwa sababu hiyo wataleta maumivu makubwa kwa wahanga.

Kitendo cha kudungwa mara moja kitaleta maumivu makubwa sana, pengine itakuwa ni sawasawa na kupigwa na umeme wenye kiwango kikubwa, na maumivu hayo yatadumu kwa miezi mitano. Hata hivyo, hata kama watakuwa wameteswa kiasi gani na hao nzige na kutamani kufa badala ya kuishi kwa mateso hayo, ukweli ni kwamba hawataweza kufa. Kwa kuwa pigo la kutokufa limejumuishwa katika pigo hili la nzige, basi kwa miezi hiyo mitano hakutakuwa na kifo chochote duniani. Pigo hili litautesa ulimwengu kwa miezi mitano.

Hatujawahi kuona mapigo kama hayo kwa macho yetu, lakini mapigo hayo yamepangwa na Mungu. Mungu anatueleza kwamba atayaleta mapigo haya hapa duniani, kwa watu wa ulimwengu huu—yaani, kwa wale wasiomwamini Mungu, na wasio fahamu upendo wake na wokovu, na wasio fahamu injili yake ya ukombozi. Mambo haya yote yamepangwa na Mungu. Kwa kuwa Mungu amepanga kufanya mambo haya yote, basi tunapaswa kuamini kwamba Mungu atayaleta mambo hayo yote.

Tunachoweza kukifanya sasa ni kumwamini Mungu, kwa kuwa hakuna mwanadamu anayeweza kubishania kile ambacho

Mungu amekipanga. Hata katika hali hii, ambapo watu watakuwa wakiteseka kwa nzige, Mungu hatawaruhusu nzige kutudunga na hivyo atatulinda dhidi ya pigo hili, kwa maana atawaamuru wasiwadunge wale wote walio na muhuri ya Mungu katika vipaji vya nyuso zao.

Kwa Nini Mungu Anayaleta Mapigo ya Matarumbeta Saba?

Dhumuni la Mungu la kuyaleta mapigo ya matarumbeta saba ni, kuwafanya wale waliozaliwa tena upya kupokea utukufu ndani ya mapigo hayo; na kwa wale ambao bado hawajazaliwa tena upya, ni kuwapatia nafasi nyingine ya kuzaliwa tena upya; na kwa kila mtu ambaye Mungu amemuumba katika ulimwengu huu, Mungu atalenga kuwaonyesha kwamba Bwana ndiye Mungu, na kwamba ndiye Muumba wa ulimwengu huu, Mwokozi na Hakimu wa wote.

Kwanza, Mungu anawafanya wenye haki kuusifu ukuu wa Bwana, neema yake na baraka na utukufu wake kwa kuleta mateso kwa wenye dhambi kupitia mapigo haya na kwa kuwaruhusu wenye haki kuyakwepa mapigo hayo.

Pili, Mungu anaruhusu mapigo yake kwa ajili ya mavuno yake ya mwisho. Mungu anayaleta mapigo ya matarumbeta saba ili kwa mara ya mwisho kuwaokoa wale ambao wameifahamu injili ya maji na Roho lakini hawakuiamini. Pia Mungu analenga kuwapatia wale wote aliowaumba, yaani Wamataifa na Waisraeli nafasi ya mwisho ili waweze kuokolewa na kumrudia Mungu wakati wa Dhiki.

Tatu, kwa kuwa hakuna kitu chochote kinachoweza kutokea hapa ulimwenguni pasipo Bwana, Yesu Kristo— aliyekuja hapa duniani katika mwili wa mwanadamu,

akazichukua dhambi za ulimwengu katika mwili wake kwa ubatizo wake, na akazisafishilia mbali dhambi hizo kwa kifo chake Msalabani—Bwana, kwa kupitia mapigo haya ya kutisha, atazionyesha nguvu zake kuu kwa wale wote ambao hawajaupokea upendo wake na upendo wa Baba yake, na wale ambao hawajaiamini injili ya wokovu. Kwa wale ambao hawajazaliwa tena upya, Bwana atawaletea mateso katika ulimwengu huu na atawaletea adhabu ya milele kuzimu.

Mungu anayaleta mapigo katika ulimwengu huu hali akiwa na madhumuni na mipango kama hiyo. Ni lazima tufahamu na kuamini kwa hakika kwamba mapigo haya yatakuja. Pamoja na kwamba tutaepushwa na pigo la nzige, ukweli ni kwamba tutayapitia mapigo haya yote. Sisi sote tutayapitia mapigo haya, pigo la moto ambalo litaunguza theluthi ya uoto wa asili na misitu ya ulimwengu, pigo la maji ambalo litabadili theluthi ya bahari kuwa damu na theluthi ya mito na chemichemi kuwa pakanga, pigo la giza ambalo litaleta giza kwenye jua, mwezi, na nyota, na pigo la vita ambalo litauangamiza ulimwengu—sisi sote tutakuwemo katikati ya mapigo haya. Lakini ni lazima tufahamu kwamba hata tutakapokuwa tukiwapitia mapigo hayo yote, tutakuwa tumejawa na furaha kuu.

Tutapoteza hamu yote ya kuishi kutokana na mapigo ya matarumbeta haya saba. Hebu tufikirie, kwa muda mfupi, kwamba volkano zinafumuka na kuwaka kila mahali, matetemeko ya ardhi yanaiharibu ardhi, milima inaungua kwa moto na kutoa moshi, na theluthi ya bahari, mito, na chemichemi imegeuka na kuwa damu na pakanga. Vumbi, moshi, na majivu yameifunika dunia; jua linachomoza saa 4 asubuhi na linazama saa 10 jioni; na mwezi na nyota zimepoteza nuru yake kiasi kwamba hatuwezi kuziona tena. Je, katika hali hiyo utafurahia kuishi maisha yako katika

ulimwengu wa jinsi hiyo? Kwa kweli hapana!

Hii ni maana watakatifu watamwangukia Mungu na kuyaweka matumaini yao katika Ufalme wake na nyakati zake. Tumaini letu lote, kwa asilimia 100 linapatikana kwa Mungu tu. Hata kama tungelipewa utajiri wote wa ulimwengu huu na kisha kuishi ndani yake kwa miaka elfu moja, ni hakika kwamba hatutakuwa na hamu ya kuishi katika ulimwengu huu tena, wala hatutaweza kufanya hivyo. Kwa kuwa mapigo haya yote yamepangwa na kuruhusiwa na Mungu, hakuna hata mmoja anayeweza kuyasimamisha. Kwa kuwa Mungu ameyapanga mapigo haya, basi ataruhusu yatokee.

Kwa nini mapigo yaliyopangwa na Mungu yameandikwa katika Biblia? Kwa nini Mungu alimwinua Yohana na kumpeleka Mbinguni, na akamfanya aweze kusikia na kuyaona mapigo yote ambayo yatatokea kwa milio ya matarumbeta, na kisha akamfanya aweze kuandika kile alichokisikia na kukiona? Mungu alifanya hivyo ili kuonyesha kile ambacho kitatokea hapa ulimwenguni, na ili kuwafanya watakatifu waliweke tumaini lao katika Ufalme wa Mungu, na kuwafanya waihubiri injili katika dunia hii, na kumfanya kila mtu aweze kumwamini Yesu Kristo.

Mungu amepanga na ameruhusu mambo haya yote ili kwamba kwa kupitia mapigo haya, watu waweze kufikiri na kutoteseka katika ziwa la moto na kibiriti huko kuzimu. Kwa maneno mengine, Mungu amewapatia kimbilio ili kuyakwepa mapigo. Kwa kuwa Mungu hapendi yeyote kati yetu kuishia kuzimu, basi anataka mioyo ya wenye dhambi kumrudia kwa kupitia mapigo. Ninaamini kwamba Neno liliandikwa na kuonyeshwa kwetu ili kwamba kila mtu aweze kuongozwa kuelekea Mbinguni.

Kwa maneno mengine, mapigo ambayo Mungu anayaleta kwetu, hayalengi kutufanya tuteseke. Mungu anayaleta mapigo

haya ulimwenguni na kwetu ili kwamba tusiliweke tumaini letu katika dunia hii bali katika Ufalme wa Mungu. Pia tunapaswa kutambua kwamba Mungu anaruhusu mambo haya yote ili kutufanya tuhubiri upendo wake wa wokovu kwa nafsi nyingi zilizopotea na ambazo zimefungwa kuangukia katika moto wa milele wa kuzimu, ili kwamba nafsi hizo ziweze pia kuliamini Neno la wokovu, na kisha kuokolewa, na kuikwepa Dhiki hii.

Miongoni mwa mambo mengine, baadhi ya samaki aina ya kambale wanajulikana sana kwa maumivu ambayo wanaweza kusababisha mara wanapokudunga. Usipokuwa mwangalifu katika kuwakamata samaki hawa, mikono yako inaweza kudungwa na mapezi yenye sumu, na baada ya hapo maumivu makubwa yatafuatia, kana kwamba umepigwa na shoti ya umeme. Maumivu haya si kitu ukilinganisha na maumivu ya kudungwa na nzige.

Sasa, hebu fikiria kuwa na maumivu hayo kwa miezi mitano. Kwa kweli yatakuwa ni maumivu makubwa sana, hata watu watatamani kufa kuliko kuishi katika mateso hayo, lakini hawataweza kufa. Watu hawataweza kujiua, maana Neno linatueleza kwamba, *“Nao watatamani kufa, nayo mauti itawakimbia.”* Lakini kwa kuwa tumefanyika kuwa wana wa Mungu kwa kuamini katika injili ya maji na Roho, na kwa kuwa sasa tunaye Roho Mtakatifu ndani yetu, Mungu atatulinda na pigo hili ili kwamba tusiteseke na maumivu yatakayoletwa na hawa nzige. Tunalindwa katikati ya pigo kama hili kwa sababu tumepokea ondoleo la dhambi kwa kuamini katika injili ya maji na Roho.

Hatupaswi kukiangalia Kitabu cha Ufunuo kwa hofu peke yake, bali kwa kupitia Neno la Ufunuo, tunapaswa kutambua jinsi ambavyo Mungu atatupatia ulinzi wake maalumu toka katika mapigo hayo, na jinsi ambavyo Mungu atatukuzwa kupitia sisi, na jinsi ambavyo Mungu atatuvika utukufu wake.

Kwa kuyafahamu mambo haya, ni hakika kwamba tutakuwa imara zaidi, tutaihubiri injili zaidi, na tutampatia Mungu utukufu zaidi wakati wa Dhiki utakapowadia. Hivyo, ni lazima tuishi katika kipindi hiki pasipo hofu katika mioyo yetu, wala pasipo kutamani maisha yetu hapa duniani. Mungu anatumfundisha mambo haya yote mapema, ili kwamba tuwe na ujasiri. Hivyo, tunapaswa kuwa na imani yenye ujasiri.

Mungu anayapanga mapigo saba katika makundi mawili, mapigo manne ya kwanza na ole tatu za mwisho, na anaweka wazi kwamba kundi hili la mwisho litakuwa ni kuogofya na kutisha zaidi kwa kiwango na madhara. Hivyo, ndio maana mara baada ya kuisha kwa pigo la tano, Mungu anatangaza kwamba, *“Ole wa kwanza umekwisha pita. Tazama, bado ziko ole mbili, zinakuja baadaye.”*

Ole wa pili ni pigo la tarumbeta la sita: *“ikimwambia yule malaika wa sita aliyekuwa na baragumu, Wafungue hao malaika wanne waliofungwa kwenye mto mkubwa Frati. Wale malaika wanne wakafunguliwa, waliokuwa wamewekwa tayari kwa ile saa na siku na mwezi na mwaka, ili kwamba waue theluthi ya wanadamu.”* Katika aya ya 16, inasema hivi, *“Na hesabu ya majeshi ya wapanda farasi ilikuwa elfu ishirini mara elfu kumi.”* Inaonyesha kwamba vita kubwa itatokea, na theluthi ya wanadamu wote watauawa na vita hii. Kwa maneno mengine, Mungu atalileta pigo la kutisha la vita katika dunia hii.

Aya ya 17-18 inasema, *“Hiyo ndivyo nilivyowaona hao farasi katika maono yangu, nao waliokaa juu yao, wana dirii kifuani, kama za moto, na za samawi, na za kiberiti; na vichwa vya farasi hao ni kama vichwa vya simba, na katika vinywa vyao hutoa moto na moshi na kiberiti. Theluthi ya wanadamu wakauawa kwa mapigo matatu hayo, kwa moto huo na moshi huo na kiberiti hicho, yaliyotoka katika vinywa vyao.”* Mungu

ataruhusu idadi kubwa ya watu kuuawa kwa jeshi kubwa la wapanda farasi. Hili ni pigo ambalo litakuja mara baada ya kupigwa kwa tarumbeta la sita.

Nini kitatokea mara baada ya kupigwa kwa tarumbeta la saba? Ufufuo na unyakuo vitatokea. Hadi kufikia tarumbeta la sita, mapigo yote yaliyotangulia yatakuja kama majanga ya asili au vita ambayo yataleta vifo kwa watu. Kwa kuwa haya yote yameandikwa na kujumuishwa katika mapigo ya matarumbeta saba katika Biblia, basi ndio maana ninaliamini Neno hili. Vipi kuhusu wewe? Je, unauamini ukweli huu?

Je, umepokea ondoleo la dhambi zako kwa kuamini katika injili ya maji na Roho? Pamoja na kuwa umejumuishwa katika mapigo haya, ili uweze kuyakwepa mateso ya pigo la milele na ili kwamba usiweze kuingia kuzimu, unapaswa kuiamini injili ya maji na Roho sasa, hii ni injili ambayo Mungu amekupatia ili kuzifanya dhambi zako kutoweka, ili kukuokoa toka katika Dhiki Kuu, na ili kukupatia Ufalme wa Mbinguni na Mbingu na Nchi Mpya. Unapaswa kuwa na imani inayoamini katika injili hii. Hakuna njia nyingine ya kwenda mbinguni za ya kuamini katika injili hii ya maji na Roho.

Yesu alimwambia Petro, “*Nami nitakupatia funguo za ufalme wa mbinguni.*” Funguo za Ufalme wa Mbinguni zinatolewa kwetu mara tunapomwamni Yesu Kristo kuwa ni Mwokozi wetu—na kwamba alikuja hapa duniani, akazichukua dhambi za mwanadamu na dhambi za ulimwengu katika mwili wake kwa ubatizo alioupokea toka kwa Yohana Mbatizaji katika Mto Yordani, na kwamba alizibeba dhambi hizo zote na kisha kufa Msalabani, na kwamba alifufuka tena toka kwa wafu. Tunaweza kuingia Mbinguni na kisha kulindwa dhidi ya mapigo haya pale tu tunapokuwa na imani hii—yaani imani inayoamini kwamba dhambi zetu zote zimetoweshewa mbali.

Unyakuo na mauaji ya kufia-dini yanayoelezwa katika


Ufunuo 13 vitafuata sambamba na kupigwa kwa tarumbeta la saba. Mpinga Kristo atakapoonekana hapo ndipo tutakapokabiliana na vifo vya haki, kuuawa na kuifia-dini kwa ajili ya injili.

Unapaswa kufahamu jinsi injili hii ilivyo ya thamani na kisha uiamini. Iamini injili hii ya maji na Roho. Hapo ndipo unapoweza kuzishinda nyakati za mwisho kwa ujasiri na kisha kuishi katika Ufalme wa Milenia na Mbingu na Nchi Mpya iliyoahidiwa na Bwana. Ili kuweza kumwabudu Bwana kama mmoja wa wale wazee 24 wanaosimama kumzunguka Yesu Kristo, ambaye ni Mungu, basi ni hakika kwamba hakuna njia nyingine zaidi ya kuishinda Dhiki kwa kuamini katika injili ya maji na Roho.

Ninatumaini na kuomba kwamba, mkiwa kama watakatifu mlizaliwa tena upya kwa kuamini katika injili hii kwa mioyo yenu yote, basi mtaweza kuzishinda nyakati za mwisho na kisha kuurithi Ufalme wa Mungu wa Milenia na Ufalme wake wa Mbinguni wa Milele. ☒

SURA YA

10



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Je, Unafahamu Wakati wa Kunyakuliwa ni Lini?

< Ufunuo 10:1-11 >

“Kisha nikaona malaika mwingine mwenye nguvu akishuka kutoka mbinguni, amevikwa wingu; na upinde wa mvua juu ya kichwa chake; na uso wake ulikuwa kama jua, na miguu yake kama nguzo za moto. Na katika mkono wake alikuwa na kitabu kidogo kimefunguliwa. Akaweka mguu wake wa kuume juu ya bahari, nao wa kushoto juu ya nchi. Naye akalia kwa sauti kuu, kama simba angurumavyo. Na alipolia, zile ngurumo saba zikatoa sauti zao. Hata ngurumo saba zilipotoa sauti zao, nalikuwa tayari kuandika. Nami nalisikia sauti kutoka mbinguni ikisema, Yatie muhuri maneno hayo yaliyonenwa na hizo ngurumo saba, usiyaandike. Na yule malaika niliyemwona, akisimama juu ya bahari na juu ya nchi, akainua mkono wake wa kuume kuelekea mbinguni, akaapa kwa yeye aliye hai hata milele na milele, yeye aliyeziumba mbingu na vitu vilivyomo, na nchi na vitu vilivyomo, na bahari na vitu vilivyomo, ya kwamba hapatakuwa na wakati baada ya haya; isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii. Na sauti ile niliyoisikia kutoka mbinguni ilinena nami tena ikisema, Enenda, ukakitwae kile kitabu kilichofunguliwa katika mkono wa yule malaika, aliyesimama juu ya bahari na juu ya nchi. Nikamwendea malaika yule nikamwambia kwamba anipe kile kitabu kidogo. Akaniambia, Kitwae, ukile, nacho

kitakutia uchungu tumboni mwako, bali katika kinywa chako kitakuwa kitamu kama asali. Nikakitwaa kile kitabu kidogo katika mkono wa malaika yule, nikakila; nacho kitabu kikawa kama asali kinywani mwangu, na nilipokwisha kukila tumbo langu likatiwa uchungu. Wakaniambia, Imekupasa kutoa unabii tena juu ya watu na taifa na lugha na wafalme wengi.”

Mafafanuzi

Msingi wa sura hii unapatikana katika aya ya 7: *“isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.”* Kwa maneno mengine, unyakuo utatokea wakati huu.

Aya ya 1: “Kisha nikaona malaika mwingine mwenye nguvu akishuka kutoka mbinguni, amevikwa wingu; na upinde wa mvua juu ya kichwa chake; na uso wake ulikuwa kama jua, na miguu yake kama nguzo za moto.”

Malaika mwenye nguvu anayeonekana katika sura ya 10 ni mtendaji wa Mungu anayeshuhudia kazi za Mungu zitakazokuja. Mwonekano wa malaika huyu unalenga kuonyesha jinsi nguvu za Mungu na ukuu wake ulivyo. Pia ni kuonyesha kuwa Mungu ataziharibu bahari za ulimwengu huu, na kwamba atawafufua na kuwanyakua watakatifu kwenda mbinguni.

Aya ya 2-3: “Na katika mkono wake alikuwa na kitabu kidogo kimefunguliwa. Akaweka mguu wake wa kuume juu ya bahari, nao wa kushoto juu ya nchi. Naye akalia kwa sauti kuu,

kama simba angurumavyo. Na alipolia, zile ngurumo saba zikatoa sauti zao.”

Mungu anafanya mambo yote kwa mujibu wa mipango yake. Siku ya mwisho itakapowadia, Mungu ataiharibu nchi na bahari. Kwa maneno mengine, Bwana wetu ataiharibu bahari ya kwanza na ardhi ya kwanza.

Kifungu hiki kinaonyesha mapenzi ya Mungu yasiyoshindwa katika kutimiza mambo yote ambayo ameyapanga, na pia kuonyesha ukamilifu wa kazi zake. Katika Biblia, namba saba inabeba maana ya ukamilifu. Mungu aliitumia namba hii wakati alipokamilisha kazi zake zote na akapumzika. Vivyo hivyo, kifungu hiki kinatueleza kuwa nyakati za mwisho, Mungu atawakomboa watu wengi toka katika maangamizi, bali kwa upande mwingine ni hakika Mungu atauharibu ulimwengu huu.

Aya ya 4: “Hata ngurumo saba zilipotoa sauti zao, nalikuwa tayari kuandika. Nami nalisikia sauti kutoka mbinguni ikisema, Yatie muhuri maneno hayo yaliyonenwa na hizo ngurumo saba, usiyaandike.”

Mungu alimwamuru Yohana kutoandika yale ambayo ngurumo saba zilitamka, ili kuficha unyakuo wa watakatifu miongoni mwa wale wasiookoka. Mungu anazificha baadhi ya kazi zake kwa muda kwa kuwa maadui wa Mungu wanawachukia na kuwatesa watakatifu.

Pia wakati wa Nuhu, wakati Mungu alipouangamiza ulimwengu kwa maji, Mungu alificha ujio wa gharika kwa watu wengine na badala yake alimwambia Nuhu tu. Hata sasa, Mungu anaihubiri injili ya maji na Roho katika ulimwengu mzima, na anawapatia Ufalme wa Mbinguni wale wanaoamini. Lakini nje ya wale walio na imani hii ya kweli, Mungu hajamfunulia yoyote yule juu ya unyakuo. Mungu ameumba

ulimwengu mpya katika Ufalme wake kwa ajili ya wenye haki na anatamani kuishi pamoja nao.

Aya ya 5-6: “Na yule malaika niliyemwona, akisimama juu ya bahari na juu ya nchi, akainua mkono wake wa kuume kuelekea mbinguni, akaapa kwa yeye aliye hai hata milele na milele, yeye aliyeziumba mbingu na vitu vilivyomo, na nchi na vitu vilivyomo, na bahari na vitu vilivyomo, ya kwamba hapatakuwa na wakati baada ya haya;”

Mambo haya yote yanaweza kuapizwa kwa jina la Mungu, kwa kuwa hata kiapo cha mwisho kimefanyika si kwa jina la anayeapiza, bali kwa jina la yeye aliye mkuu. Hivyo, Mungu ni msimamizi wa mwisho kwa watakatifu wote wa nyakati za mwisho na kwa wale wote waliokwisha kufanyika watakatifu.

Hapa, malaika mwenye nguvu anaapa kwa jina la Mwenyezi kuwa unyakuo utakuja kwa hakika. Kiapo hiki kinatueleza kuwa Mungu ataumba Mbingu Mpya na Nchi Mpya na kisha ataishi na watakatifu wake katika ulimwengu huo mpya. Pia kifungu hiki kinaonyesha kuwa Mungu hacheleweshi uumbaji wa ulimwengu mpya, na kwamba ataukamilisha uumbaji huo haraka kwa ajili ya watakatifu wake.

Aya ya 7: “isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.”

Aya hii inatueleza kuwa wakati tarumbeta la mwisho litakapolia katika dhiki ya mwisho, basi watakatifu wote watanyakuliwa. Kitu ambacho kitawashangaza watu wengi katika ulimwengu huu ni wakati ambapo unyakuo wa watakatifu utakapotokea.

Ufunuo 10:7 inatueleza kuwa, *“isipokuwa katika siku za*

sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.” Maneno haya, *“siri ya Mungu itakapotimizwa, kama alivyowahubiri watumishi wake hao manabii”* yana maanisha nini? Yana maanisha kuwa kama ambavyo injili ya maji na Roho ni injili ya kweli, na kwamba yeyote anayeamini katika injili hii anapokea upatanisho na Roho Mtakatifu katika moyo wake, basi ni hakika kuwa unyakuo wa watakatifu utatokea wakati tarumbeta la saba litakapolia.

Baada ya pigo la sita kati ya yale matarumbeta saba litakapokuwa limekwisha, watakatifu watauawa ili kuifia dini maana Mpinga Kristo, baada ya kuwa ameonekana duniani na kuanzisha utawala wake, atamtaka kila mtu kupokea alama ya yule mnyama, yaani Mpinga Kristo. Baadaye kidogo, yaani baada ya malaika wa saba kupiga tarumbeta lake, basi watakatifu wote waliouawa na walio hai na walioilinda imani yao watafufuliwa na kunyakuliwa. Baada ya hapo mapigo ya mabakuli saba, ambayo ni mapigo ya mwisho kwa mwanadamu yataanza. Wakati huu, watakatifu hawatakuwepo katika ulimwengu huu, bali watakuwa mbinguni pamoja na Bwana baada ya unyakuo. Wakatifu ni lazima wafahamu kuwa unyakuo wao utatokea baada ya mlio wa tarumbeta la malaika wa saba, ambalo ni tarumbeta la mwisho.

Pia, Mtume Paulo anathabiti katika 1 Wathesalonike 4 kwamba Bwana atashuka toka mbinguni pamoja na mlio wa sauti ya malaika mkuu. Wakristo wengi wanafikiri kuwa Bwana atakuja hapa duniani baada ya kutokea kwa unyakuo, hiyo si kweli. Unyakuo utakapotokea, Bwana wetu hatakuja hapa duniani, bali ataonekana mawinguni.

Kwa hiyo, Wakristo wanaofikiria hivyo kimakosa kuwa Bwana atakuja hapa duniani mara baada ya kutokea kwa

unyakuo wa watakatifu wa kweli wanapaswa kuachana na ufahamu wao usio sahihi, na wanapaswa kuufahamu ukweli na kuuamini kiusahihi kwa kukumbuka kwamba unyakuo wa watakatifu utatokea mara baada ya mlio wa tarumbeta la malaika wa saba.

“Hapo ndipo siri ya Mungu itakapotimizwa, kama alivyowahubiri watumishi wake hao manabii.” Unapaswa kutambua kwamba siri ya Mungu inayotajwa hapa inahusu kunyakuliwa kwa watakatifu ambako kutakuja kukiambatana na mlio wa pigo la tarumbeta la saba. Sasa, kwa kifupi, Mungu atauharibu ulimwengu wa kwanza na kisha atatengeneza ulimwengu wa pili. Ulimwengu huu wa pili ni maalumu kwa ajili ya Mungu kuishi pamoja na wale ambao wamezaliwa tena upya katika ulimwengu huu kwa kuamini katika injili ya maji na Roho, na pia katika kutimiza kwa uaminifu ahadi zote ambazo Mungu mwenyezi alizifanya kwa watu wake. Haya ni mapenzi ya Mungu, ambayo Muumbaji wa ulimwengu mzima alikuwa ameyaweka kwa ajili yake na kwa ajili ya watakatifu.

Wakati malaika atakapolipiga tarumbeta la saba, mapigo ya tarumbeta la saba yatakuwa yamekwisha, na hapo ndio mapigo ya mwisho ya mabakuli saba yatamiminwa. Neno linatueleza kuwa, *“katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.”* Siri ya Mungu inayotajwa hapa ni kwamba watakatifu watanyakuliwa sambamba na mlio wa tarumbeta la malaika wa saba.

Kwa sasa watakatifu wanaishi katika ulimwengu huu, lakini ili waweze kuishi katika ulimwengu mpya na bora zaidi watapaswa kuuawa na kuifia-dini, kisha kufufuliwa na kunyakuliwa. Ni hapo tu ndipo watakapoalikwa katika karamu ya Mwana-kondoo pamoja na Bwana na kisha kutawala

pamoja naye kwa miaka elfu moja. Baada ya milenia hii, Mpinga Kristo, Shetani, na wafuasi wake wote watapokea hukumu ya Mungu ya milele. Kuanzia hapo na kuendelea, watakatifu watakatifu watabarikiwa kwa kuishi pamoja na bwana katika Mbingu mpya kwa baraka ya milele. Hii ni siri ya Mungu. Tunachoweza kwa sasa ni kumshukuru Mungu kwa kutufunulia siri hii sisi ambao tuna ile imani ya kweli. Mungu anatueleza kuwa atazitimiza ahadi zote mara malaika wa saba atakapolipiga tarumbeta lake.

Aya ya 8: “Na sauti ile niliyoisikia kutoka mbinguni ilinena nami tena ikisema, Enenda, ukakitwae kile kitabu kilichofunguliwa katika mkono wa yule malaika, aliyesimama juu ya bahari na juu ya nchi.”

Mungu anatueleza kuwa watakatifu na watumishi wa Mungu ni lazima waendeleo kuihubiri injili ya maji na Roho hadi siku ya mwisho itakapokuja. Injili hii inahusu ukweli wa ondoleo la dhambi, kufia-dini, ufufuo, kunyakuliwa, na chakula cha harusi ya Mwana-kondoo. Ili watakatifu na watumishi wa Mungu waweze kuihubiri injili hadi mwisho, wanapaswa kwanza kujilisha Neno la Mungu kwa imani yao kabla ya ujio wa Dhiki Kuu. Mungu anataka aina mbili ya imani toka kwetu. Kwanza ni imani inayohusu kuzaliwa tena upya, na pili ni imani ya kupokea kuifia-dini katika kuilinda imani yetu ya kweli.

Aya ya 9: “Nikamwendea malaika yule nikamwambia kwamba anipe kile kitabu kidogo. Akaniambia, Kitwae, ukile, nacho kitakutia uchungu tumboni mwako, bali katika kinywa chako kitakuwa kitamu kama asali.”

Watakatifu na watumishi wa Mungu ni lazima kwanza wajilishe Neno la Mungu na kisha kulieneza kwa watu

wengine wengi. Aya hii inatueleza kuwa pamoja na kuwa mioyo ya wale wanaoliamini Neno la Mungu inapata utamu, ukweli ni kuwa kuihubiri injili hii kwa nafsi zilizopotea si jambo rahisi hivyo, kwa kuwa kunaambatana na kujitoa sadaka. Hiki ndio anachotueleza Mungu katika kifungu hiki.

Aya ya 10: “Nikakitwaa kile kitabu kidogo katika mkono wa malaika yule, nikakila; nacho kitabu kikawa kama asali kinywani mwangu, na nilipokwisha kukila tumbo langu likatiwa uchungu.”

Wakati Yohana alipolila Neno la Mungu kwa imani, moyo wake ulijawa na furaha. Lakini Yohana alikutana na magumu mengi alipokuwa akiuhubiri ukweli unaoshuhudiwa na Neno la Mungu kwa watu wasiouamini ukweli huo.

Aya ya 11: “Wakaniambia, Imekupasa kutoa unabii tena juu ya watu na taifa na lugha na wafalme wengi.”

Watakatifu ni lazima watoe unabii kwa kila mtu kwamba baraka za Mungu zilikuja kwa kupitia injili ya maji na Roho. Pia wanapaswa kutoa unabii tena kwamba dhumuni la Bwana wetu kwa ulimwengu huu katika nyakati za mwisho ni kuhakikisha kuwa kila mtu anaingia katika baraka ya Mungu kwa kuamini katika injili ya maji na Roho. Kile ambacho Mungu alimwamuru Yohana kukitolea unabii ni kulihubiri Neno la kweli—kwamba ulimwengu mpya unakuja hivi punde, unaletwa na Mungu, na kwamba yeyote anayetaka kuingia katika ulimwengu huo ni lazima ahesabiwe haki kwa kuamini katika injili ya maji na Roho. Watakatifu na watumishi wa Mungu ni lazima walihubiri Neno la Mungu tangu mwanzo hadi mwisho tena na tena, ili kwamba kila mtu katika ulimwengu huu aweze kuwa na imani ambayo itamruhusu kuingia na kuishi katika Ufalme wa Bwana wetu. ☒

Je, Unafahamu Kunyakuliwa Kwa Watakatifu Kutatokea Lini?

< Ufunuo 10:1-11 >

Hebu sasa tuangalie juu ya ni lini unyakuo utatokea. Kuna vifungu vingi katika Biblia vinavyozungumzia kuhusu unyakuo. Agano Jipya lina vifungu vingi vinavyozungumzia mada hiyo, vivyo hivyo Agano lake Kale, kwa mfano ni wapi tunapoweza kuona hivyo, Eliya alichukuliwa mbinguni katika gari la farasi la moto, na Enoki aliyetembea na Mungu naye pia alichukuliwa na Mungu. Kama inavyoweza kuonekana, Biblia inazungumzia juu ya kunyakuliwa katika sehemu nyingi. Unyakuo maana yake ni 'kuinuliwa juu.' Inahusiana na tendo la Mungu la kuwainua watu wake kwenda Mbinguni kwa nguvu zake.

Hata hivyo, swali ambalo lina fumbo sana katika Biblia ni swali kuhusu unyakuo. Ni lini Mungu atawanyakua watu wake? Swali hili kuhusu wakati wa unyakuo limekuwa ni swali ambalo linaulizwa sana ndani ya Ukristo.

Hebu tugeukie 1 Wathesalonike 4:14-17 kisha tuone kile ambacho Mungu alituambia kwa kupitia Mtume Paulo: *"Maana, ikiwa twaamini ya kwamba Yesu alikufa akafufuka, vivyo hivyo na hao waliolala katika Yesu, Mungu atawaleta pamoja naye. Kwa kuwa twawaambieni haya kwa neno la Bwana, kwamba sisi tulio hai, tutakaosalia hata wakati wa kuja kwake Bwana, hakika hatutawatangulia wao waliokwisha*

kulala mauti. Kwa sababu Bwana mwenyewe atashuka kutoka mbinguni pamoja na mwaliko, na sauti ya malaika mkuu, na parapanda ya Mungu; nao waliokufa katika Kristo watafufuliwa kwanza. Kisha sisi tulio hai, tuliosalia, tutanyakuliwa pamoja nao katika mawingu, ili tumlaki Bwana hewani; na hivyo tutakuwa pamoja na Bwana milele.”

Katika Yakobo 1:14, Mungu anathueleza kwamba, “Na Henoko, mtu wa saba baada ya Adamu, alitoa maneno ya unabii juu ya hao, akisema, angalia, Bwana alikuja na watakatifu wake, maelfu maelfu.” Kwa maneno mengine, watakatifu watainuliwa na Mungu wetu kwenda angani kwa mlio wa tarumbeta la malaika mkuu, watakuwepo pale angani kwa kitambo kidogo, kisha watashuka hapa duniani pamoja na Bwana wetu. Haya ndio maelezo sahihi ya kibiblia kuhusu unyakuo.

Sababu iliyotufanya tukiangalie kifungu hicho hapo juu mapema ni kwa sababu Ufunuo sura ya 10 inathueleza kuhusu lini unyakuo utakuja. Kama ilivyotajwa hapo kabla, kifungu cha msingi cha sura hii kinapatikana katika aya ile ya 7, “isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.” Aya hii ni ufunguo wa kujibu maswali yote na hoja kuhusu unyakuo, kwa kuwa aya hii inathueleza ni lini unyakuo utatokea.

Mungu anamtuma malaika mkuu kwenda kwa Yohana katika maono, na anamwonyesha kile ambacho atakifanya kwa kupitia malaika huyu kwa kumfanya atende kana kwamba Bwana amekuja hapa duniani. Huyu, malaika hali akiuinua mkono wake kuelekea mbinguni, “akaapa kwa yeye aliye hai hata milele na milele, yeye aliyeziumba mbingu na vitu vilivyomo, na nchi na vitu vilivyomo, na bahari na vitu vilivyomo,

ya kwamba hapatakuwa na wakati baada ya haya” Kule kusema kwamba hakutakuwa na wakati baada ya haya maana yake ni kwamba hakuna sababu yoyote ya kuchelewa tena. Hii ina maanisha kwamba “hakuna wakati.” Na huku kusema kwamba hakuna wakati, maana yake ni kwamba katika siku ya mlilo wa tarumbeta la malaika wa saba, siri ya Mungu itatimizwa kama Mungu alivyowahubiri watumishi wake manabii.

Kati ya mapigo ya matarumbeta saba, wakati tarumbeta la saba litakapopigwa, ulimwengu utaingia katika mapigo ya mabakuli saba. Sasa, tunapaswa kutambua kwamba wakati huo kutakuwa hakuna muda au wakati uliosalia kwa ajili ya ulimwengu huu. Kwa hiyo, Neno la Mungu katika aya ya 7, kwamba, katika siku za *“malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii,”* ina maanisha ni juu ya unyakuo. Paulo, pia alisema sehemu mbalimbali kwamba unyakuo utatokea kwa sauti ya malaika mkuu na kwa sauti ya tarumbeta la Mungu. Hiki ndicho ambacho Paulo alikuwa nacho akilini mwake, na huu ndio mwanzo wa nukuu zote za Biblia kuhusu unyakuo.

“isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.” Hili Neno linatueleza kwamba kunyakuliwa kwa watakatifu kutatokea wakati malaika wa sababu atakapolipiga tarumbeta lake, na kisha kuwainua angani. Wakati watumishi wa Mungu wanapoienenza injili ya maji na Roho kwa nafsi zilizopotea, basi hapo ndipo Roho Mtakatifu anaposhuka katika mioyo ya waamini walioipokea injili ya kweli, na hapo ndipo wanapofanyika kuwa watoto halisi wa Mungu. Hapo ndipo unyakuo, ambao ni siri ya Mungu, utakapogeuka na kuwa uhalisia, huku ukiwainua watakatifu

kwenda angani.

Baada ya unyakuo huu, Mungu ataungamiza ulimwengu kikamilifu kwa kuumiminia mapigo ya mwisho ya mabakuli saba, kisha atauleta Ufalme wa Mungu hapa duniani ambapo tutatawala pamoja na Kristo kwa miaka elfu moja, na kisha atatuhamishia kwenda katika Mbingu na Nchi Mpya ambako tutaishi milele.

Baada ya Mungu kumweleza Yohana juu ya unyakuo unaokuja, Mungu alimwamuru Yohana kukila kitabu kidogo na kisha kutoa unabii tena. Somo la msingi sana ambalo watumishi wa Mungu wanapaswa kuwafundisha watakatifu wanaoishi katika siku hizi za mwisho ni kuhusu tukio la unyakuo na wakati maalum ambapo tukio hili litatokea. Wanapaswa kulifundisha somo hili kwa namna ya kibiblia. Pia ni lazima waihubiri injili ya maji na Roho kwa usahihi. Haya ndio mambo ambayo watumishi wa Mungu na watakatifu wake, wanaoishi kuelekea nyakati za mwisho wanapaswa kuyafanya. Hivyo, Mungu amewapatia watakatifu kazi hizi, huku pia akiwafunulia siri yake. Mungu anatumiea kwamba hatakwia, bali atazitekeleza kazi zake pasipo shaka. Wakati utakapowadia, Mungu atavitimiza vitu vyote kuwa katika uhalisia.

Katika sura ya 11, kunaonekana mizeituni miwili, ambao ni manabii wawili. Watumishi hawa wawili wa Mungu, wanaotajwa kama mizeituni miwili, watauawa na Mpinga Kristo katika mapambano yao dhidi yake, lakini watafufuliwa toka kwa wafu tena na kisha kunyakuliwa kwa siku tatu na nusu. Kwa maneno mengine, Mungu anatumiea katika matukio mbalimbali kwamba unyakuo utatokea wakati watakatifu watakapouawa kama wafia-dini katika kipindi hicho cha Mpinga Kristo.

Tunachopaswa kukitambua mapema ni kwamba watakatifu wataishi na kuipitia Dhiki Kuu, watakuwepo hapa

duniani hadi pigo la sita kati ya yale mapigo saba ya matarumbeta litakapopita. Naye Mungu atawalinda watakatifu kutokana na mapigo haya ya matarumbeta saba—yaani, Mungu atawalinda hadi wakati wa pigo la sita, lakini hatimaye Mpinga Kristo atawaua wakati wa ukatili wake utakapofikia kimo cha juu wakati akijaribu kupambana na Mungu. Vifo ambavyo watakatifu watavipokea ndiko kuifia-dini. Kwa kuwa watakufa vifo vya haki ili kuilinda imani yao, basi ndio maana tunayaviita vifo hivi kuwa ni kuifia-dini. Hivyo ni lazima tuamini kwamba ufufuo utakuja baada ya mauaji ya kufia-dini, pia ni lazima tuihubiri injili hii kwa wengine.

Watu wengi wamechanganyikiwa sana kwamba ikiwa unyakuo utatokea kabla au baada ya Dhiki Kuu. Watu wengi katika zama za kale walifikiri kwamba Kristo atarudi baada ya Dhiki, na kwamba watakatifu watainuliwa na huu ujio wa Kristo mara ya pili. Lakini siku hizi, Wakristo wengi wanaamini kwamba unyakuo utakuja kabla ya Dhiki Kuu. Wanafikiri kwamba hawatakuwa na la kufanya kuhusiana na mapigo ya matarumbeta saba au yale ya mabakuli saba, na kwamba watainuliwa wakati wakiendelea na maisha yao ya kawaida. Lakini hatupaswi kudanganywa kwa mafundisho haya ya uongo. Watu hawa wanafanya makosa makubwa sana katika ufahamu wao juu ya kunyakuliwa; kadri nyakati za mwisho zinavyozidi kukaribia, utakatifu wao utalegea na imani yao itatoweka.

Ninapokueleza kwamba unyakuo utakuja katikati ya Dhiki Kuu, sielezei hivi ili kukufanya wewe uwe mtakatifu zaidi. Ninachotaka ni wewe uwe na ufahamu sahihi juu ya wakati wa kunyakuliwa ili uyakimbie mafundisho ya uongo ya kunyakuliwa kabla ya dhiki, hii ni kwa sababu katika aya ya 7 Mungu anatueleza kwa kina kwamba: *“katika siku za sauti ya malaika wa saba atakapokuwa tayari kupiga baragumu; hapo*

ndipo siri ya Mungu itakapotimizwa, kama alivyowahubiri watumishi wake hao manabii.” Wakati mapigo ya mabakuli saba yatakapomiminwa, tofauti na ilivyo kwa mapigo ya matarumbeta saba, mapigo ya mabakuli saba yatamiminwa moja baada ya jingine kwa kufuatana. Sisi watakatifu tunapaswa kulitambua hili.

Ufunuo 16:1-2 inatueleza kwamba, *“Nikasikia sauti kuu kutoka hekaluni, ikiwaambia wale malaika saba, Enendeni, mkavimimine vile vitasa saba vya ghadhabu ya Mungu juu ya nchi. Akaenda huyo wa kwanza, akakimimina kitasa chake juu ya nchi; pakawa na jipu baya, bovu, juu ya wale watu wenye chapa ya huyo mnyama, na wale wenye kuisujudia sanamu yake.”* Umininaji wa mabakuli yaliyosalia kwa mstari hali ikianzia na hili pigo lakwanza, ni kana kwamba mapigo haya yamo katika ndege isiyotumia mitambo bila rubani, yaani huku malaika saba wakiyamimina mabakuli yao moja baada ya jingine, huku kukiwa hakuna mlilo wa tarumbeta wala chochote kile. Kwa maneno mengine, kitendo cha kuyamimina mabakuli saba kwa mstari, kina maanisha kwamba Mungu atauangamiza ulimwengu huu kikamilifu. Kwa nini? Kwa kuwa kila kitu kitaisha kwa kumiminwa kwa mapigo ya mabakuli saba, ambayo kwa ujumla wake yamejumuishwa katika pigo la tarumbeta la saba.

Wakati mapigo ya matarumbeta saba yatakapoletwa, kutakuwa na kiasi fulani cha kupumzika kati ya pigo na pigo, lakini wakati wa mapigo ya mabakuli saba hakutakuwa na mapumziko hayo. Kwa kuwa mapigo haya ya mabakuli saba yamehifadhiwa kwa ajili ya kipindi cha mwisho, basi baada ya mapigo ya matarumbeta saba kuletwa kwa mfuatano wake, na wakati tarumbeta la mwisho litakapopigwa, basi ulimwengu utageuka na kuwa katika hatua nyingine ambapo kila kitu kitafikia mwisho.

Hii ndio maana Ufunuo 11:15-18 inaeleza hivi: *“Malaika wa saba akapiga baragumu, pakawa na sauti kuu katika mbingu, zikisema, Ufalme wa dunia umekwisha kuwa ufalme wa Bwana wetu na wa Kristo wake, naye atamiliki hata milele na milele. Na wale wazee ishirini na wanne waketio mbele za Mungu katika viti vya enzi vyao wakaanguka kifulifuli, wakamsujudia Mungu wakisema, Tunakushukuru wewe, Bwana Mungu Mwenyezi, uliyeko na uliyekuwako, kwa sababu umeutwaa uweza wako ulio mkuu, na kumiliki. Na mataifa walikasirika, hasira yako nayo ikaja, na wakati ukaja wa kuhukumikiwa waliokufa, na wa kuwapa thawabu yao watumwa wako manabii na watakatifu, na hao walichao jina lako, wadogo kwa wakubwa, na wa kuwaharibu hao waiharibuo nchi.”*

Hapa inaelezwa kwamba wakati malaika wa saba alipolipiga tarumbeta lake, sauti kubwa ilisikika ikisema, *“Ufalme wa dunia umekwisha kuwa ufalme wa Bwana wetu na wa Kristo wake, naye atamiliki hata milele na milele!”* Lakini hapa hakutajwi juu ya mapigo. Kwa nini? Hii ni kwa sababu mara baada ya tarumbeta la saba, halikuata pigo la saba, bali kulifuata kunyakuliwa. Mungu atawafufua na kisha kuwainua watakatifu, yaani watakatifu wote watakaokuwa wakiishi hapa duniani na wale watakaokuwa wamekwisha lala, na baada ya kuisha kwa unyakuo, basi Mungu atayamimina mapigo ya mabakuli saba na kisha kuuangamiza ulimwengu kikamilifu.

Ikiwa tunataka kufahamu kwa usahihi kwamba ni wakati gani unyakuo utatokea, basi tunachotakiwa ni kuliangalia Neno la Mungu linalopatikana katika Ufunuo 10:7. Ni hakika kwamba siri ya Mungu itakamilika wakati huu, kama alivyowahuburi watumishi wake manabii.

Hapa, nakupatia tena kifungu kingine ili uweze kikufahamu vizuri na kuwa na imani sahihi. Hapa tena Biblia inasema, *“Angalieni, nawaambia ninyi siri; hatutalala sote, lakini sote*

tutabadilika, kwa dakika moja, kufumba na kufumbua, wakati wa parapanda ya mwisho; maana parapanda italia, na wafu watafufuliwa, wasiwe na uharibifu, nasi tutabadilika” (1 Wakorintho 15:51-52). Je, Biblia haisemi wazi kwamba ufufuo wa watakatifu utatokea wakati wa tarumbeta la mwisho? Tarumbeta litakapolia, wafu katika Kristo watafufuliwa bila uharibifu, nasi pia tutabadilishwa kwa haraka na kisha kunyakuliwa.

Malaika anayeonekana katika sura ya 10 ni malaika mkuu aliyetumwa na Mungu, yeye ni tofauti na wale malaika wengine walioyapiga matarumbeta sita ya mwanzo. Tunapomwangalia malaika huyu mkuu akifanya, anaonekana kuwa ni kama Mungu kiasi kuwa tunaweza kufanya koso la kudhani kuwa yeye ni Mungu: *“Amevikwa wingu; na upinde wa mvua juu ya kichwa chake; na uso wake ulikuwa kama jua, na miguu yake kama nguzo za moto. Na katika mkono wake alikuwa na kitabu kidogo kimefunguliwa. Akaweka mguu wake wa kuume juu ya bahari, nao wa kushoto juu ya nchi. Naye akalilia kwa sauti kuu, kama simba angurumavyo. Na alipolia, zile ngurumo saba zikatoa sauti zao.”*

Kwa maneno mengine, tunaweza kufanya kosa la kudhania kwamba huyu malaika ni Mungu, kwa kuwa malaika huyu mkuu anayetenda mambo yote ambayo Kristo atayafanya. Hii inatueleza kwamba Mungu atayafanya haya mambo haya yote kwa kupitia malaika huyu mkuu. Kifungu hiki kinatueleza kwamba, huyu malaika, hali akiwa ameweka mguu wake mmoja baharini na mwingine katika nchi, atawaangamiza wanadamu, na kwamba wakati ngurumo zitakapotokea malaika huyu atayatimiza yale yote ambayo Mungu ameyapanga katika Yesu Kristo tangu mwanzo wa uumbaji wa ulimwengu na wa mwanadamu.

Kati ya mapigo ya matarumbeta saba, sisi watakatifu

tutaishi na kuyapitia mapigo sita ya kwanza, na tutaendelea kuihubiri injili hadi wakati huo. Mungu alimweleza Yohana kukichukua na kukika kitabu kidogo na kisha kutabiri tena, lakini Neno hili limeelekezwa kwako wewe na kwangu—yaani tunapaswa kuendelea katika imani yetu na kuendelea kuishi hadi siku ya mwisho. Kama vile kunyakuliwa kwetu kutakavyokuja kutokea wakati tarumbeta la saba litakapolia, basi tunapaswa kuutambua ukweli huu wa kunyakuliwa kwetu, na kisha tuushikilie ukweli huo katika imani, na kisha kulisikia Neno na kuihubiri injili hadi siku hii ya kunyakuliwa itakapokuja.

Hadi kufikia tarumbeta la saba, Mpinga Kristo ataendelea kufanya kazi kwa nguvu katikati ya mapigo haya, watakatifu watauawa kama wafia-dini, kisha baada ya hapo watanyakuliwa. Kwa hiyo, hata katika wakati huu, wakati ambapo imani ya waamini wengi katika Yesu itakapokuwa imetikiwa hadi katika kina chake na kisha kupoteza uzima wake, hata katika hali wewe na mimi tunapaswa kuishi kwa imani. Kwa maneno mengine, tunapaswa kuamini kwamba unyakuo wetu utakuja mara baada ya mlio wa tarumbeta la saba, na kwa sababu hiyo tunapaswa kuishi kwa imani.

Muda si mrefu tutayaona mapigo ya matarumbeta saba kwa macho yetu wenyewe. Tutayaona kwa macho yetu na kuyahesabu mapigo haya, kuanzia la kwanza hadi la sita. Baada ya mapigo haya, na wakati ambapo watakatifu watakuwa wakihisi kwamba wakati wa kuifia-dini umewadia, basi ni hakika kwamba tutauawa na kuifia-dini muda huo huo. Hii si hadithi ya kuelezwa na wala si jambo la kubuni la kisayansi. Wala si kitu ambacho una uhuru wa kukiamini au la kutokana na uamuzi wako binafsi. Hiki ndicho kitakachotokea kwako na kwangu.

Ufunuo 10:7, aya inayoonyesha kwa wazi juu ya unyakuo katika Kitabu cha Ufunuo, inatueleza kwamba unyakuo wa

watakatifu utakuja kwa mlio wa tarumbeta la saba, nakwamba ulimwengu utaisha kwa mapigo ya mabakuli saba. Baada ya kuwainua watakatifu, Mungu ataleta ulimwengu wote kufikia mwisho wake. Wakati watakatifu wote watakaponyakuliwa, watamsifu Bwana angani. Lakini hapa duniani, mapigo ya mabakuli saba yatamiminwa, na yatauangamiza ulimwengu kikamilifu, na wakati mapigo ya mabaukuli saba yatakapoisha, watakatifu watashuka na katika ulimwengu utakaokuwa umefanywa upya na Bwana. Kisha Ufalme Milenia na Ufalme wa Kristo utajengwa katika dunia hii.

Wakristo wa leo siku hizi wanaunga mkono dhana ya kunyakuliwa kabla ya dhiki na siku hizi baadhi yao wamefikia hatua ya kutetea fundisho la amilenia—yaani kwamba hakuna Ufalme wa Mileni. Je, Ufalme wa Milenia si kitu halisi? Siku hizi kuna watu wengi sana wanaoamini hivyo. Baadhi yao, na wengine ambao wanahudumu katika makanisa makubwa hapa Korea, wamefikia hatua ya kutangaza kwamba kila kitu katika kitabu cha Ufunuo, kuanzia alama 666 hadi unyakuo, si vitu halisi bali ni lugha ya picha. Kama Bwana wetu alivyowahi kuuliza, “mwana wa Adamu atakapokuja ataikuta imani duniani?” ni hakika kwamba ni vigumu kuwapata waamini wa kweli katika nyakati hizi za mwisho.

Lakini Bwana anatueleza kwamba ni hakika kwamba unyakuo wetu utatokea. Tutakaponyakuliwa, tutakutana na Bwana angani na kisha kumsifu, tutalindwa na kufarijiwa naye, kisha tutarudi pamoja naye hapa duniani. Baada ya kushuka na kuja katika Ufalme wa Milenia, basi tutaishi maisha mapya katika miili yetu iliyofufuliwa na kubadilishwa, hali tukiwa katikati ya kila kitu kilichofanywa upya, yaani toka katika miili iliyobadilishwa hadi katika baraka zilizobadilishwa. Tutaishi katika utukufu wa jinsi hiyo hali tukiwa tumefunikwa na Mungu. Wewe na mimi tunapaswa kuishi kwa imani hii na

katika tumaini hili. Na wakati Ufalme wa Milenia utakapokuwa umefikia mwisho tutaingia katika Mbingu na Nchi Mpya, tutatawala pamoja na Kristo katika heshima na utukufu milele.

Tutakapoingia katika Ufalme wa Milenia na Mbinguna Nchi Mpya, malaika wote watakuwa watumishi wetu. Ulimwengu wote uliombwa na Mungu na Yesu Kristo, na viumbe vyote vya kiroho, na vitu vyote vilivyomo ndani yake ni mali ya nani? Vitu vyote hivyo vitakuwa ni mali yetu. Hii ndiyo sababu Biblia inasema kwamba wale watakaorithi kila kitu ni watakatifu. Kwa kuwa wewe na mimi tu watakatifu ambao tulizaliwa tena upya kwa injili ya maji na Roho, basi sisi ni warithi wa Mungu na warithi wenza pamoja na Kristo, ambaye vitu vyote vitakuwa mali yake. Kwa hiyo, wewe na mimi ni lazima tuyashinde magumu hapa duniani kwa imani, na kisha tuvumilie hali tukiitazamia siku ya urithi wetu. Pia tunapaswa kuwa na imani inayoshinda tukiwa kama vikosi makini vya Mungu.

Mungu ametueleza kwamba mambo haya yote yatatimizwa hivi punde pasipo kuchelewa. Kwa maneno mengine, mambo haya yatatimizwa hivi karibuni. Wengine wanaweza kushangaa ni kwa nini Mungu hakutueleza kuhusu hili kwa kina. Jibu la swali hili ni kwamba kitendo cha Mungu kuficha matendo ya Mungu ni sehemu ya hekima yake (Mithali 25:2, Luka 10:21).

Kama mpango wa Mungu ungeliandikwa kwa kina, basi maelezo haya yangelisababisha kuwepo kwa wasiwasi mkubwa ulimwenguni. Hivyo watakatifu wasingeliweza kuishi hadi siku ya mwisho. Karibu watakatifu wote watauawa na wasioamini, na hakuna hata mtakatifu mmoja atakayesalia. Ikiwa kila taarifa kuhusu nyakati za mwisho imeandikwa katika Biblia, basi wale ambao hawajazaliwa tena upya kwa maji na kwa Roo

watawachinja waamini wote waliozaliwa tena upya. Baada ya kuwa amelificha dhumuni lake, Mungu analifunua dhumuni hilo kwa wale wanaostahili, zaidi ya hapo ni kwamba Mungu anaziweka habari hizo kama fumbo kwa wengine—hii ni hekima ya Mungu. Mungu ameufunua mpango wake kwetu na ameturuhusu kuufahamu mpango huo, hii ni kwa sababu jambo hili ni la muhimu sana kwa watakatifu wa kipindi hiki.

Kule kusema kwamba makanisa ya Mungu yaliyozaliwa tena upya yanazizungumzia nyakati za mwisho kwa kina maana yake ni kwamba siku za mwisho zinatukaribia. Kwa kuwa kipindi cha Dhiki kinakaribia, basi Neno la Ufunuo linahubiriwa ili kwamba watakatifu wawe na ufahamu sahihi wa nyakati za mwisho na ili waweze kuivumilia na kuishinda hii Dhiki. Hata kwa wale waliozaliwa tena upya, ikiwa watakabaliana na Dhiki pasipo kuwa na ufahamu wowote, ukweli ni kwamba hawatafahamu cha kufanya na kwa sababu hiyo watajikuta katika mkanganyiko mkubwa hasa wakati ambapo Dhiki itakuja. Mkanganyiko huu utakuwa mkubwa zaidi kwa wale wanaozitegemea imani zao binafsi.

Tunaweza kudhania kwamba nafsi nyingi ambazo hazijajiandaa, na katikati ya ujinga wao na mkanganyiko, wataanza kwenda katika njia isiyo sahihi katika nyakati za mwisho. “Je, Mungu amekuambia kitu fulani?” “Mungu amekuonyesha maono wakati ulipokuwa unasali?” Watu wengi watapata wasiwasi kiasi cha kutafuta maono toka kwa Mungu, na katika nyakati za wisho, watu wengi sana watadai kwamba wameona maono. “Je, Mungu amekuambia kitu wakati ulipokuwa ukisali?” Basi, ikiwa watakatifu watabaki katika ujinga, basi maswali kama haya yatakuwa ni ya kawaida sana miongoni mwa watakatifu wa nyakati za mwisho.

Lakini Mungu hafanyi kazi kwa namna hiyo, hii ni kwa sababu amekwisha kutuamuru, *“Yeye aliye na sikio, na alisikie*

neni hili ambalo Roho ayaambia makanisa.” Kwa maneno mengine, watakatifu ni lazima wakisikie kile ambacho Roho Mtakatifu anakiongea kupitia makanisa. Kwa kuwa Roho Mtakatifu, analithibitisha Neno la Mungu, na anashuhudia kile ambacho ni cha kweli na sahihi, basi wakati mapigo yatakapokuja katika nyakati za mwisho, sisi watakatifu hatatushangaa kuziona dhiki, bali tutaishi kwa imani—hii ni kwa sababu wakati huo tutakuwa tumeshalisikia Neno la kweli na kulisimika katika mioyo yetu kwa imani.

Hii ndio sababu Yohana alitufunulia mapema kile ambacho kitatokea baadaye, na kwamba ni kwanini watumishi wa Mungu wanauhubi ukweli ndani ya mipaka ya Neno lililoandikwa. Kutoa unabii si kwingine bali ni kule kufahamu kile ambacho kitatokea toka katika Neno la Mungu lililoandikwa; lakini kitendo cha kudai kuona maono katika ndoto au katika maombi huko si kutoa unabii!

Usisahau kwamwe kwamba kwa hakika kunyakuliwa kwetu kutakuja, na kwamba sisi ni watakatifu wa Mungu. Pia usisahau kwamba sasa umefanyika kuwa mtakatifu, ambaye utakuwa pamoja na Kristo angani baada ya unyakuo wako kutokea, na ambaye utashuka katika ulimwengu uliofanywa upya na kisha kuishi kwa miaka elfu moja, na ambaye utaishi milele katika Mbingu na Nchi Mpya. Kama utawasikia watu wakizungumzia juu ya kunyakuliwa kabla ya dhiki au kunyakuliwa baada ya dhiki, au wakidai kwamba hakuna Ufalme wa Milenia kabisa, basi hebu uwaambie ukweli wa kurejea kifungu ambacho tumekuwa tukikitazama hapa. Pia unaweza kurejea 1 Wathesalonike 4 na 1 Wakorintho 15, kisha uwaambie bayana kwamba Bwana atashuka pamoja na sauti ya malaika mkuu na kwa sauti ya tarumbeta la mwisho, kisha atawainua watakatifu angani ili kuwa pamoja nao. Ni mpaka pale utakapouamini unyakuo huu ndipo unapoweza kuilinda

imani yako.

Ili kunyakuliwa, ni lazima kuwe na mauaji ya wafia-dini kwa imani na ufufuo wa miili. Kwa kuwa unyakuo utakuja sambamba na ufufuo, basi mara baada ya kufufuliwa, tutanyakuliwa na kuinuliwa angani. Hivyo, unyakuo na ufufuo vitu vinavyofuatana. Kushiriki katika ufufuo wa kwanza maana yake ni kuishi na Bwana katika Ufalme wa Milenia. Kunyakuliwa pia maana yake ni kuishi na Bwana kwa miaka elfu moja katika dunia hii.

Sasa, ni kwa nini tunyakuliwe? Ni kwa sababu Mungu ataangamiza kila kitukatika ulimwengu huu kwa kuyamimina mapigo ya mabakuli saba—yaani, Mungu atawanyakua watakatifu mapema ili kuwakomboa watoto wake toka katika mapigo haya ya kumaliza. Mungu atawanyakua watakatifu ili kuwatenga watakatifu na wenye dhambi, na ili kuonyesha hatma zao ambazo pia ni tofauti. Kwa hiyo, tunapaswa kuyaamini mambo haya yote—yaani kunyakuliwa kwetu, kufufuliwa kwetu, na kuuawa kwetu kama wafia-dini.

Kwa baadhi yao, injili ya maji na Roho imefunuliwa kwa kina, ilhali kwa wengine imebakia kuwa ni siri iliyofichwa. Vivyo hivyo, mauaji ya watakatifu ya kufia-dini, ufufuo, kunyakuliwa, na kutawala kwao katika Ufalme wa Milenia na katika Mbingu na Nchi Mpya, yote hayo ni siri za Mungu. Mungu amewawezesha watakatifu kuishi hadi nyakati za mwisho na kuyashinda magumu yao yote kwa tumaini lao katika kunyakuliwa na katika Ufalme wa Mungu, na kwa sababu hiyo Mungu amewafanya waziamini hizi siri zake.

Wewe na mimi tunapaswa kuwa na aina hii ya imani. Pasipo kuwa na aina hii ya imani—yaani kutoamini kwamba tutanyakuliwa, na kwamba tutaishi katika Mbingu na Nchi Mpya, na kwamba Bwana atatufufua toka kwa wafu baada ya kuwa tumechinjwa na Mpinga Kristo, na kutunyakua, na

kuturuhusu kukaa angani, na kisha baadaye kurudi hapa duniani ili kutawala pamoja naye kwa miaka elfu moja—basi pasipo kuamini hivi, ni wazi kwamba hatutaweza kuvumilia magumu na maisha ya dhiki ya kipindi hiki cha mwisho.

Watakatifu wana ndoto nzuri, na hakuna mwingine zaidi ya Bwana wetu anayeweza kuifanya ndoto hii kuwa halisia. Pasipo tumaini hili, tutaishi kwa huzuni na mateso katika ulimwengu huu wa kuhuzunisha.

Paulo alimwambia Timotheo kuvitunza vitu vizuri ambavyo alikuwa amekabidhiwa. Injili hii ni nzuri; vivyo hivyo vifo vyetu vya kufia-dini, ufufuo na unyakuo ni vizuri pia; pia kuishi katika Ufalme wa Milenia na katika Mbingu na Nchi Mpya. Vitu hivyo vyote ni vyema na vizuri. Vitu hivyo ni vya watakatifu, na vitu hivyo ni imani na tumaini linalotambulika, si hisia au mambo ya kudhania. Mambo haya ni tumaini letu katika imani iliyotolewa na Bwana. Tunapaswa kuishi katika kipindi hiki hali tukiitarajia siku ambapo Ufalme wa Mileni na Mbingu na Nchi Mpya zitaletwa kwetu.

Wale watakaonyakuliwa si wengine bali ni wewe na mimi. Tunapaswa kuishi kwa imani, hali tukiisubiri siku ambayo tutanyakuliwa ili kusimama mbele za Bwana na kisha kutawala katika Ufalme wa Milenia na Mbingu na Nchi Mpya.

Mungu anatueleza kwamba Yeye atakayekuja atakuja hivi punde. Mapigo ambayo yatakuja katika miaka mitatu na nusu katika ya ile miaka saba ya Dhiki Kuu yatakuwa ni madogo na yatakayodumu kwa muda mfupi. Ikiwa mapigo yangelielelea katika kipindi chote cha miaka saba ya Dhiki Kuu, ingewezekanaje basi kwa yeyote yule kuvumilia? Mapigo ya kwanza ni mafupi, na kadri muda unavyokaribia mwishoni, basi kutakuwa na mengi ya kuyaona. Wakati pigo la tarumbeta la saba litakapokuja, litafikia kiwango cha kustaajabisha.

Wakati Shetani atakapojaribu kuitikisha imani ya

watakatifu, atatoa mfano kwa kuwa baadhi ya viongozi wa makanisa. Pengine Shetani ataweza kusema hivi, “Nitauhifadhi uhai wenu ikiwa tu mtamkana Mungu!” Hata kama ulimwengu utageuka na kuwa mzuri, ukweli ni kwamba mtu atafikiria mara mbili juu ya hili ambalo Shetani amelisema. Ni nani basi aliye na akili timamu ambaye anaweza kumkana Bwana wakati anafahamu dhahiri kwamba Bwana atayamimina mapigo ya mabakuli saba, na kwamba atapaswa yeye kuyapitia mateso hayo yote yatakayoletwa na mapigo hayo? Watakatifu wanaofahamu juu ya mwisho wa ulimwengu hawawezi kamwe kumkana Bwana wala kuisaliti imani yao. Pia, kwa kuwa katika mioyo yetu kuna Roho Mtakatifu, basi huyu Roho Mtakatifu atatutia nguvu.

Kwa kuwa mipango yote ya Mungu itatimizwa kwa haraka katika nyakati za mwisho, ukweli ni kwamba hakutakuwa na nafasi ya kujificha. Baada ya mapigo ya muda mfupi kuisha, kutafuatiwa na ufufuo, na baada ya huu ufufuo kutafuatiwa na unyakuo, ambao utatunyakua kwenda angani. Hebu fikiria miili yetu ikibadilishwa kwenda katika miili ya kiroho, huku ikimsifu Bwana. Katika Ufalme wa Mungu, tunaweza kuufurahia ulimwengu mwingine tofauti, ulio mzuri, wa kuvutia, yaani ubora ambao hatujawahi kuuona katika dunia hii. Kwa kuwa miili ya kiroho ipo huru kutokana na ukomo wa muda na nafasi, basi tutaishi katika ulimwengu mzuri na wa ajabu ambapo tutaweza kwenda kokote kule tunapotaka.

Ninamtolea Mungu shukrani zangu za dhati kwa kutupatia baraka baraka hizi kubwa. Ninamshukuru Mungu kwa kutufunulia kwa kina juu ya Dhiki Kuu, juu ya mapigo yake, juu ya kuuawa kwetu na kuifia-dini, na juu ya ufufuo na unyakuo kwa kupitia Neno lake. Pia ninaomba ili kwamba mioyo yetu iweze kuishi wakati wote huku ikikifahamu kipindi hiki cha mwisho na kisha kuamini. ☒

SURA YA

11



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Mizeituni Miwili na Manabii Wawili ni Akina Nani?

<Ufunuo 11:1-19 >

“Nikapewa mwanzi kama fimbo; na mmoja akaniambia, Inuka, ukalipime hekalu la Mungu, na madhabahu, na hao wasujuduo humo. Na behewa iliyo nje ya hekalu uiache nje wala usiipime, kwa maana Mataifa wamepewa hiyo, nao wataukanyaga mji mtakatifu miezi arobaini na miwili. Nami nitawaruhusu mashahidi wangu wawili, nao watatoa unabii siku elfu na mia mbili na sitini, hali wamevikwa magunia. Hao ndio ile mizeituni miwili na vile vinara viwili visimamavyo mbele za Bwana wa nchi. Na mtu akitaka kuwadhuru, moto hutoka katika vinywa vyao na kuwala adui zao. Na mtu akitaka kuwadhuru, hivyo ndivyo impasavyo kuuawa. Hao wana amri ya kuzifunga mbingu, ili mvua isinyeshe katika siku za unabii wao. Nao wana amri juu ya maji kuyageuza kuwa damu, na kuipiga nchi kwa kila pigo, kila watakapo. Hata watakapoumaliza ushuhuda wao, yule mnyama atokaye katika kuzimu atafanya vita nao, naye atawashinda na kuwaua. Na mizoga yao itakuwa katika njia ya mji ule mkuu, uitwao kwa jinsi ya roho Sodoma, na Misri, tena ni hapo Bwana wao aliposulibiwa. Na watu wa hao jamaa na kabila na lugha na taifa waitazama mizoga yao siku tatu u nusu, wala hawaiachi mizoga yao kuwekwa kaburini. Nao wakaa juu ya nchi wafurahi juu yao na kushangilia. Nao

watapelekeana zawadi wao kwa wao, kwa kuwa manabii hao wawili waliwatesa wao wakaa juu ya nchi. Na baada ya siku hizo tatu u nusu, roho ya uhai itokayo kwa Mungu ikawaingia, wakasimama juu ya miguu yao; na hofu kuu ikawaangukia watu waliowatazama. Wakasikia sauti kuu kutoka mbinguni ikiwaambia, Pandeni hata huku. Wakapanda mbinguni katika wingu, adui zao wakiwatazama. Na katika saa ile palikuwa na tetemeko kuu la nchi, na sehemu ya kumi ya mji ikaanguka; wanadamu elfu saba wakauawa katika tetemeko lile. Na waliosalia wakaingiwa na hofu, wakamtukuza Mungu wa mbingu. Ole wa pili umekwisha pita, tazama ole wa tatu unakuja upesi. Malaika wa saba akapiga baragumu, pakawa na sauti kuu katika mbingu, zikisema, Ufalme wa dunia umekwisha kuwa ufalme wa Bwana wetu na wa Kristo wake, naye atamiliki hata milele na milele. Na wale wazee ishirini na wanne waketio mbele za Mungu katika viti vya enzi vyao wakaanguka kifulifuli, wakamsujudia Mungu, wakisema:

‘Tunakushukuru wewe, Bwana Mungu Mwenyezi,
Uliyeko na uliyekuwako,

Kwa sababu umeutwa uweza wako ulio mkuu na kumiliki.

Na mataifa walikasirika, hasira yako nayo ikaja,
Na wakati ukaja wa kuhukumiwa waliokufa,
Na wa kuwapa thawabu yao watumwa wako manabii na watakatifu,

Na hao walichao jina lako, wadogo kwa wakubwa,
Na kuwaharibu hao waiharibuo nchi.’

Kisha Hekalu la Mungu liliko mbinguni likafunguliwa, na sanduku la agano lake likaonekana ndani ya hekalu lake. Kukawa na umeme, na sauti, na radi, na tetemeko la nchi,

na mvua ya mawe nyingi sana.”

Neno la Ufunuo 11 ni la muhimu sana kwetu, ni muhimu kama lilivyo Neno lote la Mungu. Ili Mungu aweze kuuangamiza ulimwengu, basi kuna kazi moja ya muhimu sana ambayo anapaswa kuifanya mapema. Na hii ni kuwavuna watu wa Israeli kwa ajili ya nyakati za mwisho. Pia Mungu anayo kazi nyingine ya kuifanya kwa Waisraeli na Wamataifa, na kazi hii ni kuwafanya washiriki katika ufufuo wa kwanza na unyakuo kwa kuwaruhusu wauawe na kuwa wafia-dini.

Kama Biblia inavyotoa maelezo ya jumla kuhusu mambo haya, basi tunapaswa kutafuta na kufahamu jinsi wokovu wa Mungu wa ondoleo la dhambi ulivyotimizwa katika Agano Jipya. Maandiko yanatueleza kuhusu mada hizi kwa sababu kama hatutayaangalia maandiko haya kwa karibu, basi ni hakika kwamba tutajichanganya kuhusu watakatifu, watumishi wa Mungu, na watu wa Israeli wanaoonekana katika Kitabu cha Ufunuo.

Mafafanuzi

Aya ya 1: “Nikapewa mwanzi kama fimbo; na mmoja akaniambia, Inuka, ukalipime hekalu la Mungu, na madhabahu, na hao wasujuduo humo.”

Hii inatueleza kwamba kazi ya kuwaokoa Waisraeli toka katika dhambi kwa neema ya Mungu sasa imepangwa ili kuanza. Hili tendo la “Kupima” linalotajwa hapa lina maanisha kwamba Mungu ataingilia yeye binafsi ili kuwaokoa watu wa Israeli toka katika dhambi zao katika nyakati za mwisho.

Katika kifungu kikuu cha sura ya 11, tunapaswa kuuweka

mkazo wetu katika wokovu wa Waisraeli toka katika dhambi. Neno hili linatueleza kwamba injili ya maji na Roho itaenea kwa watu wa Israeli kuanzia wakati huo na kuendelea, na hiyo itamaanisha mwanzo wa kazi ya Mungu kuwabadili Waisraeli kuwa watu wa Mungu waliokombolewa atoka katika dhambi zao zote kwa kupitia neema ya wokovu iliyotolewa na Yesu Kristo. Mungu aliandika Ufunuo 11 ili pia kutoa ondoleo lake la dhambi kwa Waisraeli katika nyakati za mwisho. Kitendo cha “kupima” katika aya ya 1 na ya 2 kina maanisha ni kuweka viwango kwa vitu vyote. Dhumuni la Mungu katika kulipima Hekalu lake, ni kuangalia ikiwa mioyo yao ipo tayari kupokea wokovu wako, alifanya hivi kwa kuwa amekwishapanga kuwaokoa Waisraeli. Na ikiwa mioyo yao haipo tayari, basi upimaji huo utawafanya wawe tayari, ili kwamba mioyo yao isimame sawasawa.

Aya ya 2: “Na behewa iliyo nje ya hekalu uiache nje wala usiipime, kwa maana Mataifa wamepewa hiyo, nao wataukanyaga mji mtakatifu miezi arobaini na miwili.”

Mungu alimpatia mamlaka ya kuwakanyaga mataifa kwa miaka mitatu na nusu. Hivyo, Wamataifa wote ni lazima wapokee katika mioyo yao injili ya maji na Roho, ambayo ni Neno la ukombozi, wanapaswa kuipokea injili hiyo mapema ndani ya kipindi cha miaka mitatu na nusu katika ile miaka saba ya Dhiki Kuu. Historia ya ulimwengu huu itaisha wakati Dhiki Kuu ikipita kuelekea katika nusu nyingine. Hivi karibuni, utafika wakati ambapo Wamataifa, pamoja na watakatifu ambao wamekwisha okolewa toka katika dhambi zao zote watakanyagwa na Shetani.

Hivyo, Wamataifa ni lazima wapokee ondoleo la dhambi zao na kisha waiandae imani ya kufia-dini mapema katika ile miaka mitatu na nusu ya kwanza katika ile miaka ya Dhiki. Pia

wakati huo wataupokea ukweli kwamba Yesu ni Mwokozi wao. Hapo mwishoni, watu wa Israeli wataupokea wokovu wao toka katika dhambi zao zote wakati wa kipindi cha miaka mitatu na nusu katika ile miaka ya Dhiki Kuu. Tunapaswa kufahamu kwamba Mungu ataruhusu ondoleo la dhambi kwa Waisraeli hata wakati wa Dhiki Kuu.

Aya ya 3: “Nami nitawaruhusu mashahidi wangu wawili, nao watatoa unabii siku elfu na mia mbili na sitini, hali wamevikwa magunia.”

Mungu atawainua mashahidi wawili kama watumishi wake kwa ajili ya watu wa Israeli. Manabii hao wawili ambao Mungu atawainua kwa ajili ya Waisraeli wamepewa nguvu mara mbili kuliko zile za manabii wa kale, na kwa kupitia maneno ya ushuhuda wao, Mungu ataanza kufanya kazi kati ya watu wa Israeli ili kwamba waweze kumpokea Yesu Kristo kuwa ni Mwokozi wao. Kwa kupitia kazi za hawa manabii wawili, Waisraeli wengi watakuja kuzaliwa tena upya na kuwa watu wa Mungu.

Mungu, kwa kuwaweka hawa manabii wawili ambao atawatuma kuwaokoa Waisraeli toka katika dhambi zao katika nyakati za mwisho, Mungu kwa kupitia manabii hawa atafanya miujiza na maajabu, na hivyo atawafanya Waisraeli, ambao wakati huo watakuwa wakiongozwa na hawana manabii kumrudia Kristo na kisha kumwamini kama Mwokozi wao. Manabii hawa wawili wawalisha watu wa Israeli Neno la Mungu kwa siku 1,260 wakati wa miaka mitatu na nusu ya kwanza katika kipindi cha Dhiki Kuu. Mungu awataruhusu Waisraeli kupata wokovu ule ule ambao umewaokoa Wamataifa wa kipindi cha Agano Jipya toka katika dhambi zao kwa kuwapatia injili ya maji na Roho na kisha kuwafanya waiamini injili hiyo kwa imani.

Aya ya 4: Hao ndio ile mizeituni miwili na vile vinara viwili visimamavyo mbele za Bwana wa nchi.

“Miti miwili ya mizeituni” ina maanisha ni manabii wawili wa Mungu (Ufunuo 11:10). Kwa upande mwingine, “vinara viwili vya taa,” vina maanisha ni Kanisa la Mungu ambalo amelianzisha kati ya Wamataifa, na Kanisa ambalo ameliruhusu kwa watu wa Israeli. Mungu amelijenga Kanisa lake miongoni mwa Wayahudu na kwetu sisi Wamataifa, na ataendelea kuifanya kazi yake ya kuziokoa nafsi toka katika dhambi hadi siku ya mwisho.

Kwa kupitia hii “mizeituni mwili” na hivi “vinara viwili vya taa”, Mungu anathabiti kwamba kama alivyowainua manabii wake katika kipindi cha Agano la Kale ili kuwaokoa Waisraeli toka katika dhambi zao na akatenda kwa kupitia manabii hao, basi nyakati za mwisho zitakapowadia, Mungu atawainua manabii wawili kati ya watu wa Israeli ambao watalihuburi Neno lake, na kisha kuwaongoza watu Waisraeli kwenda kwa Yesu kwa kupitia manabii hao.

Waisraeli walishindwa kuwaamini kwa umakini watumishi wa Mungu ambao wana asili ya Wamataifa, na hawakusikiliza kile ambacho watumishi hawa wa Mungu waliwaambia. Kwa kuwa wanafahamu kila kitu kuhusu utaratibu wa sadaka ya kutekelezwa na unabii wa Agano la Kale, basi manabii wa Mungu wa nyakati za mwisho wanapaswa kuinuliwa toka katika watu wa Israeli. Waisraeli wanayaelewa vizuri Maandiko kiasi kuwa wanaweza kuikariri na kuinukuu Torati yote hata pale wanapokimbia. Hii ndio sababu hawaamini kamwe kile ambacho watumishi wa Mungu ambao ni Wamataifa wanawaambia.

Lakini watumishi wa Mungu, hali wakiisikia injili ya maji na Roho ambayo mimi na wewe tunaihubiri sasa, watainuka toka miongoni mwa Waisraeli wenyewe. Wakati waamini

katika injili ya maji na Roho watakapoinuka kati yao, na kisha manabii wawili kuinuka kati yao wakiwa wameletwa na Mungu na ambao watalielezea na kulihubiri Neno la Mungu kwao, basi ni hapo tu ndipo Waisraeli watakapoamini.

Watu wa Israeli watafahamu kwamba hawa mashahidi wawili ni manabii waliotumwa na kuinuliwa na Mungu Mwenyewe ili kuwaokoa toka katika dhambi zao katika nyakati za mwisho. Manabii hawa watazionesha nguvu zao kuu, kama walivyofanya watumishi wa Mungu katika Agano la Kale, ambao Waisraeli wanawafahamu vizuri na kuwaamini. Hivyo, Waisraeli watayaona kwa macho yao maajabu ya kushangaza ambayo mashahidi hawa wawili watayafanya. Kuanzia wakati huu, watu wa Israeli watamrudia Yesu Kristo na kisha kumwamini Bwana. Watakapomtambua Yesu Kristo kuwa ni Mwana wa Mungu na Mwokozi wao, kama sisi tunavyofanya, basi hapo watakuwa na imani kama yetu—yaani, wao pia wataokolewa kwa kuiamini injili ya maji na Roho.

Mashahidi hawa wawili watalieleza Neno la Mungu na kisha kuwalisha watu wa Israeli kwa miaka 1,260 wakati kipindi cha miaka saba cha Dhiki Kuu. Kama ambavyo wewe na mimi, ambao ni Wamataifa wa wakati wa Agano Jipya tulivyookolewa kwa kuamini katika injili ya maji na Roho, basi Mungu atawaruhusu Waisraeli kuokolewa katika nyakati za mwisho kwa kuiamini injili ya maji na Roho.

Kama vile aya ya 4 inavyotueleza, *“hao ndio ile mizeituni miwili na vile vinara viwili visimamavyo mbele za Bwana wa nchi,”* Biblia inawaita hawa mashahidi wawili kuwa ni *“mizeituni miwili.”* Mizeituni hii miwili ina maanisha ni manabii wawili wa nyakati za mwisho. Katika aya ya 10, imeandikwa hivi, *“Nao wakaao juu ya nchi wafurahi juu yao na kushangilia. Nao watapelekeana zawadi wao kwa wao, kwa kuwa manabii hao wawili waliwatesa wao wakaao juu ya*

nchi.” Hapa, tunapaswa kulitazama Neno hili kwa kuangalia juu ya hii mizeituni miwili.

Katika kipindi cha Agano la Kale, mizeituni ilitumika katika kutengenezea madhabahu na mimbari katika Hema la Mungu kwa kuiweka wakfu kwa mafuta ya mizeituni. Mafuta haya ya mizeituni pia yalitumika kwa matumizi mengine, kama vile kuwashia taa za Hekaluni. Ni mafuta safi tu ya mizeituni ndiyo yaliyotumika kuwashia taa za Hekaluni. Mungu hakuruhusu mafuta mengine kutumika katika Hekalu lake, bali alihakikisha kwamba ni mafuta ya mizeituni tu ndiyo yanayotumika. Hivyo, tunapaswa kufahamu kwamba mafuta ya mizeituni, pamoja na mti wa mtini, vinawakilisha watu wa Israeli.

Kuna mafafanuzi mengi kuhusiana na hii mizeituni miwili na vinara hivi viwili vya taa. Baadhi ya watu wanadai kwamba wao wenyewe ndio hiyo mizeituni miwili. Lakini mizeituni hii miwili inawamaanisha wale waliotiwa mafuta. Katika nyakati za Agano la Kale, mtu alitiwa mafuta wakati alipofanywa kuwa nabii, mfalme, au kuhani. Wakati mtu alipowekwa mafuta Roho Mtakatifu alishuka juu yake. Kwa hiyo, mti wa mizeituni una maanisha ni Yesu Kristo ambaye alitungwa mimba kwa uwezo wa Roho Mtakatifu (Warumi 11:24). Lakini watu wanaielewa vibaya dondoo hii.

Hata hivyo, mizeituni mwili, ambayo ni mashahidi wawili wanaotwaja katika kifungu hiki, ina maanisha ni watumishi wawili wa Mungu ambao atawainua kipekee katika nyakati za mwisho kwa ajili ya wokovu wa watu wa Israeli.

Hiki ndicho ambacho aya ya 4 inatueleza. Na hivi vinara viwili vya taa vina maanisha ni Kanisa la Mungu ambalo ameliruhusu kati ya Wamataifa, na Kanisa aliloliruhusu kwa watu wa Israeli. Kwa asili, katika kipindi cha Agano la Kale, Waisraeli walikuwa na hili Kanisa la Mungu. Lakini kuanzia

katika kipindi cha Agano Jipya, Waisraeli hawana tena hili Kanisa la Mungu. Kwa nini? Kwa sababu bado hawamtambui Yesu Kristo, na pia ni kwa sababu hawana Roho Mtakatifu katika mioyo yao.

Kwa kuwa hawajaipokea injili ya maji na Roho wala hawajampokea Yesu Kristo, basi Kanisa la Mungu haliwezi kuwemo ndani yao. Hata hivyo, kabla ya mwisho wa dunia, yaani wakati wa miaka mitatu na nusu ya kwanza katika ile miaka ya Dhiki Kuu, Mungu ataliruhusu Kanisa lake kwa watu wa Israeli pia. Hii ndio sababu Biblia inatueleza kuhusu mizeituni miwili, ambayo ni mashahidi wawili wa Mungu.

Bwana atalianzisha Kanisa lake na kisha kuifanya kazi yake ya kuziokoa nafsi toka katika dhambi miongoni mwa Wayahudi na sisi Wamataifa. Kwa kwa kupitia makanisa haya, Mungu atawafanya waifanye kazi hii ya kiroho ya kuziokoa nafsi toka katika dhambi hadi atakapoonekana Mpinga Kristo. Hii ina maanisha kwamba Mungu atatengeneza vyombo miongoni mwa watakatifu, ambao ni washiriki wa Kanisa lake, ili kuwafanya waitumikie huduma yake ya kuziokoa nafsi zilizopotea katika dhambi. Hivyo ni lazima tuitende huduma yetu iliyosali kwa juhudi na katika imani.

Aya ya 5: Na mtu akitaka kuwadhuru, moto hutoka katika vinywa vyao na kuwala adui zao. Na mtu akitaka kuwadhuru, hivyo ndivyo impasavyo kuuawa.

Mungu aliwapatia nguvu hii hawa manabii wawili ili kwamba waweze kuifanya kazi yake maalumu. Mungu anatuonyesha kwamba yeyote atakayejaribu kuwaua hawa mashahidi wawili yeye mwenyewe ndiye atakayedhuriwa, na kwamba nguvu ya Neno lake itakuwa pamoja na mashahidi hawa wawili, hii yote ni ili kuwafanya watu wa Israeli kutubu na kisha kumshinda Shetani katika nyakati za mwisho.

Kwa hiyo, watu wa Israeli, hali wakiadini juu ya mafundisho ya hawa manabii wawili, watamrudia Yesu Kristo. Hii ndio sababu ni kwa nini Mungu ataruhusu uwepo wa hii mizeituni miwili—yaani mashahidi wawili—kwa Waisraeli, ili kwamba waweze kuokolewa toka katika dhambi zao katika nyakati za mwisho.

Aya ya 6: Hao wana amri ya kuzifunga mbingu, ili mvua isinyeshe katika siku za unabii wao. Nao wana amri juu ya maji kuyageuza kuwa damu, na kuipiga nchi kwa kila pigo, kila watakapo.

Kwa kuwa watu wa Israeli hawatatubu hadi pale watumishi wa Mungu ambao atawainua kwa ajili yao watakapoyafanya matendo haya yenye nguvu, basi ndio sababu Mungu ataruhusu hawa mashahidi wawili kutenda kazi kwa nguvu zake. Hawa manabii wawili sio tu kwamba watawaongoza Waisraeli kwenda kwa Yesu, bali pia watawashinda maadui wa Mungu kwa nguvu na kisha kuitimiza kazi yote ya wito wao. Mungu atawapatia nguvu maalumu ili kwamba waweze kulihubiri Neno lote la unabii kwa watu wa Israeli, na kushuhudia kwamba Yesu Kristo ndiye Masihi waliyemsubiri kwa muda mrefu na kisha kuwafanya Waisraeli waadini.

Aya ya 7: Hata watakapoumaliza ushuhuda wao, yule mnyama atokaye katika kuzimu atafanya vita nao, naye atawashinda na kuwaua.

Neno hili linatueleza kwamba Mpinga Kristo ataonekana hapa ulimwenguni baada ya kupita kwa miaka mitatu na nusu katika ile miaka saba ya Dhiki Kuu. Ni wakati huu ndipo wale wote wanaomwamini Yesu Kristo kuwa ni Mwokozi wako anayesubiriwa watakapoinuka miongoni mwa watu wa Israeli.

Lakini wengi wao watauawa na Mnyama na kuwa wafia-dini ili kuilinda imani dhidi ya Mnyama, ambaye ni Mpinga Kristo na wafuasi wake. Manabii wawili wa Mungu pia watauawa na kuwa wafia-dini mara watakapokuwa wameukamilisha wito wao.

Kule kusema kwamba mashahidi hawa wawili watauawa na Mpinga Kristo ni kwa mujibu wa mapenzi ya Mungu. Kwa nini? Kwa sababu Mungu atataka kuwapatia thawabu kwa ajili ya wao kuifia-dini. Thawabu hii ni ile ya wao ya kushiriki katika ufufuo wa kwanza, kisha kuungana na bwana katika karamu ya harusi ya Mwana-kondoo, kurahi milele, na kisha kupokea uzima wa milele. Ili Mungu aweze kuwapatia watakatifu wote baraka hii, basi anataka watakatifu wote wauawe na kuwa wafia-dini kwa sababu ya imani yao. Hivyo, watakatifu wote ni lazima wasiogope wala kukwepa kuifia-dini, bali wanapaswa kuyapokea mauaji hayo ya kufia-dini kwa imani na kisha kupokea thawabu iliyobarikiwa.

Aya ya 8: Na mizoga yao itakuwa katika njia ya mji ule mkuu, uitwao kwa jinsi ya roho Sodoma, na Misri, tena ni hapo Bwana wao aliposulibiwa.

Aya hii inatueleza kwamba “mashahidi wawili” wanatoka hasahasa miongoni mwa watu wa Israeli. Watumishi wawili ambao Mungu atawainua kwa ajili ya Waisraeli si kutoka kwa Wamataifa, bali kutoka miongoni mwa watu wa Israeli. Kwa hiyo, mashahidi wawili wanauawa mahali pale pale ambapo Yesu alisulubiwa. Ukweli huu unatueleza kwa wazi kwamba mashahidi hawa wawili ni Waisraeli. Hawa ni watumishi wa Mungu kwa ajili ya watu wa Israeli.

Mungu atawaleta manabii wake wawili kwa watu wa Israeli, ambao kiroho ni kama vile watu wa Sodoma na Misri, atawapatia nguvu, na kisha atawafanya washuhudie kwamba

Yesu ni Masihi ambaye Waisraeli walikuwa wakimngojea, ili kwamba watu wa Israeli waweze kutubu na kumwamni Yesu.

Mpinga Kristo atawaua watumishi wawili wa Mungu mahali panapoitwa Golgota, mahali ambapo Yesu alisulubiwa. Kwa kuwa wafuasi wa Mpinga Kristo wana roho chafu, watawachukia hawa mashahidi wanaomwamini na kumshuhudia Yesu hadi kifo. Ni kama vile askari wa Kirumi waliomsulubisha Yesu na kicha kumchoma kwa mkuki ubavuni, basi wale walio na roho chafu hawatamchukia Yesu tu, bali pia watawachukia mashahidi wa Mungu na kisha kuwaua.

Aya ya 9: Na watu wa hao jamaa na kabila na lugha na taifa waitazama mizoga yao siku tatu u nusu, wala hawaiachi mizoga yao kuwekwa kaburini.

Miongoni mwa watu wa Israeli, kuna watu pia ambao hawamwamini Yesu Kristo kuwa ni Mwokozi wao. Hivyo baada ya kuona miili iliyokufa ya hawa watumishi wawili (mizeituni miwili), basi watafurahia wakidhani wameshinda, na ili kuonyesha hii fikra ya kushinda, basi hawatafikiria hata kuwazika watumishi hao. Lakini ushindi wao utavunjwa vunjwa na kuwa vipande wakati Mungu atakapofanywa “mashahidi wawili” kufufuka na kuwa hai tena, na hapo ndipo watakapomwogopa Mungu.

Wanaweza kujisifia kwa vifo vya watumishi wawili wa Mungu, lakini furaha hii haitadumu kwa muda mrefu, maana ghafla watatambua kwamba Mpinga Kristo hawezi kulingana na Yesu Kristo—hivyo hali ya kukata tamaa na utupu ndivyo vitakavyowagubika.

Watu hawa wanalichukia Neno la Mungu la unabii linalohubiriwa na manabii wawili. Kwa kitendo chao cha kusimama kinyume na watumishi ambao Mungu aliwainua, basi ni hakika kwamba wao sasa watakatwa toka katika

mavuno ya mwisho ya wokovu na kisha wataishia na kuwa wafuasi wa Shetani.

Aya ya 10: Nao wakaao juu ya nchi wafurahi juu yao na kushangilia. Nao watapelekeana zawadi wao kwa wao, kwa kuwa manabii hao wawili waliwatesa wao wakaao juu ya nchi.

Kwa kuwa watalihubiri Neno la Mungu la unabii, basi hawa mashahidi wawili walioinuliwa kwa ajili ya wokovu wa Waisraeli watakua ni maumivu makubwa katika shingo za wafuasi wa Shetani. Kwa hiyo, wote hao watafurahia sana baada ya kuona vifo vya hawa mashahidi wawili na kisha watatumiana zawadi na kusifiana.

Sisi pia, tunakuwa na furaha pale tunapowaona watu waliotusumbua wakitoweka. Mpinga Kristo na wafuasi wake watachukia sana wakati Mungu atakapowainua mashahidi wawili ili kulihubiri Neno lake. Kila wakati wanapolisikia Neno la Mungu, roho zao zitakabiliwa na masumbuko. Kwa kuwa watakuwa wamesumbuliwa sana kila wakati mashahidi hao wanapozungumzia kuhusu Yesu, basi ndio maana watafurahia sana watakapowaona wameuawa na Mpinga Kristo. Na hii ndio sababu watabadilishana zawadi kama sehemu ya kupongezana.

Aya ya 11: Na baada ya siku hizo tatu u nusu, roho ya uhai itokayo kwa Mungu ikawaingia, wakasimama juu ya miguu yao; na hofu kuu ikawaangukia watu waliowatazama.

Hata hivyo, Mungu atawafanya mashahidi wawili kushiriki katika ufufuo wa kwanza. Hili Neno ni ushahidi kwamba watakatifu, ambao wameuawa na kuwa wafia-dini ili kuilinda imani yao baada ya kuwa wameokolewa toka katika dhambi kwa kuliadini Neno la wokovu lililotolewa na Bwana, watahiriki katika ufufuo wa kwanza.

Kule kusema kwamba roho ya uhai ikawaingia baada ya “siku tatu na nusu” kunatueleza kwamba Bwana ataruhusu ufufuo wao kwa muda mfupi, kama vile yeye alivyofufuka toka katika kifo cha mwili. Kule kusema kwamba Mungu amewaruhusu watakatifu kuwa na imani hii ya ufufuo wa kwanza, ina maanisha kwamba watakatifu wenyewe imani hiyo ni baraka kubwa ya Mungu, lakini kwa wenye dhambi wote, ufufuo huo utawaletea hofu kuu na kufa moyo. Ufufuo wa kwanza wa watakatifu ni ahadi ya Mungu na thawabu yake kwa ajili ya imani yao.

Aya ya 12: Wakasikia sauti kuu kutoka mbinguni ikiwaambia, Pandeni hata huku. Wakapanda mbinguni katika wingu, adui zao wakiwatazama.

Hili Neno linaeleza juu ya ufufuo na unyakuo wa watakatifu. Baada ya kuliadini Neno la Bwana la unabii, basi wale waliookolewa toka katika dhambi zao zote hawatakuwa na la kufanya zaidi ya kuuawa na kuifia-dini ili kuilinda imani yao. Aya hii inatonyesha kwamba Bwana atawafufua watakatifuhawa wote na kisha kuwanyakua. Watakatifu na watumishi wa Mungu waliouawa na kuwa wafia-dini kwa sababu ya utii kwa Mungu watabarikiwa kwa kuinuliwa kwenda angani (unyakuo) kwa sababu ya imani yao katika Bwana. Hatuwezi kufanya lolote zaidi ya kumshukuru Bwana kwa kutupatia ufufuo wetu pamoja na unyakuo kama thawabu ya kuuawa na kuifia-dini baada ya kuokolewa kwa kuamini katika ondoleo la dhambi ambalo Bwana ametupatia.

Mungu Baba ataruhusu ufufuo na unyakuo kwa wale wote wanaosimama kinyume na Mpinga Kristo na kisha kuuawa kama wafia-dini kwa kuamini injili ya maji na Roho iliyotolewa na Yesu Kristo. Tunapaswa kuuamini ukweli huu. Ufufuo wa watakatifu na unyakuo ni baraka ambazo zinatoka

katika wokovu wao kwa kupitia imani yao katika injili ya maji na Roho iliyotolewa na Mungu. Shetani na wafuasi wake wa nyakati za mwisho watafanya jitihada zote ili waweze kutowekea angani kama mvuke mara watakapowaona watakatifu ambao waliwatesa na kuwaua wakifufuliwa na kunyakuliwa.

Mungu atawafufua na kuwanyakua watakatifu waliouawa na kuwa wafia-dini, lakini atawaangamiza wale ambao watakuwa bado wapo duniani kwa kuwamiminia mapigo ya mabakuli saba. Baada ya kazi hii kukamilika kwa haraka, Bwana atakuja hapa duniani pamoja na watakatifu na kisha atawaalika wenye haki katika karamu ya harusi ya Kristo. Bwana wetu ataifanya karamu hii kudumu kwa miaka elfu moja. Baada ya kuisha kwa hii milenia, Mungu atamruhusu Shetani kuibuka toka katika shimo la kuzimu lisilo na mwisho kwa muda mfupi na kisha kupigana na Mungu na watakatifu wake, lakini hatimaye Bwana atamwangamiza Shetani na wafuasi wake na kisha kuwahukumu kutupwa katika moto wa milele. Hata hivyo, wenye haki wataingia katika Ufalme wa Bwana wa Mbinguni na kisha kuishi naye milele.

Aya ya 13: Na katika saa ile palikuwa na tetemeko kuu la nchi, na sehemu ya kumi ya mji ikaanguka; wanadamu elfu saba wakauawa katika tetemeko lile. Na waliosalia wakaingiwa na hofi, wakamtukuza Mungu wa mbingu.

Baada ya kuuawa na kuifia-dini, ufufuo, na unyakuo wa manabii wawili ambao Mungu atainua kwa ajili ya wokovu wa Waisraeli, Mungu atawaruhusu malaika zake kuyamimina kwa uhuru mapigo ya mabakuli saba katika dunia. Wale watakaokuwa wamebakia katika dunia hii baada ya watakatifu kunyakuliwa watayapokea mapigo haya ya mabakuli saba kama thawabu yao. Ni hapo tu ndipo watakapogubikwa na

hofu na kisha kumpatia Mungu utukufu, lakini jambo hili halitakuwa na maana yoyote kwao, kwa kuwa jambo hili halitakuwa ni tendo la imani ya kweli katika upendo wa Mungu.

Wakati ulimwengu huu ukiangamizwa, wenye haki watakuwa na Mbingu yao ya milele, ufufuo wa milele, na baraka za milele, lakini wenye dhambi, watakuwa wakingojewa na mateso ya moto wa milele huko kuzimu. Hii ndio sababu kila mtu anapaswa kupokea ondoleo la dhambi zake kwa kuamini katika injili ya maji na Roho. Na kwa kuwa wale waliokwisha kukombolewa toka katika dhambi zao wanaamini juu ya ulimwengu mpya ambao Mungu aliwaahidia, basi ndio maana wanaihubiri injili ya maji na Roho kwa kila mtu.

Aya ya 14: Ole wa pili umekwisha pita, tazama ole wa tatu unakuja upesi.

Ole wa tatu toka kwa Mungu utawangojea watu wote Wamataifa na Waisraeli isipokuwa wale walioshiriki katika ufufuo wao na unyakuo kwa kuokolewa na kisha kuuawa kama wafia-dini.

Pigo linalotokana na malaika kulipiga tarumbeta la sita ambalo linadumu hadi hadi kupigwa kwa tarumbeta la saba ambalo linaleta mwanzo wa mapigo ya mabakuli saba linaitwa ni ole wa pili. Mapigo ya matarumbeta saba yamegawanyika katika vipindi vitatu—kipindi cha mwanzo, cha kati, na cha mwisho. Mapigo ya kiasili na kuuawa kwa watakatifu kama wafia-dini na Mpinga Kristo kunajumuishwa katika ole ya kwanza na ya pili. Kwa maneno mengine, hii ole ya tatu, ni mapigo ambayo yataungamiza ulimwengu kikamilifu. Hii ole ya tatu ni mabakuli ya ghadhabu ya Mungu ambayo yatamiminwa kwa wenye dhambi watakaokuwa wamesalia hapa duniani.

Aya ya 15: Malaika wa saba akapiga baragumu, pakawa na sauti kuu katika mbingu, zikisema, Ufalme wa dunia umekwisha kuwa ufalme wa Bwana wetu na wa Kristo wake, naye atamiliki hata milele na milele!”

Hii sentensi inayosema, “*pakawa na sauti kuu katika mbingu,*” inatuonyesha kwamba watakatifu na watumishi ambao wameokolewa toka katika dhambi zao zote watakuwa tayari wapo Mbinguni wakati mapigo ya mabakuli saba yatakapokuwa yakianza hapa ulimwenguni. Kwa hiyo, wakati huo watu wa Mungu hawataonekana tena hapa ulimwenguni. Tunapaswa kutambua jambo hili. “*Ufalme wa dunia umekwisha kuwa ufalme wa Bwana wetu na wa Kristo wake, naye atamiliki hata milele na milele!”*

Wakati huu, watakatifu watamsifu Bwana Mbinguni, lakini baada ya mapigo ya mabakuli saba kumiminwa, basi watakatifu hao watashuka katika ulimwengu utakaokuwa umefanywa upya na bwana na kisha watatawala pamoja naye kwa miaka elfu moka hapa ulimwenguni. Kisha itafuatiwa kwa Bwana na watakatifu kutawala milele katika Mbingu na Nchi Mpya.

Bwana wetu ametuokoa sisi kama watumishi wake badala ya kututawala kama mfalme ili kutukomboza toka katika dhambi zetu. Bwana amewapatia neema yake inayowafanya wote wanaoamini katika injili ya maji na Roho kama wokovu wao kuwa wana wa Mungu. Kwa kuwa Bwana wetu ni Mfalme wetu wa milele, basi atatufanya sisi watu wake kutawala milele. Haleluya! Mshukuruni Bwana!

Aya ya 16: Na wale wazee ishirini na wanne waketio mbele za Mungu katika viti vya enzi vyao wakaanguka kifulifuli, wakamsujudia Mungu,

Mungu anastahili kupokea utukufu wote. Ni sahihi

kabisa kwa wale ambao wameokolewa toka katika dhambi zao kuanguka na kusujudu na kumsifu Mungu. Bwana wetu, ambaye amefanya kazi hizi zote ili kuwaokoa wenye dhambi, anastahili kupokea sifa na kuabudiwa toka kwa watakatifu wote na uumbaji wote milele na milele.

Aya ya 17: wakisema: “Tunakushukuru wewe, Bwana Mungu Mwenyezi, uliyeko na uliyekuwako, kwa sababu umeutwaa uweza wako ulio mkuu, na kumiliki.”

Ili aweze kutawala milele pamoja na watu wake, Bwana wetu atamshinda Shetani na kupokeo nguvu kuu toka kwa Mungu Baba. Kwa hiyo, Bwana atatawala milele. Bwana anastahili kufanya hivyo. Ninampatia Bwana utukufu, hii ni kwa sababu Bwana ndiye aliyezifanya dhambi zote za ulimwengu kutoweka, na ni yeye ndiye aliyewaokoa wale wote wanaoamini katika injili ya maji na Roho, na ni yeye ndiye aliyewahukumu maadui zake, kwa sababu hiyo anastahili kupokea nguvu kuu na kisha kutawala milele. Kwa hiyo, wale wote wanaotambua ukuu wa Mungu watavikwa utukufu wa kumsifu Mungu milele pamoja na nguvu kuu na upendo wa Bwana.

Aya ya 18: “Na mataifa walikasirika, hasira yako nayo ikaja, na wakati ukaja wa kuhukumiwa waliokufa, na wa kuwapa thawabu yao watumwa wako manabii na watakatifu, na hao walichao jina lako, wadogo kwa wakubwa, na wa kuwaharibu hao waiharibuo nchi.”

Sambamba na kumiminwa kwa mapigo ya mabakuli saba kutaambana na maangamizi ya mwili kwa wale wote ambao watabakia kiroho kuwa Wamataifa. Neno hili linatueleza kwamba wakati huo utakuwa ni wakati wa Mungu kumhukumu kila mtu huku yeye akiwa Hakimu wa wote, naye atawapa

thawabu watumishi wake na manabii, watakatifu, na wale wote wanaomheshimu Yeye, kisha atawaangamiza wale wote wanaosimama kinyume na kutoyaheshimu mapenzi yake. Bwana ataileta hukumu ya ghadhabu yake juu ya wale wasioutambua ukuu wake, lakini atawaruhusu watakatifu kutukuzwa pamoja naye. Hii ina maanisha kwamba Bwana amefanyika kuwa Hakimu wa wote, wema kwa waovu.

Wakati Bwana atakapoketi katika kiti chake cha enzi kama Mfalme wa wale waliozaliwa tena upya na kisha kumhukumu kila mtu, basi wenye dhambi wote na wenye haki wa hapa ulimwenguni watapokea hukumu yao ya haki. Wakati huo, kama maamuzi ya hukumu yake, Bwana atawapatia watakatifu Mbingu na uzima wa milele, lakini atawapatia wenye dhambi maangamizi ya milele na adhabu ya kuzimu. Ukuu wa Yesu Kristo na baraka kwa watu wake ya kutawala itaendelea milele. Wakati huu, ulimwengu wa kwanza utafikia ukomo, na hivyo ulimwengu wa pili, ambao ni Ufalme wa Kristo utaanza.

Aya ya 19: Kisha Hekalu la Mungu lililoko mbinguni likafunguliwa, na sanduku la agano lake likaonekana ndani ya hekalu lake. Kukawa na umeme, na sauti, na radi, na tetemeko la nchi, na mvua ya mawe nyingi sana.

Mungu atawaruhusu watakatifu wake, ambao ni wenye haki, kupata baraka ya kuishi katika Hekalu lake. Mambo haya yote yanatimizwa kwa mujibu wa Neno la Mungu la ahadi kwa mwanadamu katika Yesu Kristo. Ufalme wa Mungu unaanza na Neno la Mungu la unabii, kisha unakamilishwa kwa utimilifu wa unabii huu.

Ahadi zote za Mungu, kuanzia ufufuo hadi unyakuo wa watakatifu hadi kushiriki kwao katika karamu ya harusi ya Mwana-kondoo pamoja na Yesu Kristo pamoja na baraka yao

ya kutawala milele kama wafalme zitagawanywa sawa kwa watu wa Israeli na kwa Wamataifa. Pia Mungu anauchukulia wokovu wa Waisraeli katika nyakati za mwisho na ule wokovu wetu kuwa ni mmoja, anatumia sisi sote kuuawa na kuifia-dini wakati huo, anaturuhusu kushiriki ufufuo mmoja na baadaye unyakuo ule ule, na anatumia sisi sote utukufu ule ule. Neno linatueleza kwamba pamoja na kuwa Waisraeli na sisi Wamataifa ni watu wawili tofauti katika mwili, ukweli ni kuwa kiroho sisi ni watu wamoja wa Mungu.

Watu wengi wanadai na kuamini kwamba waliozaliwa tena upya watanyakuliwa kabla ya Dhiki Kuu ya miaka saba haijaanza. Lakini ukweli sio huu. Tukiongea kibiblia, watu wataendelea kuisikia injili ya kweli na kisha kuokolewa katika ile miaka mitatu na nusu ya kwanza kati ya ile miaka saba ya Dhiki Kuu. Kisha Mpinga Kristo atatokea, watakatifu watauawa na kuifia-dini, na baada ya ufufuo na unyakuo itafuata karamu ya harusi ya Mwana-kondoo, na kisha kuwaruhusu watakatifu kutawala pamoja naye kwa miaka elfu moja.

Watakatifu wanapaswa kuwa na ufahamu sahihi juu ya muda wa wao kuuawa na kuifia-dini, na juu ya ufufuo na unyakuo. Pasipo kuufahamu wakati huu, basi ni hakika kwamba wataendelea kushangaa hali wakiwa wamekanganyikiwa na kisha kufa kiroho kwa sababu ya mkanganyiko huo.

Wale walio na ufahamu sahihi wa majaliwa ya Mungu juu ya nyakati za mwisho wanautumaini ufufuo na unyakuo wao, na wataendelea kuitumikia injili kwa juhudi. Wale wanaofahamu kwamba hakuna tumaini katika dunia hii wanapaswa kuwa na tumaini lile lile la wale waliozaliwa tena upya kwa kuamini katika injili ya maji na Roho. Pia ni vizuri ifahamike kwamba watakatifu wanauawa na kuifia-dini kwa

sababu ya kuliadini Neno la Mungu.

Ni kweli kwamba imani inayoweza kupambanua nyakati inahitajika sana katika nyakati hizi. Kwa kweli wakati umekaribia wa mapigo ya kutisha na dhiki kushuka juu ya ulimwengu mzima na kwa Mpinga Kristo kutokea. Sasa ni wakati wako wa kuamka toka katika usingizi. Tunapaswa kuzingatia kwamba tutapaswa kuyapitia mateso yote ya ile Dhiki Kuu. Ni muhimu tuamini juu ya kurudi kwa Kristo, na juu ya ufufuo na unyakuo, na juu ya ushiriki wetu katika karamu ya harusi ya Mwana-kondoo pamoja na Kristo. Ili tuweze kuwa na imani sahihi katika kipindi hiki, basi ni lazima tuingie katika sanduku la injili ya maji na Roho.

Ninatumaini na kuomba kwamba kwa kukifahamu kipindi hiki, basi utakuwa na imani ambayo inahitajika sana na ambayo ni sahihi kabisa kwa wakati huu. ☒

Wokovu wa Watu wa Israeli

< Ufunuo 11:1-19 >

Kwa nini Mungu aliwatuma manabii wawili kwenda kwa watu wa Israeli? Mungu alifanya hivyo ili hasahasa kuwaokoa watu wa Israeli. Kifungu kikuu kinatueleza kwamba Mungu atawafanya mashahidi wake wawili kutabiri kwa siku 1,260. Hii inalenga kuwaokoa Waisraeli kwa mara ya mwisho. Kule kusema kwamba Mungu atawaokoa watu wa Israeli kuna maanisha pia kwamba wakati huo mwisho wa dunia utakuwa umefika.

Aya ya 2 inasema, *“Na behewa iliyo nje ya hekalu uiache nje wala usiipime, kwa mana Mataifa wamepewa hiyo, nao wataukanganya mji mtakatifu miezi arobaini na miwili.”* Hii ina maanisha kwamba wakati mapigo ya kutisha yatakapokuja kwa Wamataifa, wakati wa kipindi cha miaka saba ya Dhiki Kuu kitakapoanza na kisha kuleta mkanganyiko mkuu na mapigo, na wakati ambapo miongoni mwa Wamataifa walioisikia na kuiamini injili watakapouawa na kuifia-dini, basi hapo ndipo Mungu atakapowainua manabii wawili kwa ajili ya watu wa Israeli, na atawafanya manabii hao kushuhudia kwamba Yesu ni Mungu na Mwokozi, na kwa sababu hiyo kuwaokoa Waisraeli. Kifungu hiki kinatueleza kwamba hizo ndizo kazi za Mungu ambazo zitakuja hapo baadaye.

Ni lazima tulifundishe hili Neno kwa wale ambao, hali wakiwa wamedanganywa na shetani, wanadai kwamba viongozi wa madhehebu yao ndio mizeituni miwili ya nyakati

za mwisho, na kwamba mwanzilishi wa kikundi chao cha kidini ni Eliya aliyetabiriwa katika nyakati za mwisho. Kila mara makanisa ya kidunia yanapozungumza juu ya Ufunuo, yanakitumia kifungu hiki kinachozungumza juu ya mizeituni miwili mara nyingi. Kati ya watu wote waliodanganywa na vikundi-dini vya kizushi na ambao nimekutana nao katika maisha yangu ya kiimani hadi sasa, hakuna hata mmoja aliyeshindwa kudai kwamba kiongozi wa kikundi chake cha kidini ni mmoja kati ya ile mizeituni miwili inayotajwa katika kifungu hiki cha maandiko. Kila mzushi niliyekutana naye hatimaye ametoa madai ya jinsi hiyo.

Lakini mizeituni miwili na vinara vya taa viwili vya Ufunuo havina uhusiano na yale ambayo wazushi hawa wanadai. Kiukweli, mizeituni hii miwili ina maanisha ni manabii wawili ambao Mungu atawainua miongoni mwa Waisraeli ili kuweza kuwaokoa.

Sura ya 11 inatueleza kwa kina jinsi Mungu atakavyowaokoa watu wa Israeli. Kama ilivyo kwa Kitabu cha Warumi, kila sura katika Kitabu cha Ufunuo ina wazo kuu linalojitegemea. Kwa kwa kulifahamu wazo kuu la sura hii ya 11, ndipo tunapoweza kufahamu kwamba kifungu hiki kinaeleza nini. Hali wakisoma kwamba Wamataifa wataukanyaga mji mtakatifu kwa mizei arobaini na mbili, basi baadhi ya watu wanadai hata pasipo kufahamu wazo kuu la sura hii, kwamba wakati huo kipindi cha watu wa Mataifa kitakuwa kimekwisha, na kwamba kipindi cha wokovu wa Waisraeli kitakuwa kimefunguliwa, na kwamba kuanzia hapo na kuendelea Waisraeli wataokolewa.

Lakini hoja hii ipo mbali kabisa na ukweli. Sura ya 7 inatueleza kwamba idadi kubwa isiyohesabika ya Wamataifa watatoka katika ile Dhiki na kukokolewa—yaani, Wamataifa na Waisraeli wote wataokolewa wakati wa Dhiki, na kwamba si

Waisraeli peke yao. Hivyo, kile ambacho sura ya 11 inatueleza ni kwamba Mungu atawainua manabii wawili ili kuwaokoa watu wa Israeli katika nyakati za mwisho, ukweli huu hautuelezi kwamba Wamataifa hawataokolewa.

Baadhi wanaweza kuuliza hivi, “Waisraeli 144,000 si walikwisha okolewa, maana sura ya 7 inatueleza kwamba hii ni idadi ya Waisraeli ambao walikuwa wametiwa muhuri na Mungu?” Kutiwa muhuri si sawa na kuokolewa. Hakuna hata mmoja anayeweza kuokolewa pasipo kupitia Yesu Kristo. Wokovu unakuja kwa kuamini kwamba Yesu Kristo alifanyika kuwa Mwokozi wetu kwa kuja hapa duniani, kwa kubatizwa na kuzichukua dhambi zetu zote, kwa kuzichukua dhambi zote za ulimwengu na kwenda nazo Msalabani na kisha kufa Msalabani, na kisha kufufuka tena toka kwa wafu.

Pamoja na kuwa tunafahamu kwamba tumefungwa katika dhambi hadi tutakapokufa, ukweli ni kwamba tumeokolewa kwa kuamini kwamba Yesu Kristo alizifanya dhambi zetu zote kutoweka na hivyo amefanyika kuwa Mwokozi wetu. Ingawa Waisraeli 144,000 watatiwa muhuri, Mungu atawainua manabii wake wawili, na atawatumia manabii hao kuihubiri injili yake kwa Waisraeli. Kwa maneno mengine, Neno hili linatueleza kwamba manabii wawili wataihubiri injili kwa Waisraeli, na kwamba 114,000 wataokolewa.

Biblia haina ubabaishaji wala ubaguzi. Hakuna hata mmoja anayeweza kuokolewa pasipo kupitia Yesu Kristo. Pasipo kupitia Yesu Kristo Mungu anachoweza kukisema ni “Hujaokolewa.”

Manabii wawili, ambao ni miti miwili ya mizeituni iliyotajwa katika kifungu hiki, watauawa mahali panapoitwa Golgotha. Miili yao itaachwa pasipo kuzikwa, na wale wasiompokea wala kumwamini Yesu watafurahia kuuawa kwao na watatumiana zawadi. Lakini aya ya 11 na ile ya 12

inatueleza kwamba, *“Na baada ya siku hizo tatu u nusu, roho ya uhai itokayo kwa Mungu ikawaingia, wakasimama juu ya miguu yao; na hofu kuu ikawaangukia watu waliowatazama. Wakasikia sauti kuu kutoka mbinguni ikiwaambia, Pandeni hata huku. Wakapanda mbinguni katika wingu, adui zao wakiwatazama.”*

Hii inatueleza moja kwa moja kwamba sisi—yaani, wewe na mimi ambao ni Wamataifa—tutauawa pia na kuifia-dini kwa imani wakati utakapowadia, na kwamba muda mfupi baada ya sisi kuuawa na kuifia-dini, ufufuo na unyakuo wetu vitafuata. Jambo hili linaendelea kuonekana katika sehemu mbalimbali za Kitabu cha Ufunuo. Pia kuna vifungu vinavyotueleza kwamba wakati mapigo ya mabakuli saba yatakapokuwa yamemiminwa katika dunia hii, watakatifu walionyakuliwa watakuwa wakimsifu Mungu angani.

Sura ya 14 pia inazungumzia juu ya watu 144,000 waliookolewa, huku wakimsifu Mungu kwa wimbo ambao hakuna hata mmoja anayeweza kuuimba isipokuwa aliye malimbuko ya wokovu ndiye anayeweza kuimba. Hapa tunaenezwa kwamba baada ya watu wa Israeli kuokolewa, watauawa na kuifia-dini kila mahali, na mara baada ya kuuawa na kuifia-dini ufufuo na unyakuo wao utafuata.

Hili pia litawahusu pia Wamataifa. Katika nyakati za mwisho, wewe na mimi tutapitia magumu ya mapigo ya matarumbeta saba, lakini Mungu atatulinda na mapigo haya. Wakati Dhiki Kuu ya miaka saba itakapofikia kilele chake kwa kupita miaka mitatu na nusu, basi mateso ya watakatifu yatakuwa yamefikia kileleni. Lakini mateso haya ya kutisha yatadumu kwa muda mfupi tu. Watakatifu wengi na watumishi wa Mungu watauawa na kuifia-dini, na mara baada ya kuuawa na kuifia dini unyakuo wao utafuata.

Kwa nini? Kwa sababu Ufunuo imekuwa ikiandika mara

kwa mara kwamba wakati mapigo ya mabakuli saba yatakapokuwa yakimiminwa hapa duniani, basi watakatifu watakuwa wapo mbinguni wakimsifu Mungu. Neno linautaja mchakato huu kuwa ni wa ajabu.

Ufunuo 10:7 inasema, *“isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.”* Siri ya Mungu iliyofichwa si kitu kingine chochote zaidi ya kunyakuliwa. Katika 1 Wathesalonike 4:16, Mtume Paulo anatueleza kwamba, *“Kwa sababu Bwana mwenyewe atashuka kutoka mbinguni pamoja na mwaliko, na sauti ya malaika mkuu, na parapanda ya Mungu; nao waliokufa katika Kristo watafufuliwa kwanza.”*

Hata hivyo, kule kusema kwamba Bwana atashuka kutoka Mbinguni, hakumaanishi kwamba atashuka hapa duniani haraka. Bwana atashuka kutoka Mbinguni hadi angani, na wakati ufufuo wa kwanza utakaowafufua waliolala na kuwabadilisha wale waliozaliwa tena upya wakiwa hai utakapotokea, basi hapo ndipo unyakuo ambao kwa huo watakatifu watampokea Bwana utafuata. Baada ya chakula cha harusi ya Mwana-kondoo kufanyika angani na baada ya ulimwengu huu kuangamizwa kabisa kwa mapigo ya mabakuli saba, Bwana atashuka katika ulimwengu utakaokuwa umefanywa upya pamoja nasi na ataonekana mbele ya wale watakaokuwa wapo hai.

Kulitafsiri Neno la Ufunuo kwa kuzingatia mawazo binafsi ya mtu ni kuelekea katika njia ya maangamizi. Ni makosa kabisa kuamini katika nadharia tupo zinazopendekezwa na baadhi ya wanaotheolojia, pia ni makosa kutetea nadharia hizo pasipo kulifahamu Neno.

Miongoni mwa watheolojia wanaoheshimwa sana katika jamii za Wakristo wahafidhina, yaani wanazuoni kama vile L.

Berkhof na Abrahamu Kuyper waliotoa nadharia ya amilenia. Kati ya nadharia hizi, nadharia ya kunyakuliwa kabla ya dhiki, kunyakuliwa baada ya dhiki, na amilenia, kuamini katika nadharia ya amilenia ni sawa na kutoiamini Biblia yenyewe.

Kipindi ambapo watu walikuwa wakiamini katika nadharia ya kunyakuliwa baada ya dhiki kimeshapita, na katika kipindi hiki, wengi wanaamini katika nadharia ya kunyakuliwa kabla ya dhiki. Lakini nadharia hii pia haina uhalali wa kibiblia. Lakini bado kuna watu wengi wanaoipenda nadharia hiyo hasa wanapoelezwa juu ya kunyakuliwa kabla ya dhiki. Kwa nini? Kwa sababu kwa mujibu wa nadharia hii ya kunyakuliwa kabla ya dhiki, Wakristo hakuna watawachokihofia kuhusiana na kipindi cha miaka saba ya Dhiki Kuu.

Hivyo, nadharia hiyo inawafanya waamini waikubali maana wanaishi maisha ambayo si baridi wala si moto, na kuyafanya makanisa kushughulika zaidi na ongezeko la idadi ya waumini wao. Hivyo, imani za watu zinakuwa na uzembe. Kwa kuwa wanafikiri kuwa hawana kitu cha kuhofia kuhusiana na kipindi cha Dhiki Kuu, hivyo imani yao inakuwa ni ya kizembe wakati ambapo imani yao inapaswa kuwa imara kufuatia ujio wa nyakati za mwisho. Hapo zamani za kale, watu walikuwa wakiiamini nadharia ya amilenia, kisha wakaamini nadharia ya kunyakuliwa baada ya dhiki kwa muda, na sasa wanaamini juu ya nadharia ya kunyakuliwa kabla ya dhiki.

Mwaka 1830, Mchungaji Scofield, aliyekuwa profesa katika Taasisi ya Biblia ya Moody, alianza kuandika Biblia ya marejeo. Huyu Scofield alikuwa ameshawishiwa sana na mwanatheolojia mashuhuri aliyetwa Darby.

Darby, mwalimu wa kiroho wa Scofield, ambaye hapo awali alikuwa ni kasisi wa Kikatoliki alikuwa na akili sana na mwenye ufahamu wa juu. Yeye aliliacha Kanisa Katoliki baada

ya kuzitambua nadharia zake za uongo, kisha akajiunga na asasi ndogo ya Kikristo na akawa kiongozi wake. Pamoja na kwamba Darby alisoma Biblia mara kwa mara, hakuweza kuelewa kikamilifu ikiwa unyakuo utatokea kabla au baada ya Dhiki Kuu. Hivyo aliamua kusafiri ili kutafuta ushahidi wa wazi kuhusiana na jambo hili.

Katika safari hii, alikutana na binti wa kike aliyekuwa kiongozi wa elimu ya kiroho. Huyu binti alidai kwamba ameona katika maono kwamba kunyakuliwa kutatokea kabla ya Dhiki Kuu. Hali akiamini hilo kwamba unyakuo utatokea kabla ya Dhiki, Darby alihitimisha masomo yake ya kibiblia kwa nadharia ya kunyakuliwa kabla ya dhiki.

Hata hivyo, kwa kuwa watu wa wakati huo walikuwa wameamini zaidi katika nadharia ya kunyakuliwa baada ya dhiki, hiyo nadharia ya Darby ya kunyakuliwa kabla ya dhiki haikupokelewa vizuri.

Darby alidai kwamba kile kilichoandikwa katika Kitabu cha Ufunuo ni wokovu wa watu wa Isareli, na kwamba haisemi chochote kuhusu wokovu wa Wamataifa. Na kuhusu lile neno linalosema *“Imekupasa kutoa unabii tena (10:11),”* alilitafsiri kuwa ni injili ya Ufalme ambayo inatangaza ujio wa ufalme huo badala ya ukweli kwamba ni kuihubiri injili ya maji na Roho.

Scofield, ambaye aliikubali nadharia hiyo ya Darby kama ilivyo na hivyo akaiweka nadharia ya kunyakuliwa kabla ya dhiki katika Biblia yake ya marejeo, kisha akatengeneza nadharia yake juu ya nyakati saba. Madai kama hayo ya Scofield yalitimiza matakwa ya wakati wake na yakaendana vizuri sana na hali yake, na hivyo madai hayo yalileta mjadala mkubwa wa kidini ulimwenguni kote na hatimaye yakakubaliwa katika sehemu nyingi.

Lakini Mungu anasema nini katika Biblia? Katika

maandiko tunamwona Yesu akilipokea na kulifungua gombo lililokuwa limetiwa mihuri saba mbele ya kiti cha enzi cha Mungu, yaani Yesu aliyeigawa historia katika vipindi saba kwa mihuri saba.

Kipindi cha kwanza ni kipindi cha farasi mweupe. Hiki ni kipindi cha wokovu, kipindi ambacho Mungu aliamua kutuokoa tangu wakati ule alipouumba ulimwengu huu na alipomuumba mwanadamu, na ni hakika kwamba Mungu ametuokoa. Kama vile Ufunuo 6:2 inavyotueleza, *“Nikaona, na tazama, farasi mweupe, na yeye aliyempanda ana uta, akapewa taji, naye akatoka, ali akishinda tena apate kushinda,”* Bwana ameshinda na ataendelea kushinda. Hata kabla ya uumbaji, injili ilikuwepo na wokovu ulikuwa umekwisha anza.

Kipindi cha pili ni kipindi cha farasi mwekundu, yaani wakati wa Shetani. Hiki ni kipindi cha Ibilisi ambapo ataipora amani toka kwa wanadamu, na kuwafanya kupigana vita dhidi yao, kuchukiana, na kushiriki katika machafuko ya kidini.

Kipindi cha tatu ni kipindi cha farasi mweusi, ambacho ni kipindi cha njaa ya kimwili na kiroho, na kipindi cha nne ni kipindi cha farasi wa kijivujivu, yaani kipindi cha mauaji ya kuifia-dini. Kipindi cha tano ni kipindi cha unyakuo—Mungu amepanga unyakuo wa watakatifu kama moja ya nyakati zake. Kipindi cha sita ni kile cha mabakuli saba, kikiwa kimehusisha maangamizi ya ulimwengu huu, na kipindi kinachofuatia ni kile cha Ufalme wa Milenia na Mbingu na Nchi Mpya. Hivyo, Mungu ameupanga ulimwengu huu katika nyakati saba, ndani ya gombo lilitiwa mihuri saba.

Maoni ya Scofield juu ya nyakati saba yalijengwa katika msingi wa maono na mawazo yake binafsi. Kinyume na mawazo hayo, nyakati saba zilizotabiriwa katika Ufunuo 6 kwa kupitia mihuri sita katika lile gombo lililoshikiliwa na Mungu

ni nyakati zilizopangwa na Mungu Mwenyewe. Hata hivyo bado watu wanazizungumzia nadharia zilizotengenezwa na watu, yaani nadhari ya kunyakuliwa kabla ya dhiki, na kwa sababu hiyo wale wanaoiamini nadharia hiyo wanafikia hitimisho kwamba hawana sababu yoyote ya kumwamini Bwana kwa nguvu.

Wanaoamini hivyo wameamua katika mioyo yao kwamba, “Kwa kuwa tutanyakuliwa kabla ya Dhiki Kuu, tutakuwa tayari tupo katika uwepo wa Mungu wakati miaka saba ya Dhiki Kuu itakapowadia. Hivyo hatuna cha kuhofia!” Kama Neno la Mungu lingekuwa limetuambia kwa hakika kwamba tutanyakuliwa kabla ya ile Dhiki, basi kusingelikuwa na sababu ya kuiandaa imani yetu, na kwamba kuhudhuria Kanisani mara moja au mbili kwa mwaka kungekuwa kunatosha. Lakini Mungu hajatueleza hivi.

“Nao watatoa unabii siku elfu na mia mbili na sitini.”
“Nao wataukanyaga mji mtakatifu miezi arobaini na miwili.”
Neno la Mungu kama hilo linatueleza kwamba Wamataifa pia wataokolewa katika kipindi cha Dhiki. Mungu atawainua manabii wake wawili ili kuieneza injili ya maji na Roho. Hakuna hata mmoja anayeweza kusimama mbele ya Mungu pasipo kupitia kwanza katika kipindi cha miaka mitatu na nusu katika ile miaka saba ya kipindi cha Dhiki Kuu iliyopangwa na Mungu, yaani wakati wa magumu utakapokuwa umewadia. Mungu anatueleza pia kwamba wafia-dini wengi watatoka katika kipindi cha Dhiki.

Ili kumwamini Yesu kiusahihi, imempasa mtu kujifunza Biblia kikamilifu na kuamini kile kilicho sahihi. Ikiwa watu wanahubiri na kuamini kivyao pasipo kusoma kila ukurasa wa Biblia kwa uangalifu, basi ni hakika kuwa wataishia kuwa wazushi. Sababu inayofanya kuwe na madhehebu mengi sana katika ulimwengu huu ni kutokana na ukweli kwamba watu

wengi wameiweka imani yao kutokana na tafsiri zao binafsi za Biblia.

Kule kusema kwamba watu wa Israeli wataokolewa kuna tueleza kwamba mpango wa Mungu utatimizwa kwa mujibu wa Neno lake la ahadi. Hii pia inatueleza kwamba Mungu hatalivunja Neno lake la ahadi lililotamkwa kwetu bali atayatimiza yote. Hii ndio maana tuna tumaini kubwa sana.

Manabii wawili wa Israeli watafufuliwa baada ya siku tatu na nusu baada ya vifo vyao na kisha watapaa kwenda Mbinguni. Huu ni unyakuo. Tukio hili linatoa mfano wa jinsi ambavyo wafia-dini wakati wa ile Dhiki Kuu watakavyonyakuliwa, na hivyo inatuonyesha juu ya unyakuo wetu. Biblia inatueleza kwamba baada ya kupigwa kwa tarumbeta la saba, ulimwengu huu utakuwa ni Ufalme wa Kristo na kwamba atatawala katika ulimwengu huu milele. Vivyo hivyo, wale waliomwamini Yesu Kristo watatawala pamoja na Kristo.

Baada ya kuwanyakua watakatifu Mungu ataiangamiza dunia hii kikamilifu. Hatufahamu ikiwa maangamizi hayo yatakuwa ni kwa asilimia 100, kwa kuwa hili halijaandikwa katika Biblia, lakini katika Ufunuo 11:18 Mungu anatueleza kwamba, *“Na mataifa walikasirika, hasira yako nayo ikaja, na wakati ukaja wa kuhukumiwa waliokufa, na wa kuwapa thawabu yao watumwa wako manabii na watakatifu, na hao walichao jina lako, wadogo kwa wakubwa, na wa kuwaharibu hao waiharibuo nchi.”*

Ni hakika kwamba unyakuo utatokea wakati Dhiki Kuu itakapokuwa ikikaribia kilele chake cha miaka mitatu na nusu—yaani sio mwisho wa miaka mitatu na nusu, bali baada ya kuipita kidogo miaka hiyo mitatu na nusu. Katikati ya kipindi cha miaka saba ndio wakati ambapo Dhiki itakuwa imefikia kiwango chake cha juu. Huu ndio wakati ambapo

watakatifu toka watu wa Israeli watauwawa na kuifia-dini, na baada ya hapo unyakuo utafuata. Wakati unyakuo utakapotokea, sisi sote tutaungana katika karamu ya chakula cha harusi ya Mwana-kondoo angani.

Wakati tutakapokuwa tukishiriki katika chakula cha harusi ya Mwana-kondoo angani kama Mathayo 25 inavyotueleza, mapigo ya mabakuli saba yataishukia dunia hii. Hali tukiyaona mambo yote yatakayokuwa yakitokea katika dunia hii, tutakuwa tukimsifu Mungu angani na kumshukuru kwa neema yake.

Ninatumaini na kuomba kwamba kwa kupitia Neno la Ufunuo, utaweza kuzitofautisha nyakati wakati siku za mwisho zitakapowadia, pia utaweza kuliadini Neno kiusahihi, utaishi maisha yako kwa imani, na kisha utajiandaa kwa ajili ya yatakayojiri baadaye. Unapaswa kuiandaa imani yako ili uweze kushiriki katika kumsifu, kumheshimu, na kumwabudu Bwana huku ukishiriki katika chakula cha harusi ya Mwana-kondoo pamoja naye.

Ninatumaini kwamba Neno la Ufunuo litathibitisha kuwa ni mwongozo mkuu kwako kuhusu siku zinazokuja baadaye, hali likiukumbusha moyo wako tena kwamba unapaswa kuishi kwa uvumilivu na kwa uaminifu kwa imani yako katika injili ya maji na Roho. ☒

SURA YA

12



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Kanisa la Mungu Ambalo Litadhuriwa Sana Hapo Baadaye

< Ufunuo 12:1-17 >

“Na ishara kuu ilionekana mbinguni; mwanamke aliyevikwa jua, na mwezi ulikuwa chini ya miguu yake, na juu ya kichwa chake taji ya nyota kumi na mbili. Naye alikuwa ana mimba, akilia, hali ana utungu na kuumwa katika kuzaa. Ikaonekana ishara nyingine mbinguni; na tazama, joka kubwa jekundu, alikuwa na vichwa saba na pembe kumi, na juu ya vichwa vyake vilemba saba. Na mkia wake wakokota theluthi ya nyota za mbinguni, na kuziangusha katika nchi. Na yule joka akasimama mbele ya yule mwanamke aliye tayari kuzaa, ili azaapo, amle mtoto wake. Naye akazaa mtoto mwanamume, yeye atakayewachunga mataifa yote kwa fimbo ya chuma. Na mtoto wake akanyakuliwa hata kwa Mungu, na kwa kiti chake cha enzi. Yule mwanamke akakimbilia nyikani, ambapo ana mahali palipotengenezwa na Mungu, ili wamlishe huko muda wa siku elfu na mia mbili na sitini. Kulikuwa na vita mbinguni; Mikaeli na malaika zake wakapigana na yule joka, yule joka naye akapigana nao pamoja na malaika zake; nao hawakushinda, wala mahali pao hapakuonekana tena mbinguni. Yule joka akatupwa, yule mkubwa, nyoka wa zamani, aitwaye Ibilisi na Shetani, audanganyaye ulimwengu wote; akatupwa hata nchi, na malaika zake akatupwa pamoja naye. Nikasikia sauti kuu

mbinguni, ikisema, Sasa kumekuwa wokovu, na nguvu, na ufalme wa Mungu wetu, na mamlaka ya Kristo wake; kwa maana ametupwa chini mshitaki wa ndugu zetu, yeye awashitakiye mbele za Mungu wetu, mchana na usiku. Nao wakamshinda kwa damu ya Mwana-Kondoo, na kwa neno la ushuhuda wao; ambao hawakupenda maisha yao hata kufa. Kwa hiyo shangilieni, enyi mbingu, nanyi mkaao humo. Ole wa nchi na bahari! Kwa maana yule Ibilisi ameshuka kwenu mwenye ghadhabu nyingi, akijua ya kuwa ana wakati mchache tu. Na joka yule alipoona ya kuwa ametupwa katika nchi, alimwudhi mwanamke yule aliyemzaa mtoto mwanamume. Mwanamke yule akapewa mabawa mawili ya tai yule mkubwa, ili aruke, aende zake nyikani hata mahali pake, hapo alishwapo kwa wakati na nyakati na nusu ya wakati, mbali na nyoka huyo. Nyoka akatoa katika kinywa chake, nyuma ya huyo mwanamke, maji kama mto, amfanye kuchukuliwa na mto ule. Nchi ikamsaidia mwanamke; nchi ikafunua kinywa chake, ikaumeza mto ule alioutoa yule joka katika kinywa chake. Joka akamkasirikia yule mwanamke, akaenda zake afanye vita juu ya wazao wake waliosalia, wazishikao amri za Mungu, na kuwa na ushuhuda wa Yesu; naye akasimama juu ya mchanga wa bahari.”

Mafafanuzi

Aya ya 1: “Na ishara kuu ilionekana mbinguni; mwanamke aliyevikwa jua, na mwezi ulikuwa chini ya miguu yake, na juu ya kichwa chake taji ya nyota kumi na mbili.”

Hii inatueleza juu ya Kanisa la Mungu likimpatia Mungu utukufu kwa kupitia kifo cha kuifia-dini. “Mwanamke

aliyekwa jua” ana maanisha ni Kanisa la Mungu hapa duniani, na ule msemu “na mwezi ulikuwa chini ya miguu yake” una maanisha kuwa Kanisa bado lipo chini ya utawala wa ulimwengu. Na kwa upande mwingine, msemu unaosema “na juu ya kichwa chake taji ya nyota kumi na mbili,” una maanisha Kanisa la Mungu litayashinda mateso na vitisho vya Shetani kwa kuuawa na kuifia-dini.

Aya hii inaelezea juu ya Kanisa la Mungu likiwa katikati ya Dhiki Kuu. Katika nyakati za mwisho Kanisa la Mungu litateseka sana na kudhuriwa na Shetani na wengi watauwawa na kuifia-dini, lakini hata hivyo litamshinda Shetani kwa imani yake na kisha litatukuzwa na Mungu. Hata katika wakati wa Dhiki, watakatifu wa Kanisa la Mungu watamshinda Mpinga Kristo na kisha kuibuka washindi kwa kuifia-dini kwa kuamini katika injili ya maji na Roho.

Ni hakika kuwa wana wa Mungu ambao wamezaliwa tena upya kwa maji na Roho wauawa na kuifia-dini katika nyakati za mwisho. Wale ambao watakuwa wamekwisha amini na kumtumia Mungu kabla ya kuja kwa Dhiki, na wale ambao wataamini injili na kisha kuinuka kama uyoga katikati ya Dhiki, wote hao watakuwa na imani ya kuweza kuifia-dini imani inayowawezesha kusimama kinyume na kumshinda Mpinga Kristo.

Wale ambao watakuwa wameondolewa katika kuifia-dini kwa sababu ya kumkana Mungu pia wataondolewa Mbinguni, kisha wataangukia kuzimu wakiwa pamoja na Shetani. Tunapaswa kujiandaa kupokea kuuawa kwa ajili ya kuifia-dini hali tukiwa na imani thabiti ili kwamba tusije tukaikosa baraka ya milele tuliyoandaliwa. Pia tunapaswa kufahamu kwamba wale wote waliozaliwa tena upya watakutana na vitisho vya Shetani. Mauaji ya wafia-dini yatakuwa ni ya muda tu, na mara baada ya mauaji haya kuisha, basi Ufalme wa Mileni na ule wa

Mbinguni vitakuwa ni mali yetu.

Hivyo, tunapaswa kuishi katika wakati huu hali tukifahamu kwamba nyakati za mwisho zitakapokuja, tutauawa na kuifia-dini kwa imani na kupitia Roho Mtakatifu. Wakati huo Roho Mtakatifu atatupatia maneno ya kuongea wakati wa mauaji hayo, hali akituwezesha kuyashinda mateso yetu kwa ujasiri na kisha kupokea kuuawa kwa kuifia-dini kwa hiari pasipo kuikana imani yetu.

Hata katikati ya Dhiki ya kutisha, Kanisa la Mungu litapigana dhidi ya Shetani na kumshinda kwa kuuawa na kuifia-dini. Ni wazi kwamba Kanisa litapokea thawabu toka kwa Mungu kwa kumshinda Mpinga Kristo kwa kuifia-dini, na kwa kuamini katika Neno la Bwana hata katika kipindi cha mwisho cha Shetani.

Aya ya 2: “Naye alikuwa ana mimba, akilia, hali ana utungu na kuumwa katika kuzaa.”

Aya hii inatueleza juu ya Kanisa la Mungu likiwa katika Dhiki. Inatueleza juu ya Kanisa lote likivumilia katika mateso na dhiki za nyakati za mwisho zilizoletwa na Shetani. Kanisa la Mungu litapita katika Dhiki Kuu, yaani wakati wa kupambana dhidi ya Mpinga Kristo. Hivyo, watakatifu watamwita Mungu tu wakati watakapokuwa wakipita katika hiyo Dhiki. Wataomba hivi, “Mungu, tunaomba utupatie neema yako ili kwamba tuweze kupita kwa haraka katika dhiki hizi zote. Utusaidie kwa kuzikomesha dhiki hizi zote. Uturuhusu kuzishinda hizi dhiki. Tufanye tuweze kumshinda Shetani!”

Aya ya 3: “Ikaonekana ishara nyingine mbinguni; na tazama, joka kubwa jekundu, alikuwa na vichwa saba na pembe kumi, na juu ya vichwa vyake vilemba saba.”

Wakati Shetani atakapoonekana duniani hapo baadaye,

atatenda kana kwamba yeye ni Mungu, na kwamba atayakusanya mataifa yote ya ulimwenguni na atayatumia kama zana yake ya kuyatimiza madhumuni yake. Pia ni hakika kuwa atawaua watakatifu na kisha kuutawala ulimwengu kama Mungu na mfalme.

Msemo unaosema, *“Na tazama, joka kubwa jekundu, alikuwa na vichwa saba na pembe kumi, na juu ya vichwa vyake vilemba saba,”* unaonyesha kuwa Shetani, mvunja-amani, atawakokota wafalme saba na mataifa saba kama mali yake. Aya hii inatueleza kuwa, kimsingi, Shetani katika uwepo wake, anasimama kinyume na Mungu.

Aya ya 4: “Na mkia wake wakokota theluthi ya nyota za mbinguni, na kuziangusha katika nchi. Na yule joka akasimama mbele ya yule mwanamke aliye tayari kuzaa, ili azaapo, amle mtoto wake.”

Aya hii inatueleza kile ambacho Shetani anakifanya. Joka aligeuka na kuwa kinyume na Mungu Mbinguni na alitupwa kutoka mbinguni. Yule Joka aliwavuta theluthi ya malaika wa Mbinguni katika mkia wake na akawaongoza kwenda katika maangamizi yao pamoja na maangamizi yake. Hivyo alivurumishwa atoke katika uwepo wa Mungu. Lakini hata akiwapo hapa duniani, anajaribu kuisimamisha kazi ya injili ya Mungu kwa kuwatesa wale wanaoiamini injili.

Aya ya 5: “Naye akazaa mtoto mwanamume, yeye atakayewachunga mataifa yote kwa fimbo ya chuma. Na mtoto wake akanyakuliwa hata kwa Mungu, na kwa kiti chake cha enzi.”

Hii inatueleza kuwa Kanisa la Mungu, kwa kuwa linauawa kwa kuifia-dini na kwa kumwamini Yesu Kristo, basi Kanisa hilo litafufuliwa na Kristo na kunyakuliwa kwenda

katika Ufalme wa Mbinguni.

Aya ya 6: “Yule mwanamke akakimbilia nyikani, ambapo ana mahali palipotengenezwa na Mungu, ili wamlishe huko muda wa siku elfu na mia mbili na sitini.”

Aya hii inatueleza kuwa Mungu atawalisha watu wake kwa miaka mitatu na nusu katika ulimwengu huu. Kanisa la Mungu litalishwa na kulindwa na Mungu kwa siku 1,260 kabla ya ujio wa dhiki kuu kamilifu, na wakati utakapowadia, Kanisa litapigana dhidi ya Mpinga Kristo na kisha litauawa na kuifia-dini.

Aya ya 7-8: “Kulikuwa na vita mbinguni; Mikaeli na malaika zake wakapigana na yule joka, yule joka naye akapigana nao pamoja na malaika zake; nao hawakushinda, wala mahali pao hapakuonekana tena mbinguni.”

Hii inazungumzia juu ya Shetani kufukuzwa na kuondolewa kikamilifu huko mbinguni.

Kabla ya kuja hapa ulimwenguni, Shetani atatupwa nje ya Mbingu moja kwa moja. Ibilisi hataweza tena kamwe kukaa Mbinguni. Shetani, aliye na mamlaka juu ya anga, anakaa angani na duniani na kwa sasa anavitawala vitu hivyo. Kwa kuwa atakuwa ameondolewa moja kwa moja toka Mbinguni, basi akiwa hapa duniani atawatesa watakatifu zaidi na zaidi hasa nyakati za mwisho zitakapowadia. Lakini, hatimaye Shetani atatolewa na kutupwa katika shimo lisilo na mwisho na kuzimu iliyoandaliwa na Mungu.

Aya ya 9: “Yule joka akatupwa, yule mkubwa, nyoka wa zamani, aitwaye Ibilisi na Shetani, audanganyaye ulimwengu wote; akatupwa hata nchi, na malaika zake akatupwa pamoja naye.”

Katika nyakati za mwisho, Shetani baada ya kuwa ameondolewa toka Mbinguni na kutupwa duniani, atawatesa na kuwaua watakatifu kwa mara ya mwisho. Watakatifu wengi watauawa na kuifia-dini katika mikono yake.

Aya ya 10: “Nikasikia sauti kuu mbinguni, ikisema, Sasa kumekuwa wokovu, na nguvu, na ufalme wa Mungu wetu, na mamlaka ya Kristo wake; kwa maana ametupwa chini mshitaki wa ndugu zetu, yeye awashitakiye mbele za Mungu wetu, mchana na usiku.”

Shetani hatapatikana kamwe katika Ufalme wa Mbinguni. Wakati nyakati za mwisho zitakapokuwa zikiishia, hataweza kukaa Mbinguni tena. Hii ndio sababu Kitabu cha Ufunuo 21:27 kwamba hakuna watenda maovu wala waongo wanaopatikana Mbinguni.

Aya ya 11: “Nao wakamshinda kwa damu ya Mwana-Kondoo, na kwa neno la ushuhuda wao; ambao hawakupenda maisha yao hata kufa.”

Wakati nyakati za mwisho zitakapowadia, watakatifu watauawa na kuifia-dini ili kuilinda imani yao. Yeyote aliye mtakatifu ataufikia ushindi wa imani kwa kupitia kifo chake cha kuifia-dini kwa imani. Kwa maneno mengine, wafia-dini wanaomwamini Bwana, watahinda viti dhidi ya nafsi zao.

Aya ya 12: “Kwa hiyo shangilieni, enyi mbingu, nanyi mkaao humo. Ole wa nchi na bahari! Kwa maana yule Ibilisi ameshuka kwenu mwenye ghadhabu nyingi, akijua ya kuwa ana wakati mchache tu.”

Baada ya Shetani kutupwa toka Mbinguni, basi atakapokuja hapa duniani atakuwa na nguvu za muda dhidi ya ulimwengu, atawanyanyasa na kuwatesa watakatifu katika hali

ya kutisha. Lakini kwa watakatifu watakaokuwa wameifia-dini na kunyakuliwa angani, watakuwa wakiingojea furaha ya ajabu. Baada ya kunyakuliwa, Mungu atayaleta mapigo ya mabakuli saba katika dunia yote na bahari.

Aya ya 13: “Na joka yule alipoona ya kuwa ametupwa katika nchi, alimwudhi mwanamke yule aliyemzaa mtoto mwanamume.”

Aya hii inazungumzia juu ya mateso ya watakatifu yatakayokuja katika wakati wa Dhiki Kuu. Watakatifu na watumishi wa Mungu watakufa wakati huo kwa kuifia-dini, lakini mauaji ya kuifia-dini yatakuwa ni ushindi mkubwa kwao wa kiimani. Hakutakuwa na kifo tena, mateso, wala laana kwao. Kitakachokuwa kimebakia kwao ni kumsifu Mungu na kutukuzwa milele wakiwa Mbinguni.

Aya ya 14: “Mwanamke yule akapewa mabawa mawili ya tai yule mkubwa, ili aruke, aende zake nyikani hata mahali pake, hapo alishwapo kwa wakati na nyakati na nusu ya wakati, mbali na nyoka huyo.”

Biblia inatueleza kuwa kunyakuliwa kutatokea baada ya kupita kwa miaka mitatu na nusu katika ile Dhiki Kuu. Neno hili linatueleza kuwa Mungu atawapatia watakatifu ulinzi maalumu na kuwatia moyo katikati ya mapigo ya kiasili ya Dhiki Kuu. Mungu atatustawisha sisi sote tunaolinda imani yetu ili kwamba tuweze kupigana na kumshinda Shetani kwa imani hii.

Kule kusema sasa tunaishi kwa ajili ya injili ya maji na Roho basi injili hiyo inafanywa kuwa chakula chetu cha kiroho, pia kuihubiri injili hii kunafanywa kuwa chakula cha kiroho. Tutaendelea kuishi maisha yetu tukiihubiri injili hadi mapigo ya matarumbeta saba yatakaposhuka hapa duniani. Kwa nini?

Kwa sababu kama hatuihubiri injili hadi nyakati za mwisho za kuuawa kwetu kwa kuifia-dini, basi ni hakika kuwa nafsi nyingi zitapotelea na kwenda kuzimu. Hakuna wakati mwingine wa kuihubiri injili zaidi ya sasa.

Aya ya 15-17: “Nyoka akatoa katika kinywa chake, nyuma ya huyo mwanamke, maji kama mto, amfanye kuchukuliwa na mto ule. Nchi ikamsaidia mwanamke; nchi ikafunua kinywa chake, ikaumeza mto ule alioutoa yule joka katika kinywa chake. Joka akamkasirikia yule mwanamke, akaenda zake afanye vita juu ya wazao wake waliosalia, wazishikao amri za Mungu, na kuwa na ushuhuda wa Yesu; naye akasimama juu ya mchanga wa bahari.”

Hapo kabla, Shetani aliwaua watakatifu kwa kuwatesa na kuwafanya waende mbali na injili. Lakini siku hizi, wakati ambapo injili imeenezwa sana kwa kupitia njia mbalimbali, Shetani anajaribu kuwaua watakatifu kwa kuimimina dhambi na kuwafanya wazame kwa mmiminiko wa hizo dhambi. Hivyo, Shetani amejaribu kuleta kifo kwa watakatifu wengi kwa kuumwaga mto wa dhambi na kuwafanya wanywe toka katika mto huo. Kwa kuwa watakatifu wameweza kuishi na kutouawa na jitihada hizo za Shetani, basi Shetani atakuja na mbinu nyingine ili kuwaua watakatifu kikamilifu kama inavyoonyeshwa katika sura ya 13. ☒

Pokea Kuuawa kwa Kuifia-Dini Kwa Imani Thabiti

< Ufunuo 12:1-17 >

Sura ya 12 inatuonyesha jinsi ambavyo Kanisa la Mungu litakabiliana na dhiki ya nyakati za mwisho. Aya ya 1 inasema, *“Na ishara kuu ilionekana mbinguni; mwanamke aliyevikwa jua, na mwezi ulikuwa chini ya miguu yake, na juu ya kichwa chake taji ya nyota kumi na mbili.”* Hii sentensi ya “Mwanamke aliyevikwa jua” ina maanisha ni Kanisa la Mungu hapa duniani, na sentensi inayosema “na mwezi ulikuwa chini ya miguu yake” ina maanisha kwamba Kanisa la Mungu bado lipo chini ya utawala wa ulimwengu. Hii inatuonyesha kwamba Kanisa la Mungu hapa ulimwenguni, na watakatifu ambao ni sehemu ya Kanisa hilo, watamtukuza Mungu kwa kuuawa na kwa kuifia-dini.

Msemo au sentensi inayosema, “na juu ya kichwa chake taji ya nyota kumi na mbili,” unaonyesha kwamba katika nyakati za mwisho Kanisa litapambana na Shetani na kisha litauawa na kuifia-dini kwa imani. Kama Neno la Mungu linavyotueleza, ni hakika kwamba Kanisa la Mungu litashinda. Pamoja na kuwa mapenzi ya Shetani ni kuiangamiza imani yetu, kututisha kwa namna zote, kutufanya tuteseke, kutudhuru, na hatimaye kudai hata uhai wetu, ukweli ni kwamba tutailinda imani yetu na kisha kuuawa kwa haki na kuifia-dini. Huu ni ushindi wa kiimani.

Katika kipindi cha Kanisa la Kwanza, watakatifu wengi waliotutangulia waliuawa pia na kuifia-dini. Mauaji haya ya kuifia-dini hayaji kwa sababu ya nguvu zetu, bali yanakuja kwa uwezo wa Roho Mtakatifu anayekaa ndani ya mioyo yetu.

Kutokana na sentensi inayosema, “mwanamke aliyevikwa jua,” basi hili neno “mwanamke” lina maanisha ni Kanisa la Mungu, na kule kusema kwamba “limevikwa jua” maana yake ni kwamba Kanisa litesubiriwa vya kutosha. Hata kati ya dhiki ya kutisha na wakati wa mapigo ya nyakati za mwisho, watakatifu watailinda imani kikamilifu na hawatamtii Shetani. Kwa nini? Kwa sababu Roho Mtakatifu aliyeko katika mioyo yao atawafanya wasimam na kumpinga Shetani, na huyo Roho Mtakatifu atawapatia imani isiyosalimu amri kwa vitisho na mateso ya aina yoyote ile ikiwemo utayari wa kuyatoa maisha yao.

Pia, kwa kuwa wale walioliweka tumaini lao katika Ufalme wa Mbinguni wanaamini katika Neno la Mungu linalowaeleza kwamba mapigo ya matarumbeta saba yatafikia ukomo na kisha kufuatwa na mapigo ya mabakuli saba ambayo yataufuta ulimwengu, basi ndio maana hawasalimu amri mbele ya Shetani.

Wale wanaofahamu na kuamini kwamba ulimwengu bora zaidi unawangojea hawawezi kamwe kumsujudia na kusalimu amri mbele ya Shetani. Mapigo ya mabakuli saba yatakayomiminwa kwa Mpinga Kristo na wafuasi wake yatawapiga bila kuchoka na bila huruma. Kwa watakatifu wanaoyafahamu vizuri mapigo hayo, ni hakika kuwa asilimia 100 ya watakatifu hao hawataitupilia mbali imani yao ati kwa sababu ya vitisho, hii ni kwa sababu Roho Mtakatifu atafanya kazi ndani ya mioyo yao. Roho Mtakatifu anayekaa ndani yetu atatupatia nguvu ya kusimama kinyume na Shetani, na kumshinda, na kisha kuuawa kwa kuifia-dini.

Wakati pigo la tarumbeta la nne litakapopita na kisha kuwasili kwa pigo la tarumbeta la tano na la sita, basi hapo ndipo “kufia-dini” kutakapotufikia. Wale watakaoilinda imani yao na kisha kuuawa na kuifia-dini ni wale tu waliozaliwa tena upya kwa maji na Roho. Wakati mapigo ya matarumbeta saba yatakaposhuka, Mpinga Kristo atakuwa na mamlaka kwa muda juu ya ulimwengu akiwa ameruhusiwa na Mungu.

Hali akifahamu kuwa mamlaka haya yatadumu kwa muda mfupi tu, watumishi wa Shetani, ambaye ni Mpinga Kristo watawatesa wale wote wanaomtumikia Yesu Kristo kama Bwana wao, ili kwamba aweze kuwachukua watu wengi kadri atakavyoweza kwenda nao kuzimu. Lakini wale waliozipitisha dhambi zao zote kwenda kwa Yesu kwa kupitia ubatizo wa Yesu hawata salimu amri kwa mateso ya Mpinga Kristo, bali watailinda injili iliyotolewa na Yesu Kristo na kisha kuuawa na kuifia-dini kwa ujasiri.

Hivyo, kuifia-dini ni ushahidi wa kiimani. Wale walio na ushahidi huu wataupata Ufalme wa Milenia na Mbingu na Nchi Mpya zilizoandaliwa na Bwana. Hii ni kwa wale wote wanaoamini katika injili ya maji na Roho na waliotawanyika sehemu mbalimbali duniani. Biblia inatueleza kwamba watakatifu karibu wote waliozaliwa tena upya watauawa na kuifia-dini katika nyakati za mwisho.

Lakini wale ambao, kwa nia ya kukwepa vifo vya kuifia-dini, watasimama upande wa Mpinga Kristo, na kisha kumtumikia na kumwabudu kama Mungu watauawa na mapigo ya mabakuli saba na pia katika mikono ya Mpinga Kristo mwenyewe. Vifo vyao havitakuwa ni vile vya kuifia-dini bali vitakuwa ni vifo vya bure tu. Wakati Shetani na Mpinga Kristo watakapokuwa wametupwa kuzimu, basi watu waliowafuata watakwenda pamoja nao kuzimu.

Kumkana Yesu Kristo kwa nia ya kukwepa mauaji ya

kuifia-dini na kupunguza magumu ya dhiki kuu hata kama ni kwa uchache tu litakuwa ni jambo la kijinga sana. Wakati mapigo ya matarumbeta saba yatakapokuwa yameisha huku wale walioilinda imani yao wakiwa wameuawa na kuifia-dini, basi hapo ndipo mapigo ya mabakuli saba yatakapoipiga dunia hii, hali yakiwaacha watu wachache tu. Kilichowazi ni kwamba wale waliopokea ondoleo la dhambi ni hakika kuwa watauawa na kuifia-dini, hivyo ili na sisi tusiweze kumkana Bwana wetu katika kipindi hiki cha kuifia-dini, tunapaswa kuiandaa imani yetu sasa kwa kuamini hali tukiwa na ufahamu sahihi wa nyakati za mwisho na uelewa sahihi wa Neno.

Tumepokea ondoleo la dhambi zetu, hivyo wakati tutakapokuwa tukiua na kuifia-dini, tutakutana na furaha isiyoelezeka, kwa kuwa Mungu atatutia nguvu. Hivyo, hebu tuiweke imani yetu kwa wazi kabisa katika mioyo yetu kwamba wewe na mimi tumepangiwa kuuawa na kuifia-dini kwa ajili ya Bwana. Wakati kipindi hiki cha mauaji ya kuifia-dini kitakapopita, ni hakika kuwa Mungu atatupatia ufufuo na unyakuo, na ataturuhusu kutukuzwa katika Ufalme wa Milenia, na atatupatia Mbingu na Nchi Mpya na kutufanya tutawale ndani yake, na kuturuhusu tuishi milele katika utajiri—hasa ikiwa tutakuwa tukiyaamini haya yote kwa ujasiri, pia ni hakika kuwa mateso yetu yote yatageuzwa na kuwa furaha.

Mtume Paulo alisema, *“Kwa maana nayahesabu mateso ya wakati huu wa sasa kuwa si kitu kama utukufu ule utakaofunuliwa kwetu”* (Warumi 8:18). Paulo aliteseka sana wakati alipokuwa akiitumikia injili, mara kadhaa alipigwa karibu na kufa. Lakini kwa kuamini kwamba mateso haya yalikuwa ni kwa ajili ya utukufu wa Mungu, maumivu ya Paulo yaligeuzwa na kuwa furaha ya ajabu. Kwa mujibu wa rekodi za kihistoria na elimu ya mapokeo ya jadi, takribani mitume wote akiwemo Paulo, waliuawa na kuifia-dini.

Inasemekana kwamba Petro alisulubiwa katika Kilima cha Vatikani kichwa chini miguu juu. Viongozi wa Kanisa la Kwanza akiwemo Polikap, pamoja na watakatifu wengine wengi waliimba nyimbo za kumsifu Mungu hata pale walipokuwa wakichomwa moto hadi kifo. Mambo kama hayo yasingeliwezekana ikiwa Mungu asingeliwatia nguvu watakatifu wake.

Pamoja na kwamba kulikuwa na watakatifu waaminifu kama hao katika nyakati hizo, ukweli ni kuwa kulikuwa na baadhi yao ambao waliikana imani yao. Origeni, ni mtheolojia anayeheshimiwa sana na watheolojia wa leo, na alikuwa ni mtu aliyeisikia injili moja kwa moja toka kwa mitume. Lakini wakati wa yeye kuuawa na kuifia-dini ulipowasili, alitoroka, yeye alisalimika ingawa watakatifu wenzake waliuawa na kuifia-dini. Jambo hili lisingeliwezekana ila kwa ukweli kwamba alikana kila kitu ambacho Yesu alikuwa amekifanya kwa ajili yake. Hivyo, Origeni alikuwa ni mwakilishi wa wale wote waliokuwa wameukana uungu wa Yesu. Lakini pamoja na yeye kumkana Yesu, watheolojia wa leo wanamwinua juu na kumuona ni miongoni mwa watheolojia wenye heshima.

Kwa nini Origeni alikwepa kuuawa na kuifia-dini wakati watakatifu wengine walipokea kuuawa kwao kwa mikono miwili? Si kwa sababu nguvu ya maamuzi ya Origeni ilikuwa dhaifu wakati ya wale watakatifu wengine ilikuwa imara. Watakatifu waliouawa na kuifia-dini huku wakimsifu Mungu walifanya hivyo kwa sababu waliamini kile ambacho Paulo alikuwa amekiongea—yaani *“kwamba mateso ya wakati huu wa sasa si kitu kama utukufu ule utakaofunuliwa kwetu”* Kwa maneno mengine, waliweza kuyavumilia mateso yao ya sasa kwa kuwa waliamini katika Neno la Mungu la ahadi kwamba atawafufua na kuwanyakua, na kisha kuwapatia Ufalme wake wa Milenia.

Ni lazima tutambue waziwazi kwamba mauaji ya kufia-dini yatatufikia. Wale wanaoishi maisha ya imani hali wakiwa na ufahamu sahihi wa ukweli huu ni tofauti na wengine waliosalia. Wale wanaoamini kwamba picha ya watakatifu waliouawa na kuifia-dini katika Kanisa la Kwanza ni picha yao pia, basi hao wanaweza kuishi maisha ya kiimani yenye nguvu, na yenye heshima na ujasiri, hii ni kwa sababu Neno lote la Biblia litakuwa ni hadithi yao. Wataishi wakati wote wakiwa na imani inayoweza kuwawezesha kupokea mauaji ya kuifia-dini—yaani, maisha ya kuamini wakati wote kwamba, baada ya kuuawa na kuifia-dini, Mungu atawapatia ufufuo na unyakuo, na Mbingu na Nchi Mpya ambavyo alivipanga na kuwaandalia tangu zamani.

Wale wanaoamini hili wanaweza kuishi maisha ya ujasiri ya kiimani, kwa kuwa wanafahamu kwamba imani yao inawaandaa kukabiliana na mwisho wao, yaani wakati watakapoweza kufa hali wakimtukuza Mungu. Na kwa kuwa hili si jambo la fundisho la kiimani, bali jambo la imani halisi, basi wale wasioliamini Neno hili na Injili kikamilifu watakuwa wa kwanza kutuuza kwa Mpinga Kristo. Hii ni sababu, ikiwa wewe na mimi tutatambua kwamba wakati fulani tutauawa na kuifia-dini, basi ni hakika kuwa kaka na akina dada katika Kanisa la Mungu, walio na imani sawa na ya kwetu watakuwa pamoja nasi milele, na jambo hili ni la muhimu sana. Kwetu sisi, watumishi wa Mungu, watu wake, na Kanisa lake—wote ni wa thamani sana kwetu sisi.

Watakatifu wa kipindi cha Kanisa la Kwanza walikuwa na imani iliyokuwa kamilifu na ya haki zaidi ya imani yetu tunaoishi katika kipindi hiki cha nyakati za mwisho. Waliamini juu ya kuifia-dini, na juu ya ufufuo na unyakuo utakaokuja, na juu ya Ufalme wa Milenia na Mbingu na Nchi Mpya. Hii ndio sababu waliishi maisha yao ya kiimani kana kwamba wanaishi

katika kipindi cha Dhiki Kuu, na kana kwamba kuja kwa Bwana kulikuwa kumekaribia. Hivyo, sisi tunaoishi katika kipindi kinachokaribia ujio wa kipindi cha Dhiki tunaposoma habari zao, basi habari zao zinaonekana kwetu kuwa ni za kweli na halisi, hii ni kwa sababu wao pia waliamini katika Neno lote la Mungu kuhusu Dhiki, kufia-dini, kufufuliwa, na kunyakuliwa.

Kwa kuwa tunaishi maisha yetu hali nyakati za mwisho zikiwa zimekaribia katika macho yetu, basi ni lazima tuiandae imani yetu ya kuifia-dini kwa uthabiti kabisa katika mioyo yetu. Shetani atamsumbua yeyote anayeamini katika maji na damu ya Kristo, hali akijaribu kuishusha imani ya anayeamini. Ili kutosalimu amri kwa usumbufu huu wa Shetani, ni hakika kuwa tunapaswa kuishikilia injili ya maji na Roho katika mioyo yetu, kisha kuichunguza hali tukiwa na tumaini katika Mbingu na Nchi Mpya, na kisha kuhakikisha kwamba imani yetu hii hailegei hadi wakati wa kuuawa kwetu na kuifia-dini.

Sababu iliyowafanya watakatifu wa kipindi cha Kanisa la Kwanza kuilinda imani yao kikamlifu ni kwa sababu walifahamu na kuamini katika Neno lote la Maandiko juu ya Dhiki, na juu ya kuuawa kwao na kuifia-dini, na juu ya ufufuo na unyakuo. Wewe na mimi pia tutauawa na kuifia-dini. Mimi nitakufa, vivyo hivyo na ninyi pia—sisi sote tutakufa ili kuilinda imani yetu. Pengine, mimi nitakuwa wa kwanza kuburuzwa na kuuawa. Jambo kama hili litaonekana kuwa ni la kutisha, lakini hatimaye, hakuna cha kuogopa, kwa maana hitimisho la kuogopa kuuawa na kuifia-dini litakuwa ni kuikana imani yetu, kitu ambacho hatuwezi kukifanya kabisa.

Mwisho wa yote, Mungu anapaswa kutukuzwa kwa kupitia vifo vyetu vya kuifia-dini, na Mungu amepanga hivi kama majaliwa yetu. Hivyo, hii ni hali ambayo tunapaswa kuipitia angalau mara moja. Kwa kuwa hatuwezi kuikwepa hali

hiyo, basi hebu tuikimbilie hali tukiwa na nguvu kamili na kuisha kuirukia kwa ujasiri. Sisi tunayo mamlaka ya Mfalme ambayo hakuna mwingine yeyote aliyenayo, pia tunalo tumaini la baraka za milele. Hivyo, tunaweza kumwomba Mungu wakati wote ili atuimarishe, na kisha tukampatia utukufu zaidi. Sisi tutapokea furaha kubwa zaidi kwa kuamini pasipo hofu juu ya kuifia-dini. Huu ni utukufu mkuu wa Mungu, na baraka kubwa kwetu sisi.

Mungu aliandika Kitabu cha Ufunuo ili kutueleza kuhusu mauaji ya watakatifu ya kuifia-dini, ufufuo na unyakuo, Ufalme wa Milenia, na Mbingu na Nchi Mpya. Hivyo, ikiwa una ufahamu sahihi wa Ufunuo, basi unaweza kuishi vizuri kwa imani yako katika ulimwengu huu unaokwisha. Barabara kuelekea katika Mbingu na Nchi Mpya iliyoandikwa katika Kitabu cha Ufunuo haiwezi kutumiwa pasipo injili ya maji na Roho. Na imani hii haiwezi kuthibitika pasipo kupitia kifo cha kuifia-dini. Hivyo, ninatumaini na kuomba kwamba utaiweka imani yako katika moyo kikamilifu, hali ukiamini kwamba hautaikana injili na kwamba utauawa na kuifia-dini wakati utakapowadia, na kwamba utasonga mbele kwa imani yako. Sasa, naamini kwamba maisha yako ya kiimani yatabadilika kuanzia wakati huu.

Hatutakufa pasipo sababu ya maana, hali tukiwa tumeshikwa katika mitego ya Shetani. Tutakufa ili kuilinda imani yetu kufuatia kazi ya Roho Mtakatifu katika mioyo yetu. Na huku ndio kuifia-dini. Ni hakika kwamba siku ya kuifia-dini itawadia. Lakini hatuiogopi, kwa kuwa tunafahamu kwamba hata kama miili yetu itauawa na Shetani, Mungu atatufanya tuishi tena katika miili yetu mipya na yenye utukufu. Pia tunafahamu kwamba mauaji ya kuifia-dini yatafuatiwa na ufufuo na unyakuo, na kwamba kitakachokuwa kinatungojea kuanzia hapo na kuendelea ni baraka ya kutawala katika

Ufalme wa Milenia na ufalme wetu Mbinguni.

Hapo zamani, Mtawala wa Rumi aliyeitwa Nero aliuchoma mji wa Rom ili aweze kuujenga upya. Wakati wenyeji wa Roma walipokasirika kwa sababu ya jambo hili, yeye Nero alizipeleka lawama zote kwa Wakristo na akawaua kwa mauaji ya kimbari. Vivyo hivyo, wakati majanga ya asili yatakapoupiga ulimwengu wakati wa Dhiki Kuu, Mpinga Kristo atatulaumu watakatifu kwa mapigo yote, atatushutumu na kutuua.

Hivyo, kuanzia sasa na kuendelea ni lazima tumwombe Mungu, ili atupatie imani ya kuifia-dini, yaani imani ambayo twaweza kufa kwa hiyo. Ikiwa hatuiachi imani yetu na kisha tukauawa na kuifia-dini, basi ni hakika kuwa utukufu wa Mungu utaonekana. Lakini ikiwa tutaiacha imani yetu, na kusalimu amri kwa Mpinga Kristo, na kumkubali kuwa yeye ni Mungu, ni hakika kuwa tutatupwa katika moto wa milele. Kwa maneno mengine ikiwa tutamwomba Mungu kwa imani ambayo kwa hiyo tutamshinda Mpinga Kristo, basi Bwana wetu atatupatia nguvu na ujasiri, lakini ikiwa hatuiandai mioyo yetu kikamilifu na kuikana imani yetu, basi atakachotupatia Mungu ni kuzimu.

Hebu nikusimulie hadithi fupi toka katika Vita ya Korea. Vikosi vya majeshi ya Korea Kaskazini vilifika katika kanisa fulani kusini mwa Korea, mahali ambapo dikoni mmoja aliyeitwa Chudal Bae alikuwa akilisimamia kanisa hilo. Baada ya kuona kwamba kiwanja cha kanisa ni kichafu, wale askari wavamizi walimwambia yule dikoni akisafishe. Lakini huyu dikoni alikataa, kwa madai kwamba alipaswa kuishika na kuitunza siku ya Bwana takatifu. Wale askari wakashindwa kuvumilia na wakamtishia kumuua mbele ya waumini wote ikiwa atakataa kuusafisha uwanja wa kanisa. Lakini yule dikoni aliendelea kukataa, huku akisema kwamba anapaswa

kuilinda imani yake, na hatimaye aliuawa. Baadaye kidogo, baadhi ya Wakristo walikutaja kufa kwake kuwa ni kuifia-dini, lakini ni kweli kwamba kifo cha huyu dikoni si kuifia-dini. Kwa nini? Kwa sababu kuifia-dini ni kufa kwa ajili ya kazi ya haki—yaani, kuufunua utukufu wa Mungu. Kufa kwa sababu ya ugumu wa mtu binafsi kwa kisizingizio cha Mungu ni tofauti kabisa na kuifia-dini kwa haki.

Je, tunaweza kuutupilia mbali upendo wa wokovu ambao Mungu ametupatia? Yesu Kristo alizichukua katika mwili wake dhambi zetu zote kwa ubatizo wake na alisulubiwa hadi kifo kwa sababu ya makosa na dhambi zetu. Ikiwa hatutauheshimu kikamilifu upendo huu wa Bwana wetu aliounyesha hadi kifo, basi ni hakika kwamba tunaweza kuitupilia mbali injili ambayo inatupatia Mbingu na Nchi Mpya kwa sababu ya kuupendelea mwili ambao utapotea wakati wa vifo vyetu. Tulizaliwa katika ulimwengu huu kwa majaliwa ya kuokolewa, kuihubiri injili ya wokovu kwa kila mtu katika dunia hii, na kisha kufa hali tukiihubiri injili hii. Usisahau kwamba majaliwa ya watakatifu waliopokea ondoleo la dhambi, yaani majaliwa yetu binafsi, ni kuishi kwa imani na kisha kuuawa na kuifia-dini ili kuyashinda majaribu ya kiimani ya Shetani kwa ajili ya utukufu ambao Mungu atatupatia.

Sisi tuna mapungufu mengi sana na tuna mawaa mengi sana kiasi kwamba hatuwezi kumpatia Mungu utukufu kwa kitu chochote. Kwa watu kama sisi, Mungu ametupatia fursa ya kumpatia Bwana utukufu mkuu, na fursa hii si nyingine bali ni kuifia-dini. Usikwepe kuifia-dini. Hebu tumwamini Mungu ambaye atatulegezea wakati wa Dhiki ikiwa tutamwomba, hali tukiwa tumelishikilia tumaini letu la urithi wa Mbingu na Nchi Mpya, hebu tuyashinde mateso yetu ya mpito ambayo yataisha haraka. Hebu tuishi hali tukiamini kwamba Bwana hataruhusu mateso makubwa mno kwa wale wambao wamekuwa wakiishi

kwa uaminifu kwa ajili yake, na kwamba hataruhusu kitu chochote ambacho kinaweza kuwafanya kuikana imani yao, na kwamba Mungu atawalinda na kuwapatia neema nyingi zaidi.

Hali tukitambua kwamba tutauawa na kuifia-dini, ni hakika kwamba tunahitaji uzoefu wa kukutana na magumu, kuvumilia mateso, na kutenda kazi ya Bwana. Kwa kupitia mambo hayo, tunaweza kuikuza imani yetu kwa kupitia uzoefu wa kutembea pamoja na Bwana, na nyakati za mwisho zitakapowadia, tutaweza kukabiliana na vifo vya kuifia-dini kwa nguvu tuliopewa na Bwana. Ikiwa hatutakuwa na uzoefu wowote wa mateso kwa ajili ya Bwana, yaani kujitoa kwa Bwana, uzoefu wa kufanya kazi na kujitoa muhanga kwa ajili ya Bwana, basi ni hakika kuwa hofu itatutawala hasa wakati mauaji ya kuifia-dini yatakapowasili kwa ujio wa Dhiki Kuu. Ni wale tu waliopitia mateso yao na kuyashinda maumivu hapo kabla ndio wanaoweza kuyashinda mateso kwa mara nyingine tena.

Ninamwomba Mungu ili kwamba maisha yako ya kiimani yawe ni yale ya mateso kwa ajili ya Bwana na yawe ya kushinda mateso hayo, ili kwamba wakati mauaji ya kuifia-dini yatakapowasili, wewe nawe uwe miongoni mwa waaminifu wanaoweza kuikumbusha mioyo yao na kukiri kwa vinywa vyao kwamba mambo haya yote ni utukufu wao ulioruhusiwa kupitia baraka na neema ya Mungu.

Ikiwa utataka kwa nia kuuchukua Ufalme wa Mbinguni kwa imani yako, basi ni dhahiri kwamba Mbingu na Nchi Mpya zitakuwa ni mali yako. Mungu anatamani kuona watu wote wakiokolewa na kuupata ufahamu wa kweli (1 Timotheo 2:4). ☒

SURA YA

13



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Kutokea Kwa Mpinga Kristo

< Ufunuo 13:1-18 >

“Kisha nikaona mnyama akitoka katika bahari, mwenye pembe kumi, na vichwa saba, na juu ya pembe zake ana vilemba kumi, na juu ya vichwa vyake majina ya makufuru. Na yule mnyama niliyemwona alikuwa mfano wa chui, na miguu yake ilikuwa kama miguu ya dubu, na kinywa chake kama kinywa cha simba, yule joka akampa nguvu zake na kiti chake cha enzi na uwezo mwingi. Nikaona kimoja cha vichwa vyake kana kwamba kimetiwa jeraha la mauti, na pigo lake la mauti likapona. Dunia yote ikamstaajabia mnyama yule. Wakamsujudu yule joka kwa sababu alimpa huyo mnyama uwezo wake; nao wakamsujudu yule mnyama, wakisema, Ni nani afananaye na mnyama huyu? Tena ni nani awezaye kufanya vita naye? Naye akapewa kinywa cha kunena maneno makuu, ya makufuru. Akapewa uwezo wa kufanya kazi yake miezi arobaini na miwili. Akafunua kinywa chake amtukane Mungu, na kulitukana jina lake, na maskani yake, nao wakaaao mbinguni. Tena akapewa kufanya vita na watakatifu na kuwashinda, akapewa uwezo juu ya kila kabila na jamaa na lugha na taifa. Na watu wote wakaaao juu ya nchi watamsujudu, kila ambaye jina lake halikuandikwa katika kitabu cha uzima cha Mwana-Kondoo, aliyechinjwa tangu kuwekwa misingi ya dunia. Mtu akiwa na sikio na asikie. Mtu akichukua mateka, atachukuliwa mateka. Mtu akiua kwa upanga, atauawa

kwa upanga. Hapa ndipo penye subira na imani ya watakatifu. Kisha nikaona mnyama mwingine, akipanda juu kutoka katika nchi; naye alikuwa na pembe mbili mfano wa Mwana-Kondoo, akanena kama joka. Naye atumia uwezo wote wa mnyama yule wa kwanza mbele yake. Naye aifanya dunia na wote wakaa ndani yake wamsujudie mnyama wa kwanza, ambaye jeraha lake la mauti lilipona. Naye afanya ishara kubwa, hata kufanya moto kushuka kutoka mbinguni uje juu ya nchi mbele ya wanadamu. Naye awakosesha wale wakaa juu ya nchi, kwa ishara zile alizopewa kuzifanya mbele ya huyo mnyama, akiwaambia wakaa juu ya nchi kumfanyia sanamu yule mnyama, aliyekuwa na jeraha la upanga naye akaishi. Akapewa kutia pumzi katika ile sanamu ya mnyama, hata ile sanamu ya mnyama inene, na kuwafanya hao wote wasioisujudu sanamu ya mnyama wauawe. Naye awafanya wote, wadogo kwa wakubwa, na matajiri kwa maskini, na walio huru kwa watumwa, watiwe chapa katika mkono wao wa kuume, au katika vipaji vya nyuso zao; tena kwamba mtu awaye yote asiweze kununua wala kuuza, isipokuwa ana chapa ile, yaani, jina la mnyama yule, au hesabu ya jina lake. Hapa ndipo penye hekima. Yeye aliye na akili, na aihesabu hesabu ya mnyama huyo; maana ni hesabu ya kibinadamu. Na hesabu yake ni mia sita, sitini na sita.”

Ufafanuzi

Aya ya 1: Kisha nikaona mnyama akitoka katika bahari, mwenye pembe kumi, na vichwa saba, na juu ya pembe zake ana vilemba kumi, na juu ya vichwa vyake majina ya makufuru.

Mtume Yohana alimwona mnyama akitoka katika bahari. Mungu anatuonyesha sisi kile ambacho Mpinga Kristo atakifanya mara atakapotokea hapa duniani kwa kupitia Mnyama huyu ambaye Yohana alimwona. Mungu alimwonyesha Yohana huyu Mnyama mwenye vichwa saba na pembe kumi si kwa kumaanisha kwamba atatokea mnyama wa jinsi hii na kisha kuonekana duniani, bali alifanya hivyo ili kutuonyesha kwamba mtu fulani mwenye mamlaka na nguvu za huyu Mnyama atakuja kutokea, atawatesa watakatifu, na kisha atawaua kama wafia-dini.

Je, hii ina maanisha kwamba kila kitu kinachoonekana katika Ufunuo ni lugha ya picha? Si kweli kabisa! Mungu alitumia maono ya jinsi hiyo ili kufunua kutokea kwa Mpinga Kristo na kazi zake katika nyakati za mwisho. Hii ni hekima na nguvu ambazo ni Mungu peke yake ndiye anayeweza kuongea. Kwa kupitia Neno la Ufunuo 13, tunapaswa kuiona picha ya wazi kabisa ya nyakati za mwisho.

Kile ambacho Yohana alikiona kwanza ni umbile la mnyama aliyetoka baharini. Hivi vichwa saba vya mnyama pamoja na pembe zake kumi zina maanisha ni nguvu za Mpinga Kristo zinazotoka hapa ulimwenguni. Hii sentensi inayosema, *“na juu ya pembe zake ana vilemba kumi, na juu ya vichwa vyake majina ya makufuru,”* maana yake ni kwamba Mpinga Kristo atawakusanya mataifa ya ulimwengu ili kusimama kinyume na Mungu. Pia sentensi hii inatueleza kwamba huyu Mpinga Kristo atawatawala wafalme wote wa ulimwengu. Vile vilemba kumi vina maanisha ni ushindi wao, na yale majina ya makufuru katika kichwa cha Mnyama yana maanisha ni kiburi na majivuno yao.

Hapo baadaye, ulimwengu utatawaliwa na kamati ya umoja wa mataifa, utawala huu utazingatia mfumo unaotelekeza matakwa ya jumla ya nchi zilizoungana. Hizi

nguvu kuu zilizoungana, ambazo muungano wa mataifa makubwa, wataupanua utawala wao na kisha kuyatawala mataifa yote ya ulimwengu, na hatimaye watazitenda kazi zote za Mpinga Kristo mara atakapokuwa ametoka hapa duniani. Mpinga Kristo ni adui wa Mungu, yeye anayefanya kazi hali akiwa amevikwa nguvu za Shetani, pia yeye ni mtumishi wa Ibilisi.

Aya ya 2: Na yule mnyama niliyemwona alikuwa mfano wa chui, na miguu yake ilikuwa kama miguu ya dubu, na kinywa chake kama kinywa cha simba, yule joka akampa nguvu zake na kiti chake cha enzi na uwezo mwingi.

Neno hili linatueleza kile ambacho Mpinga Kristo atakifanya kwa watakatifu na kwa watu wa ulimwengu mara baada ya kuonekana kwake. Mpinga Kristo anayekuja atafanya vitu vya kikatili kwa watakatifu kwa kuwa atakuwa amepokea mamlaka na nguvu toka kwa Shetani ili kufanya mambo hayo. Hii inatuonyesha jinsi Mpinga Kristo atakavyowafanyia watakatifu kwa sumu mara baada ya kuonekana kwake, na hii inaonyesha ni aina gani ya mateso ambayo watakatifu watakabiliana nayo toka kwa Mpinga Kristo na hatimaye kushinda kwa kuuawa kama wafia-dini.

Neno hili linatuonyesha jinsi Mpinga Kristo alivyo katili. Sentesi inayosema, “*na miguu yake ilikuwa kama miguu ya dubu,*” inaonyesha jinsi nguvu zake zilivyo na uharibifu. Na huyu “Joka” kwa asili yeye alikuwa ni malaika aliyeumbwa na Mungu, na ambaye alishindana na Mungu kwa ajili ya kiti cha enzi cha Mungu. Mnyama anayeonekana katika sura hii ana maanisha ni yule aliyepokea mamlaka toka kwa Joka na anayefanya kazi ya kusimama kinyume na Mungu na watakatifu wake.

Shetani, ambaye alikuwa ni malaika aliyefukuzwa

Mbinguni, atatoa nguvu na mamlaka yake kwa yule ambaye atasimama kinyume na Mungu, na kisha kumwongoza kwenye mauti yake kwa kumfanya apigane na Mungu na watakatifu wake. Mpinga Kristo, hali akiwa amevikwa nguvu za Shetani, atawanyanyasa watu wa Mungu na wanadamu wote kwa ukatili hapo baadaye.

Aya ya 3: Nikaona kimoja cha vichwa vyake kana kwamba kimetiwa jeraha la mauti, na pigo lake la mauti likapona. Dunia yote ikamstaajabia mnyama yule.

Aya hii inatueleza kwamba Mpinga Kristo atatokea kama mmoja wa wafalme saba. Mpinga Kristo anatajwa pia kama Mnyama kwa kuwa atatenda vitu vya kinyama kwa watakatifu.

Hapa, adui wa Mungu na wa watakatifu atatokea kama anayeweza kutatua hata tatizo la kifo katika nyakati za mwisho. Kwa hiyo, watu wengi wa nyakati za mwisho watamwamini kwamba anaweza kutatua matatizo yote yanayoipiga dunia. Lakini yeye ni adui wa Mungu. Pamoja na kuwa atawafanya watu wa kidunia kusalimu amri mbele zake, ukweli ni kwamba hatimaye ataangamizwa kwa kitendo chake cha kusimama dhidi ya Mungu na watakatifu wake.

Aya ya 4: Wakamsujudu yule joka kwa sababu alimpa huyo mnyama uwezo wake; nao wakamsujudu yule mnyama, wakisema, Ni nani afananaye na mnyama huyu? Tena ni nani awezaye kufanya vita naye?"

Hii aya inatueleza kwamba yule Joka atazitoa nguvu zake zote kwa yule anayefanya mambo ya kinyama, ambaye atakuwa amemgeuza kuwa mtumishi wake. Kwa sababu ya jambo hili, watu wote wa ulimwenguni watamfikia yule Joka kana kwamba ni mungu, huku wakitetemeka kwa hofu, na kisha kumwabudu. Kwa kuwa wakati huo hakuna mfale yeyote

katika dunia hii atakayekuwa na nguvu alizonazo Joka, basi hakuna hata mmoja atakayeweza kumzuia asijitangaze kuwa yeye ni mungu.

Kwa kuwa Joka anampatia huyo Mnyama nguvu kuu, basi kila mtu atamheshimu Joka na Mnyama na kisha kumwabudu huyu Mnyama kama mungu wao. Wakati Mpinga Kristo akiwa amepokea nguvu za jinsi hiyo atakapoonekana, wale wanaopenda giza kuliko nuru watamfuata, kisha watamwabudu kama mungu wao, na watamwinua juu sana.

Aya ya 5: Naye akapewa kinywa cha kunena maneno makuu, ya makufuru. Akapewa uwezo wa kufanya kazi yake miezi arobaini na miwili.

Mnyama atapokea toka kwa Joka moyo wenye kiburi na majivuno na atapokea pia mamlaka ya kuongea maneno ya kujisifu kwa miaka mitatu na miezi sita (miezi 42). Hivyo, mnyama atapokea mamlaka ya kuwadhuru watakatifu na watu wa hapa ulimwenguni kwa miaka hii mitatu na nusu.

Mnyama, ambaye ni Mpinga Kristo, atapokea mamlaka ya kunena maneno yanasimama kinyume na Mungu na kulikufuru Kanisa lake kwa miaka mitatu na nusu. Hivyo, wenye dhambi wote wataishia kusalimu amri kwa huyu Mnyama, na hivyo mwishowe wataingia katika maangamizi yao pamoja na huyo Mnyama.

Aya ya 6: Akafunua kinywa chake amtukane Mungu, na kulitukana jina lake, na maskani yake, nao wakaao mbinguni.

Huyu Mnyama, baada ya kuwa amepokea mamlaka toka kwa Joka, atamkufuru Mungu, pamoja na malaika wake wote na watakatifu kwa miaka mitatu na miezi sita, huku akimlaani Mungu na kuwapinga. Mambo haya yote yatatokea kwa jinsi anavyoelekezwa na Joka. Hapa, tunapaswa kutambua na

kuamini kwamba tendo hili la Shetani—yaani la kumpatia Mnyama mamlaka yake ili kumkufuru Mungu kwa miaka mitatu na nusu—litawezekana kwa ruhusa ya Mungu tu.

Kimsingi, Mpinga Kristo yupo ili kumkufuru Mungu na wake wake. Baada ya kupokea mamlaka toka kwa Joka, Mpinga Kristo atalikufuru jina la Mungu na watu wake kwa miaka miatatu ya nusu ya kwanza katika ile miaka ya Dhiki Kuu.

Aya ya 7: Tena akapewa kufanya vita na watakatifu na kuwashinda, akapewa uwezo juu ya kila kabila na jamaa na lugha na taifa.

Mnyama atapokea mamlaka toka kwa Joka ya kuwaua watakatifu wote na hivyo kufanya wafia-dini kati ya watakatifu. Baada ya kuwa amepewa mamlaka ya kumtiisha kila mtu katika ulimwengu huu chini ya utawala wake, basi atautawala pia ulimwengu wote.

Mpinga Kristo atawaua watakatifu, hii ni kwa sababu njia pekee ya yeye kuweza kuutawala ulimwengu ni kwa yeye kupambana na kisha kuwashinda watakatifu. Huyu anayevuta kamba ya waya ya Mpinga Kristo ni Ibilisi, malaika aliyeanguka na ambaye anataka kuabudiwa kama Mungu anavyoabudiwa. Hivyo, kwa tendo lake la kuwaua watakatifu, basi wale ambao hawajazaliwa tena upya watamhusudu. Katika wakati huu wa Dhiki, watakatifu wote watateswa na kisha kuuawa na Mpinga Kristo na kuwa wafia-dini.

Aya ya 8: Na watu wote wakaao juu ya nchi watamsujudu, kila ambaye jina lake halikuandikwa katika kitabu cha uzima cha Mwana-Kondoo, aliyechinjwa tangu kuwekwa misingi ya dunia.

Wakati Mpinga Kristo atakapokuwa ameishinda dunia hii na kuifanya mateka, basi kila mtu isipokuwa wale waliozaliwa

tena upya kwa kuamini katika injili ya maji na Roho—au wale wote ambao watakuwa hawajazaliwa tena upya—watamwabudu Mpinga Kristo kama mungu wao. Lakini huyu Mpinga Kristo ataabudiwa na wenye dhambi tu ambao majina yao hayajaandikwa katika Kitabu cha Uzima.

Aya ya 9: Mtu akiwa na sikio na asikie.

Hii inatueleza kwamba yeyeote ambaye yupo katika kundi la watu wa Mungu ni lazima aiandae imani yake tayari kwa kuuawa na kuwa mfiadini, kwa kuwa mambo haya yote yatatimizwa kama yalivyoandikwa katika Maandikko.

Aya ya 10: Mtu akichukua mateka, atachukuliwa mateka. Mtu akiua kwa upanga, atauawa kwa upanga. Hapa ndipo penye subira na imani ya watakatifu.

Hapa Mungu anasema kwamba ataleta kifo kile kile na dhiki kwa wale wote waliowaua watakatifu waliozaliwa tena upya katika nyakati za mwisho. Baada ya kupita kwa miaka mitatu na nusu katika miaka ya ile Dhiki, basi watakatifu watauawa na Mpinga Kristo na wafuasi wake. Lakini kwa wale ambao watakuwa wamewaua watakatifu, basi Mungu atawalipiza kwa dhiki kuu zaidi na mateso. Kwa hiyo, watakatifu wote ni lazima waiunganishe mioyo yao, waishinde hii Dhiki ngumu kwa imani yao katika Neno la bwana, na kisha wampatie Mungu utukufu kwa kuyapokea mauaji na kuwa wafiadini.

Aya ya 11: Kisha nikaona mnyama mwingine, akipanda juu kutoka katika nchi; naye alikuwa na pembe mbili mfano wa Mwana-Kondoo, akanena kama joka.

Hapa tunachoona si yule Mnyama wa kwanza, bali ni mnyama wa pili. Huyu mnyama wa pili anafikiri na kuongea

pia kama Joka. Sio kwamba anafikiri kana kwamba yeye ni kama Joka, lakini matendo yake yote yatawekwa katika imani yake, naye atawatesa watakatifu kwa ukatili zaidi. Huyu mnyama ni nabii wa Mpinga Kristo.

Aya ya 12: Naye atumia uwezo wote wa mnyama yule wa kwanza mbele yake. Naye aifanya dunia na wote wakaao ndani yake wamsujudie mnyama wa kwanza, ambaye jeraha lake la mauti lilipona.

Mnyama wa pili, hali akiwa amepewa nguvu ya Mnyama wa kwanza, atamsujudu Mnyama wa kwanza na kisha kumfanya yeyote atakayekuwa yupo hapa duniani kumwabudu huyo Mnyama pia. Kazi yake itakuwa ni kuzifanya sanamu za Mnyama wa kwanza na kisha kumfanya kila mtu kuiabudu sanamu hiyo kama vile Mungu. Kwa sababu ya kazi hii, Mnyama wa kwanza ataabudiwa kana kwamba yeye ni Mungu. Hii ndiyo hali yake ni udhihirisho wa kweli wa Shetani.

Aya ya 13: Naye afanya ishara kubwa, hata kufanya moto kushuka kutoka mbinguni uje juu ya nchi mbele ya wanadamu.

Kwa kuwa Shetani atafanya miujiza mingi hapa duniani mbele ya macho ya wanadamu, basi ataweza kuwadanganya watu wengi. Atakuwa na nguvu ya kuweza hata kuufanya moto utoke mbinguni kuja duniani.

Aya ya 14: Naye awakosesha wale wakaao juu ya nchi, kwa ishara zile alizopewa kuzifanya mbele ya huyo mnyama, akiwaambia wakaao juu ya nchi kumfanyia sanamu yule mnyama, aliyekuwa na jeraha la upanga naye akaishi.

Lakini muda si mrefu, Shetani atazifunua rangi zake halisi. Anachotaka kukifanya ni kuiiba imani ya Mungu toka katika mioyo ya watu na kisha kuwafanya wamwabudu yeye. Ili

kufanikisha jambo hili, atafanya miujiza mingi mbele za wanadamu na kisha atawaua watu wa Mungu. Ili kulitimiza dhumuni lake la mwisho—yaani kuwa kama Mungu—basi Shetani atajaribu kujiinua ili kuwa sawa na Mungu. Hivyo atafanya sanamu ya Mnyama wa kwanza na kuwafanya watu wamwabudu kama vile ni Mungu.

Aya ya 15: Akapewa kutia pumzi katika ile sanamu ya mnyama, hata ile sanamu ya mnyama inene, na kuwafanya hao wote wasioisujudu sanamu ya mnyama wauawe.

Kwa kuwa kikwazo kikuu cha yeye kujifanya kuwa Mungu ni watu wa Mungu, basi Shetani atafanya kila awezalo kuwaondolea mbali. Hivyo atawaua wale wote ambao hawaiabudu sanamu ya Mnyama, atafanya hivyo bila kujalisha wingi wa watu hao. Lakini watakatifu hawatasalimu amri kwa Mnyama huyu. Kwa hiyo, watakatifu wengi wakati huo watakuwa tayari kupokea vifo vya kuifia-dini kwa imani yao, huku wakiangalia zaidi maisha yao ya baadaye baada ya kufa. Kwa kuwa Mpinga Kristo atakuwa ameleta mateso makuu kwa watakatifu, basi Mungu atamwandalia mapigo ya mabakuli saba na adhabu ya kuungua milele huko kuzimu.

Ayay ya 16-17: Naye awafanya wote, wadogo kwa wakubwa, na matajiri kwa maskini, na walio huru kwa watumwa, watiwe chapa katika mkono wao wa kuume, au katika vipaji vya nyuso zao; tena kwamba mtu awaye yote asiweze kununua wala kuuza, isipokuwa ana chapa ile, yaani, jina la mnyama yule, au hesabu ya jina lake.

Wakati Dhiki itakapofikia kiwango chake cha juu, Mpinga Kristo atawataka watu wote kuipokea alama au chapa katika mikono yao ya kulia au katika vipaji vyao vya nyuso, atafanya hivyo ili kuhakikisha kwamba kila mtu anakuwa chini ya

himaya yake. Alama au chapa hii ni alama ya Mnyama. Mpinga Kristo atawalazimisha watu kuipokea alama yake ili kuwafanya watu wote kuwa watumishi wake.

Hali akishikilia maisha ya watu kama vile dhamana yake, basi Mpinga Kristo ataendelea na mipango yake ya kisiasa. Hivyo atamfanya yule asiye na alama ya Mnyama, ambayo ni uthibitisho wa utii kwake, kutoweza kununua wala kuuza kitu chochote. Alama hii jina la Mnyama au namba yake. Wakati Mnyama atakapokuja hapa ulimwenguni hapo baadaye, basi kila mtu atatakiwa kuipokea alama yake, alama iliyotengenezwa kwa jina lake au namba yake. Hivyo, ni lazima tujikumbushe juu ya onyo la Mungu kwamba wale wote watakaopokea alama yake watatupwa katika ziwa la moto na kibiriti.

Aya ya 18: Hapa ndipo penye hekima. Yeye aliye na akili, na aihesabu hesabu ya mnyama huyo; maana ni hesabu ya kibinadamu. Na hesabu yake ni mia sita, sitini na sita.

Namba ya huyu Mnyama ni 666. Kwa kifupi, hii ina maanisha kwamba huyu Mnyama anakazia kwamba yeye yupo sawa na Mungu. Je, kuna namba yoyote inayoonyesha kwamba, “Mwanadamu ni Mungu?” Namba inayobeba maana hiyo ni namba ya Mpinga Kristo. Kwa hiyo, watakatifu hawawezi kuipokea alama hii, kwa kuwa Mungu Utatu ndiye Mungu wetu wa kweli. Watakatifu ni lazima wamshinde Shetani kwa imani yao katika Bwana na kisha kumpatia Mungu utukufu. Hii ni imani nzuri na ibada ambayo kwa hiyo watakatifu wanaweza kumpatia Bwana utukufu. Hebu tushinde kwa imani yetu.

Maelezo ya Maneno Makuu

Mada ya sura ya 13 inaongelea juu ya kuonekana kwa

Mpinga Kristo na Shetani. Baada ya kuonekana kwao, watakatifu wapambana nao katika vita ya kiroho, ambayo hatimaye hawatakuwa na la kufanya zaidi ya kuuawa na kuifia-dini kwa mkono wa Mpinga Kristo. Mpinga Kristo ni mtumishi wa Shetani, na ndiye atakayewatesa watakatifu na kuwafanya wafe kwa kuifia-dini.

Wakristo wote na wasio Wakristo wanaoishi katika kipindi cha sasa wanapaswa kulifahamu Neno la Ufunuo. Sura ya 13 ya Ufunuo inatabiri kwamba utafika wakati ambapo Shetani atamfanya Mpinga Kristo kuwa kama Mungu. Shetani atatoa mamlaka yake kw ammoja wa viongozi wenye nguvu wa kisiasa wa hapa ulimwenguni na atamfanya kiongozi huyo kusimama kinyume na Mungu na watakatifu wake. Kimsingi, Mpinga Kristo atajifanya kama Mungu na kisha kumshambulia Mungu.

Kila mtu wakiwemo watu wa Mungu watateseka sana kutokana na dhiki na mateso yatakayoletwa na Mpinga Kristo mnyama. Kifungu kikuu kinaonyesha kwamba sanamu ya Mpinga Kristo, baada ya kuwa imepokea pumzi ya uhai ya Shetani, itaweza kuongea kama vile ipo hai, pia itakuwa na mamlaka ya kuwadhuru watu. Hivyo wale ambao hawajazaliwa tena upya watasalimu amri kwa Mpinga Kristo na kisha kuwa watumishi wake. Kwa upande mwingine, wale wote wasioiabudu sanamu ya Shetani, watauawa bila kujalisha idadi yao. Pia Shetani atawafanya wote kuipokea alama yake au namba yake katika mikono yao ya kulia au katika vipaji vya nyuso zao.

Sisi sote tunapaswa kuiandaa imani yetu mapema, na kisha tupambane na kumshinda Shetani kwa imani yetu hapo baadaye kwa kufahamu na kuamini juu ya maana ya Neno hili lililofunuliwa katika Ufunuo 13. Watu wa Mungu wa leo wanapaswa kumpatia Bwana utukufu kwa kujifunza na

kuliamini Neno hili la Ufunuo, na hivyo kusimama imara dhidi ya Mpinga Kristo na kisha kumshinda kwa ushindi.

Asili ya Kuzimu

Kwanza tunapaswa kufahamu ni kwa nini kuwe na kuzimu na kwamba ilianza wapi hadi ikawepo. Kuzimu ni mahali palipoandaliwa kwa ajili ya Shetani. Biblia inatueleza kwamba yeye hakuwa Shetani tangu mwanzo, bali alikuwa ni mmoja wa malaika wengi walioumbwa na Mungu. Lakini kwa sababu ya kumbishania Mungu kwa ajili ya kiburi na majivuno yake, basi malaika huyu aligeuka na kuwa Shetani kama mshahara wa dhambi yake, na kuzimu ni mahali ambapo Mungu alipaumba ili aweze kumfungia huko. Mungu aliifanya kuzimu ili aweze kumpatia Shetani pamoja na wafuasi wake adhabu iliyohifadhiwa kwa ajili ya wale wote wanaosimama kinyume na Mungu.

Isaya 14:12-15 inaleza jinsi malaila huyu alivyoishia kugeuka kuwa Shetani: *“Jinsi ulivyoanguka kutoka mbinguni, Ewe nyota ya alfajiri, mwana wa asubuhi! Jinsi ulivyokatwa kabisa, Ewe uliyewaangusha mataifa! Nawe ulisema moyoni mwako, Nitapanda mpaka mbinguni, Nitakiinua kiti changu juu kuliko nyota za Mungu; Nami nitaketi juu ya mlima wa mkutano, Katika pande za mwisho za kaskazini. Nitapaa kupita vimo vya mawingu, Nitafanana na yeye Aliye juu. Lakini utashushwa mpaka kuzimu; Mpaka pande za mwisho za shimo.”*

Malaika huyu aliyesimama kinyume na Mungu huko Mbinguni alikifanyia hila kiti cha enzi cha Mungu. Baada ya kuona kwamba ni Mungu tu ndiye aliyekuwa juu ya kiti cha enzi, basi huyu malaika aliwaza kumwondoa ili yeye aweze

kukikalia kiti cha enzi cha Mungu, lakini kama matokeo ya uasi huu ulioshindwa, malaika huyo alifukuzwa na Mungu toka Mbinguni na hatimaye akaishia kuwa Shetani. Pia Biblia inawataja malaika wengine waliomfuata Shetani kuwa ni mapepo.

Mungu aliitengeneza sehemu hii inayoitwa “kuzimu” ili kuitoa adhabu yake ya haki kwa viumbe ambao waligeuka na kuwa kinyume na Mungu. Ingawa Shetani anaweza kuonekana kama anamletea Mungu changamoto bila ukomo huku akizikufuru kazi zake, basi ukweli ni kwamba injili ya maji na Roho itakapohubiriwa kwa wote, basi Shetani huyu atafungwa katika shimo la kuzimu lisilo na mwisho kwa miaka elfu moja.

Kwa kuwa kimsingi Shetani hataitubia dhambi yake ya kugeuka na kuwa kinyume na Mungu, basi ataendelea kujiinua ili awe juu kama Mungu, na hatimaye ataishia kupokea adhabu ya kutisha huko kuzimu milele. Shetani ataendelea kusimama kinyume na Mungu na kinyume na wenye haki kwa kuwafanya watu wamfanye yeye kuwa Mungu hadi mwisho. Biblia inamtaja huyu malaika aliyeanguka na anayemkufuru Mungu na watakatifu wake, kuwa ni Shetani au Ibilisi, na Joka wa kale (Ufunuo 12:9).

666, Namba ya Mnyama

Hatimaye Mungu atamfunga Shetani katika gereza lake. Lakini kabla ya kufungiwa kuzimu, Shetani atawafanya watu waipokee alama ya 666, ambayo ni jina na namba yake, katika mikono yao ya kulia au katika vipaji vya nyuso zao. Atakamkataza mtu yeyote asiyekuwa na alama hii kununua au kuuza chochote.

Namba 7 ni namba ya ukamilifu, ambayo ina maanisha

kuwa ni Mungu. Kwa upande mwingine, namba sita ina maanisha ni mwanadamu, hii ni kwa sababu Mungu alimwumba mwanadamu katika siku ya sita kwa sura na mfano wake. Hii namba ya Mnyama, yaani 666, ina onyesha kiburi cha mwanadamu kwa kujaribu kuwa kama Mungu Utatu. Muda si mrefu, utafika wakati hapa uliwenguni ambapo wanadamu wataipokea alama hii ya 666.

Ufunuo 13:1 inatueleza kwamba wafalme saba watatokea kati ya mataifa kumi. Kati yao, yeye aliye na nguvu kuu, na aliyepewa mamlaka toka kwa Shetani, atauweka ulimwengu huu chini ya utawala wake. Atafanya miujiza mikuu kama vile kuliponya jeraha lake la kufa na kuleta moto toka mbinguni kuja duniani, atawafanya watu wote wa ulimwengu kumfuata.

Kwa maneno mengine, kadri Shetani anavyowafanya watu kumfuata kuliko kumfuata Mungu, basi watu wengi wataishia kumwabudu yeye kama Mungu. Kama vile mashujaa wanavyoinuka wakati wa shida, Mpinga Kristo, baada ya kuwa amepokea mamlaka makuu toka kwa Shetani, atataka kufuatwa na kila mtu kama Mungu, atafanya hivyo kwa kuyatatua matatizo ya kisiasa na ya kiuchumi ambayo ulimwengu itakuwa ikikabiliana nayo. Hatimaye, Shetani atazidhirisha rangi zake kwa kujaribu kumpa Mungu changamoto katika nyakati za mwisho.

Kama tunavyoweza kuona atoka katika Kitabu cha Danieli, Dhiki Kuu itageuka na kuwa kali sana itapofikia nusu yake ya kwanza, ambayo itadumu kwa miaka mitatu na nusu, na kipindi hiki ni cha mapigo ya kutisha na kipindi cha utawala wa Shetani wenye nguvu. Lakini mara baada ya kuisha kwa miaka hii mitatu na nusu, basi kitakachofuata ni dhiki kuu sana kama bomu. Wakati huu, Shetani atapewa mamlaka kuzifanya kazi zake kati ya watu ulimwenguni, huku akimuua yeyote asiyemsikiliza, huku akiwadanganya wanadamu kwa miujiza

yake inayoweza kuleta moto toka angani, atajifanyia kuwa Mungu, na kisha atawafanya wanadamu kuzifanya kazi za machukizo dhidi ya Mungu.

Wakati huo huo, Mpinga Kristo, baada ya kuwa amepokea mamlaka toka kwa Shetani, awakufuru watakatifu kuwaua watakatifu wote wasiomtii yeye. Kama aya ya 7-8 inavyotueleza, *“Tena akapewa kufanya vita na watakatifu na kuwashinda, akapewa uwezo juu ya kila kabila na jamaa na lugha na taifa. Na watu wote wakaa juu ya nchi watamsujudu, kila ambaye jina lake halikuandikwa katika kitabu cha uzima cha Mwana-Kondoo, aliyechinjwa tangu kuwekwa misingi ya dunia.”* Hata hivyo, wapo wale ambao watakataa kumwabudu Mnyama wakati huo, na hao si wengine bali ni wale watu wa Mungu waliozaliwa atena upya na ambao majina yao yameandikwa katika Kitabu cha Uzima cha Mwana-kondoo.

Tukio la Mauji ya Wafia-dini

Mauji ya wafia-dini ni tukio ambalo litatokea wakati watakatifu waliozaliwa tena upya kwa kuamini katika injili ya maji na Roho watakapoilinda imai katika Bwana kwa kuikataa alama ya Shetani. Kwa lugha nyingine, Dhiki Kuu itafikia kiwango chake cha juu itakapokaribia mwisho wa miaka mitatu na nusu katika ile miaka ya Dhiki. Wakati huu, wenye haki ni lazima wajiandae kwa mauaji ya kuifia-dini.

Hata hivyo, wale ambao hata kama wanamwamini Yesu kama Mwokozi wao, watakuwa hawajaiamini injili ya maji na Roho, na kwa sababu hiyo kutopokea ondoleo la dhambi zao na hivyo kubaki na dhambi katika mioyo yao, wataishia kuwa upande wa Shetani na hatimaye kusalimu amri. Hii ni kwa sababu Wakristo wanaomwamini Yesu lakini ambao

hawajazaliwa tena upya hawana Roho Mtakatifu katika mioyo yao, basi wakibilishwa na msukosuko kidogo, wote hao wataishia kusalimu amri kwa Shetani, na kisha kuipokea alama yake katika mikono yao ya kulia au katika vipaji vya nyuso zao, na hatimaye watamwabudu yeye kana kwamba ni Mungu.

Ni lazima tufahamu kwa wazi kwamba wale wasiomwabudu Shetani wakati huo watakuwa ni wale tu waliopokea ondoleo la dhambi zao. Pia tunapaswa kutambua kwamba Mungu ametueleza bayana kwamba atawatupa wale wote watakaosalimu amri kwa Mnyama pamoja na Shetani katika ziwa la moto na kibiriti.

Aya ya 9-10 inatueleza kwamba, *“Mtu akiwa na sikio na asikie. Mtu akichukua mateka, atachukuliwa mateka. Mtu akiua kwa upanga, atauawa kwa upanga. Hapa ndipo penye subira na imani ya watakatifu.”* Wakati huu, Mpinga Kristo na wafuasi wake wataleta mateso makuu kwa wenye haki, watawatoa na kisha kuwaua kwa mapanga yao. Hata hivyo, tunachopaswa kukitambua hapa ni kwamba ni hakika kuwa Mungu atatulipia kisasi kwa adui zetu wanaowaua na kuwatesa wenye haki.

Kwa hiyo, watakatifu ni lazima wayapitie mateso na vifo kwa kuziamini ahadi za Mungu. Ikiwa Mungu hangelipanga kutulipia kisasi tungeliwezaje kuifumbia macho haki yetu? Lakini kwa vile Mungu alimeahidi kutulipia kisasi kwa adui zetu wanaotudhuru, basi ni hakika kwamba vifo vyetu hazitaishia kwenye utupu. Ni hakika kwamba Mungu atalipa kisasi kwa wale wote wanaowatesa na kuwanyanyasa wenye haki, kisha atawaongoza wenye haki kuelekea katika ufufuo wao, kunyakuliwa, na katika karamu ya harusi ya Mwana-Kondoo, na atawafanya kutawala pamoja na Bwana kwa miaka elfu moja nao wataishi na Bwana milele. Sisi sote tunaamini juu ya hili na tuna tumaini hivyo. Hivyo, Bwana wetu ndiye Mungu bora ambaye atayatimiza matumaini yetu yote. ☒

Kuonekana Kwa Mpinga Kristo

< Ufunuo 13:1-18 >

Kwa kuzingatia kifungu kikuu hapo juu, sasa nitajadili juu ya kuonekana kwa Mpinga Kristo na mauaji ya wafia-dini. Kuanzia sura ya 13 tunamwona Mnyama akitoka katika bahari. Huyu Mnyama, ambaye ana pembe kumi na vichwa 7 si mwingine bali ni Mpinga Kristo. Kifungu hiki kinatueleza kwamba juu ya pembe za yule Mnyama kulikuwa na vilemba kumi, na juu ya vichwa vyake kulikuwa na majina ya makufuru. Pia tunaelezwa kwamba huyu Mnyama alikuwa ni kama chui, na miguu yake ikiwa kama miguu ya dubu, na mdomo wake ulikuwa kama mdomo wa simba. Kwa nyongeza, yule Joka akampatia nguvu zake, kiti chake cha enzi, na mamlaka makuu. Moja ya kichwa chake kilikuwa na jeraha la mauti, lakini hili jeraha la mauti lilipona kwa miujiza.

Ulimwengu wote ulianza kumfuata yule Mnyama kwa sababu ya maajabu hayo, na kwa kuwa alikuwa amepewa mamlaka makuu na yule Joka, basi wanadamu wakamwabudu Joka na yule Mnyama, huku wakisema, “Ni nani aliye kama Mnyama huyu? Ni nani anayeweza kufanya vita dhidi yake?” Hiki kifungu kinatueleza kwamba Mnyama alipewa kichwa cha kuongea maneno makuu na makufuru, na mamlaka ya kuendeleza kazi zake kwa miezi 42.

Mnyama Akitoka Baharini

Alichokiona Mtume Yohana ilikuwa ni kuonekana kwa Mpinga Kristo kati ya watawala wa ulimwengu huu katika nyakati za mwisho. Huyu Mpinga Kristo alikuwa ni Mnyama aliyekuwa akitoka baharini, mnyama mwenye pembe kumi na vichwa saba.

Kwanza ni lazima tufahamu ikiwa Mnyama huyu ndiye yule Mnyama halisi ambaye ataonekana hapa ulimwengu. Kuna mambo mawili kuhusu Mnyama ambayo ni ya msingi: kwanza, ikiwa ni kweli au si kweli kwamba huyu Mnyama ataonekana hapa ulimwenguni na kisha kuwaua watu wengi; na pili ni ikiwa Mnyama huyu anamaanisha ni Mpinga Kristo katili ambaye atatokea kati ya watawala wa ulimwengu. Haya ni baadhi ya mambo ambayo yanawavuta watu wengi sana. Wale wanaoyafahamu mambo haya wanaweza kusema kwamba mambo haya ni rahisi kuyaelewa, lakini kwa wale wasioyafahamu, ni kitu cha kawaida kwao kujiuliza juu ya ikiwa Mnyama huyo ataonekana kiuhalisia katika nyakati za mwisho na kisha kuwatawala watu au la.

Kile ambacho Mungu anatueleza katika sura ya 13 ni kuhusu kuonekana kwa mfalme katika ulimwengu huu ambaye atatawalia na Shetani. Hii sentensi inayosema, “mnyama akitoka baharini,” maana yake ni kwamba mfalme kati ya wafalme saba wa ulimwenguni atakuwa ni Mpinga Kristo. Pia kifungu hiki kinatueleza kwamba mataifa kumi yataungana pamoja na Mpinga Kristo na kisha kutawala juu ya ulimwengu utakaokuwa umeharibiwa.

Kwa upande mwingine, jeraha la mauti katika moja ya vichwa vya yule Mnyama na kisha kupona kwake, kunatueleza kwamba mmoja kati ya wale wafalme saba atajeruhiwa kwa jeraha la mauti, lakini pia jeraha lake hili la mauti litaponywa.

Kwa misingi ya tiba za kawaida, huyu mfalme atatangazwa kuwa amekufa, lakini fahamu zake zitarudishwa kwa njia ya muujiza, kisha atatenda kama Joka. Huyu Joka anasimama kumwakilisha Shetani. Kama vile Joka, Mnyama atakuwa na mamlaka yote kuwadhuru na kuwaangamiza watu. Nyakati za mwisho zitakapowadia, mtu aliye kama mnyama ataoonekana hapa ulimwenguni na kisha kuwaua watu mauaji ya halaiki, atakuwa kama vile mnyama kama anavyoonekana Godzila katika sinema.

Kwa kuonekana kwa huyo mtumishi wa Shetani, basi ulimwengu utakuwa umeanza kukimbilia kwenda katika maangamizi yake. Njia ambayo Shetani ameamua kuitumia katika nyakati za mwisho ni kuyafikisha mateso yake kwa wanadamu kwa kupitia watumishi wake. Hii ni kanuni kama ile ya Mungu kuwaokoa wanadamu toka katika dhambi zao kwa kupitia watakatifu wake.

Tunapawa kufahamu kwa hakika kwamba kifungu hiki kinatueleza nini kwetu. Kwa kuwa kimoja kati ya vichwa vya yule Mnyama kilijeruhiwa, basi mtawala wa ulimwengu huu, huku akiwa amepata fahamu toka katika jeraha lake la mauti, atapokea mamlaka toka kwa Joka na kisha ataheshimiwa na wanadamu kana kwamba yeye ni Mungu. Hii ndio sababu tunapaswa kukumbuka jinsi watu walivyokuwa wakimnenea huyo Mnyama, *“Ni nani afananaye na mnyama huyu? Tena ni nani awezaye kufanya vita naye?”*

Huyu Mpinga Kristo anayeonekana katika kifungu hiki ataheshimiwa na watu wote chini ya utawala wa Shetani na kisha kusimama kinyume na Mungu. Hii ina maanisha kwamba kiongozi mwenye nguvu atatokea katika ulimwengu wa mwisho na kisha kuutawala ulimwengu huo. Kiongozi huyu atakuwa ni mmoja wa viongozi wa mataifa ya ulimwenguni. Baada ya kuwa amepokea roho ya Mpinga Kristo toka kwa

Shetani, basi yeye atatokea kama kiongozi mwenye nguvu sana. Kisha ulimwengu utakuja kuwa chini ya utawala wa kiongozi huu na kutawaliwa naye. Hapo baadaye ulimwengu utakuja kuungana na kuwa taifa moja. Mataifa ya sasa yaliyoendelea yatashirikiana na kupanua utawala wao kwa ulimwengu mzima kwa kumtanguliza kiongozi mwenye nguvu.

Hivi sasa kule Ulaya, tunao Umoja wa Ulaya, pia umoja wa jinsi hiyo upo pia Marekani na pia kule Asia pia, na kuna baadhi ya asasi zinazotaka kuwe na muungano wa mataifa huru ili kuwa katika taifa moja. Wakati asasi kama hizo zitakapoendelea zaidi, basi muungano wa mataifa makuu utatokea, na kiongozi mwenye nguvu atatokea toka katika mataifa yale yaliyoungana. Huyu kiongozi atatenda kama Mpinga Kristo anayesimama kinyume na Mungu. Atakuwa ni kiongozi mwenye kipaji kikubwa na mwenye mamlaka ya kuutawala ulimwengu mzima kama atakavyo.

Kwa nini? Ni kwa sababu kwa kupokea uwezo mkuu na mamlaka toka kwa Joka, Shetani, basi hekima na ufahamu wake vitakuwa tofauti na ule wa wanadamu wa kawaida, na pia fikra zake zitakuwa ni tofauti na zile za wanadamu wa kawaida. Hekima yake na mamlaka vitafika angani. Kile anachokisema kitatekelezwa pasipo shida yoyote, na hakuna hata mmoja atakayediriki kuitamani nafasi yake. Kipindi hiki cha utawala wa huyu Mpinga Kristo ni kipindi cha farasi wa kijivujivu kilichoandikwa katika Ufunuo sura ya 6.

Ni hakika kwamba kipindi cha farasi wa kijivujivu kitaugia ulimwengu hivi karibuni, kisha ulimwengu utakuwa ni mali ya Mpinga Kristo kwa muda. Lakini wale wasiufahamu ukweli huu wanataka kumwona kiongozi mwenye nguvu kama vile Mpinga Kristo akitokea. Hata hivyo, watakatifu wanaufahamu ukweli huu na hivyo katika kipindi hiki watakuwa makini, na hivyo wakati huu utakapowadia,

wataweza kupambana na Mpinga Kristo, na kisha kuuawa kama wafia-dini ili kuilinda imani yao.

Siku hizi ni watu wachache sana wanaowaheshimu viongozi wa nchi zao. Bila kujalisha kuwa unaishi katika nchi gani, ukweli ni kuwa kwa ujumla watu wana ile hali ya kutoridhishwa na viongozi wao wa kisiasa. Hivi sasa katika sehemu mbalimbali duniani watu wanamngojea kiongozi mwenye nguvu na mwenye uwezo. Kwa nini? Kwa sababu wanataka kiongozi ambaye atayatatua matatizo yote ambaye yameuelemea ulimwengu huu, kuanzia upungufu wa chakula hadi kwenye uharibifu wa mazingira, matatizo ya kidini, mdodoro wa uchumi, machafuko ya kikabila, na kadhalika. Wakati kiongozi wa ulimwengu, hali akiwa na hekima kubwa na mamlaka, atakapokuwa na uwezo wa kuyatatua matatizo yote, basi kila mtu hapa ulimwengu atamheshimu kama vile ni Mungu na atafurahi kutawaliwa na kiongozi huyo. Kiongozi huyu, Mpinga Kristo ambaye ana ulimwengu mzima mkononi mwake, atayashughulikia matatizo hayo yote.

Sisi sote tunataka kiongozi wa kisiasa ambaye tunaweza kumheshimu katika mambo yote, lakini matamanio ya jinsi hiyo ni makubwa sana kuweza kufikiwa, kwa kuwa ni vigumu kwa kiongozi kama huyo kupatikana katika hali ya kawaida. Lakini kwa kuwa Mpinga Kristo atakayekuja atayatatua matatizo mengi ya ulimwengu huu ya kiuchumi na ya kisiasa, basi atakuwa ni aina ya kiongozi ambaye kila mtu anamtaka, yaani yeye anayeweza kuleta utengamano wa kisiasa na kiuchumi duniani.

Wakati kipindi cha farasi mweusi kitakapopita na kitakapokuwa kikianza kipindi cha farasi wa kijivu, na kwa sababu ya mapigo ya matarumbeta saba, basi ulimwengu ulio magofu utatafuta kiongozi mwenye nguvu na mwenye uwezo. Viongozi wasio na nguvu wa nchi ndogo hawawezi kutatua

matatizo ya ulimwengu. Kwa hiyo, watu watamtafuta kiongozi sahihi na makini. Mpinga Kristo atatokea wakati huu, hali akizungumza na kutenda kama vile Mungu. Kwa kuwa atakuwa ameponywa toka katika jeraha lake la mauti, watu watamshangaa sana. Na kwa kuwa atatenda kama kiongozi mwenye mamlaka makuu, ujasiri, dhamira na ufahamu, basi watu wote ulimwenguni watamfikiria kuwa yeye ni Mungu.

Kwa hiyo, hata watu wa Israeli watamwamini kuwa ndiye Masihi waliyemngojea kwa muda mrefu. Lakini hatimaye Waisraeli watatambua kuwa yeye ni mwongo na kwamba Yesu Kristo ndiye Masihi wao wa kweli, na hivyo wengi wao wataokolewa. Mpinga Kristo atawasikia watu wakisema hivi, *“Tena ni nani awezaye kufanya vita naye?”* Basi wale wote wasiomtii watauawa bila shaka.

Kipindi cha farasi wa kijivujivu kitakapokuja, ulimwengu mzima sio kwamba utateseka tu kutokana mapigo ya kiasili, yaani ukiwa umeharibiwa na moto uliunguza theluthi ya misitu yote na kuvukizwa kwa moshi mkubwa, bali watu wa ulimwenguni wataungana chini ya kiongozi mmoja ili kumtumikia kama mfalme wao. Yeye atakayeyatua matatizo haya yote atainuliwa na wanadamu hao kuwa kama Mungu.

Mambo haya yote ni miongoni mwa yale ambayo Mungu ameyapanga. Kwa kuwa ili mambo haya yote yaweza kutokea ulimwenguni, basi nilazima kuwe na mabadiliko makubwa ya kimazingira duniani, na kuwe na makubaliano miongoni mwa viongozi wakuu wa kila taifa juu ya hitaji la kuwa na serikali moja inayotawala. Hivi sasa, makubaliano ya kuwa na aina hii ya kiongozi yanazungumzwa na kupangwa sana katika kipindi hiki cha farasi mweusi. Hivi sasa ulimwengu unamuhitaji kiongozi imara. Kwa kuwa viongozi wa kila taifa wanashindwa kuiondoa hali ya kutoridhika ya watu wao, basi wanadamu hivi sasa wanamtafuta kiongozi mwenye nguvu anayeweza

kuyatatua matatizo yote wanayokabiliana nayo.

Ikiwa utaangalia kwa karibu juu ya kile kinachotokea hapa ulimwenguni, basi utatambua kwamba mambo haya yote yapo karibu sana kukamilika. Kiongozi aliyetabiriwa atakuwa ni mkatili sana, mtu mwenye nguvu kamili na uwezo mkuu, kama anavyoonekana kutokana na maelezo kwamba miguu yake ilikuwa ni kama ile ya dubu, na kinywa kama cha simba, na mwenye sura kama ya chui.

Huyu mtu, hali akipokea mamlaka toka kwa Joka, atamkufuru Mungu, na malaika wake Mbinguni, na watakatifu wake. Naye atapigana na watakatifu na kisha kuwashinda. Mpinga Kristo atawaua watakatifu katika mapambano yake dhidi yao, huku akiwataka kuikana imani yao. Kwa kuwa watakatifu hawataikana imani yao wakati huu, basi watakatifu hao wote watauawa kama wafia-dini. Na kwa kuwa Mpinga Kristo atakuwa na mamlaka juu ya ulimwengu wote, basi atawaua kwa uhuru wale wote wasioziti amri zake.

Aya ya 8 inatueleza kwamba, *“Na watu wote wakaao juu ya nchi watamsujudu, kila ambaye jina lake halikuandikwa katika kitabu cha uzima cha Mwana-Kondoo, aliyechinjwa tangu kuwekwa misingi ya dunia.”* Kwa kuwa Mpinga Kristo atatawala kama kiongozi mkuu wa wakati huo, basi yeyote asiyemtii yeye atauawa kwa amri yake. Hata hivyo, wakati huo utakuwa ni wakati wa kufia-dini kwa watakatifu wote.

Katika aya ya 8 hapo juu, kuna neno “kusujudu” na maana yakeni kumheshimu na kumtumikia yeye aliye mkamilifu. Katika nyakati za mwisho, Mpinga Kristo ataabudiwa na watu hapa duniani kama vile ni Mungu, atapokea heshima kubwa sana ambayo hakuna mfalme yeyote aliyepita hapa duniani aliyewahi kuzipata. Hata hivyo kundi fulani la watu halitamsujudia kiongozi huyu. Na kundi hilo si jingine bali ni “Wakristo waliozaliwa tena upya.” Wao hawatamtambua

Mpinga Kristo kuwa ni Mungu, na kwa hiyo, hawatamsujudia na kwa sababu hiyo watauawa ili kuilinda imani yao.

Mnyama Mwingine Akitoka Katika Nchi

Mpinga Kristo pia anaye nabii wake wa uongo. Huyu nabii wa uongo ndiye atakayemwinua Mpinga Kristo, pia atawatisha na kuwaua wale wote wasiomtii Mnyama. Ufunuo 13:11 inasema, *“Kisha nikaona mnyama mwingine, akipanda juu kutoka katika nchi; naye alikuwa na pembe mbili mfano wa Mwana-Kondoo, akanena kama joka.”* Mnyama wa pili anayeonekana hapa ni mtumishi wa Mnyama wa kwanza—yaani Mpinga Kristo. Kama Mpinga Kristo, yeye naye atasimama kinyume na Mungu na kuwaua watu wa ulimwengu na wenye haki.

Hali akiwa amepokea mamlaka toka kwa Joka, atawalazimisha watu kumsujudia Mpinga Kristo aliyekuja kabla yake kama Mungu. Na kwa kuwa yeye naye atakuwa amepokea mamlaka toka kwa Joka, basi atatenda yale ambayo Joka anataka ayatende. Sio tu kwamba atawafanya watu wamwabudu Mpinga Kristo aliyekuja kabla yake na kuwaua wale wote wasiomtii, bali pia atatenda miujiza, kama vile kuleta moto toka angani, na pia atatenda kama Mpinga Kristo. Atamfanya Mnyama kuwa ni Mungu na atatengeneza sanamu za Mnyama, yaani yule aliyekuwa amepata jeraha la mauti lakini akapona toka katika jeraha lake.

Ni nani basi ambaye atatenda mambo haya yote? Huyu ni nabii wa Mpinga Kristo. Kazi yake ni kutengeneza sanamu ya Mpinga Kristo aliyekuja kabla yake na kisha kuwafanya watu wamwinue huyu Mpinga Kristo kama vile Mungu. Ili kufanya hivyo, ataipulizia hiyo sanamu ya Mpinga Kristo pumzi ya uhai

ili iweze kuongea, na kisha kuwaua wale wote ambao hawaisujudii sanamu hii ya Mnyama pasipo kujali idadi yao. Kwa kuwa watakatifu watauawa ili kuifia-dini kwa kukataa kuisujudia sanamu, basi idadi kubwa ya wafia-dini watauawa wakati huo.

Kwa upande mwingine, kila mtu ulimwenguni ambaye hajazaliwa tena upya atatetemeka mbele ya kifo chake na kuishia kuwa mtumwa wa kifo chake. Kwa hiyo, watu wengi wataishia kumsujudia Mpinga Kristo kama vile ni Mungu. Wale walio na akili zenye ufahamu mzuri wanaweza kuinuka na kuleta upinzani dhidi ya huyo dikteta, lakini watauawa kwa haraka sana, watauawa kwa moto unaotoka katika kinywa cha yule nabii wa uongo na Mpinga Kristo.

Huyu nabii wa uongo, baada ya kuwa ametengeneza sanamu ya Mpinga Kristo, atasema hivi, “Kila mtu ni lazima apokee alama ya jina lake au namba yake!” kisha atatengeneza sera yake kwamba yeyote asiyekuwa na alama ya huyu Mnyama kutofanya aina yoyote ile ya biashara, ili kwamba kila mtu aweze kupokea alama hii ya jina la Mnyama. Aya ya 18 inasema, *“Hapa ndipo penye hekima. Yeye aliye na akili, na aihesabu hesabu ya mnyama huyo; maana ni hesabu ya kibinadamu. Na hesabu yake ni mia sita, sitini na sita.”*

Maelezo haya yapo wazi kabisa. Ingawa tunaweza kufikiri kwamba namba 666 kuwa ni kitu kilichojichanganya, kwa kweli namba hii ina maanisha ni jina la Mpinga Kristo au namba yake. Kupokea alama au chapa ya Mnyama maana yake ni kupokea alama ya jina lake katika kipaji cha uso au katika mkono wa kuume. Kitendo hicho kinalenga kuliandika jina la mtu katika mwili wa mtu, yaani likiwa limeandikwa katika namba au kuwekwa katika mfumo wa digitali wa baa-kodi.

Alama hii itahitajika kila mahali wakati mtu akijaribu kununua kitu chochote. Hata ukipanda basi, utahitajika

kuonyesha hii namba ya digitali ikiwa imeandikwa katika mwili wako, na pasipo kuwa na namba hiyo basi hutaruhusiwa kufanya safari yoyote. Kipindi cha leo ndio kipindi halisi cha digitali. Ni kipindi cha namba. Kwa kuwa kila kitu kimetafsiriwa katika namba, basi kile ambacho zamani kilikuwa kimefanywa kuwa kigumu hivi sasa kimerahisishwa. Ni katika kipindi hicho ndipo alama ya Mnyama itakapoonekana.

Mpinga Kristo atatengeneza sanamu yake na kuwataka watu waiabudu kama vile ni Mungu. Ni hakika kwamba utafika wakati ambapo watu watatakiwa kumwita Mpinga Kristo kuwa ni “Mungu” wao, watamsifu na kisha kuliitia jina lake kwa heshima, kisha watalipokea jina lake katika mikono yao ya kuume au katika vipaji vya nyuso zao. Wakati mambo kama hayo yatakapotoka, basi watakatifu wote watauawa kama wafia-dini. Mpinga Kristo atawataka watakatifu kuipokea alama yake na kisha kumsujudia yeye, huku akisema, “Kwa hiyo mnamwamini Yesu? Mnamwamini kuwa ni Mungu wenu? Achaneni naye! Hebu muisujudie hii sanamu na badala yake mniite mimi kuwa ni Mungu! Niaminini mimi kwamba ndiye niliye mkamilifu! Ikiwa hamtafanya hivyo basi ni hakika kwamba mtakufa!”

Mpinga Kristo atataka kuwe na imani moja ulimwenguni kote. Na atamtaka kila mtu kumwabudu yeye kama Mungu. Wale wasiokiri wakati huo kuwa yeye ni Mungu watauawa wote. Mpinga Kristo atawaua watakatifu wanaosimama kinyume naye hadharani.

Wale wote ambao majina yao hayajaandikwa katika Kitabu cha Uzima cha Mwana-kondoo wataipokea alama ya Mnyama na kumwabudu. Tunapopokea ondoleo la dhambi katika mioyo yetu, Roho Mtakatifu anakaa ndani yetu, na majina yetu yanaandikwa katika Kitabu cha Uzima katika

Ufalme wa Mbinguni. Kwa kuwa majina yetu yameandikwa katika Kitabu cha Uzima na kwa kuwa Roho Mtakatifu ameitia mihuri mioyo yetu, basi sisi sote tutainuliwa kama watoto wa Mungu wakati atakapotuita.

Je, tunaweza kweli kumkana Yesu Kristo ambaye ametuokoa, na kisha kuitangaza sanamu ya Mnyama kuwa sasa ndio Mungu wetu na Mwokozi? Kwa kweli haiwezekani! Haijalishi hata kama tuna mapungufu kiasi gani mbele ya Mungu, ukweli ni kuwa Bwana wetu alikuja hapa duniani katika mwili wa mwanadamu, akazisafisha dhambi zetu zote kwa kuzichukua dhambi hizo katika mwili wake kwa ubatizo wake, kisha akatuokoa kwa kuhukumiwa kwa niaba yetu Msalabani.

Pia, kwa kuwa Bwana wetu amekwisha tuambia kuhusu mambo haya yote yatakayokuja mapema, basi sisi wenye haki hatuwezi kuikana kamwe imani yetu wakati huo wa Mpinga Kristo. Ingawa wakati wa dhiki utatujia na kisha kufuatia na vifo vyetu, bado tunaamini kwamba Bwana wetu atatufanya kuishi katika Ufalme wake wa Mbinguni na kutufufua na kutunyakua mara baada ya kuuawa kwetu na kuifia-dini.

Kwa kuwa tunaamini kwamba baada ya kunyakuliwa kwetu Mungu atauangamiza ulimwengu huu kwa kuyamimina mapigo yake ya mabakuli saba, na kwamba baada ya mapigo haya tutashuka hapa duniani na kisha kutawala kwa miaka elfu moja, hatuwezi kamwe kupiga magoti mbele ya sanamu. Hii ndio sababu watumishi na watakatifu wa Mungu watayatoa kwa hiyari maisha yao.

Nabii wa uongo atajaribu kutushawishi kinyume chake. Atajaribu kutununua huku akisema, “Tazama, kwa sasa machafuno ni mengi sana katika ulimwengu huu. Wakati kila mtu wakiwemo wataalamu na wanazuoni wanamwamini na kumfuata huyu kiongozi mkuu kama Mungu, inawezekanaje

basi kwa ninyi kumkataa huyu mfalme wetu mkamilifu?” Lakini kama tutalifahamu na kuliadini Neno la Mungu wakati wote, basi hapo mwishoni tutashinda kwa kuyakubali na kuyapokea mauaji yetu ya kuifia-dini.

Katika Ufunuo 14 kunaonekana watakatifu 144,000 wakimsifu Mungu Mbinguni. Hii inatueleza juu ya ufufuo wa watakatifu na unyakuo wao mara baada ya kuuawa kama wafia-dini. Tunaweza pia kuona juu ya unyakuo katika sehemu mbalimbali katika Biblia, kama alivyotueleza Paulo juu ya ujio wa Kristo mara ya pili, au yale ambayo watumishi wengine wa Mungu walioyatabiri katika Agano la Kale, yaani kwamba watakatifu watainuliwa angani na kujiunga katika karamu ya harusi ya Mwana-kondoo pamoja na Bwana. Watakatifu wataingia katika karamu hii ya harusi.

Wakati watakatifu watakapokuwa wameingia karamu ya harusi ya Mwana-kondoo huko Mbinguni, basi mapigo ya mabakuli saba yatamiminwa hapa duniani, nayo yataufanya ulimwengu huu kuwa magofu. Baada ya hili, dunia itafanywa kuwa mpya, kisha watakatifu watashuka pamoja na bwana na kisha kutawala katika Ufalme wa Kristo kwa miaka elfu moja itakayofuata. Tunapoufahamu ukweli huu wote, je, tunaweza kweli kumwita Mpinga Kristo kuwa ni Mungu? hata kama atatutupa katika kila aina ya majaribu na vishawishi ili kutufanya tuisujudie sanamu yake, yaani tumsujudie kama ni Mungu, anaweza kweli kutufanya tuikane imani yetu katika Mungu wa kweli? Kwa kweli hapana!

Kama ilivyoandikwa katika Biblia, *“imani ni kuwa na hakika na mambo yatarajiwayo, ni bayana ya mambo yasiyoonekana (Waebrania 11:1),”* manabii wanaamini katika yale ambayo Mungu amewaeleza mapema kuhusu mambo yatakayojiri. Watumishi na watu wote wa Mungu wanaoliamini Neno ni makuhani na manabii. Mungu anaziongoza nafsi

nyingi kupokea ondoleo lao la dhambi kwa kutufanya sisi kuihubiri injili ya ondoleo la dhambi kwa kila mtu ulimwenguni. Kwa kuwa Bwana wetu ametuokoa bila kujalisha mapungufu tuliyo nayo mbele yake, basi Mungu ametufanya sisi kuwa watu wake, na hadi wakati huu, Mungu ametupenda, ametuongoza, na kutubariki pasipo kubadilika.

Si tu kwamba Bwana ametupatia amani ya moyo, bali ametufanya sisi kuyaweka matumaini yetu katika Ufalme wa Mbinguni kwa kutupatia Roho Mtakatifu. Kwa hiyo, tunapomsikia Mpinga Kristo akitueleza kumsujudia yeye kama Mungu, basi ukweli ni kuwa hatuwezi kufanya lolote zaidi ya kumpinga kwa kina toka katika mioyo yetu.

Mara ya kwanza tunaweza kutatizwa na mfuatano wa matukio hadi tutakapotambua kwamba wakati ambao Mungu aliuongelea umewadia, lakini sisi watakatifu tutapata ufahamu wetu haraka na kuanza kumpinga Mpinga Kristo. “Kwa hiyo unadhani wewe ni Mungu halisi? Je, uliuumba ulimwengu? Je, ulimuumba mwanadamu? Je, wewe ndiwe Bwana kweli wa roho za watu?” Haya ndiyo maneno ambayo tutayatumia kumpinga Mpinga Kristo.

Wakati Mpinga Kristo atakapowaua watakatifu na watumishi wa Mungu wakatio huo, basi ni hakika kwamba sisi nasi tutakufa. Kwetu sisi hakuwezi kuwa na mabadiliko ya Mungu. Imani haiwezi kuja kwa kulazimishwa. Wala imani haiwezi kuonekana au kutoweka kwa misingi ya kutumia nguvu. Ukweli ni kuwa imani ya kweli ina nguvu sana ya kuweza kushinda shuruti. Hivyo, watakatifu watauawa kama wafia-dini, na Mpinga Kristo ataishia kuwakosa watakatifu.

Wakati Mpinga Kristo atakapotengeneza sanamu ya sura yake na kuwataka watakatifu kuisujudia kama Mungu, watakatifu na watumishi wa Mungu watampigia kelele wakisema, “Wewe ni mtumishi wa Mungu au mtumishi wa

Shetani? Je, unaifahamu injili ya maji na Roho? Je, unafahamu na kuamini kwamba Yesu Kristo ni Mungu? Yesu Kristo atakaporudi hapa duniani atawatupa watu kama wewe katika shimo la kuzimu! Umesikia wewe mwana wa Shetani?” Kisha Mpinga Kristo na nabii wake watawaua watakatifu, na watakatifu watavipokea kwa furaha vifo vyao ya kuifia-dini kwa ajili ya Mungu.

Aya ya 10 inatueleza kwamba *“mtu akiua kwa upanga, atauawa kwa upanga.”* Hii ina maanisha kwamba ikiwa Mpinga Kristo atawaua watakatifu, basi Mungu atamtupa na yeye na wafuasi wake katika shimo la kuzimu lisilo na mwisho, pia atawaua hapa duniani. Wakati wale wanaosimama kinyume na Mungu watakapowatesa watakatifu, basi ni hakika kwamba hata wao watakabiliana na mateso makubwa zaidi toka kwa Mungu.

Kwa hiyo, ni lazima tusimame dhidi ya Mpinga Kristo kwa kuishikilia imani yetu. Kipindi cha mateso ya watakatifu wakati huo kitadumu kwa muda wa miaka mitatu na nusu tu. Lakini Mungu anaweza kuyapunguza mateso ya watakatifu na dhiki yao, kwa kupunguza kipindi hicho kuwa miezi michache au wiki kadhaa. Ingawa watakatifu watauawa, ukweli ni kuwa wataishi tena. Watafufuliwa na kunyakuliwa, kisha watabarikiwa kutawala pamoja na Yesu Kristo katika Ufalme wa Milenia.

Wakati Ufalme wa Mileni utakapokuja, uzuri wa hali ya mazingira utafikia kiwango chake cha juu, na watakatifu watatawala pamoja na Bwana wakiwa katika miili mitakatifu iliyobadilishwa toka katika miili yao ya kimwili ya kale. Kisha wataishi kwa furaha pamoja na Bwana katika Mbingu na Nchi Mpya. Inawezekanaje basi, sisi tunaofahamu na kuamini katika mambo haya yote kushindwa kuvumilia mateso ya muda mfupi yatakayotujia kwa ajili ya imani yetu katika Yesu?

Haijalishi jinsi dhiki ya wakati huo itakavyokuwa kali, ukweli ni kuwa watakatifu wengi watauawa kama wafia-dini, na kwa sababu hiyo hakuna msingi wowote wa sisi kutovikubali na kuvipokea vifo vyetu kama wafia-dini. Kwa kuwa mambo haya yote ni ya kweli, basi ni hakika kwamba hatutasalimu amri kwa Dhiki ambayo itatudumu kwa muda mfupi tu hapa ulimwenguni. Kwa mfano wa mbali, hata kama ulimwengu utageuka na kuwa kama paradiso kwa miaka mia au kwa maelfu ya miaka, sisi hatutaweza kusalimu amri kwa Mpinga Kristo. Mambo haya yote hayapo mbali nasi, bali yatatimia kwetu sisi hivi karibuni.

Hivyo, ni lazima tuihubiri injili ya maji na Roho hivi sasa, yaani wakati ambapo ulimwengu una amani. Kwa sasa tunaeneza injili ya maji na Roho kwa juhudi ili kujiandaa kwa ajili ya nyakati za Dhiki Kuu. Kwa muda wa mwaka mmoja, injili hii tunayoihubiri itazitenda kazi zenye maajabu sana. Kitaifa na kimataifa kazi njema kabisa za injili zitajitokeza. Kwa mara ya kwanza, watu wanaweza kuichukulia injili ya maji na Roho kwa wepesi, lakini watu wengi wasiolifahamu Neno la Ufunuo watalitafuta na kulisikia na kisha kuirudia injili ya maji na Roho, hii ni kwa sababu watavutiwa sana na Neno la Ufunuo na kwa sababu hiyo watalichukua Neno hilo kwa uzito.

Ufunuo 13 ni sura ya mauaji ya kufia-dini ya watakatifu. Wakati mauaji ya kufia-dini yatakapowadia, watakatifu watauawa kwa panga au kupigwa risasi hadi kifo. Hivyo watakatifu wengi watauawa kwa mkono wa Mpinga Kristo. Lakini tutaweza kukabiliana na vifo vyetu pasipo hofu, kwa kuwa vitakuwa ni vifo vyetu vya miili tu, na wala havitakuwa vifo vya imani yetu. Hali tukiwa tumejazwa na Roho Mtakatifu, tutatoa maneno yasiyoweza kuelezewa ya kijasiri.

Hakuna kitu unachopaswa kukihofia, hata kama utakuwa

huwezi kuongea vizuri au hata kama una kigugumizi. Hebu fikiria juu ya watakatifu wa zamani katika kipindi cha Kanisa la Mwanzo. Watakatifu wa wakati huo hawakusalimu amri kwa nguvu za Shetani kwa sababu hawakuuawa kila mtu peke yake bali waliuawa kwa pamoja, pia ni kwa sababu walikuwa wamejazwa na Roho Mtakatifu. Pia kumbuka kwamba Yesu alikwisha kutueleza kwamba, *“Lakini hapo watakapowapeleka, msifikiri-fikiri jinsi mtakavyosema; maana mtapewa saa ile mtakavyosema. Kwa kuwa si ninyi msemao, bali ni Roho wa Baba yenu asemaye ndani yenu.”* (Mathayo 10:19-20). Tukiwa kama watu wa Mungu, hatuwezi kujitolea kufa ili kuupokea Ufalme wa Mungu? Kwa kweli tunaweza kujitolea.

Ulimwengu huu utaharibiwa kikamilifu kwa mapigo ya Mungu ya matarumbeta saba, wakati ambapo mtawala katili aitwaye Mpinga Kristo atakapotawala kwa muda. Tunawezaje basi kubadilisha Mbingu ya milele kwa kitu chochote hapa ulimwenguni, hata kama kitu hiyo ni kizuri sana? Wakati ulimwengu utakapokuwa umebadilika na kuwa mahali pasipofaa kuishi, yaani ambapo mito itakuwa imegeuka na kuwa pakanga, bahari imegeuka na kuwa damu, huku hali ya mazingira ikiwa imeharibiwa na kuwa kama takataka, basi ni hakika kwamba hatutaweza kamwe kusalimu amri kwa mwanadamu aliye kama mnyama ambaye atataka tuikane imani yetu.

Kuanzia siku ile tutakapouawa na kuwa wafia-dini, basi ulimwengu utakaowangojea wale wanaobakia hapa duniani utakuwa ni ule uliogubikwa na mapigo yasiyoelezeka huku mimea ikiacha kutoa mazao, kwa kuwa yatakuwa yamepigwa kwa mvua ya mawe. Ukweli ni kuwa hata ukiachilia mbali suala la kiimani, hakuna hata mtu mmoja atakayetamani kuishi katika ulimwengu huu tena.

Kitabu cha Ufunuo kinatuonyesha juu ya mambo

yatakayokuja baadaye. Wakati kipindi hiki cha farasi mweusi kitakaposogea mbele kidogo, basi kipindi cha farasi wa kijivujivu kitawadia. Kwa maneno mengine, Bwana wetu atakuja mapema. Ninachokisema hapa ni kwamba hupaswi kuacha mali zako zote ati kwa sababu ujio wa Bwana upo karibu. Bali ninachokisema hapa ni kwamba tunapaswa kuendelea kumtumikia Bwana wetu hadi siku Mpinga Kristo atakapoonekana, hali tukiwa waaminifu na tusiobadilika kama hivi sasa.

Ikiwa, kwa namna yoyote ile unasumbuliwa au una mashaka hivi sasa, basi usihofie tena. Wakati wewe na mimi tunatambua kwamba tutakuwa wafia-dini, basi ni hakika kwamba mioyo yetu itakuwa na amani na utulivu. Kwa maneno mengine, kuwa tutakuwa wafia-dini, basi ni choyo au tamaa ipi itakayokuwa imebakia ndani yetu? Ikiwa kuna tamania lolote lililobakia ndani yetu, basi tamania hilo litakuwa ni kuihubiri injili kwa kila mtu katika ulimwengu mzima, ili kwamba watakatifu wengi waweze kuinuka katika nyakati za mwisho, ili waweze kuokolewa na kuifia-dini kwa kuamini katika injili hii, na hatimaye waweze kuipokea Mbingu na Nchi Mpya. Pia ninatumaini kwamba watakatifu wote wataufanya Ufalme wa Kristo kuwa mali yao kwa imani yao, watafanya hivyo baada ya kuwa wamejengwa kwa ukweli huu, na hatimaye kuwa tayari kuyapitia mambo haya yote yanayowangojea katika wakati wa Mpinga Kristo.

Mungu ametupatia baraka yake ya kuwa wafia-dini. Si kila mtu anaweza kuwa mfia-dini, na wala si kila mtu anaweza kuishi kwa ajili ya Bwana. Ninamshukuru sana Mungu kwa kutupatia baraka kama hiyo, nina furaha sana kutokana na ukweli kwamba nitakufa kwa ajili ya imani. Kwa kuwa hatuna tumaini lolote kwa ulimwengu huu, basi kitendo cha kuyapokea mauaji yetu na kuwa wafia-dini litakuwa ni jambo

la furaha sana kwetu.

Tunachopaswa kukifanya ni kuwa na tumaini katika Ufalme wa Milenia na Ufalme wa Mbinguni ambao Mungu ameuandaa kwa ajili yetu, kisha tuishi maisha yetu kwa kuziunganisha juhudi zetu katika kuihubiri injili ulimwenguni kote hadi siku ile Bwana atakaporudi, na kisha tukampokea Bwana kwa furaha wakati atakaporudi, na kisha kufurahia mahali ambapo tuliweka tumaini letu. Uliamini Neno hili kwa kuwa haya ni mambo ambayo kwa hakika yatatokea.

Hatuwezi kupokea alama ya Mpinga Kristo, kwa kuwa sisi ni watu wa Ufalme wa Mbinguni. Kwa kuwa suala la kuipokea alama litakuwa ni juu ya hiari ya mtu binafsi, basi jambo hili halitafanywa kwa nguvu za kulazimisha, bali kwa hiari ya moyo.

Hata kwa watoto wetu, ikiwa injili hii inapatikana katika mioyo yao, basi wao nao watayapokea mauaji ya kuwa wafia-dini tena kwa ujasiri mkubwa kuliko hata watu wazima, hii ni kwa sababu hata hao watoto watakuwa na Roho Mtakatifu akikaa ndani yake. Kama watu wazima wanavyozidi kukiri kwamba Yesu ni Mwokozi wao, basi ikiwa Roho Mtakatifu anapatikana katika mioyo ya watoto, basi na wao pia, watakiri kwamba Yesu ni Mwokozi na Mungu. Biblia inatueleza kutofikiria kile ambacho tutakisema pale tutakapobururwa na kupelekwa mbele ya Mpinga Kristo, kwa kuwa Roho Mtakatifu ataijaza mioyo yetu kwa maneno ambayo tutayaongea.

Watoto wa Mungu pia wanaweza kuogopa kwa kuwa bado ni wachanga kiroho na wadhaifu, lakini Roho Mtakatifu aliye ndani yao haogopi. Watauawa kama wafia-dini kwa nguvu ya Roho Mtakatifu anayekaa ndani yao. Kwa kuwa na wao pia ni mali ya Mungu, Mungu atazipokea roho zao, ataruhusu miili yao kuuawa, kisha atawapa thawabu ya kutawala katika ulimwengu bora zaidi.

Mungu atakuwa ameishaijaza mioyo ya wale waliozaliwa tena upya kwa maji na Roho kwa Maneno yake ili wayaongee. Kwa kuwa ni roho zilizochaguliwa na kupokelewa na Mungu ndizo zinazoweza kuuawa kama wafia-dini, basi Mungu ataiandaa imani yao kwa ajili ya jina lake. Kutokana na ukweli kwamba Roho Mtakatifu anakaa katika mioyo yetu kwa sababu tumeamini katika injili ya maji na Roho, basi sisi sote tutapokea thawabu ya Ufalme wa Milenia na utukufu wa Mbingu na Nchi Mpya.

Katika nyakati za mwisho, sisi sote tutapitia uzoefu wa ujazo wa Roho Mtakatifu katika mioyo yetu. Kwa kuwa tumejaliwa kuwa wafia-dini, basi wakati tutakapouawa na kuwa wafia-dii kwa mujibu wa mpango wa Mungu, ni hakika kwamba sisi sote tutayapitia mauaji ya kuwa wafia-dini hali tukisifu, tukimwabudu, na kumtukuza Yeye katika uwepo wake. Kwa kuwa tunamwamini Mungu, basi tunamfuata Yeye kwa imani yetu tu ambayo inasema “Amen!” Kwa kuwa tunafahamu kwamba tutauawa na kuwa wafia-dini, basi matamania yetu ya mwili yatatowekea mbali, na hivyo kuzifanya roho zetu kuwa safi sana.

Kuuawa na kuwa wafia-dini, ambayo ni mapenzi ya Mungu kwetu sisi, ni kupokea baraka kubwa na kisha kutukuzwa zaidi. Kwa kuwa watakatifu wana tumaini la kuishi milele katika Mbingu na Nchi Mpya, basi watapambana dhidi ya Mpinga Kristo na kisha kuilinda injili ya maji na Roho katika mioyo yao hadi mwisho. Wakati wa Dhiki Kuu, watakatifu wote, hali wakimtambua Yesu Kristo kuwa ni Mungu wao na huku wakiamini katika wokovu mkamilifu ambao amewapatia, basi watayapokea mauaji ya kuwa wafia-dini mbele za Mungu.

Ninamshukuru Bwana ambaye ametupatia baraka hii ya kuwa wafia-dini. ☒

SURA YA

14



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Sifa za Wafia-dini Waliofufuka na Kunyakuliwa

< Ufunuo 14:1-20 >

“Kisha nikaona, na tazama, huyo Mwana-Kondoo amesimama juu ya mlima Sayuni, na watu mia na arobaini na nne elfu pamoja naye, wenye jina lake na jina la Baba yake limeandikwa katika vipaji vya nyuso zao. Nami nikasikia sauti kutoka mbinguni, kama sauti ya maji mengi, na kama sauti ya radi kuu. Na hiyo sauti niliyoisikia ilikuwa kama sauti ya wapiga vinubi, wakivipiga vinubi vyao; na kuimba wimbo mpya mbele ya kile kiti cha enzi, na mbele ya wale wenye uhai wanne, na wale wazee; wala hapana mtu aliyeweza kujifunza wimbo ule, ila wale mia na arobaini na nne elfu, walionunuliwa katika nchi. Hawa ndio wasiotiwa unajisi pamoja na wanawake, kwa maana ni bikira. Hawa ndio wamfuatao Mwana-Kondoo kila aendako. Hawa wamenunuliwa katika wanadamu, malimbuko kwa Mungu na kwa Mwana-Kondoo. Na katika vinywa vyao haukuonekana uongo. Maana hawana mawaa. Kisha nikaona malaika mwingine, akiruka katikati ya mbingu, mwenye Injili ya milele, awahubiri hao wakaao juu ya nchi, na kila taifa na kabila na lugha na jamaa, akasema kwa sauti kuu, Mcheni Mungu, na kumtukuza, kwa maana saa ya hukumu yake imekuja. Msujudieni yeye aliyezifanya mbingu na nchi na bahari na chemchemi za maji. Kisha mwingine, malaika wa pili, akafuata, akisema,

Umeanguka, umeanguka Babeli, mji ule ulio mkubwa, maana ndio uliowanywesha mataifa yote mvinyo ya ghadhabu ya uasherati wake. Na mwingine, malaika wa tatu, akawafuata, akisema kwa sauti kuu, Mtu awaye yote akimsujudu huyo mnyama na sanamu yake, na kuipokea chapa katika kipaji cha uso wake, au katika mkono wake, yeye naye atakunywa katika mvinyo ya ghadhabu ya Mungu iliyotengenezwa, pasipo kuchanganywa na maji, katika kikombe cha hasira yake; naye atateswa kwa moto na kiberiti mbele ya malaika watakatifu, na mbele za Mwana-Kondoo. Na moshi wa maumivu yao hupanda juu hata milele na milele, wala hawana raha mchana wala usiku, hao wamsujuduo huyo mnyama na sanamu yake, na kila aipokeaye chapa ya jina lake. Hapa ndipo penye subira ya watakatifu, hao wazishikao amri za Mungu, na imani ya Yesu. Nikasikia sauti kutoka mbinguni ikisema, Andika, Heri wafu wafao katika Bwana tangu sasa. Naam, asema Roho, wapate kupumzika baada ya taabu zao; kwa kuwa matendo yao yafuatana nao. Kisha nikaona, na tazama, wingu jeupe, na juu ya wingu hilo ameketi mmoja, mfano wa Mwanadamu, mwenye taji ya dhahabu juu ya kichwa chake, na katika mkono wake mundu mkali. Na malaika mwingine akatoka katika hekalu, akimlilia kwa sauti kuu yeye aliyekuwa ameketi juu ya lile wingu, Tia mundu wako, ukavune; kwa kuwa saa ya kuvuna imekuja; kwa kuwa mavuno ya nchi yamekomaa. Na yeye aliyeketi juu ya wingu akautupa mundu wake juu ya nchi, nchi ikavunwa. Kisha malaika mwingine akatoka katika lile hekalu lililoko mbinguni, yeye naye ana mundu mkali. Na malaika mwingine akatoka katika ile madhabahu, yule mwenye mamlaka juu ya moto; naye akamlilia kwa sauti kuu yule mwenye mundu ule mkali, akisema, Tia mundu wako mkali,

ukachume vichala vya mzabibu wa nchi, maana zabibu zake zimeiva sana. Malaika yule akautupa mundu wake hata nchi, akauchuma mzabibu wa nchi, akazitupa zabibu katika shinikizo hilo kubwa la ghadhabu ya Mungu. Shinikizo lile likakanyagwa nje ya mji, damu ikatoka katika shinikizo mpaka kwenye hatamu za farasi, kama mwendo wa maili mia mbili.”

Mafafanuzi

Aya ya 1: Kisha nikaona, na tazama, huyo Mwana-Kondoo amesimama juu ya mlima Sayuni, na watu mia na arobaini na nne elfu pamoja naye, wenye jina lake na jina la Baba yake limeandikwa katika vipaji vya nyuso zao.

Hii ni kuhusiana na watakatifu waliozaliwa tena upya, ambao walifufuliwa na kunyakuliwa baada ya kuuawa kama wafia-dini na Mpinga Kristo, wapo wakimsifu Bwana Mbinguni. Watakatifu waliouawa na Mpinga Kristo kama wafia-dini na watakatifu waliokufa hapo kabla sasa watakuwa Mbinguni, huku wakimsifu Bwana kwa wimbo mpya. Katika aya ya 4 tunaona kwamba watu 144,000 waliimba wimbo huu mpya. Sasa unaweza kushangaa, kwamba watakatifu wanaweza kuwa ni hao watu 144,000 tu. Lakini namba 14 ina maanisha kwamba mambo yote yamebadilika (Mathayo 1:17).

Tunapaswa kutambua kwamba baada ya mauaji ya wafia-dini na kunyakuliwa kwa watakatifu, Bwana ataubadilisha ulimwengu huu wa sasa kuwa katika ulimwengu mpya. Badala ya ulimwengu huu, Bwana wetu ataujenga ulimwengu ambao ataishi ndani yake pamoja na watu wake. Haya ni mapenzi ya Muumba.

Wale wanaomsifu Bwana Mbinguni ni wale ambao

wamefanyika kuwa watakatifu kwa kuamini katika injili ya maji na Roho iliyotolewa na Kristo wakati alipokuwa hapa duniani. Kwa hiyo, katika vipaji vya nyuso zao wameandikwa majina ya Mwana-Kondoo na Mungu Baba, kwa kuwa sasa wao ni mali ya Kristo.

Aya ya 2: Nami nikasikia sauti kutoka mbinguni, kama sauti ya maji mengi, na kama sauti ya radi kuu. Na hiyo sauti niliyoisikia ilikuwa kama sauti ya wapiga vinubi, wakivipiga vinubi vyao.

Watakatifu wanaonekana Mbinguni ni wale ambao waliuawa kama wafia-dini ili kuulinda wokovu wao ulitolewa na Bwana na pia katika kuulinda imani yao kwamba Bwana ndiye Mungu wao, na ambao walifufuliwa baadaye. Kwa kuwa miili yao ilifufuliwa na walinyakuliwa kwa nguvu za Bwana, basi ndio maana wanamsifu Bwana wakiwa Mbinguni kwa ajili ya wokovu wake na baraka yake ya kuwapatia mamlaka. Sauti ya sifa zao ni nzuri kama sauti ya maji mengi yanayotiririka, na ni kuu kama vile ngurumo. Wote wameokolewa milele toka katika dhambi zao zote kwa kupitia ukombozi wa dhambi zao kwa kuamini katika injili ya maji na Roho iliyotolewa na Bwana wakati alipokuwa hapa duniani.

Aya ya 3: Na kuimba wimbo mpya mbele ya kile kiti cha enzi, na mbele ya wale wenye uhai wanne, na wale wazee; wala hapana mtu aliyeweza kujifunza wimbo ule, ila wale mia na arobaini na nne elfu, walionunuliwa katika nchi.

Watu 144,000 ina maanisha ni watakatifu walionyakuliwa. Katika Biblia, namba 14 ina maanisha ni mabadiliko mapya. Wale wanaoweza kumsifu Bwana kwa wimbo mpya Mbinguni ni wale ambao wamebadilishwa na kutengenezwa wakati walipokuwa hapa duniani kwa kupokea ondoleo la dhambi na

kisha kuzaliwa tena upya kwa kupitia imani yao katika injili ya maji na Roho. Hii ndio sababu Bwana anasema hapa kwamba kulikuwa na watu 144,000.

Nje ya hao, hakuna hata mmoja anayeweza kumsifu Bwana kwa baraka yake ya ukombozi kwa kupitia injili ya maji na Roho. Hivyo, Bwana wetu anasifiwa na wale ambao dhambi zao zimesamehewa kwa kuamini katika injili ya maji na Roho na ambao wamempokea Roho Mtakatifu kama karama yao.

Aya ya 4: Hawa ndio wasiotiwa unajisi pamoja na wanawake, kwa maana ni bikira. Hawa ndio wamfuatao Mwana-Kondoo kila aendako. Hawa wamenunuliwa katika wanadamu, malimbuko kwa Mungu na kwa Mwana-Kondoo.

Watakatifu ndio wale ambao hawajaitia unajisi imani yao kwa nguvu yoyote ile ya kiulimwengu au dini ya kiulimwengu. Kuna watu wengi katika ulimwengu huu ambao wanabadili imani zao kiurahisi. Lakini kwa wale waliofanyika kuwa watakatifu kwa kuamini katika ubatizo wa Bwana na damu yake Msalabani, na kwa sababu hiyo kupokea ondoleo la dhambi zao, basi watu hao imani zao haziwezi kubadilishwa kamwe na kitu chochote katika ulimwengu huu.

Watakatifu wanaopaa kwenda Mbinguni na kumsifu Bwana ndio wale ambao wameishikilia na kuitunza injili ya maji na Roho iliyotolewa na Bwana na kisha wakazilinda imani zao pasipo kubadilika. Kwa hiyo, wale wanaoweza kumsifu Bwana katika Ufalme wa Mbinguni ni wale ambao wamenyakuliwa na Bwana kwa sababu ya imani yao katika injili ya maji na Roho.

Katikati ya aya ya 4 imeandikwa hivi, “*Hawa ndio wamfuatao Mwana-Kondoo kila aendako.*” Unapawa kutambua kwamba wale waliosafishwa dhambi zao zote mara moja kwa kupitia imani yao katika injili ya maji na Roho

wanapaswa kumfuata Bwana popote anapowaongoza kwenda, wanapaswa kufanya hivi baada ya kuwa wamezaliwa tena upya. Kwa kuwa wamepokea ondoleo la dhambi zao, basi ndani ya mioyo yao unapatikana utayari wa kumfuata Bwana kwa furaha popote anapowaongoza kwenda. Hivyo katika nyakati za mwisho, watakuwa wakimsifu Bwana Mbinguni, watafanya hivyo baada ya kuwa wameuawa kama wafia-dini na Mpinga Kristo kwa sababu ya imani yao, na kisha wakafufuliwa na kunyakuliwa na Bwana.

Pia imeandikwa hivi, *“Hawa wamenunuliwa katika wanadamu, malimbuko kwa Mungu na kwa Mwana-Kondoo.”* Kati ya watu wengi sana wanaoishi katika ulimwengu huu, ni wachache sana ambao wameokolewa toka katika dhambi zao zote kwa kuamini katika injili ya maji na Roho iliyotoelwa na Bwana. Hii ndio sababu katika Yeremia 3:14 Bwana wetu anasema kwamba, *“Nami nitatwaa mtu mmoja wa mji mmoja, na wawili wa jamaa moja, nami nitawaleta hata Sayuni”* Wale waliokutana na injili ya maji na Roho na kupokea ondoleo la dhambi zao ni wachache kiasi hiki.

Kwa kuwa watu hao ni mali ya Mwana-Kondoo, basi hao watakuwa wa kwanza kupokea malimbuko ya ufufuo, ambao wamenyakuliwa kwa nguvu ya Bwana, na ambao wanamsifu Kristo milele, yote hayo yatakuwa kama yalivyoahidiwa na Bwana. Na hapa duniani, hao ndio wale wanaomfuata Bwana mahali popote anapowaongoza kwenda. Mambo haya yote ni kwa neema na mamlaka ya Mungu.

Aya ya 5: Na katika vinywa vyao haukuonekana uongo. Maana hawana mawaa.

Wale waliozaliwa tena upya kwa kuamini katika injili ya maji na Roho wanaweza kuihubiri injili hii ya kweli kwa vinywa vyao. Ingawa kuna watu wengi siku hizi ambao

wanaihubiri injili kwa njia zao binafsi, ukweli ni kwamba ni wachache sana kati yao ambao ndio wanaoihubiri injili ya kweli ya maji na Roho.

Wale wanaoihubiri damu ya Yesu ya Msalabani tu hawaihubiri injili ya maji na Roho iliyotolewa na Bwana. Kwa nini? Kwa kuwa hakuna injili nyingine zaidi ya injili ya maji na Roho ambayo ndio injili ya kweli ya Biblia. Kwa kuwa dhambi zote katika mioyo ya wenye haki zimechukuliwa mbali na Neno la injili ya kweli, basi watu hao wanaweza kuihubiri injili hii kwa vinywa vyao kwa ushawishi mkamilifu.

Aya ya 6-7: Kisha nikaona malaika mwingine, akiruka katikati ya mbingu, mwenye Injili ya milele, awahubiri hao wakaao juu ya nchi, na kila taifa na kabila na lugha na jamaa, akasema kwa sauti kuu, Mcheni Mungu, na kumtukuza, kwa maana saa ya hukumu yake imekuja. Msujudieni yeye aliyezifanya mbingu na nchi na bahari na chemchemi za maji."

Watakatifu waliozaliwa tena upya wanapaswa kuendelea kuitangaza injili ya maji na Roho hapa duniani. Hivyo, kazi hii ya kuihubiri injili ya maji na Roho, ni lazima iendelee hapa duniani hadi siku ile watakatifu watakaponyakuliwa.

Ni wale tu wanaoamini katika injili ya maji na Roho ndio watakaouawa na Mpinga Kristo na kuifia-dini ili kuilinda imani yao, na ni hao tu ndio watakaoinuliwa kwenda katika Ufalme wa Mbinguni. Kila mtu anapaswa kumwogopa Mungu, kuamini katika injili ya maji na Roho, na hivyo kupokea ondoleo la dhambi zake na Roho Mtakatifu kama karama yao. Ikiwa Wakristo wa leo hawawezi kuiamini injili ya maji na Roho iliyotolewa na Bwana na katika shukrani, basi imani yao katika Yesu itakuwa ni utupu tu.

Yeye aliyeuumba ulimwengu wote na vitu vyote vilivyomo si mwingine bali ni Yesu Kristo. Kwa hiyo,

wanadamu ni lazima wamtambue Yesu Kristo kuwa ni Mungu wao aliyewaumba na kuwapa wokovu wao kwa msamaha wa dhambi zao, na hivyo wanapaswa kumwabudu Mungu vilivyo, hii ni kwa sababu vitu vyote viliumbwa kwa mikono yake na vikakamilishwa. Watu wote wanaweza kusamehewa dhambi zao zote na kisha kupokea baraka ya kuwa na Roho Mtakatifu kwa kuamini katika injili ya maji na Roho katika mioyo yao.

Ulimwengu huu ni lazima ujiandae kupokea hukumu ambayo Yesu Kristo ataitoa kwa wale wanaosimama kinyume na Mungu. Hivyo, ni lazima tuiandae imani yetu kwamba hivi punde tutanyakuliwa na Bwana, hii ni kwa sababu siku ya hukumu ya Bwana inakaribia. Njia ya kujiandaa kwa ajili ya unyakuo ni kwa kuamini katika Neno la injili ya maji na Roho iliyotolewa na Bwana. Kwa nini? Ni kwa sababu watu wanaweza kupokea Roho Mtakatifu kwa kuamini katika injili ya Bwana ya maji na Roho, na siku ya mwisho itakapowadia, watavikwa utukufu wa kuinuliwa angani na Bwana katika unyakuo wao.

Hivyo, wenye dhambi wote ni lazima wamwamini Yesu Kristo kuwa ni Mungu wa uumbaji na wokovu mara moja, na kisha wamwabudu Mungu ipasavyo. Wanapaswa kuikubali injili ya maji na Roho katika mioyo yao, na hivyo kupokea neema ya ukombozi wake na Roho Mtakatifu kama karama. Wale wanaomwabudu Mungu wanapokea katika mioyo yao injili ya maji na Roho iliyotolewa na Bwana na hawaikatai, kwa kuwa hivi ndivyo wanavyoweza kumwabudu Mungu.

Aya ya 8: Kisha mwingine, malaika wa pili, akafuata, akisema, Umeanguka, umeanguka Babeli, mji ule ulio mkubwa, maana ndio uliowanywesha mataifa yote mvinyo ya ghadhabu ya uasherati wake.”

Ulimwengu huu utatoweka kwa hukumu ya Yesu Kristo

ya kutisha. Kwa kuwa dini za ulimwengu huu kimsingi zimejengwa katika mafundisho ya uongo, basi ndio maana ulimwengu huu utaangamizwa na Mungu. Dini hizi za kiulimwengu zimewafanya watu kuufuata ulimwengu kuliko kumfuata Mungu Mwenyewe, na zimewatumia watu kama vyombo vya kusimama kinyume na Mungu. Hivyo, ulimwengu huu utaangamizwa, kwa sababu watu wake wamemwacha Mungu na wamezitamani hizo dini za kiulimwengu.

Kule kusema kwamba watu wamefuata dini za kiulimwengu maana yake ni kwamba wameifuata miungu ya uongo, ambayo ni mashetani. Hivyo, Mungu atauangamiza ulimwengu huu kwa ghadhabu yake. Kila kitu katika ulimwengu huu na dini zake zote za uongo vitaangushwa na Mungu, na vitakunywa mvinyo ya ghadhabu ya Mungu. Kwa hiyo, wale wanaosimama kinyume na Mungu, pamoja na mashetani ambayo yanaishi kama minyoo nyonyaji iliyojiunga na dini za ulimwenguni, itaangushwa yote chini kwa mapigo ya Mungu na kisha watatupwa kuzimu milele.

Aya ya 9-10: Na mwingine, malaika wa tatu, akawafuata, akisema kwa sauti kuu, "Mtu awaye yote akimsujudu huyo mnyama na sanamu yake, na kuipokea chapa katika kipaji cha uso wake, au katika mkono wake, yeye naye atakunywa katika mvinyo ya ghadhabu ya Mungu iliyotengenezwa, pasipo kuchanganywa na maji, katika kikombe cha hasira yake; naye atateswa kwa moto na kiberiti mbele ya malaika watakatifu, na mbele za Mwana-Kondoo."

Hapa Mungu anamwonya kila mtu, huku akisema kwamba ikiwa mtu yeyote atamwabudu Mnyama na sanamu yake, au ikiwa atapokea alama yake katika mkono au kipaji cha uso, basi mtu huyo atapokea adhabu ya milele kuzimu. Hali akifanya kazi kupitia watu wengi, Shetani atawashurutisha

wanadamu wote kuiabudu sanamu ya Mpinga Kristo, lakini wale waliozaliwa tena upya watapambana na Mpinga Kristo na kisha kuuawa kama wafia-dini na hivyo kuilinda imani yao. Hivyo, watakatifu waliozaliwa tena upya ni lazima wailinde imani yao kwa kusimama kinyume na Mpinga Kristo na kisha kuuawa kama wafia-dini.

Ikiwa mtu yeyote, hali akisalimu amri kwa Mpinga Kristo, ataisujudia sanamu ya Mpinga Kristo na kisha kupokea alama ya jina lake au namba yake, basi mtu huyo atajipatia ghadhabu ya Mungu ambayo itamtupa katika ziwa la moto na kibiriti milele. Wakati wa Dhiki utakapowadia, watakatifu ni lazima wamwombe Mungu, wailinde imani yao katika Bwana, na kisha waliweke tumaini lao katika Ufalme wa Mungu. Ni lazima wasimame kinyume na Mpinga Kristo na kisha kuilinda imani yao kwa kumwamini Yesu Kristo, na kisha kujiunga katika mauaji ya kuifia-dini, ufufuo, na unyakuo, na hivyo kupokea baraka ya milele ya kuishi pamoja na Bwana katika Ufalme wake.

Aya ya 11: Na moshi wa maumivu yao hupanda juu hata milele na milele, wala hawana raha mchana wala usiku, hao wamsujuduo huyo mnyama na sanamu yake, na kila aipokeaye chapa ya jina lake.

Wale wanaomwabudu Shetani kuwa ni Mungu watapewa mapigo ya Mungu na mateso ya milele bila kupumzika huko kuzimu. Yeyote atakayesalimu amri kwa Mpinga Kristo katika nyakati za mwisho na kisha kuiabudu sanamu yake kama ni Mungu atateswa katika ziwa la moto na kibiriti lililojazwa ghadhabu ya Mungu. Sisi sote ni lazima tuamini kwamba yeyote anayemfuata Mnyama na sanamu yake, na yeyote anayeipokea alama ya Mnyama hataona raha usiku na mchana.

Aya ya 12: Hapa ndipo penye subira ya watakatifu, hao wazishikao amri za Mungu, na imani ya Yesu.

Kama vile watakatifu wanavyoamini juu ya utajiri wote, utukufu, na baraka ambazo Bwana amewaahidi, basi ni lazima wavumilie kwa ustahimilivu. Pia ni lazima wavumilie wakati wa kipindi cha Dhiki. Ahadi ambayo Bwana ameifanya kwa watakatifu wa nyakati za mwisho ni kwamba atawapatia baraka ya kuishi pamoja naye baada ya kuifia-dini, na kufufuliwa kwa nguvu za Bwana, na kisha kuinuliwa Mbinguni.

Hivyo, watakatifu wanavumilia kwa sababu wanaamini katika baraka hii ambayo itawaruhusu kuingia katika karamu ya harusi ya Mwana-Kondoo pamoja na Bwana, na kwamba watatawala pamoja na Bwana kwa miaka elfu moja, na kisha wataishi milele pamoja na Bwana katika Ufalme wa Mbinguni. Wakati nyakati za mwisho zitakapowadia, watakatifu watahitaji kuuawa na kuifia-dini ili kuilinda imani yao. Hivyo ni lazima wavumilie kupita katika dhiki yote ya wakati huo kwa ustahimilivu.

Watakatifu wanaoishi katika wakati wa sasa wanapaswa kupokea mauaji ya kufia-dini hali wakiamini katika ahadi za Bwana, hasa wakati ule ambapo Mpinga Kristo atawataka waikane imani yao kwa vitisho, misukumo, na kwa ulaghai. Kwa nini? Kwa sababu mara baada ya hapo, baraka zote za Bwana wetu zitatimizwa kama alivyotuahidi. Watakatifu wote wanaweza kupokea zawadi zao ikiwa tu watailinda imani yao katika Neno la Mungu na katika Bwana. Hivyo, itunze imani yako katika Neno la Bwana. Mungu atawakaribisha watakatifu ambao wameilinda imani yao katika Neno lake na katika Yesu Kristo kuingia katika ulimwengu wake mpya.

Kuna sababu nyingi kwamba ni kwa nini watakatifu wanaoitumikia injili ya Bwana wanapaswa kuyavumilia magumu yote ya nyakati za Dhiki kwa ustahimilivu. Kwa kuwa

mema zaidi yapo baadaye, basi kuna kila sababu ya kuvumilia mateso ya sasa kwa ustahimilivu.

Warumi 5:3-4 inatueleza kwamba, *“Wala si hivyo tu, ila na mfurahi katika dhiki pia; mkijua ya kuwa dhiki, kazi yake ni kuleta saburi; na kazi ya saburi ni uthabiti wa moyo; na kazi ya uthabiti wa moyo ni tumaini.”*

Watakatifu watakaovumilia wakati wa Dhiki Kuu kwa kuamini katika Bwana wataishi maisha ya baraka, watapokea ufufuo wao na kunyakuliwa toka kwa Bwana na kisha kutawala katika Ufalme wa Mungu. Kwa hiyo, sisi sote ni lazima tuvumilie na kupita katika Dhiki kwa imani yetu. Watakatifu wanaweza kuvumilia kupita katika Dhiki Kuu ya nyakati za mwisho kwa kuilinda imani yao katika Bwana. Watakatifu wanaviamini vitu vyote ambavyo Bwana atavitimiza kwa ajili yao katika ulimwengu huu na huko Mbinguni.

Aya ya 13: Nikasikia sauti kutoka mbinguni ikisema, “Andika, Heri wafu wafao katika Bwana tangu sasa. Naam, asema Roho, wapate kupumzika baada ya taabu zao; kwa kuwa matendo yao yafuatana nao.”

Aya hii inatueleza kwamba, *“Heri wafu wafao katika Bwana tangu sasa.”* Kwa nini? Kwa sababu wakati nyakati za Dhiki zitakapowadia—yaani wakati Mpinga Kristo atakapoutawala ulimwengu—hivyo wenye dhambi wote wanaoishi katika ulimwengu huu wataangamizwa. Hivyo, watakatifu ni lazima watazanie ujio wa Ufalme wa Kristo, wailinde imani yao, na wapokee kuuawa na kuifia-dini kwa imani. Wale waliouawa na kuifia-dini ili kumpatia Bwana utukufu wamebarikiwa, na kwa sababu hiyo, ni lazima wapokee kuuawa na kuifia-dini ili kuilinda imani yao.

Kisha Bwana atawashughulia watakatifu wa jinsi hiyo,

huku akiruhusu ufufuo wao na kunyakuwali ili kuwaiunua kwenda katika Ufalme wake. Kazi zote za watakatifu hapa duniani hatimaye zitakoma, na badala yake wataishi huku wakifurahia zawadi iliyotolewa na Bwana. Wakati huu, watakatifu wote watakuwa na furaha ya kutawala pamoja na Bwana na maisha ya milele, na utajiri na utukufu wa Ufalme wa Mungu vitakuwa ni mali yao milele.

Hii ndio sababu wale waliouawa kuifia-dini katika nyakati za mwisho ili kuilinda imani yao wamebarikiwa sana, kwa kuwa wataishi pamoja na Bwana katika utajiri wote na utukufu wa Ufalme wa Milenia na Ufalme wa Mbinguni milele. Kwa wale ambao hawatasalimu amri kwa Mnyama na kisha kuilinda imani yao katika Bwana, basi Mungu atawapatia baraka ya kutawala pamoja na Bwana milele.

Aya ya 14: Kisha nikaona, na tazama, wingu jeupe, na juu ya wingu hilo ameketi mmoja, mfano wa Mwanadamu, mwenye taji ya dhahabu juu ya kichwa chake, na katika mkono wake mundu mkali.

Aya hii inatueleza kwamba Bwana atarudi kuwanyakua watakatifu. Kwa kuwa Bwana ni Kiongozi wa watakatifu, basi atawafufua watakatifu ambao watakuwa wameuawa kuifia-dini ili kuilinda imani yao na kisha kuwainua kwenda katika Ufalme wa Mungu kwa unyakuo. Basi ni hakika kwamba unyakuo utakuja kwa watakatifu wakati wa Dhiki Kuu.

Aya ya 15: Na malaika mwingine akatoka katika hekalu, akimlilia kwa sauti kuu yeye aliyekuwa ameketi juu ya lile wingu, Tia mundu wako, ukavune; kwa kuwa saa ya kuvuna imekuja; kwa kuwa mavuno ya nchi yamekomaa.”

Hili neno lina maanisha ni ukamilifu wa unyakuo wa watakatifu utakaofanywa na Bwana. Kwa maneno mengine,

unyakuo utatokea baada ya mauaji makubwa ya watakatifu kama wafia-dini. Bwana ataruhusu unyakuo wa watakatifu ambao wakati huo watakuwa wamelala mauti, pamoja na wale ambao watakuwa wameuawa ili kuifia-dini. Ukamilifu wa imani ya watakatifu unapatikana katika wokovu wao, ufufuo, unyakuo, na uzima wa milele. Muda wa unyakuo wa watakatifu ni baada ya kuuawa na kuifia-dini kutokana na mateso ya Mpinga Kristo, na vifo vya kuifia-dini vitaandaman na ufufuo wao.

Aya ya 16: Na yeye aliyeketi juu ya wingu akautupa mundu wake juu ya nchi, nchi ikavunwa.

Aya hii pia, ina maanisha ni unyakuo wa watakatifu. Kunyakwali maana yake ni kuinuliwa kwa watakatifu kwenda angani. Je, hii ina maanisha kwamba watakatifu watainuliwa angani, na kisha kushuka chini pamoja na Bwana? Lakini ukweli nikwamba! Baada ya watakatifu kunyakuliwa, Bwana wetu ataiangamiza dunia, bahari, na vitu vyote vilivyo ndani yake kwa kuyamimina mapigo ya mabakuli saba, na baada ya kuuangamiza ulimwengu, basi Bwana atashuka hapa duniani pamoja na watakatifu walionyakuliwa.

Kisha, Bwana na watakatifu wake watatawala hapa duniani kwa miaka elfu moja, na baada ya kuisha kwa karamu ya harusi ya Mwana-Kondoo, watapaa tena kwenda katika Ufalme wa Mbinguni wa milele. Wakati watakatifu watakapoungana na Bwana katika karamu ya harusi ya Mwana-Kondoo, basi Bwana atakuwa ameushaufanya ulimwengu na vitu vyote ndani yake kuwa vipya.

Baada ya kunyakuliwa, watakatifu watakaa angani pamoja na Bwana kwa kitambo, na mara baada ya kuisha kwa mapigo ya mabakuli saba, watatelemka katika dunia itakayokuwa imefanywa upya ili kutawala pamoja na Bwana kwa miaka elfu

moja. Kisha wataingia katika Ufalme wa Mungu pamoja na Bwana, na kuishi pamoja na Bwana milele.

Aya ya 17: Kisha malaika mwingine akatoka katika lile hekalu lililoko mbinguni, yeye naye ana mundu mkali.

Malaika anayeonekana hapa ni malaika wa hukumu. Malaika huyu atayaleta mapigo makuu kwa watu wa ulimwengu waliosimama kinyume na Mungu, kisha atawatupa katika moto wa milele. Kazi yake ni kuwatupa na kuwafunga wenye dhambi wote wa ulimwengu ambao hawajazaliwa tena upya pamoja na Mpinga Kristo katika shimo la kuzimu lisilo na mwisho.

Aya ya 18: Na malaika mwingine akatoka katika ile madhabahu, yule mwenye mamlaka juu ya moto; naye akamlilia kwa sauti kuu yule mwenye mundu ule mkali, akisema, Tia mundu wako mkali, ukachume vichala vya mzabibu wa nchi, maana zabibu zake zimeiva sana.”

Neno hili linatueleza kwamba wakati umefika sasa kwa wenye dhambi kuhukumiwa na Mungu kwa ajili ya dhambi zao za kusimama kinyumena Mungu. Kwa mujibu wa nyakati za Mungu, sasa ni masaa ya kutekeleza mipango yake. Ili aweze kuwapatia wenye dhambi hukumu yake, basi Mungu atawakusanya wenye dhambi wote ambao walisimama kinyume na Mungu na kisha kuwaadhibu ipasavyo.

Aya ya 19: Malaika yule akautupa mundu wake hata nchi, akauchuma mzabibu wa nchi, akazitupa zabibu katika shinikizo hilo kubwa la ghadhabu ya Mungu.

Neno hili linatuonyesha kwamba baada ya kunyakuliwa kwa watakatifu, Mpinga Kristo na wenye dhambi watateseka sana chini ya mapigo ya mabakuli saba. Mungu ataileta

ghadhabu yake pia hapa duniani kwa wenye dhambi kwa kuyamimina mapigo yake ya kutisha juu yao, na kisha itafuatiwa na adhabu ya kuzimu. Hivyo, mapigo ambayo Mungu atayamimina, kwa Mpinga Kristo na wafuasi wake ni ghadhabu yake ya haki. Haya ni majaliwa ya Mungu kwa wenye dhambi ambao wanasimama kinyume naye.

Aya ya 20: Shinikizo lile likakanyagwa nje ya mji, damu ikatoka katika shinikizo mpaka kwenye hatamu za farasi, kama mwendo wa maili mia mbili.

Hii aya inatueleza kwamba jinsi adhabu ya ghadhabu ya Mungu ilivyo kali na jinsi mateso yake yatakavyokuwa kwa wale watakaokuwa wamebakia hapa duniani, kwa wanadamu na kwa viumbe hai, mateso ambayo yataletwa kwa mapigo ya mabakuli saba yatakayomiminwa juu yao. Pia aya hii inatueleza kwamba mapigo haya yatatawanyika katika ulimwengu mzima. Wakati watakatifu watakapouawa na kuifia-dini, kufufuliwa, na kunyakuliwa, basi kuanzia wakati huo na kuendelea, ghadhabu ya mapigo ya mabakuli saba itashushwa na hivyo kumaliza kila kitu.

Hakuna hata mmoja atakayeweza kuyakwepa mapigo haya ya kutisha zaidi ya watakatifu Mbinguni na malaika ambao walisimama upande wa Mungu. Kwa upande mwingine, wale wanaosimama kinyume na Mungu, basi ni vema wafahamu kwamba adhabu ya kuzimu inawangojea. Lakini wakati huo wale waliozaliwa tena upya watajikuta katika karamu ya chakula cha harusi ya Mwana-Kondoo angani, huku wakimshukuru na kumsifu Bwana kwa ajili ya wokovu wake. Kuanzia hapo, watakatifu wataishi pamoja na Bwana milele katika baraka yake ya milele. ☒

Watakatifu Wafanye Nini Mara Mpinga Kristo Atakapoonekana?

< Ufunuo 14:1-20 >

Ili kumshinda Mpinga Kristo mara atakapoonekana muda si mrefu toka sasa, basi imewapaswa watakatifu kujiandaa kuuawana kuifia-dini kwa imani yao katika Bwana. Ili kuweza kufanya hivyo, ni lazima wafahamu vizuri kuhusu mipango miovu ambayo Mpinga Kristo ataileta hapa duniani. Ni baada ya kuifahami mipango hiyo ndipo watakatifu watakapoweza kusimama kinyume naye na kumshinda kwa imani. Shetani atajaribu kuziangamiza imani za Wakristo kwa kuwafanya watu waipokee alama ya jina lake au namba yake.

Sababu inayomfanya ajaribu kuiharibu imani ya Wakristo ni kwamba anasimama kinyume na Mungu na kwa hiyo analenga kuishusha imani ya wenye haki, na lengo lake kuu ni kuwazuia watu wasiweze kupokea ondoleo la dhambi zao kwa kupitia injili ya maji na Roho. Mpinga Kristo atawageuza watu na kuwafanya watumishi wake na kuwafanya wasimame kinyume na Mungu. Hivyo, Mpinga Kristo na watumishi wake watakaokuwa wamebaki katika ulimwengu huu watapokea adhabu kubwa na mapigo.

Wenye haki ni lazima waishi maisha yao ya kiimani hali wakiwa na uelewa sahihi wa mapigo ya mabakuli saba ambayo Mungu atayamimina kwa maadui zake. Kama vile Mungu anavyosema katika Kumbukumbu la Torati 32:35, *“Kisasi ni*

changu mimi, na kulipa,” Mungu atalipa kisasi kwa ajili ya vifo vya watoto wake. Kwa hiyo, ni lazima tuilinde imani yetu na kisha kuishi maisha ya ushindi, badala ya kuzidiwa na hasira na kisha kufanya matendo ya hasira. Watakatifu ni lazima wapambane dhidi ya Mpinga Kristo hali wakiuamini ukweli kwamba Mungu atawaangamiza wale wote watakaosalia katika dunia hii baada ya wao kuuawa na kuifia-dini.

Neno la Kweli Ambalo Halipaswi Kamwe Kusahauliwa

Kile ambacho wale wote waliopokea ondoleo la dhambi wanapaswa kukikumbuka ni ukweli kwamba watakatifu wasio na dhambi ndio watakaofufuliwa na kunyakuliwa mara baada ya kuuawa na Mpinga Kristo na hivyo kuifia-dini. Siku ya kuonekana kwa Mpinga Kristo na mauaji ya watakatifu ya kuifia-dini vitakapowadia, basi tutapaswa kukumbuka wkamba ahadi zote za Mungu zititimizwa.

Kuanzia aya ya 14 na kuendelea, Neno la Mungu katika sura ya 14 linatufundisha kwamba ni hakika kuwa unyakuo utawajia watakatifu, na kwamba wakati wa kunyakuliwa utakuwa mara baada ya kuuawa na kuifia-dini.

Tusisahau kwamba ufufuo na unyakuo wetu utakuja baada ya Shetani kuwafanya watu kuipokea alama yake. Ifahamike kwamba baraka ya ufufuo na kunyakuliwa inawangojea wenye haki ambao watauawa na kuifia-dini na Mpinga Kristo. Wenye haki watayapokea mauaji matakatifu ya kuifia-dini ili kuilinda imani yao, hii ni kwa sababu watakataa kuipokea alama ya Shetani. Hivyo wenye haki wafia-dini watapokea thawabu yao kulingana na kazi yao hapa duniani, kisha wataongezewa

utukufu wa Mungu.

Mara utakapowana watakatifu wenzako na watumishi wakiuawa na kuifia dini ili kuilinda imani yao usiomboleze na kukasirishwa. Badala yake, watakatifu wote wanapaswa kumshukuru Mungu na kumpatia utukufu kwa kuwaruhusu kuifia-fini ili kuilinda imani yao, maana mara baada ya kuifia-dini wafia-dini watafufuliwa katika miili mitakatifu na kisha kunyakuliwa na Bwana.

Mapigo ya Mabakuli Saba Yaliyoandaliwa Kwa Ajili ya Wale Wanaosimama Kinyume na Mungu ni Yapi?

Aya ya 19 inasema, *“Malaika yule akautupa mundu wake hata nchi, akauchuma mzabibu wa nchi, akazitupa zabibu katika shinikizo hilo kubwa la ghadhabu ya Mungu.”* Wale ambao watakuwa wamesimama kinyume na upendo wa Mungu ni hakika kwamba wamepangiwa kupokea mapigo ya Mungu ya kutisha mara baada ya mauaji ya wafia-dini, hii ni kwa sababu walipokuwa hapa duniani, walikataa kuipokea injili ya maji na Roho iliyotolewa na Bwana katika mioyo yao, na badala yake wakasimama kinyume na injili hii. Hawa ndio wale waliofanyika kuwa maadui wa Mungu kwa kutoamini katika wokovu wa Yesu Kristo, aliyekuja kwa damu na maji ili kuwaokoa toka katika dhambi. Ni lazima wapokee sio tu mapigo ya mabakuli saba yatakayomiminwa na Mungu, bali pia wanapaswa kupokea adhabu ya kutisha ya kuzimu milele.

Haya ni mapigo saba ambayo Mungu atayaleta kwa wale ambao hawajanyakuliwa na Bwana. Baada ya mauaji ya watakatifu, Mungu, tena bila huruma atayashusha mapigo ya mabakuli saba ambayo atakuwa ameyaandaa kwa wale ambao,

kwa kutoshiriki katika unyakuo, watakuwa wamebakia hapa duniani kama watumwa wa Shetani huku wakiendelea kuukufuru utukufu wa Mungu.

Ni kwa nini Mungu atawafanya wenye haki kuuawa na kuifia-dini? Ni kwa sababu kama wenye haki wangelibakia katika dunia hii pamoja na wale ambao hawajazaliwa tena upya, Mungu angelishindwa kuyashusha mapigo yake ya mabakuli saba wakati utakapokuwa umewadia. Na kwa kuwa Mungu anawapenda wenye haki, anawaruhusu kuifia-dini ili kwamba kuungana naye katika utukufu wake. Hii ndio sababu Mungu atawafanya wenye haki kuifia-dini kabla ya kuyatelemsha mapigo ya mabakuli saba. Na baada ya kuwafufua na kuwanyakua wenye haki walioifia-dini, hapo ndipo Mungu atakapoyamimina mapigo haya duniani kwa uhuru. Mapigo haya ya mabakuli saba ni mapigo ya mwisho ambayo Mungu atayaleta kwa mwanadamu katika dunia hii.

Ufalme wa Milenia na Mamlaka ya Watakatifu

Kipindi cha Ufalme wa Milenia kitaanza wakati Bwana, pamoja na watakatifu wake, watakaposhuka hapa duniani tena. Mathayo 5:5 inatueleza kwamba, *“Heri wenye upole, maana watairithi nchi.”* Wakati Bwana atakaporudi katika dunia hii pamoja na watakatifu, Neno la Zaburi 37:29, kwamba “wenye haki watairithi nchi,” litakuwa limetimizwa.

Hivyo, wakati Bwana atakaposhuka hapa duniani pamoja na watakatifu wote, Bwana atawapatia mamlaka ya kuifanya dunia hii kuwa mali yao. Wakati huu, Bwana atawapatia mamlaka ya kutawala juu ya miji kumi, na wengine miji mitano zaidi. Bwana ataufanya ulimwengu huu pamoja na vitu vyote vilivyomo ndani yake kuwa vipya, kisha atawafanya

watakatifu kutawala pamoja naye kwa miaka elfu moja na baadaye.

Sasa, ni tumaini gani ambalo watakatifu wa kipindi hiki wanapaswa kuishi nalo? Wanapaswa kuishi hali wakitumainia siku ambayo Ufalme wa Kristo utakuwa umejengwa hapa duniani. Wakati Ufalme wa Bwana utakapokuja hapa duniani, amani, furaha, na baraka zinazotoka katika utawala wake zitakuwa juu ya dunia hii. Ukweli ni kwamba kuishi chini ya utawala wa Bwana, kutatufanya tusipungukiwe na kitu chochote, na hivyo tutaishi katika neema yake na ukamilifu.

Wakati Ufalme wa Bwana utakapowadia katika dunia hii, matumaini yote na ndoto za wenye haki zitatimizwa. Baada ya kuishi katika dunia hii kwa miaka elfu moja, basi hapo ndipo wenye haki watakapoingia katika Ufalme wa Mbinguni wa milele, lakini wale waliosimama kinyume na Mungu watatupwa katika ziwa la moto la milele na kiberiti, watateseka milele na hawatapunzima mchana na usiku.

Hivyo, wenye haki ni lazima waishi kwa matumaini, hali wakiisubiria siku ya Bwana. Wenye haki wote wanapaswa kukumbuka kwamba mauaji ya kuifia-dini, ufufuo, unyakuo, na uzima wa milele ni vyao. Naomba ulishike hili Neno la kweli na tumaini ulilolisikia kwa uthabiti wote.

Wenye haki wataendelea kuishi hali wakiihubiri injili ya maji na Roho na kisha kuliweka tumaini lao katika Ufalme wa Mbinguni hadi siku ambayo Bwana atarejea. Wenye haki wana mamlaka ya kuishi milele katika Ufalme wa Mungu, na wana mamlaka ya kuihubiri injili ya maji na Roho katika dunia hii.

Watakatifu Wanaoishi katika Kipindi Hiki Cha Giza Wanapaswa Kufanya Nini?

Ni dhahiri kwamba kipindi hiki ni kipindi cha giza, na ni kipindi ambacho inaendelea kuwa vigumu sana kuishi ndani yake. Hivyo, ni lazima tuihubiri injili ya maji na Roho kwa kwenye dhambi na kisha kuwalea. Wenye haki ni lazima waueneze upendo wa Mungu na ondoleo la dhambi zao linalopatikana kupitia injili ya maji na Roho iliyotolewa na Yesu Kristo katika ulimwengu mzima. Hili ni jambo ambalo watakatifu wanapaswa kulifanya.

Ikiwa watakatifu wataipoteza fursa hii, basi ni hakika kwamba fursa hii hawataipata tena. Kwa kuwa mwisho wa ulimwengu huu hauko mbali sana, basi tunapaswa kuihubiri injili ya maji na Roho zaidi, na kisha kuzilea nafsi zilizopotea kwa kuzipatia tumaini la Ufalme wa Mungu. Hili ni jambo jema ambalo wenye haki wanapaswa kulifanya.

Katika ulimwengu huu wa sasa, kuna watu wengi ambao, pamoja na kuwa hawana Neno la injili ya maji na Roho, wanaendelea kudai kumwamini Yesu na kuishi maisha yao huku wakimtumikia Bwana. Lakini, wale wanaoishi maisha ya kidini pasipo ukweli halisi ni manabii wa uongo. Waongo hawa ni wadanganyifu ambao kazi yao ni kunyonya mali na vitu vya waamini kwa kutumia jina la Yesu.

Hivyo, tunawaonea huruma wale wote wanaojaribu kuishi maisha yao ya kiimani huku wakidanganywa na hawa manabii wa uongo. Hali wakiishi pasipo kuwa na injili ya maji na Roho, na huku wakidai kumwamini Bwana, Wakristo hawa wa mazoea wanaendelea kubaki kuwa wenye dhambi na wanaendelea kuishi chini ya laana ya Torati ya Mungu. Wanaendelea kuishi katika dhambi wakati wote, hali wakiwa hawafahamu ukweli kwamba kama wangelifahamu injili ya

maji na Roho, basi dhambi zao zote zingelipotea na zingelifanywa kuwa nyeupe kama theluji, na kwa sababu hiyo wangelipewa Roho Mtakatifu kama karama.

Lakini kinyume chake, watumishi wa Mungu wanaoamini katika injili ya maji na Roho wanaendelea kuishi kwa amani. Watumishi wa Mungu na watu wake wanaifurahia injili ya maji na Roho. Wanashuhudia hivi: “Bwana Yesu amezifanya dhambi zote za ulimwengu kutoweka kwa kuzichukua dhambi za ulimwengu katika mwili wake mara moja kwa ubatizo wake toka kwa Yohana, na kwa kuhukumiwa kwa ajili ya dhambi hizo Msalabani. Ninapouamini wokovu huu wa upatanisho, dhambi zangu zote ambazo zilikuwa zikiniielemea zinatoweka. Sasa nimefanyika kuwa mwenye haki.”

Watakatifu katika Kanisa la Mungu wanampatia Mungu utukufu kwa ushuhuda kama huo. Wale alio na imani hii wanaweza kuwa na tumaini Mbinguni.

Ufufuo wa Kwanza ni Tukio Lililohifadhiwa Kwa Ajili ya Watakatifu

Hivi punde, Bwana atarejea hapa duniani. Muda mfupi tangu sasa, mtu mmoja ambaye atakuwa ni Mpinga Kristo ataonekana na kisha kuiweka chapa yake katika mikono ya kulia na katika vipaji vya nyuso vya watu wengi. Wakati huu utakapowadia, utapaswa kutambua kwamba ujio wa mara ya pili wa Bwana, pamoja na mauji ya wafia-dini, ufufuo, na unyakuo vitakuwa vimekaribia. Siku kama hiyo na saa kama hiyo itakapowadia, basi unapaswa kutambua kuwa itakuwa ni siku ya furaha kwa watakatifu, lakini kwa wenye dhambi ambao hawajazaliwa tena upya, itakuwa ni siku ya hukumu ya dhambi zao.

Watakatifu wote watafufuliwa mara baada ya kuifia-dini, kisha watajiunga katika chakula cha harusi ya Mwana-kondoo pamoja na Bwana. Wakati wewe na mimi tutakapouawa na kuifia-dini wakati huo, muda si mrefu miili yetu itafufuliwa na kunyakuliwa. Haijalishi kitakachokuwa kimetokea kwa miili ya watakatifu waliotangulia kabla yetu—yaani hata kama miili yao imebadilika na kuwa vumbi au la, au hata kama miili yao haina umbo lolote, hakutakuwa na shida juu ya wao kufufuliwa. Wakati huu utakapowadia, watakatifu watafufuliwa sio katika miili dhaifu ya sasa, bali katika miili mikamilifu. Wenye haki watafufuliwa katika miili mitakatifu, na wataishi na Bwana milele.

Hata wakati ambao nyakati ngumu zinatusubiri, yaani wakati ambapo Mpinga Kristo ataonekana na kututesa, basi sisi tunapaswa kuilinda imani yetu katika Yesu Kristo kwa kuamini katika Neno la Mungu ambalo tumelisikia hivi sasa. Pia tusisahau kwamba kwa kuwa wewe na mimi tumeamini katika injili ya maji na Roho, basi sisi sote tutashiriki katika mauaji ya kuifia-dini ya watakatifu, tutashiriki katika ufufuo na unyakuo.

Sasa, hupaswi kuanguka na kuiacha imani yako katika ukweli huu, kisha unapaswa kuishi maisha ya kumpinga na kumshinda Mpinga Kristo. Kwa pamoja, yaani pamoja na wale waliookolewa kabla yetu kwa kuamini katika ukweli huu, tunapaswa kulishikilia Neno la Mungu, na kisha kumfuata Bwana kwa imani hadi siku hii itakapowadia.

Hata Sasa, Kuna Waongo Wengi Wanaowadanganya Watu

Hata sasa, kuna idadi kubwa ya watu, ambao kama watumishi wa Shetani, wanafundisha imani ya uongo.

Kimsingi, kuna waongo wengi sana ambao wanatetea na kuifundisha nadharia ya kunyakuliwa kabla ya mateso kwa waumini wao, hali wakijaribu kuwashawishi kwamba hawana jambo la kuhofia wala kufanya kuhusiana na Dhiki Kuu ya miaka saba.

Kinyume chake, Biblia inaeleza wazi kwamba mauaji ya watakatifu ya kuifia-dini na kunyakuliwa vitatokea baada ya kupita miaka mitatu na nusu ya ile Dhiki. Hivyo, tusidanganywe na hao waongo. Badala yake hebu tufahamu na kuamini kwamba baada ya kipindi cha miaka mitatu na nusu kupita katika ile miaka saba ya Dhiki Kuu, basi sisi sote tutauawa na kuifia-dini, na muda mfupi baadaye tutafufuliwa na kunyakuliwa kwa pamoja.

Hivyo, ni lazima mkae mbali na manabii wa uongo wanaofundisha kwamba hawatakuwa na cha kufanya kuhusiana na miaka saba ya Dhiki Kuu. Watakatifu wa kweli wanaamini kwamba mauaji yao ya kuifia-dini, ufufuo, na unyakuo, na karamu ya harusi ya Mwana-kondoo vyote vitatokea mara baada ya kupita ile miaka mitatu katika ile miaka ya Dhiki.

Sasa, Sisi Sote Tuishi Vipi?

Kwa sasa, unapaswa kutambua kwamba ikiwa mtu anamwamini Bwana kuwa ni Mwokozi wake—yaani Bwana aliyekuja katika ulimwengu huu, akazibeba dhambi za ulimwengu huu kwa ubatizo wake toka kwa Yohana, akaimwaga damu yake Msalabani, na akafufuka tena toka kwa wafu—basi Roho Mtakatifu atakuja katika moyo wa mwamini huyu kama karama yake.

Unapaswa kusikiliza kwa masiko yako na kisha kuamini


kwa moyo wako kile ambacho Roho Mtakatifu anakuambia kwa kupitia Kanisa la Mungu, na kisha udumu katika imani yako kwa Mungu. Watakatifu wote ni lazima waishi maisha yao yakiongozwa na Kanisa la Mungu. Hakuna mtu anayeweza kuihubiri, kuishika, au kuitumikia injili ya maji na Roho hali akiwa peke yake. Hii ndio maana Kanisa la Mungu ni la muhimu sana hata kwa watakatifu ambao wamekwisha zaliwa tena upya.

Hivyo, Mungu amelianzisha Kanisa Lake, na watumishi wake hapa duniani, na kwa kupitia hapo anawalisha wanakondoo wake. Kimsingi, kazi za Mungu zinakuwa ni za thamani sana na zenye umuhimu kadri nyakati za mwisho zinavyozidi kutukaribia, na kwa sababu hiyo, ninaomba na kuamini kwamba utaishi maisha ya uaminifu yaliyojazwa na Roho Mtakatifu. Kadri nyakati za mwisho zinavyozidi kukabiria, wenye haki ni lazima wafanye kazi kwa juhudi zaidi katika kuungana, kuomba, kutiana moyo, kuishikilia imani, na katika kusaidiana, na katika kuishi kwa ajili ya Bwana, hali wakiwa wameungana katika moyo mmoja na kwa nia moja.

Mungu ameruhusu mauaji ya kufia-dini, ufufuo, unyakuo, na uzima wa milele kwa watakatifu. Hebu sisi sote tuishi maisha ambayo yanasimama kinyume na Mpinga Kristo, na kisha tusimame kwa uthabiti mbele za Mungu. Halleluya! ☒

SURA YA

15



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Watakatifu Wanaoyasifia Matendo ya Bwana ya Kushangaza Angani

< Ufunuo 15:1-8 >

“Kisha nikaona ishara nyingine katika mbingu, iliyo kubwa, na ya ajabu; malaika saba wenye mapigo saba ya mwisho; maana katika hayo ghadhabu ya Mungu imetimia. Tena nikaona kitu kama mfano wa bahari ya kioo iliyochangamana na moto, na wale wenye kushinda, watokao kwa yule mnyama, na sanamu yake, na kwa hesabu ya jina lake, walikuwa wamesimama kando-kando ya hiyo bahari ya kioo, wenye vinubi vya Mungu. Nao wauimba wimbo wa Musa, mtumwa wa Mungu, na wimbo wa Mwana-Kondoo, wakisema:

‘Ni makuu, na ya ajabu, matendo yako,

Ee Bwana Mungu Mwenyezi!

Ni za haki, na za kweli, njia zako!

Ee Mfalme wa mataifa.

Ni nani asiyekucha, Ee Bwana, na kulitukuza jina lako?

Kwa kuwa wewe peke yako u Mtakatifu.

Kwa maana mataifa yote watakuja na kusujudu mbele yako,

Kwa kuwa matendo yako ya haki yamekwisha kufunuliwa.’

Na baada ya hayo nikaona, na hekalu la hema ya ushuhuda mbinguni lilifunguliwa; na wale malaika saba

wenye mapigo saba, wakatoka katika hekalu, wamevikwa mavazi ya kitani safi, ya kung'aa, wamefungwa vifuani mwao mishihi ya dhahabu. Na mmoja wa wale wenye uhai wanne akawapa wale malaika saba vitasa saba vya dhahabu, vimejaa ghadhabu ya Mungu, aliye hai hata milele na milele. Hekalu likajazwa moshi uliotoka kwenye utukufu wa Mungu na uweza wake. Wala hapakuwa na mtu aliyeweza kuingia ndani ya hekalu, hata yatimizwe mapigo saba ya wale malaika saba.

Mafafanuzi

Aya ya 1: Kisha nikaona ishara nyingine katika mbingu, iliyo kubwa, na ya ajabu; malaika saba wenye mapigo saba ya mwisho; maana katika hayo ghadhabu ya Mungu imetimia.

Sura ya 15 inatueleza juu ya mwisho wa ulimwengu utakaoletwa na mapigo ya mabakuli saba yatakayomiminwa na malaika saba. Je, hii “ishara nyingine katika mbingu, iliyo kubwa, na ya ajabu,” ambayo Mtume Yohana aliiona ni nini? Ni mwonekano wa kushangaza wa watakatifu wakiwa wamesimama katika bahari ya kioo huku wakizisifia kazi za Bwana.

Aya ya 2: Tena nikaona kitu kama mfano wa bahari ya kioo iliyochangamana na moto, na wale wenye kushinda, watokao kwa yule mnyama, na sanamu yake, na kwa hesabu ya jina lake, walikuwa wamesimama kando-kando ya hiyo bahari ya kioo, wenye vinubi vya Mungu.

Hii sentensi inayosema “kitu kama mfano wa bahari ya kioo iliyochangamana na moto” inatueleza kuwa maombolezo ya kuteseka katika dunia hii yatafikia ukomo wake wakati

Mungu atakapoyamimina mapigo ya mabakuli saba katika dunia, na kwa upande mwingine, watakatifu watakuwa wakimsifu Bwana angani. Mapigo ya Mungu ya mabakuli saba katika dunia hii yataletwa ili watakatifu walipize kisasi kwa adui zao.

Wakati huu, watakatifu, baada ya kuwa wameshiriki katika ufufuo wao na kunyakuliwa na Mungu, watakuwa wamesimama katika bahari hii ya kioo iliyochangamana na moto huku wakizisifu kazi za Mungu. Watakatifu waliofufuliwa na kunyakuliwa kwa kupitia nguvu za Mungu, baada ya kuuawa na kuifia-dini hapa duniani watamsifu Bwana milele kwa ajili ya wokovu na nguvu zake. Watakatifu wanaosifu ni wale ambao watakuwa wameufikia ushindi wa kiimani kwa kumshinda Mpinga Kristo kwa imani inayomkataa yeye, na sanamu yake, na alama ya jina lake au namba ya jina lake.

Aya ya 3: “Nao wauimba wimbo wa Musa, mtumwa wa Mungu, na wimbo wa Mwana-Kondoo, wakisema: ‘Ni makuu, na ya ajabu, matendo yako, Ee Bwana Mungu Mwenyezi! Ni za haki, na za kweli, njia zako! Ee Mfalme wa mataifa.’”

Watakatifu wakiwa wamesimama katika bahari ya kioo wanauimba wimbo wa Musa na wimbo wa Mwana-kondoo. Na mashairi yake ni: *“Ni makuu, na ya ajabu, matendo yako, Ee Bwana Mungu Mwenyezi! Ni za haki, na za kweli, njia zako!”* Mashairi ya wimbo huu, kama yalivyoandikwa, yanamsifu Mungu kutokana na ukweli kuwa, Mungu, kwa kupitia nguvu zake kuu hakuna asichoweza kukifanya. Pia imeandikwa hapa kwamba *“Ni makuu, na ya ajabu, matendo yako [Mungu].”*

Neno “ya ajabu” lina maanisha ni “kitu ambacho ni kikuu ambacho maneno hayawezi kuelezea vizuri.” Kwa maneno mengine, ni jambo la kushangaza na la ajabu kwamba Bwana

Mungu wetu amewaokoa watakatifu wote wa Agano la Kale na wale wa Agano Jipya toka katika dhambi zetu kwa kupitia injili ya maji na Roho, na kisha kuwafanya wasio na dhambi, na anawaruhusu watakatifu hawa, ambao wameokolewa kwa kupitia imani yao, kumsifu Bwana wakiwa angani kwa kuwafufua toka katika kifo cha mwili na kuwainua angani. Watakatifu hawa wanamsifu Bwana Mungu kwa kuwa Mwokozi wao, Bwana wao, na Mungu Mwenyezi.

Je, unaamini kwa kweli kuwa Bwana Mungu ameumba ulimwengu na vitu vyote vilivyomo ndani yake, ukiwemo wewe na mimi, na kwamba Yeye ni Bwana? Wale tu wanaoamini katika ukweli huu ndio wanaoweza kuwa waamini katika injili ya maji na Roho iliyotolewa na Bwana. Wale walio na imani hii ndio wale walio na imani ya kweli kabisa. Wakristo wanapaswa kufahamu na kuamini kwamba Yesu ni Muumba aliyeumba ulimwengu wote na kila kitu kilichomo ndani yake. Na wanapaswa kumsifu na kumwabudu Bwana Mungu kwa kuyafahamu na kuyaamini matendo yake. *“Ni makuu, na ya ajabu, matendo yako, Ee Bwana Mungu Mwenyezi!”* Kusifu huku kwa imani kunaionyesha imani ya kweli ya watakatifu waliozaliwa tena upya wanaouimba wimbo wa Mungu na wimbo wa Mwana-kondoo.

Je, unaamini kwamba Bwana Yesu ni Mungu Mwenyezi? Wale wanaoamini kwamba Yesu ni Mungu Mwenyewe aliyeumba ulimwengu mzima pia wanaamini kwamba Bwana alikuja hapa duniani katika mwili wa mwanadamu, na kwamba akiwa na umri wa miaka 30 alibatizwa na Yohana ili kuzichukua dhambi za mwanadamu katika mwiliw ake mara moja, na kwamba aliimwaga damu yake Msalabani na kisha akafufuka tena toka kwa wafu. Kwa kupitia imani yao wanapokea ondoleo la dhambi na kufanywa watakatifu. Wale wanaoufahamu ukweli huu, na walio na imani ya kweli, basi ni

hakika kuwa watu hao wanaweza kutajwa kuwa ni watu wa imani kubwa.

Kifungu hiki kinaeleza kuwa watakatifu walionyakuliwa walimsifu Mungu wakiwa angani, wakisema, “*Ni makuu, na ya ajabu, matendo yako*” Kwa maneno mengine, walikuwa wakimsifu Bwana Mungu kwa kuumba ulimwengu na wanadamu, kwa kuwaokoa wenye dhambi katika dunia hii kwa kuzioshelea mbali dhambi zao zote mara moja kwa kupitia ubatizo wa Bwana alioupokea toka kwa Yohana, na kwa kuwapatia haki ya kufanyika wana wa Mungu—alifanya hayo yote kwa kupitia injili ya maji na Roho iliyotolewa na Bwana. Ule ukweli kwamba watakatifu wanaweza kushiriki katika kuifia-dini, katika ufufuo na unyakuo, na katika uzima wa milele—basi haya yote ni baraka zilizotolewa na Mungu.

Watakatifu wote ni lazima wampatie Mungu sifa zao ambazo zinaufunua utukufu wa Mungu kwa matendo yote ya haki ambayo Bwana ameyafanya kwa wenye dhambi—yaani, kwa kuzifanya dhambi zote kupotea, na pia kwa matendo mengine yote ambayo Bwana ameyafanya alipokuwa hapa duniani. Watakatifu wanaimba wimbo wa Musa na wimbo wa Mwana-kondoo wakiwa angani. Wanamsifu Bwana huku wakiimba jinsi ukuu wake na maajabu yake yalivyo, yaani kile ambacho Bwana Mungu Mwenyezi amekifanya kwa adui zake.

Kwa hakika, kile ambacho Bwana amekifanya kwa watakatifu na kwa wale wote wanaosimama kinyume na Mungu si jambo la kushangaza kwetu tu, bali pia ni jambo la ajabu. Dhumuni la Mungu kwa kuumba ulimwengu huu ulilenga kuwafanya wanadamu kuwa watu wake. Hivyo, matendo yake yote aliyoyafanya kwa mwanadamu yanaonekana kwetu kuwa ni matendo ya kushangaza na ya ajabu. Tunamtolea Mungu utukufu kwa kuyaamini yale yote ambayo ameyafanya kwa ajili yetu, na tunamsifu kwa

kuyaamini matendo yake yote.

Kule kusema kwamba Mungu alimuumba mwanadamu kwa mfano wake ni jambo la ajabu pia. Kule kusema kwamba Mungu alitoa Sheria kwa kila mtu, na kwamba alitenda kwa kupitia Bikira Maria ili kumtuma Yesu Kristo kuja hapa duniani pia ni mambo ya ajabu mbele ya macho yetu. Lakini, kwa wakati huo huo, tunaamini kwamba matendo haya yote yalifanywa kama njia ya kuwaokoa wenye dhambi toka katika dhambi zao. Pia ni jambo la ajabu kwamba Bwana wetu amezipitisha dhambi zote za ulimwengu kwenda katika mwili wa Yesu Kristo, mara moja, kwa kumfanya aupokee ubatizo toka kwa Yohana, ili kwamba aweze kuifanya kila dhambi ya mwanadamu kutoweka kikamilifu na kwa usahihi.

Kwa wale wanaoamini katika injili ya maji na Roho, kwamba Bwana Mungu amewapatia ondoleo la dhambi la milele pamoja na Roho Mtakatifu ni jambo la kushangaza na la ajabu. Pia kule kusema kwamba Bwana amewafanya watakatifu waliookolewa kuihubiri injili ya maji na Roho katika ulimwengu mzima ni jambo jingine la kushangaza, yaani kitu ambacho ni cha ajabu kwetu sisi. Ule ukweli kwamba Mungu ataruhusu vifo vya kuifia-dini kwa wataktifu, na kuwaruhusu kufufuliwa na kunyakuliwa, na kuwafanya waishi katika utukufu milele huko Mbinguni—basi ni hakika kuwa matendo haya yote ni baraka za kushangaza.

Baada ya kupanga mambo haya yote, Mungu atayatimiza kwa yote kama alivyopanga mara wakati utakapowadia—matendo haya ya Bwana yanayowafanya watakatifu kumsifu na kumtukiza Mungu yanabadilishwa na kuwa baraka kuu katika mioyo yetu. Pia tunamshukuru Bwana na tunabarikiwa kutokana na ukweli kwamba atalipiza kisasi kwa wapinzani wake kwa nguvu zake kuu kwa kupitia mapigo ya mabakuli saba.

Kwa kuwa matendo yote ya Bwana Mungu yanaonekana mbele ya macho ya watakatifu kama kitu kilicho mbali na upeo wao, basi ndio maana wanamsifu Bwana. Hivyo wanamsifu Bwana kwa nguvu zake kuu, na kwa matendo na nguvu zake za ajabu. Bwana Mungu wetu anastahili kupokea sifa zote si tu toka kwa kila mwanadamu, bali toka kwa kila uumbaji katika ulimwengu huu. Halleluya!

Wale waliofahamu, waliopata uzoefu, na walioshuhudia kwa macho yao yale ambayo Bwana Mungu ameyafanya kwao hawawezi kufanya lolote zaidi ya kumsifu kwa nguvu zake kuu, kwa hekima yake kamilifu, kwa haki yake, kwa hukumu yake ya haki isiyobadilika, na na kwa upendo wake wa milele na usiobadilika. Bwana amewaruhusu watakatifu kumsifu milele kwa matendo yake ya ajabu.

Kwa hiyo, watakatifu wanamsifu Bwana Mungu milele kwa matendo yote ambayo ameyafanya kwa ajili yao, na wanafanya hivyo kwa sababu ya wema na ukuu wa Mungu. Bwana Mungu wetu anastahili kupokea sifa toka katika vitu vyote hapa ulimwenguni, kwa kuwa matendo yake yote yamewezekana kutokana na nguvu zake kuu. Halleluya! Ninamsifu Bwana kwa nguvu zake na kwa upendo wake wa milele, usiobadilika na uliobarikiwa!

Aya ya 4: “Ni nani asiyekucha, Ee Bwana, na kulitukuza jina lako? Kwa kuwa wewe peke yako u Mtakatifu. Kwa maana mataifa yote watakuja na kusujudu mbele yako, Kwa kuwa matendo yako ya haki yamekwisha kufunuliwa.”

Watakatifu wakiwa angani wanaimba sifa wakisifu matendo ya Bwana kwa vinywa vyao. “Ni nani asiyekucha, Ee Bwana, na kulitukuza jina lako?” Hizi ni sifa zilizojazwa na tumaini la kiimani, huku zikitangaza kwa ujasiri kwamba hakuna anayeweza kusimama kinyume na utukufu wa Bwana

Mungu, na kwamba hakuna anayeweza kudiriki kumzuia Mungu kupokea sifa. Ni nani anayeweza kusimama mbele ya jina la Bwana pasipo kutetemeka kwa hofu? Hakuna hata mmoja wala hakuna kitu kinachoweza katika dunia hii, na katika ulimwengu mzima, kusimama na kumshinda Bwana Mungu wetu, kwa kuwa Yesu ni Mfalme wa wafalme, na Mungu Mwenyezi.

Watu wote katika ulimwengu huu pamoja na watakatifu hawawezi kufanya lolote zaidi ya kutetemeka kwa hofu mbele ya jina la Yesu Kristo, mbele ya nguvu Bwana Mungu mwenyezi, na mbele ya ukweli wa Mungu. Kwa kuwa nguvu za Bwana Mungu ni kubwa sana, na kwa kuwa Yeye ni wa kweli na mkamilifu, basi viumbe vyote vinampatia shukrani, vinampatia utukufu na kulisifu jina lake. Kila mtu ni lazima awe na moyo unaomwogopa Mungu. Kila kitu katika ulimwengu huu ni lazima kilisifu jina la Bwana wetu. Kwa nini? Kwa sababu Bwana wetu ni mtakatifu, na amewakomboa wanadamu wote toka katika hali ya kutokuwa na haki.

Kutokana na mapigo ya mabakuli saba ambayo Bwana atayamimina kwa Mpinga Kristo, basi wafuasi wake na wanadini wanaoishi katika ulimwengu huu wataidhihirisha haki ya Mungu, na kwa sababu hiyo hatuna la kufanya zaidi ya kumsifu Bwana. Kwa kuwa haki ya Bwana inafunuliwa kupitia mapigo makuu ya mabakuli saba, basi ni hakika kuwa Bwana Mungu wetu anastahili kupokea utukufu, sifa, na kuabudiwa na viumbe vyote hai, malaika, na watakatifu angani.

Ni nani anayeweza kudiriki kutoliogopa jina la Bwana Yesu Kristo? Bwana wetu si kiumbe, bali ni Bwana Mungu Mwenyezi. Kwa kuyamimina mapigo ya kutisha ya mabakuli saba kwa wale wote wanaosimama kinyume na Mungu, basi ni hakika kuwa Bwana Mungu anafanya kila kiumbe kisikwepe kumsifu kutokana na nguvu na uweza wake.

“Kwa maana mataifa yote watakuja na kusujudu mbele yako, Kwa kuwa matendo yako ya haki yamekwisha kufunuliwa.” Hivyo, ni lazima tutambue kwamba hakuna hata mmoja anayeweza kusimama na kulitukana jina la Bwana kisha akaishi kwa furaha.

Aina ya sifa ambazo jina lake listahili kupokea ni kupiga magoti mbele ya jina la Bwana, kuliadini, kumshukuru na kumsifu Mungu kwa uweza wake, ukuu na nguvu zake, kwa rehema zake, na kwa wokovu na upendo wake mkuu. Hivyo, uumbaji wote ni lazima uadini kile ambacho Bwana amekifanya alipokuwa hapa duniani, na kisha umsifu na kumwabudu Yeye. Bwana wetu anatahili kupokea sifa toka kwa watu wote na mataifa yote. Amin. Halleluya!

Aya ya 5: Na baada ya hayo nikaona, na hekalu la hema ya ushuhuda mbinguni lilifunguliwa.

Aya hii inatueleza kwamba baada ya kuisha kwa mapigo ya mabakuli saba ambayo Bwana Mungu atayamimina hapa duniani, Mungu atawapatia watakatifu nyumba yake ya Mbinguni. Mambo haya yote yatatimizwa na Bwana Mungu. Sasa hili hekalu la hema ya ushuhuda ni kitu gani? Ni nyumba ya Mungu ambayo ni kama hema takatifu la kukutania la hapa duniani. Msemo huu, *“hekalu la hema ya ushuhuda mbinguni lilifunguliwa”* una maanisha kuwa kipindi cha Ufalme wa Bwana Mungu kitafunguliwa kuanzia hapo.

Mapigo ya mwisho na Ufalme wa Bwana Mungu utaletwa hapa duniani kwa kuufungua mlango wa hekalu la hema ya ushuhuda. Hakuna imani itakayoruhusiwa kuingia mbele za Mungu ikiwa haiifahamu injili ya maji na Roho. Hivyo, tunapaswa kuifahamu na kuadini injili hii na kisha kutambua na kuadini kwamba wakati wa sisi kwenda kuishi katika Ufalme wa Kristo unakaribia.

Aya ya 6: na wale malaika saba wenye mapigo saba, wakatoka katika hekalu, wamevikwa mavazi ya kitani safi, ya kung'aa, wamefungwa vifuani mwao mshipi ya dhahabu.

Neno hili linatuonyesha kuwa wakati Mungu atakapoyamimina mapigo ya mabakuli saba katika ulimwengu huu, Mungu atafanya kazi kupitia malaika wanaoamini juu ya umuhimu wa haki na usawa wa haya mapigo saba. Kwa maneno mengine, neno linatueleza kuwa watumishi wa Mungu wanaweza kustahilishwa kumtumikia Bwana na kuwa watumishi wake pale tu wanapokuwa wakiamini katika haki yake na kuyaweka matumaini yao yote katika wema wa Mungu.

Watumishi wa Mungu wanaweza kuzifanya kazi za Mungu pale wanapokuwa wakiamini kwamba matendo ya Bwana ni sahihi wakati wote. Hivyo, watakatifu wanaweza kutumiwa kama watumishi wa Mungu wenye thamani pale tu wanapokuwa wamejivika haki ya Mungu, na kujivisha tumaini la wokovu kama kofia ya chuma, na kuilinda imani yao, na kisha kuishi maisha ambayo yanamtukuza Bwana.

Aya ya 7: Na mmoja wa wale wenye uhai wanne akawapa wale malaika saba vitasa saba vya dhahabu, vimejaa ghadhabu ya Mungu, aliye hai hata milele na milele.

Hii inatueleza kwamba wakati Mungu anapofanya kazi kupitia watumishi wake, basi anawafanya watende kazi katika namna yenye utaratibu, na kwamba kazi hizo pia zinatimizwa kwa utaratibu mzuri. Msemu, “mmoja wa wale wenye uhai wanne,” unatuonyesha kuwa Bwana anao watumishi wa thamani sana waliowekwa kwa ajili ya madhumuni yake, na kwamba Mungu anafanya kazi kupitia watumishi hao. Viumbe wenye uhai wanne wanaonekana hapa ni watumishi wanne wa Bwana ambao ni wa thamani zaidi ambao wakati wote wapo karibu naye, na watumishi hao ndio wa kwanza katika

kuyatimiza madhumuni ya Mungu. Tunapaswa kuyatambua mamlaka ya Mungu na uweza wake mkuu, pia ni lazima tuamini kwamba Mungu anafanya kazi kupitia watumishi wake.

Aya ya 8: Hekalu likajazwa moshi uliotoka kwenye utukufu wa Mungu na uweza wake. Wala hapakuwa na mtu aliyeweza kuingia ndani ya hekalu, hata yatimizwe mapigo saba ya wale malaika saba.

Ni hakika kuwa hakuna hata mmoja anayeweza kuingia katika Ufalme wa Mungu kabla Bwana Mungu hajaitimiza hukumu yake hapa duniani. Hii inatueleza jinsi utakatifu wa Mungu ulivyo mkamilifu. Pia inatueleza kuwa yeye si Mungu anayefurahia uovu (Zaburi 5:4). Hivyo, ni lazima tukumbuke kuwa ikiwa mtu yeyote anataka kuingia katika Ufalme wa Mungu, basi imempasa mtu huyo kuamini katika injili ya maji na Roho ambayo Bwana ameitoa kwa wanadamu. Bwana Mungu wetu anawaruhusu wale tu wanaoamini katika injili ya maji na Roho kuingia katika Ufalme wake.

Mungu ametoa baraka kwa watakatifu waliopokea ondoleo la dhambi kuishi milele katika Ufalme wake, hii ni baada ya kuwa amewaangamiza maadui zake kwa kuwamiminia mapigo ya mabakuli saba. Kazi na matendo yote ya Mungu yanakwenda na kufanyika kupita uwezo wa fikra za mwanadamu, na kwa sababu hiyo Mungu anaufunua ukuu wake na mamlaka yake. Mungu anadhihirisha ukuu na nguvu zake kwa kuwahukumu maadui zake. Kama Mungu asingelikuwa na nguvu ya kuwaadhibu maadui zake kwa sababu ya dhambi zao na kwa kule kusimama kinyume naye, basi ni hakika kuwa asingeliweza kupokea sifa toka kwa wote.

Lakini, akiwa ni Mungu anazo nguvu zaidi za kuwaadhibu wale wanaosimama kinyume naye, ni hakika kuwa Bwana Mungu ataleta hukumu yake kwa maadui zake, na atawaadhibu

kwa adhabu ya milele ya kuzimu.

Bwana Mungu wetu anastahili zaidi kupokea sifa milele toka kwa kila mtu katika kila taifa. Hivyo, Mungu ataitimiza hukumu yake dhidi ya maadui zake kwa dhambi zao zote kisha ataufungua Ufalme wake. Amin. Tunamshukuru Bwana Mungu wetu kwa nguvu zake kuu, na kwa utukufu na utakatifu wake. Halleluya! ☒

Kituo cha Kugawa Hatma ya Milele

< Ufunuo 15:1-8 >

Sura ya 15 inaeleza juu ya mapigo ya mabakuli saba, ambayo yatamiminwa mara baada ya kunyakuliwa kwa watakatifu, mapigo hayo yatamiminwa juu ya wale ambao watakuwa wamesimama kama maadui wa Mungu. Namba “saba” ambayo inajitokeza sana katika kitabu cha Ufunuo, kama vile mihuri saba, matarumbeta saba, na mabakuli saba, inasimama kumaanisha ukamilifu wa Mungu na nguvu zake kuu. Yesu Kristo ni Mungu mwenye nguvu na anayejua yote. Kule kusema kuwa Yesu ni Mungu mwenye nguvu na anayejua yote kuna maanisha kuwa Bwana wetu ni Mungu Mwenyezi ambaye kwake yeye hakuna kisichowezezana. Bwana wetu ni Mungu Mwenyewe ambaye amepanga vitu vyote na ambaye ana nguvu na mamlaka ya kuvitumiza vyote.

Hivyo, watakatifu wanapaswa kumsifu Bwana kwa uwezo wake mkuu na unaoweza yote ambao umedhihirika kupitia mapigo ya mabakuli saba ambayo atayamimina katika ulimwengu huu. Tunamshukuru Bwana wetu kutokana na ukweli kuwa hukumu ya jinsi hiyo imefanywa iwezekane kwa kupitia uwezo na nguvu zake. Ule ukweli kuwa Bwana atalipiza kisasi kwa ajili ya watakatifu kwa maadui wake kwa mapigo ya mabakuli saba na mateso ya milele kuzimu, basi ni jambo ambalo watakatifu wanapaswa kushukuru kwa kuwa ukweli huo ni sahihi kabisa. Hivyo, watakatifu hawawezi kufanya lolote zaidi ya kumsifu Bwana. Haleluya!

Mapigo ya mabakuli saba yatawasili mara baada ya watakatifu kunyakuliwa baada ya kuipita miaka mitatu na nusu katika ile miaka saba ya Dhiki Kuu. Kutokana na mapigo ya mabakuli haya saba, mioyo ya maadui wa Mungu itahuzunishwa, kwa kuwa watagundua kuwa Bwana wetu ni Mungu Mwenyezi, na hivyo watamhofia na kumwogopa Mungu.

Ile *“ishara kubwa mbinguni, na ya ajabu”* inayoelezwa katika aya ya 1 ina maanisha ni mapigo ya mwisho ambayo yatamwagwa katika ulimwengu huu—yaani, mapigo ya mabakuli saba. Kwa upande mwingine, ule msemu unaosema *“kubwa na ya ajabu”* unatueleza katika namna tatu: kwanza, watakatifu, kwa kupitia Neno la unabii wanafahamu kila kitu kuhusu mapigo ambayo yataujilia ulimwengu huu; pili, watakatifu wataondolewa toka katika mapigo ya mabakuli saba; na tatu, nguvu ya haya mapigo ya mabakuli saba yatakayolewa na Bwana yatakuwa katika ulimwengu mzima na yatakuwa yenye maangamizi ya kifo.

Kwa upande mwingine, watakatifu waliokombolewa na kunyakuliwa wataimba *“wimbo wa Musa, mtumishi wa Mungu, na wimbo wa Mwana-kondoo”* wakiwa angani. Msingi wa wimbo huu, kama unavyoonekana katika kitabu cha Kutoka 15:1-8, ni wimbo wa Waisraeli, ambao walikuwa wakimtukuza Bwana kwa nguvu na mamlaka yake baada ya kuvuka Bahari ya Shamu wakiongozwa na Musa. Hawakuwa na cha kufanya zaidi ya kumsifu na kumtukuza Mungu kwa kuwaokoa kwa nguvu na mamlaka yake toka katika hali tete ya kufuatiwa na jeshi la Wamisri.

Vivyo hivyo, watakatifu wa Agano Jipya hawawezi kufanya lolote zaidi ya kumsifu Bwana kwa wokovu wao wa milele, ambao umekuja kwa kupitia ondoleo la dhambi lililotimizwa kwa ubatizo wa Yesu alioupokea toka kwa

Yohana na kwa damu yake Msalabani. Wakati nyakati za mwisho zitakapowadia, watu wa Mungu watamsifu tena Bwana, wakimshukuru kwa kuifia-dini, kwa ufufuo, unyakuo na uzima wa milele, mambo hayo yatakuwa yamewezekana kwa kupitia Yesu Kristo aliyewakomboa toka kwa adui zao na toka katika dhambi zao zote.

Kwa nyongeza, jambo la muhimu na la kipekee kwa wimbo huu ni kwamba unasifu nguvu za Bwana, uwezo wake, na haki yake. Wafia-dini hawataweza kufanya lolote zaidi ya kumsifu Bwana kwa nguvu zake, kwa neema ya wokovu toka katika dhambi, na baraka ya uzima wa milele.

“Hekalu la hema takatifu la ushuhuda” katika aya ya 5 lina simama kumaanisha Hema Takatifu la Kukutania ambalo Mungu aliliruhusu kwa Waisraeli wakati walipoondoka Misri ili aweze kuwapatia baraka za kuandamana na Bwana.

“Kitani” katika aya ya 6 ina simama kumaanisha haki ya Mungu. Inatueleza kuwa malaika watavikwa haki ya Mungu na kisha kupokea mamlaka toka kwa Mungu ya kutoa hukumu ambayo hakuna adui anayeweza kuikataa.

Aya ya 8 inasema, *“Hekalu likajazwa moshi uliotoka kwenye utukufu wa Mungu na uweza wake. Wala hapakuwa na mtu aliyeweza kuingia ndani ya hekalu, hata yatimizwe mapigo saba ya wale malaika saba.”* Hapa tunaweza kuzigundua maana tatu. Kwanza, aya hii inaonyesha jinsi hasira kamilifu ya Mungu ilivyo kwa adui zake.

Pili, inatueleza kuwa hakuna anayeweza kuingia katika Hekalu la Bwana pasipo kuamini katika ubatizo wa Yesu Kristo na damu yake, hii ni kwa kuwa wokovu wa Mungu kwa wenye dhambi ni mkamilifu sana.

Tatu, inaonyesha kuwa hakuna wema wa mwanadamu unaoweza kumwezesha yeyote yule kuikwepa hukumu ya haki ya Mungu, na kwamba ni kuamini katika ubatizo wa Yesu

Kristo na damu yake ndipo mtu anapoweza kuikwepa hasira ya Mungu itakayomiminwa kwa kwenye dhambi.

Hivyo, watakatifu ni lazima waishikilie injili na kuihubiri hadi wakati wa mwisho. Na wale ambao bado hawajapokea ondoleo la dhambi zao ni lazima watambue kuwa wamefungwa na watakabiliana na hukumu ya haki ya Mungu, hivyo ni lazima wairudie haraka iwezekanavyo injili ya maji na Roho iliyotolewa na Bwana. Kifungu hiki kinatuonyesha kuwa, ile hukumu ambayo Mungu ataileta kwa maadui zake kwa mapigo ya mabakuli saba ni kamilifu mbele ya wote watakaiona, na kwa sababu hiyo hakuna yeyote atakayeweza kuizuia hadi hukumu hii ya dhambi itakapokuwa imekamilika.

Sura ya 15 katika kitabu cha Ufunuo inatuonyesha kuwa Mpinga Kristo, Shetani, mapepo, na wale wote wanaosimama kinyume na kutoiamini injili ya maji na Roho, ambayo imeletwa kwetu kwa upendo wa Kristo, ni maadui wa Bwana wetu. Nimsifu na kumshukuru Bwana kwa kuyaleta mapigo yake kwa maadui hawa wa Mungu ili kuwahukumu. Ni sahihi kabisa kwa watakatifu kumsifu Bwana kwa wimbo wa Musa, mtumishi wa Mungu, na kwa wimbo wa Mwana-kondoo.

Hakuna anayeweza kutuzuia kuisifu haki ya Bwana, nguvu, uweza, na ukweli yake. Ninamsifu Bwana kwa kutupatia baraka kama hizo. Haleluya! ☒

SURA YA

16



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Mwanzo wa Mapigo ya Mabakuli Saba

< Ufunuo 16:1-21 >

“Nikasikia sauti kuu kutoka hekaluni, ikiwaambia wale malaika saba, Enendeni, mkavimimine vile vitasa saba vya ghadhabu ya Mungu juu ya nchi. Akaenda huyo wa kwanza, akakimimina kitasa chake juu ya nchi; pakawa na jipu baya, bovu, juu ya wale watu wenye chapa ya huyo mnyama, na wale wenye kuisujudia sanamu yake. Na huyo wa pili akakimimina kitasa chake juu ya bahari, ikawa damu kama damu ya mfu, na vitu vyote vyenye roho ya uhai katika bahari vikafa. Na huyo wa tatu akakimimina kitasa chake juu ya mito na chemchemi za maji; zikawa damu. Nami nikamsikia malaika wa maji akisema:

‘Wewe u mwenye haki,

Uliyeko na uliyekuwako, Mtakatifu,

Kwa kuwa umehukumu hivi.

Kwa kuwa walimwaga damu ya watakatifu na ya manabii,

Nawe umewapa damu wainywe.

Nao wamestahili.’

Nikaisikia hiyo madhabahu ikisema, ‘Naam, Bwana Mungu Mwenyezi, ni za kweli, na za haki, hukumu zako.’

Na huyo wa nne akakimimina kitasa chake juu ya jua, nalo likapewa kuwaunguza wanadamu kwa moto. Wanadamu wakaunguzwa maunguzo makubwa, nao wakalitukana jina la Mungu aliye na mamlaka juu ya mapigo hayo; wala hawakutubu wala kumpa utukufu. Na

huyo wa tano akakimimina kitasa chake juu ya kiti cha enzi cha yule mnyama; ufalme wake ukatiwa giza; wakatafuna ndimi zao kwa sababu ya maumivu, wakamtukana Mungu wa mbingu kwa sababu ya maumivu yao, na kwa sababu ya majipu yao; wala hawakuyatubia matendo yao. Na huyo wa sita akakimimina kitasa chake juu ya mto ule mkubwa Frati; maji yake yakakauka, ili njia itengenezwe kwa wafalme watokao katika maawio ya jua. Nikaona roho tatu za uchafu zilizofanana na vyura, zikitoka katika kinywa cha yule joka, na katika kinywa cha yule mnyama, na katika kinywa cha yule nabii wa uongo. Hizo ndizo roho za mashetani, zifanyazo ishara, zitokazo na kuwaendea wafalme wa ulimwengu wote kuwakusanya kwa vita ya siku ile kuu ya Mungu Mwenyezi. (Tazama, naja kama mwivi. Heri akeshayee, na kuyatunza mavazi yake, asiende uchi hata watu wakaione aibu yake.) Wakawakusanya hata mahali paitwapo kwa Kiebrania, Har-Magedoni. Na huyo wa saba akakimimina kitasa chake juu ya anga. Sauti kuu ikatoka katika hekalu, katika kile kiti cha enzi, ikisema, Imekwisha kuwa. Pakawa na umeme na sauti na radi; na palikuwa na tetemeko la nchi kubwa, ambalo tangu wanadamu kuwako juu ya nchi hapakuwa namna ile, jinsi lilivyokuwa kubwa tetemeko hilo. Na mji ule mkuu ukagawanyikana mafungu matatu, na miji ya mataifa ikaanguka; na Babeli ule mkuu ukakumbukwa mbele za Mungu, kupewa kikombe cha mvinyo ya ghadhabu ya hasira yake. Kila kisiwa kikakimbia, wala milima haikuonekana tena. Na mvua ya mawe kubwa sana, ya mawe mazito kama talanta, ikashuka kutoka mbinguni juu ya wanadamu. Wanadamu wakamtukana Mungu kwa sababu ya lile pigo la mvua ya mawe; kwa maana pigo lake ni kubwa mno.”

Mafafanuzi

Aya ya 1: “Nikasikia sauti kuu kutoka hekaluni, ikiwaambia wale malaika saba, Enendeni, mkavimimine vile vitasa saba vya ghadhabu ya Mungu juu ya nchi.”

Mungu ataileta hasira yake juu ya watumishi wa Mpinga Kristo na watu wake wataokuwa wakiishi katika dunia hii kwa mapigo ya mabakuli saba ya hasira. Viumbe wote pamoja na watu watafutwa na dhoruba ya ghadhabu ya Mungu, ambayo italipuka baada ya miaka mingi ya uvumilivu, kisha wanadamu watateseka kwa mapigo makuu yatakayomiminwa juu yao katika kipindi kitakachokuwa kimebakia katika ile miaka saba ya Dhiki Kuu. Wakati huo, ulimwengu huu utafinyangwa na kuwa kama majivu maana utakuwa umevunjwawunjwa katika vipande, na utasahauliwa kabisa.

Ufunuo 16 ni sura ambapo mapigo ya mabakuli saba yanamiminwa. Wale ambao wakati huo watakuwa bado hawajaifahamu wala kuiamini injili hii ambayo inabeba ushuhuda wa wokovu, ambayo ingeliwawezesha kunyakuliwa angani na Bwana—yaani, injili ya maji na Roho—wataangamizwa wote na mapigo haya.

Aya ya 2: Akaenda huyo wa kwanza, akakimimina kitasa chake juu ya nchi; pakawa na jipu baya, bovu, juu ya wale watu wenye chapa ya huyo mnyama, na wale wenye kuisujudia sanamu yake.

Pigo la jibu baya na bovu ambalo Mungu atalimimina kwa kupitia malaika wake litawashukia wale walioipokea alama ya Mnyama. Pigo hili la jibu ni ugonjwa wa ngozi ambao hauna tiba ambao utatungisha usaha katika ngozi ya aliyeathiriwa, na maambukizi yake yataenea katika sehemu yote ya ngozi. Mateso haya yatakuwa ni makubwa sana, maana waathirika

watateswa na pigo hili hadi kifo chao, je, si jambo la kutisha? Lakini, Mungu hatalishusha pigo la jipu tu kwa wale wote walioipokea alama ya Mnyama, bali atayashusha pia mapigo sita mengine yatakayofuata baadaye. Hivyo, watu wote wanapaswa kutafuta njia ya kuepukana na mapigo haya kwa kuipokea injili ya maji na Roho, na kwa kufanya hivyo watayakwepa haya mapigo ya kutisha hasa watakapoiamini injili hii sasa hivi.

Bwana wetu anasema atayashusha mapigo mengine sita kwa wale wanaomwabudu Mnyama na sanamu yake. Je, ni dhambi gani ambayo Mungu anaichukia zaidi? Dhambi anayoichukia zadi ni kutengeneza sanamu ya kitu fulani au mtu fulani zaidi ya Mungu, na kisha kuichukulia kama Mungu na kuisujudia. Hivyo tunapaswa kufahamu kikamilifu jinsi Bwana Mungu wetu na Yesu Kristo walivyo, na kisha tukamwamini na kumwabudu Kristo Yesu. Hakuna yeyote yule katika ulimwengu huu zaidi ya Bwana Mungu Mwenyewe anayeweza kuwa Mungu wetu.

Ikiwa unataka kulikwepa pigo la jibu na mapigo mengine sita ya nyongeza, basi jifunze na uamini katika injili ya maji na Roho iliyotolewa na Bwana. Idadi kubwa ya watu ambao wamesimama kinyume na Mungu katika maisha yao ya kila siku, na waliokataa kuiamini injili ya maji na Roho watateseka kwa mapigo haya hadi watakapokuwa wameangamizwa kabisa.

Aya ya 3: Na huyo wa pili akakimimina kitasa chake juu ya bahari, ikawa damu kama damu ya mfu, na vitu vyote vyenye roho ya uhai katika bahari vikafa.

Pigo la pili ni wakati ambapo bahari itageuka na kuwa kama damu ya mfu. Mungu ataviua viumbe vyote baharini kwa pigo hili. Kutokana na pigo hili pili litakalokuwa limemiminwa na Mungu, bahari itaoza na viumbe vyake vyote havitaweza

kuishi ndani yake. Mungu atakapolileta pigo hili lapili hakutakuwa na mtu atakayeweza kula mazao ya baharini. Kwa kupitia pigo la pili, Mungu atajidhihirisha kwamba yupo hai, na kwamba yeye ni Bwana juu ya uhai wote.

Pigo hili la pili ni hukumu ya Mungu ambayo itakuwa imeshushwa kwa watu wote wa ulimwengu huu, ambao badala ya kumwabudu Bwana Mungu kwa ajili ya uumbaji wake, watakuwa wakiisujudia sanamu ya Mnyama, ambayo ni adui wa Mungu, na ambao wataimwaga damu ya watakatifu. Pigo hili la pili ni miongoni mwa mapigo sahihi na ya haki. Mungu anatueleza kuwa atauchukulia mbali utajiri wa asili kwa wale wote ambao hawamshukuru Bwana kwa viumbe vyote vilivyoumbwa na Mungu.

Aya ya 4-7: “Na huyo wa tatu akakimimina kitasa chake juu ya mito na chemchemi za maji; zikawa damu. Nami nikamsikia malaika wa maji akisema, wewe u mwenye haki, uliyeko na uliyekuwako, mtakatifu, kwa kuwa umehukumu hivi. Kwa kuwa walimwaga damu ya watakatifu na ya manabii, nawe umewapa damu wainywe. Nao wamestahili. Nikaisikia hiyo madhabahu ikisema, naam, Bwana Mungu Mwenyezi, ni za kweli, na za haki, hukumu zako.”

Pigo la tatu ambalo litaigeuza mito na vyanzo vya maji kuwa damu kwa kweli ni moja kati ya mapigo ya kutisha sana. Pigo hili, linalokuja kama adhabu kwa wale wote wasiomwamini Mungu, litazibadili chemichemi na kuzifanya kuwa damu na kisha litawafanya wanadamu hao washindwe kuishi hapa duniani. Mungu atazigeuza chemichemi na mito yote katika dunia hii kuwa damu. Pigo hili pia ni hukumu iliyowekwa kwa ajili ya watu wa ulimwengu kama mshahara na adhabu yao kwa kusimama kinyume na Mungu, ambaye aliwapatia maji, ambayo ni mzizi na msingi wa uhai wote.

Sababu itakayomfanya Mungu kuleta pigo hili juu ya wale waliosimama kinyume Naye ni kwa sababu waliwaua watakatifu wake na manabii walipokuwa hapa duniani. Hao ndio wale ambao sio tu walikataa kumwamini Mungu kuwa ni Mungu, bali pia ndio waliosimama kinyume na Mungu hali wakiungana na Mpinga Kristo.

Hali wakiwa wamegubikwa na nguvu za Mpinga Kristo, wale wanaosimama kinyume na upendo wa Mungu katika ulimwengu huu watawatesa na kuwaua watakatifu na watumishi wanaopendwa na Mungu. Wale wasioiamini sasa injili ya maji na Roho, ambayo Bwana wetu ameitoa ili kuwakomboa watu wa ulimwengu huu toka katika dhambi, watawaua watakatifu wengi na manabii wa nyakati za mwisho na kuimwaga damu yao. Hivyo, Mungu atalimimina pigo lake la tatu juu ya ulimwengu huu ambao maadui zake watakuwa wanaishi, na kwa pigo hilo atayageuza maji, ambayo ni mzizi na msingi wa uhai wote, kuwa damu na kwa sababu hiyo atawaangamiza.

Hii ni hukumu ya Mungu ya haki, na watakatifu wakiwa angani wataifurahia hukumu hii? Kwa nini? Kwa sababu Mungu atalipiza kisasi cha vifo vya watakatifu kwa kuileta hukumu yake ya haki kwa maadui ambao waliwaua watakatifu. Hivyo, watakatifu na watumishi wa Mungu hawapaswi kuogopa, bali wanapaswa kuilinda imani yao katika Bwana Mungu, na kisha waiangalie ahadi ya Mungu na mamlaka yake wakati wanapokabiliana na mauaji ya kuifia-dini.

Aya ya 8-9: Na huyo wa nne akakimimina kitasa chake juu ya jua, nalo likapewa kuwaunguza wanadamu kwa moto. Wanadamu wakaunguzwa maunguzo makubwa, nao wakalitukana jina la Mungu aliye na mamlaka juu ya mapigo hayo; wala hawakutubu wala kumpa utukufu.

Wakati malaika wa nne alipolimimina bakuli la pigo la nne katika jua, watu wataunguzwa maunguzo makuu hadi kifo kwa sababu ya joto kali. Mungu atalileta pigo la jua linalochoma kwa wale waliosimama kinyume naye. Dunia hii inalizunguka jua kwa usahihi, lakini ikiwa dunia ingelikwepa na kutoka katika njia yake na kusogea hata kama ni kwa umbali mdogo tu kuelekea liliko jua, basi ni hakika kuwa wakazi wake wote wangelionguza na kufa. Hivyo, wakati pigo hili la nne litakapokuwa limemiminwa, watu wote watakuwa wakiishi katika dunia hii watateseka sana kwa kuungua.

Hata hivyo, bado wanadamu hawataitubia dhambi yao ya kusimama kinyume na Mungu. Kwa nini? Kwa sababu kwa kusimama kinyume na injili ya maji na Roho, basi wanakuwa wamekwishapangiwa kuangukia katika uharibifu. Hivyo, kila mtu ni lazima aiandae imani yake ambayo itamwezesha kuikwepa hasira ya Mungu. Na imani hiyo ni ile ya kuamini katika injili ya maji na Roho kuwa ni wokovu wa mtu. Hivyo, kila mtu ni lazima auamini ukweli wa maji na Roho.

Aya ya 10-11: Na huyo wa tano akakimimina kitasa chake juu ya kiti cha enzi cha yule mnyama; ufalme wake ukatiwa giza; wakatafuna ndimi zao kwa sababu ya maumivu, wakamtukana Mungu wa mbingu kwa sababu ya maumivu yao, na kwa sababu ya majipu yao; wala hawakuyatubia matendo yao.

Pigo la bakuli la tano ni lile ambalo litaleta giza na maumivu. Mungu atalimimina bakuli hili la pigo la tano juu ya kiti cha enzi cha Mpinga Kristo na kisha kulileta pigo la giza na maumivu. Kutokana na pigo hili, watu watazitifuna ndimi zao kwa sababu ya maumivu na kuteseka. Mungu atahakikisha alipiza kisasi cha mateso ya watakatifu juu ya wanadamu kwa

maumivu makubwa mara mbili zaidi.

Kwa maneno mengine, Mungu atawafanya wateseke, zaidi ya vile walivyowafanya wakatifu kuteseka. Lakini bado watamkufu Mungu na kutotubu, hata pale watakapokuwa wakiteseka kutokana na majibu yao. Hivyo, kwa sababu hiyo watapokea adhabu ya milele ya kuzimu kwa kuunguzwa na moto na kibiriti.

Aya ya 12: Na huyo wa sita akakimimina kitasa chake juu ya mto ule mkubwa Frati; maji yake yakakauka, ili njia itengenezwe kwa wafalme watokao katika maawio ya jua.

Pigo la bakuli la sita litakalomiminwa na Mungu ni pigo la njaa ambalo litaufanya Mto Frati kukauka. Wanadamu watakabiliana na mateso makuu kutokana na pigo hili. Pigo la njaa ni pigo linalotisha zaidi kwa maisha ya kila mtu. Pigo hili ambalo litamiminwa juu ya wale wote ambao watakuwa wameikataa injili ya maji na Roho iliyotolewa na Bwana linaonyesha jinsi adhabu itakavyokuwa kubwa kwa wale wote walioukataa upendo wa Mungu na kusimama kinyume naye. Baadaye, jeshi la Mungu la Mbinguni na jeshi la Shetani la hapa duniani yatapigana katika uwanja huu wa vita. Shetani na wafuasi wake watazimishwa na kuangamizwa na Mungu.

Aya ya 13: Nikaona roho tatu za uchafu zilizofanana na vyura, zikitoka katika kinywa cha yule joka, na katika kinywa cha yule mnyama, na katika kinywa cha yule nabii wa uongo.

Aya hii inatuonyesha kuwa kazi za roho zote chafu na mapepo zinatoka katika kinywa cha Shetani, Mnyama wa Shetani, na kutoka katika manabii wa uongo. Kazi za mashetani zitaendelea kuwepo katika ulimwengu hadi mwisho wa ulimwengu utakapokaribia. Mashetani watawadanganya watu na kuwaongoza kuelekea katika maangamizi kwa kufanya

miujiza na ishara kupitia Shetani, manabii wa uongo, na kwa kupitia Mpinga Kristo. Hivyo, ulimwengu wa nyakati za mwisho utakuwa ni ulimwengu wa mapepo. Lakini ulimwengu huo utafikishwa mwisho kwa mapigo ya mabakuli saba yatakatomiminwa na Yesu Kristo pamoja na ujio wake mara ya pili.

Aya ya 14: Hizo ndizo roho za mashetani, zifanyazo ishara, zitokazo na kuwaendea wafalme wa ulimwengu wote kuwakusanya kwa vita ya siku ile kuu ya Mungu Mwenyezi.

Roho za mashetani zitaivutia mioyo ya wafalme wa ulimwengu mzima kukusanyika mahali pamoja ili kupigana na Mungu. Katika ulimwengu wa nyakati za mwisho, moyo wa kila mtu utatawaliwa na roho za mashetani, na hivyo mtu mke na mtu mme watageuzwa na kuw watumishi wa Shetani huku wakizifanya kazi za Ibilisi.

Aya ya 15: “Tazama, naja kama mwivi. Heri akeshaye, na kuyatunza mavazi yake, asiende uchi hata watu wakaione aibu yake.”

Bwana atakuja katika ulimwengu huu kama vile mwizi, na kwa sababu hiyo wamebarikiwa sana wale wanaoilinda imani yao na kuihubiri injili hadi mapigo ya mabakuli saba yatakatomiminwa. Bwana wetu anawaeleza watakatifu watakaokuwa wakiishi katika nyakati za mwisho za ulimwengu kwamba wanapaswa kuishi kwa imani yao katika injili ya maji na Roho iliyotolewa na Yesu na kwamba wanapaswa kuilinda imani hii hadi siku ya mwisho. Wale wanaoilinda imani yao katika Bwana kabla ya kumiminwa kwa mapigo ya mabakuli saba watapokea thawabu kubwa toka kwa Mungu. Ni hakika kuwa Bwana wetu atakuja tena ili kuwachukua wale ambao atawapatia baraka zake.

Aya ya 16: Wakawakusanya hata mahali paitwapo kwa Kiebrania, Har-Magedoni.

Biblia inatabiri kwamba vita ya mwisho kati ya Shetani na Mungu itapiganwa mahali panapoitwa Har-Magedoni. Lakini kwa kuwa Mungu ni Mungu Mwenyezi, atamshinda Shetani na kisha kumtupa yule Mnyama katika ziwa la moto na kibiriti. Ni lazima tutambue kwamba Shetani ni mdanganyifu wakati wote, na kwa sababu hiyo ni lazima tuilinde imani yetu katika bwana kwa uimara wote hadi siku tutakayosimama mbele za Mungu.

Aya ya 17-21: Na huyo wa saba akakimimina kitasa chake juu ya anga. Sauti kuu ikatoka katika hekalu, katika kile kiti cha enzi, ikisema, Imekwisha kuwa. Pakawa na umeme na sauti na radi; na palikuwa na tetemeko la nchi kubwa, ambalo tangu wanadamu kuwako juu ya nchi hapakuwa namna ile, jinsi lilivyokuwa kubwa tetemeko hilo. Na mji ule mkuu ukagawanyikana mafungu matatu, na miji ya mataifa ikaanguka; na Babeli ule mkuu ukakumbukwa mbele za Mungu, kupewa kikombe cha mvinyo ya ghadhabu ya hasira yake. Kila kisiwa kikakimbia, wala milima haikuonekana tena. Na mvua ya mawe kubwa sana, ya mawe mazito kama talanta, ikashuka kutoka mbinguni juu ya wanadamu. Wanadamu wakamtukana Mungu kwa sababu ya lile pigo la mvua ya mawe; kwa maana pigo lake ni kubwa mno.

Wakati Mungu atakapolimimina pigo la bakuli la saba angani, ngurumo na umeme vitatawala angani, wakati huo pia tetemeko kuu litatokea, tetemeko ambalo halijawahi kutokea hapo kabla na litaipiga dunia. Ulimwengu wa kwanza utatoweka kwa sababu ya machafuko haya na mahali pake hapataonekana tena. Baada ya pigo hili, watakatifu wataishi katika utukufu pamoja na Yesu Kristo katika ulimwengu utakaokuwa umefanywa upya kwa miaka elfu moja

itakayofuata.

Baada ya miaka elfu moja kupita na wakati wa kuitimiza ahadi ya Mungu ya Mbingu na Nchi Mpya kwa watakatifu itakapowadia, Mungu ataufanya ulimwengu wa kwanza kutoweka kisha atawapatia watakatifu Mbingu na Nchi ya pili. Kisha watakatifu watatawala pamoja na Mungu katika Mbingu na Nchi mpya milele. Watakatifu ni lazima waamini kwamba wataishi katika Ufalme wa Kristo kwa miaka elfu moja na kwamba wataishi milele katika utukufu katika Mbingu na Nchi mpya. Watakatifu ni lazima waishi katika tumaini hili, hali wakisubiria kuja kwa Bwana. ☒

Unachopaswa Kukifanya Kabla ya Kumiminwa Kwa Mabakuli Saba Ni...

< Ufunuo 16:1-21 >

Kati ya mapigo ya mabakuli saba, pigo la kwanza ni lile la majipu, pigo la pili ni lile la bahari kugeuka na kuwa damu, na pigo la tatu ni lile la maji ya mito na chemichemi kugeuka na kuwa damu. Na pigo la nne, ni lile ambalo watu wataunguzwa hadi kufa kutokana na joto la jua.

Kifungu kikuu kinatueleza kwamba, “*Na huyo wa nne akakimimina kitasa chake juu ya jua, nalo likapewa kuwaunguza wanadamu kwa moto. Wanadamu wakaunguzwa maunguzo makubwa.*” Hii inatuonyesha kwamba Mungu atalisogeza jua karibu na dunia na kisha kuviunguza viumbe hai hadi kifo. Wakati Mungu anaporuhusu hili kutokea, hakuna hata mmoja atakayeweza kulikwepa joto la jua lenye kuunguza, hata kama mtu angelichimba pango chini ya ardhi ya kujificha huko. Hata kuviwasha viyoyozi vitakavyokuwa vimewekwa tayari kwa ajili ya pigo hili havitaweza kulizuia pigo hili la Mungu. Watu wote hawatakuwa na la kufanya zaidi ya kufa.

Bila shaka tunaweza kufikira jinsi hali hii itakavyotokea hasa wakati pigo hili litakapowadia—ngozi zao zitachubuka; nyama ya miili yao ya ndani itaunguzwa na kuwa nyekundu, na kisha kuoza. Hivyo, kila mtu atakufa kutokana na kansa ya ngozi.

Hata hivyo, pamoja na kuunguzwa hadi kifo kutokana na

joto kali la jua, watu hawatazitubia dhambi zao. Pigo hili la Mungu ni la kushangaza sana, lakini hata hawa watu wanaokataa kutubu pamoja na kuwa katika pigo hili ni kuwashangaza pia. Kadri watakavyozidi kukataa kutubu, ndivyo mapigo ya Mungu yatakavyoendelea.

Kifungu kikuu kinasema, *“Na huyo wa tano akakimimina kitasa chake juu ya kiti cha enzi cha yule mnyama; ufalme wake ukatiwa giza; wakatafuna ndimi zao kwa sababu ya maumivu, wakamtukana Mungu wa mbingu kwa sababu ya maumivu yao, na kwa sababu ya majipu yao; wala hawakuyatubia matendo yao.”* Tunapouangalia ulimwengu wa leo, hatuwaoni watu wengi ambao wangelipaswa kuhukumikiwa na Mungu sasa hivi? Lakini kwa kuwa Mungu anaizuia hasira yake huku akisubiria, ndio maana Mungu bado hawajahukumu. Hata hivyo, ikiwa watakufa hali wakiwa hawaiamini injili ya maji na Roho iliyotolewa na Yesu Kristo, Mungu atawafanya kuwa hai katika miili isiyokufa, na kisha watakabaliana na moto wa milele wa kuzimu.

Jambo hili litakapotokea, watu watataka kufa, hii ni kwa sababu mateso yao yatakuwa ni makubwa sana na watashindwa kuyavumilia. Lakini mateso ya kuzimu yatakuwa ni ya milele. Utafika wakati ambapo wale waliohukumikiwa na Mungu watatamani kufa, lakini kifo kitawakimbia, kwa kuwa Mungu atawazuia ili wasife ili aweze kuwahukumu milele.

Pigo la sita ni la vita ya Har-magedoni. Na pigo la saba ni la mwisho na la tetemeko kuu na mvua kubwa ya mawe.

Aya ya 17-21 inatueleza kwamba, *“Na huyo wa saba akakimimina kitasa chake juu ya anga. Sauti kuu ikatoka katika hekalu, katika kile kiti cha enzi, ikisema, Imekwisha kuwa. Pakawa na umeme na sauti na radi; na palikuwa na tetemeko la nchi kubwa, ambalo tangu wanadamu kuwako juu ya nchi hapakuwa namna ile, jinsi lilivyokuwa kubwa tetemeko hilo.”*

Na mji ule mkuu ukagawanyikana mafungu matatu, na miji ya mataifa ikaanguka; na Babeli ule mkuu ukakumbukwa mbele za Mungu, kupewa kikombe cha mvinyo ya ghadhabu ya hasira yake. Kila kisiwa kikakimbia, wala milima haikuonekana tena. Na mvua ya mawe kubwa sana, ya mawe mazito kama talanta, ikashuka kutoka mbinguni juu ya wanadamu. Wanadamu wakamtukana Mungu kwa sababu ya lile pigo la mvua ya mawe; kwa maana pigo lake ni kubwa mno.”

Kifungu hicho hapo juu kinatueleza kwamba Mungu atakapomimina bakuli la saba, tetemeko kuu litaipiga sayari, ulimwengu wote utagawanyika vipande vitabu, na majengo yote yatakayokuwa bado yanasalia katika ulimwengu huu yataangushwa chini, hakuna hata jengo moja litakalosalia. Kwa kuwa ulimwengu huu umewekwa chini ya ghadhabu ya Mungu ya kutisha, basi visiwa vyote na milima vitatoweka.

Je, Milima ya Himalaya itabakia wakati jambo hili likitokea? Kwa kweli hapana! Milima yote mirefu itatoweka mbele ya macho ya yeye aliye hai. Kimsingi, kila mlima katika ulimwengu huu utatoweka na mahali pake hapataonekana. Kifungu hiki kinatueleza pia kwamba mvua kubwa ya mawe, huku kila jiwe la mvua hiyo likiwa na uzito wa paundi 100 (sawa na kilo 45) yataanguka katika dunia hii. Je, kutakuwa na mtu yeyote atakayesalimika kutokana na matetemeko haya ya ardhi na mvua kubwa za mawe?

Ufunuo 18 inatueleza kwamba ghadhabu ya Mungu inaletwa juu ya wale ambao hawakumwamini Mungu na ambao walilidharau Neno lake. Baadhi ya watu katika ulimwengu huu wanadai, kana kwamba walikuwa ni kimungu huku wakisema, “sintaangukia katika ghadhabu ya Mungu, wala sintahukumiwa na Mungu.” Hata hivyo, hukumu ya Mungu inaletwa kwa watu kama hawa ambao wamejaa majivuno na kiburi. Ni lazima tuamini kwamba ulimwengu huu

utatoweka utakapokuwa umepigwa na mapigo haya ya mabakuli saba yatakayomiminwa na Mungu.

Ni Lazima Tuwe na Imani Katika Neno la Mungu

Mungu anatueleza kwamba ataufanya ulimwengu huu kupotea. Hivyo, ulimwengu huu hautadumu milele. Hivyo, wale wote wanaoukabili mwisho wa ulimwengu huu wanapaswa kuiamini katika ukweli huu na kuushikilia kwa imani yao ya kiroho. Hivyo, watu wote wa ulimwengu huu ni lazimwa waamshwe toka katika usingizi wao wa kiroho. Sijui umekuwa ukiishi maisha yako ya kiimani kwa imani ipi hadi sasa, lakini sasa ni wakati wako kuzingatia yale ambayo yatatokea katika nyakati za mwisho, na kisha kuamka na kuamini. Unapaswa kuwa na ufahamu sahihi juu ya mapigo yaliyotabiriwa katika Ufunuo, na unapaswa kuwa macho.

Bwana wetu ametuambia kwamba muda si mrefu dunia hii itakuwa chini ya mapigo ya mabakuli saba ya Mungu. Kwa hiyo, ni lazima tumsubiri Bwana hali tukiendelea kuihubiri injili, hata kama watu hawaipokei vizuri.

Hatma ya ulimwengu huu sasa imekaribia na kuwa tete. Ulimwengu wa leo upo katika kila aina ya hatari, kuanzia vita hadi hali mbaya ya hewa, uharibifu wa mazingira, kuzidi kwa migongano ya kijamii, na kila aina ya magonjwa. Hivyo, Mungu anatueleza kwamba wakati wa sasa ni kama wakati ule wa Nuhu. Ikiwa wakati wa sasa ni kama ule wa wakati wa Nuhu, basi hii ina maanisha kwamba ulimwengu huu umeingia katika siku zake za mwisho. Ishara ya nyakati za mwisho ni kwamba watu watapendelea zaidi vitu vya kimwili, kama vile kula, kunywa, kuoa, na mambo mengine kama hayo. Hivyo wamestahili kuhukumikiwa na Mungu. Wakati wa Nuhu, watu

wa jinsi hiyo hawakusikia kile ambacho Nuhu aliwaambia, hivyo waliangamizwa wote, isipokuwa kwa Nuhu na familia yake ya watu nane. Ulimwengu unaokuja utakuwa vivyo hivyo.

Karibu vitu vyote ambavyo Mungu ameviahidi vimeshatimia kama vilivyoandikwa katika Biblia. Kati ya mambo hayo, ni takribani asilimia 5 ndio bado haijatimia, lakini asilimia nyingine yote imekwisha timia. Neno la wokovu na ukombozi pia limetimizwa. Katika Neno la Mungu, kilichobakia ni hukumu kwa wale wasioiamini injili ya maji na Roho. Na kwa wale waliozaliwa tena upya, Ufalme wa Milenia na Mbingu na Nchi Mpya, mahali ambapo wenye haki wataingia na kuishi vinawangojea.

Mungu ni mwenye rehema, anasimama upande wa wenye haki. Hata hivyo, kwa wale ambao wanastahili ghadhabu ya Mungu, ni hakika kwamba Mungu ataishusha ghadhabu yake juu yao, na kwa wale wanaostahili rehema yake, Mungu atawashushia rehema.

Pigo hili litatokea lini? Pigo la bakuli la saba litakuja baada ya mauaji ya watakatifu ya kufia-dini, wakati ambapo alama ya 666 itakapokuwa imewekwa katika ulimwengu huu na kisha kupingwa na watakatifu. Baada ya mapigo haya, ufufuo wa kwanza, Ufalme wa Milenia, na hukumu ya mwisho Yesu akiwa ameketi katika kiti cha enzi vitakuja. Hii itafuatiwa na kufunguliwa kwa Ufalme wa Mbinguni wa milele. Tunapaswa kuupata ufahamu wa majaliwa ya Mungu kupitia Biblia.

Je, unauamini ukweli kwamba Yesu alifufuka tena toka kwa wafu? Je, unaamini kwamba Bwana amezifanya dhambi zote za mwanadamu kutoweka kwa kupitia ubatizo wake na damu yake? Bwana wetu alizichukua dhambi zote za mwanadamu kwa maji na damu yake, akafufuka tena toka kwa wafu baada ya siku tatu, na sasa ameketi mkono wa kuume wa

kiti cha enzi cha Mungu. Hivyo, dhambi za wale wanaoamini katika Yesu Kristo zimetoweka kikamilifu, na kama vile Kristo alivyofufuka tena toka kwa wafu, vivyo hivyo na wao watafufuliwa.

Hivyo, watakatifu watatukuzwa pamoja na Bwana, lakini wakati wakiwa hapa duniani, watakabiliana na mateso mengi kwa ajili ya Bwana. Lakini mateso ya wakati huu wasasa hayawezi kulinganishwa na utukufu unaowangojea, kwa kuwa utukufu wa Mungu ndio kitu pekee kinachowangojea watakatifu waliozaliwa tena upya. Hivyo, watakatifu hawapaswi kuhofia kuhusu hatma yao ya baadaye. Kile ambacho wenye haki wanapaswa kukifanya ni kuishi maisha yao yote kwa ajili ya injili na kwa imani yao. Ni lazima tujitoe katika kazi ya kuziokoa nafsi, na si kuufuata ulimwengu.

Hebu Tuyatoe Maisha Yetu Yaliyosalia Kwa Mungu

Ninahofia kwamba anaweza kuwepo miongoni mwetu mtu ambaye ataikana injili. Yeyote anayeikana injili ya maji na Roho atakuwa amemkana Bwana Mwenyewe. Pamoja na kuwa sisi ni dhaifu, ikiwa tunaamini na kuifuata injili ya maji na Roho iliyotimizwa na Bwana, basi hapo sisi sote tunaweza kuishi kwa imani. Watakatifu hawawezi kuishi kwa kuitegemea hekima yao na nguvu binafsi. Ikiwa watafanya hivyo, wataishia kuikana imani yao na kukabiliana na maangamizi yao. Hivyo, ili kukwepa hali hiyo, tunapaswa kuishi kwa imani.

Kwa nini Bwana wetu atawaruhusu wanadamu kuipokea alama ya 666? Hii ni kwa lengo la kutenganisha nafaka na makapi. Kabla ya kuruhusu watakatifu kunyakuliwa, basi kitu ambacho Mungu atakifanya itakuwa ni kutenganisha nafaka na

makapi.

Zipo vita za kiroho ambazo watakatifu wanapaswa kupigana nazo. Kwa hiyo, watakatifu hawapaswi kuogopa kupigana dhidi ya maadui ya Mungu. Ikiwa watasita kupigana dhidi ya Shetani, basi wategemee kupigwa kumbo na Shetani. Hivyo, watakatifu wote ni lazima wapigane vita ya kiroho kwa ajili yao. Vita vyote vya kiroho vinavyopiganwa na watakatifu ni halali. Ili kumfuata Mungu, kila mtakatifu ni lazima apigane na kumshinda Shetani na watumishi wake.

Watakatifu ni lazima wapigane kwa ajili ya Ufalme wa Mungu. Pia ni lazima wateswe kwa ajili ya Ufalme wa Mungu, na kisha kuchukiwa na watu wa ulimwengu. Kule kusema kwamba watakatifu wanapewa fursa ya kupigana kwa ajili ya Bwana ni jambo zuri sana. Ikiwa ungelipewa fursa hii ya kupigana kwa ajili ya Mungu, basi ni hakika kwamba ungelipaswa kumshukuru Mungu kwa ajili ya fursa hiyo. Vita ya jinsi hiyo ni vita nzuri, kwa kuwa ni vita kwa ajili ya haki ya Mungu.

Mungu anawasaidia wenye haki. Hakuna siku nyingi zilizosalia katika maisha yetu, ni tumaini langu na ombi langu kwamba sisi sote tuishi maisha yetu yote yaliyosalia tukipigana vita vya kiroho na kuzifanya kazi za kiroho hadi tutakapo simama mbele za Bwana. Haijalishi watu wa ulimwengu huu watasema nini kwetu, tunapaswa kupigana vita vya kiroho, kuzaa matunda ya kiroho, na kisha kuyatoa matunda haya mbele ya Bwana wetu. Wakati siku ya kurudi kwa Bwana wetu itakapowadia, hebu tuweze kusimama mbele yake kwa ujasiri. Wakati siku hii itakapowadia, Bwana atayafuta machozi yetu yote na atatuweka mahali ambapo hatutalia tena, mahali ambapo hatutaona maumivu tena, na wala hatutaiona dhambi tena.

Hebu sisi sote tuishi kwa imani, na kisha sisi sote tuingie katika Ufalme wa Mungu kwa imani hii. ☒

SURA YA

17



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Hukumu ya Kahaba Akaaye Katika Maji Mengi

< Ufunuo 17:1-18 >

“Akaja mmoja wa wale malaika saba, wenye vile vitasa saba, akanena nami, akisema, Njoo huku, nitakuonyesha hukumu ya yule kahaba mkuu aketiye juu ya maji mengi; ambaye wafalme wa nchi wamezini naye, nao wakaa katika nchi wamelevywa kwa mvinyo ya uasherati wake. Akanichukua katika Roho hata jangwani, nikaona mwanamke, ameketi juu ya mnyama mwekundu sana, mwenye kujaa majina ya makufuru, mwenye vichwa saba na pembe kumi. Na mwanamke yule alikuwa amevikwa nguo ya rangi ya zambarau, na nyekundu, amepambwa kwa dhahabu, na kito cha thamani, na lulu, naye alikuwa na kikombe cha dhahabu mkononi mwake, kilichojawa na machukizo, na machafu ya uasherati wake. Na katika kipaji cha uso wake alikuwa na jina limeandikwa, la siri, BABELI MKUU, MAMA WA MAKAHABA NA MACHUKIZO YA NCHI.

Nikamwona yule mwanamke amelewa kwa damu ya watakatifu, na kwa damu ya mashahidi wa Yesu. Nami nilipomwona nikastaajabu ajabu kuu. Na yule malaika akaniambia, Kwani kustaajabu? Nitakuambia siri ya mwanamke huyu, na ya mnyama huyu amchukuaye, mwenye vile vichwa saba na zile pembe kumi. Yule mnyama uliyemwona alikuwako, naye hayuko, naye yu tayari kupanda kutoka kuzimu na kwenda kwenye uharibifu. Na hao wakaa juu ya nchi, wasioandikwa

majina yao katika kitabu cha uzima tangu kuwekwa misingi ya ulimwengu, watastaajabu wamwonapo yule mnyama, ya kwamba alikuwako, naye hayuko, naye atakuwako. Hapo ndipo penye akili zenye hekima. Vile vichwa saba ni milima saba anayokalia mwanamke huyo. Navyo ni wafalme saba. Watano wamekwisha kuanguka, na mmoja yupo, na mwingine hajaja bado. Naye atakapokuja imempasa kukaa muda mchache. Na yule mnyama aliyekuwako naye hayuko, yeye ndiye wa nane, naye ni mmoja wa wale saba, naye aenenda kwenye uharibifu. Na zile pembe kumi ulizoziona ni wafalme kumi, ambao hawajapokea ufalme bado, lakini wapokea mamlaka kama wafalme muda wa saa moja pamoja na yule mnyama. Hawa wana shauri moja, nao wampa yule mnyama nguvu zao na mamlaka yao. Hawa watafanya vita na Mwana-Kondoo, na Mwana-kondoo atawashinda, kwa maana Yeye ni Bwana wa Mabwana, na Mfalme wa Wafalme, na hao walio pamoja naye ndio walioitwa, na wateule, na waaminifu. Kisha akaniambia, Yale maji uliyoyaona, hapo aketipo yule kahaba, ni jamaa na makutano na mataifa na lugha. Na zile pembe kumi ulizoziona, na huyo mnyama, hao watamchukia yule kahaba, nao watamfanya kuwa mkiwa na uchi, watamla nyama yake, watamteketeza kabisa kwa moto. Maana Mungu ametia mioyoni mwao kufanya shauri lake, na kufanya shauri moja, na kumpa yule mnyama ufalme wao hata maneno ya Mungu yatimizwe. Na yule mwanamke uliyemwona, ni mji ule mkubwa, wenye ufalme juu ya wafalme wa nchi.”

Mafafanuzi

Aya ya 1: Akaja mmoja wa wale malaika saba, wenye vile vitasa saba, akanena nami, akisema, “Njoo huku, nitakuonyesha hukumu ya yule kahaba mkuu aketiye juu ya maji mengi,”

Ili kuweze kuitafsiri vizuri sura ya 17 ni muhimu sana kumfahamu huyu kahaba, mwanamke, na Mnyama anayetajwa katika kifungu kikuu. Huyu “kahaba” anayetajwa katika aya ya 1 anasimama kumaanisha dini za ulimwengu, ilhali “mwanamke” ana maanisha ni ulimwengu. Na kwa upande mwingine, “Mnyama,” anasimama kumwakilisha Mpinga Kristo. Na sentensi isemayo “maji mengi” ina maanisha ni mafundisho ya Ibilisi. Sentensi hii, “*Nitakuonyesha hukumu ya yule kahaba mkuu aketiye juu ya maji mengi,*” inatueleza kwamba Mungu atazihukumu dini za ulimwengu ambazo zinakaa katika mafundisho ya Shetani.

Aya ya 2: “ambaye wafalme wa nchi wamezini naye, nao wakaao katika nchi wamelevywa kwa mvinyo ya uasherati wake.”

Na hili neno “uasherati” lina maanisha juu ya kuupenda ulimwengu huu na vitu vyake kuliko kumpenda Mungu Mwenyewe. Matendo ya uasherati yana ambatana na kutengeneza sanamu za vitu vya hapa ulimwenguni, na kisha kuviabudu na kuvipenda kana kwamba ni Mungu.

Msemo huo hapo juu, “*ambaye wafalme wa nchi wamezini naye,*” una maanisha kwamba viongozi wa ulimwengu huu wameishi maisha yao wakiwa wamelewa dini za ulimwengu, na kwamba watu wote wa kidunia pia wamelewa kwa dhambi ambazo dini za ulimwengu zinazitoa.

Aya ya 3: Akanichukua katika Roho hata jangwani, nikaona mwanamke, ameketi juu ya mnyama mwekundu sana, mwenye kujaa majina ya makufuru, mwenye vichwa saba na pembe kumi.

Sentensi inayosema, “mwanamke, ameketi juu ya mnyama mwekundu sana,” inatueleza kwamba watu wa ulimwengu huu wataiunganisha mioyo yao pamoja na moyo wa Mpinga Kristo ili kuwatesa na kuwaua watakatifu. Inaonyesha kwamba watu wa kiulimwengu wataishia kuwa watumishi wa adui wa Mungu, huku wakizifanya kazi za Mpinga Kristo kwa kuongozwa naye. Mnyama ni Mpinga Kristo anaye simama kinyume na Mungu. Mpinga Kristo anawatala wafalme wengi, pia anatawala mataifa mengi ya ulimwengu.

Hali akiwa na kiburi cha majivuno, Mpinga Kristo hatasita kumkufuru Mungu na kusema maneno ya majivuno. Atamkufuru Mungu kwa kunena maneno ya kiburi na majivuno, huku akidai kwamba yeye ni Mungu au ni Yesu Kristo, na atajiinua juu kana kwamba yeye ni Mungu. Hivyo, nguvu zake zitainuka na kuwatawala wafalme wote wa ulimwenguni na mataifa yote yaliyomo ndani yake.

Sentensi inayosema, “mwenye vichwa saba na pembe kumi,” hivi “vichwa saba” vina maanisha ni wafalme saba wa ulimwenguni, na “pembe kumi” zina maanisha ni mataifa ya ulimwengu.

Aya ya 4: Na mwanamke yule alikuwa amevikwa nguo ya rangi ya zambarau, na nyekundu, amepambwa kwa dhahabu, na kito cha thamani, na lulu, naye alikuwa na kikombe cha dhahabu mkononi mwake, kilichojawa na machukizo, na machafu ya uasherati wake.

Sentensi inayosema, “mwanamke yule alikuwa amevikwa nguo ya rangi ya zambarau, na nyekundu, amepambwa kwa

dhahabu, na kito cha thamani, na lulu,” inatueleza kwamba dini za kidunia, hali zikiwa zimepangiliwa na Mpinga Kristo, zitamfikiria Mpinga Kristo kuwa ndiye mfalme wao. Kwa hiyo, wataona kwamba inafaa kwa wale wote wanaosimama kinyume nao kuuawa, na kwa sababu hiyo watayatekeleza mawazo yao kwa kufanya matendo dhidi ya watakatifu.

Na ili kuupamba ulimwengu huu kama ufalme wao wa milele wa furaha, watajipamba kwa dhahabu za ulimwenguni, watajipamba kwa vito vya thamani sana na kwa lulu. Lakini imani yao inapendelea zaidi juu ya raha kiasi gani wanaweza kupata katika miili yao wanapokuwa hapa ulimwenguni. Kwa kuwa Mungu anapowaangalia watu wa hapa ulimwenguni, ataona ulimwengu uliojaa dhambi zao chafu, na kwa sababu hiyo wote wataonekana kuwa ni machukizo mbele zake.

Aya ya 5: Na katika kipaji cha uso wake alikuwa na jina limeandikwa, la siri, BABELI MKUU, MAMA WA MAKAHABA NA MACHUKIZO YA NCHI.

Pamoja na kuwa watu wa kidini wa hapa ulimwenguni watajaribu kujitambulisha kuwa wao ni malkia, ukweli ni kuwa watadhihirishwa kuwa ni makahaba. Kwa upande mmoja, jina lake *“Babeli Mkuu,”* linatuonyesha juu ya tabia yake ya majivuno, ya kuabudu sanamu, na ya kikahaba na ya kunyanyasa, ilhali kwa upande mwingine neno *“mama”* linatuonyesha kwamba majeshi yote ya Mpinga Kristo katika historia yanabeba asili yake toka katika ulimwengu wenyewe, na kwamba ulimwengu ndio mzizi mkuu wa kila aina ya ukahaba na rushwa.

Pamoja na kuwa ulimwengu huu umepambwa kwa vito vizuri na vinavyo metameta, Mpinga Kristo anayesimama kinyume na Mungu na anayefanya kazi katika mioyo ya watu hawa wa ulimwengu atafanya kazi akiwa kama mama yao.

Kwa hiyo, Bwana wetu ameamua kuwaangamiza wote kwa mapigo yake makuu ya mabakuli saba.

Aya ya 6: Nikamwona yule mwanamke amelewa kwa damu ya watakatifu, na kwa damu ya mashahidi wa Yesu. Nami nilipomwona nikastaajabu ajabu kuu.

Hili neno “watakatifu” lina maanisha ni watu wa imani katika historia yote ya Kanisa ambao wamekuwa wakiamini katika injili ya maji na Roho iliyotolewa na Yesu Kristo. *Sentensi inayosema “mashahidi wa Yesu”* ina maanisha ni wale miongoni mwa watakatifu ambao wameushuhudia ukweli kwamba Yesu ni Mwana wa Mungu na Mwokozi wao, na ambao waliuawa kama wafia-dini na mashahidi katika kuilinda imani yao.

Aya hii inasisitiza kwamba yeye ambaye atawatesa na kuwaua watakatifu si mwingine zaidi ya watu wa dini za hapa ulimwenguni. Watayafanya maovu hayo wakiwa kama kikosi tangulizi cha Mpinga Kristo.

Hapa Yohana anatueleza kwamba alipomuona yule mwanamke, “alistaajabu, ajabu kuu.” Kwa kweli ulimwengu huu ni ulimwengu wenye udadisi. Watakatifu hawajafanya lolote la kuudhuru ulimwengu huu, lakini ulimwengu huu unajipanga pamoja na Mpinga Kristo na kuwaua watakatifu wengi. Je, ulimwengu huu si kitu cha kustaajabisha? Watu wa ulimwengu huu watawafanya watakatifu kubeba mambo haya yote. Kwa kuwa ulimwengu huu upo chini ya Mpinga Kristo, basi watu wake, ambao ni kama watumishi wake, watawakamata watakatifu na kuwaua.

Hivyo, watu hao wataonekana kuwa ni wageni na kuwashangaza sana kwetu. Tunapowaangalia watu wa ulimwenguni, je, kwa kiasi fulani hawaonekani kuwa ni wa kushangaza? Wakati watu wameumbwa kwa sura na mfano wa

Mungu, inawezekanaje basi wakawa watumishi wa Mpinga Kristo na kisha kuwaua watu—na si kila mtu, bali ni watu wengi sana wanaomwamini Mungu? Hii ni kwa sababu ulimwnegu huu unamtumikia Shetani.

Aya ya 7: Na yule malaika akaniambia, Kwani kustaaajabu? Nitakuambia siri ya mwanamke huyu, na ya mnyama huyu amchukuaye, mwenye vile vichwa saba na zile pembe kumi.”

Hili neno “mwanamke” lina maanisha ni watu wa ulimwengu huu. Aya hii inatueleza kwamba Mnyama, anayeitwa Mpinga Kristo, atawatawala wafalme wote wa ulimwenguni na mataifa yao, na atazifanya kazi zake kupitia wafalme hao yaani kazi ya kusimama kinyume na Mungu, ya kuwatesa watakatifu, na ya kuwaua watakatifu. Na hili neno “siri ya mnyama huyu” ina maanisha ni utambulisho wa Mpinga Kristo, ambaye anatembea kwa kufuata amri ya Shetani. Naye atayageuza mataifa ya ulimwengu huu kuwa mali yake.

Watu wa ulimwengu huu, wakiwa wameungana na Mpinga Kristo, wataishia kuwa vyombo vya Shetani katika kuwaua kimbari idadi kubwa ya watu wa Bwana. Ulimwengu huu pamoja na Mpinga Kristo ni vyombo vya Shetani, ambavyo kwa sasa vimefichwa katika macho yetu. Lakini baada ya kupita miaka mitatu na nusu katika ile miaka ya Dhiki Kuu, ulimwengu pamoja na Mpinga Kristo watainuka na kuwaua watakatifu.

Sasa, mtu anaweza kushangaa, kwamba itawezekanaje kwa jambo hili kutokea, ukizingatia kwamba ulimwengu huu una watu wa matabaka mbalimbali, wasomi, na watu makini, yaani kuanzia wanasiasa hadi wakufunzi hadi wanafalsafa na wenye shahada za uzamivu. Lakini kwa kuwa ulimwengu

utafanya uhaini pamoja na Mpinga Kristo, basi ndio maana mambo haya yote ikiwemo mauaji ya kimbari ya watakatifu, yatatokea. Kwa hiyo, hii taarifa ya kwamba ulimwengu utasalimu amri kwa Mpinga Kristo na kisha kuwa watakatifu ni kitu cha msingi sana katika kulifumbua fumbo la Mpinga Kristo.

Aya ya 8: “Yule mnyama uliyemwona alikuwako, naye hayuko, naye yu tayari kupanda kutoka kuzimu na kwenda kwenye uharibifu. Na hao wakaao juu ya nchi, wasioandikwa majina yao katika kitabu cha uzima tangu kuwekwa misingi ya ulimwengu, watastaajabu wamwonapo yule mnyama, ya kwamba alikuwako, naye hayuko, naye atakuwako.”

Aya hii inatueleza kwamba Mpinga Kristo alionekana kati ya wafalme wa zama za kale, na kwamba pamoja na kuwa kwa sasa hayupo katika ulimwengu wa sasa, huyo Mpinga Kristo atakuja kutokea hapa ulimwenguni hapo baadaye. Pia inatueleza kwamba watu wa ulimwengu huu watashangaa sana mara watakapomwona Mpinga Kristo akitokea na kuwaua watakatifu.

Mpinga Kristo atayatekeleza madhumuni yake kwa kushiriki katika siasa mpya za ulimwengu huu. Ataendelea kuwa ni fumbo kubwa kwa watu wa ulimwengu huu na atatangazwa kama ni wa kushangaza. Kwa kuwa atayabeba matatizo mengi ya kisiasa, kiuchumi, kifikra, na ya kidini na kisha kuyatatua kwa uwezo wake, basi watu wengi watafikiri na kumfuata wakifikiri kuwa yeye ni Kristo Yesu atakayekuja tena katika nyakati za mwisho. Hivyo, Mpinga Kristo atabaki kuonekana kama ni wa kushangaza mbele za macho ya watu wa ulimwengu.

Aya ya 9: “Hapo ndipo penye akili zenye hekima. Vile

vichwa saba ni milima saba anayokalia mwanamke huyo.”

Aya hii inatueleza kwamba Mpinga Kristo ataanzisha sheria zake binafsi ili kuwatawala watu wa ulimwengu na kisha atazigeuza sheria hizi kuwa chombo chake cha utawala ili kuyatekeleza madhumuni yake. Sababu itakayowafanya watu wa ulimwengu kuungana pamoja ni ili waweze kuwa chini ya utawala wa Shetani kwa kuipokea chapa ya Mpinga Kristo, na kisha kusimama kinyume na Mungu na watakatifu wake, na kisha kuyaweka matumaini yao katika sheria zilizoundwa na Mpinga Kristo.

Aya ya 10: “Navyo ni wafalme saba. Watano wamekwisha kuanguka, na mmoja yupo, na mwingine hajaja bado. Naye atakapokuja imempasa kukaa muda mchache.”

Aya hii inatueleza kwamba wafalme wanaosimama dhidi ya Mungu wataendelea kujitokeza toka katika ulimwengu huu, sawasawa na walivyotokea wafalme kama hao zamani. Wakati muda wa mwisho wa Dhiki Kuu utakapowadia, kiongozi wa ulimwengu huu atainuka kama Mpinga Kristo na kisha kuwaua watakatifu. Lakini mateso ya kiongozi huyu wa ulimwengu, ambaye atakuwa ni Mpinga Kristo, yatadumu kwa muda mfupi tu yakiwa yameruhusiwa na Mungu.

Aya ya 11: “Na yule mnyama aliyekuwako naye hayuko, yeye ndiye wa nane, naye ni mmoja wa wale saba, naye aenenda kwenye uharibifu.”

Kifungu hiki kinatueleza kwamba Mpinga Kristo anayekuja hapa ulimwenguni atainuka akiwa kama mmoja wa wafalme wa mwisho wa ulimwengu huu. Wakati Mpinga Kristo atakapoonekana kati ya wafalme wa ulimwengu, watu wengi wa ulimwenguni watamfuata kama atakavyo, kwa kuwa baada ya kupokea roho ya Mnyama, ataonyesha nguvu kama

Mungu na kutenda ishara na miujiza mingi. Watumishi wa Mungu na watakatifu pia watauwawa na Mpinga Kristo, lakini mambo haya yote yatadumu kwa muda mfupi tu huku yakiwa yamepewa kibali na Mungu. Baada ya mambo hayo kupita, Mpinga Kristo atafungwa katika shimo la kuzimu lisilo na mwisho, kisha atatupwa katika jehanamu ya kutisha, ambako hataachiliwa kamwe.

Aya ya 12: “Na zile pembe kumi ulizoziona ni wafalme kumi, ambao hawajapokea ufalme bado, lakini wapokea mamlaka kama wafalme muda wa saa moja pamoja na yule mnyama.”

Aya hii inatueleza kwamba mataifa kumi yataziunganisha nguvu zao ili kuutawala ulimwengu. Baada ya mataifa haya kumi kuungana, yatazitumia nguvu zao juu ya ulimwengu pamoja na Mpinga Kristo kwa muda mfupi. Lakini aya hii pia inatueleza kwamba wafalme wa ulimwengu bado hawajapokea ufalme unaotawaliwa na Mpinga Kristo. Hata hivyo, hapo baadaye kidogo, wafalme hawa wa ulimwengu watatawala huku Mnyama wakiwa wafalme wa giza kwa muda. Lakini utawala wao utadumu kwa muda mfupi tu, na kwa hiyo, watatawala juu ya mamlaka ya giza kwa huo muda mfupi.

Aya ya 13: “Hawa wana shauri moja, nao wampa yule mnyama nguvu zao na mamlaka yao.”

Wakati utakapowadia, wafalme wa ulimwengu huu watazihamishia nguvu zao na mamlaka yao kwa Mpinga Kristo. Wakati huo, Kanisa la Mungu, watakatifu wake, na watumishi wake watateswa sana na Mpinga Kristo na kisha kuuawa kama wafia-dini. Lakini Mpinga Kristo mwenyewe ataangamizwa kwa nguvu na mamlaka ya Yesu Kristo na kwa upanga wa Neno utokao katika kinywa cha Yesu.

Aya ya 14: “Hawa watafanya vita na Mwana-Kondoo, na Mwana-kondoo atawashinda, kwa maana Yeye ni Bwana wa Mabwana, na Mfalme wa Wafalme, na hao walio pamoja naye ndio walioitwa, na wateule, na waaminifu.”

Pamoja na kuwa Shetani atatafuta kufanya vita dhidi ya Yesu Kristo, ukweli ni kuwa hataweza kulingana naye kabisa. Pia watakatifu, watamshinda Mpinga Kristo katika mapambano dhidi yake. Bwana atawapatia watakatifu nguvu ya kupigana na kumshinda Mpinga Kristo kwa imani yao. Kwa hiyo, watakatifu hawatayaogopa mapambano yao dhidi ya Mpinga Kristo, bali wataishi katika nyakati za mwisho kwa amani na utulivu kwa kumwamini Bwana Mungu wao. Kisha watawashinda maadui zao kwa imani yao katika Bwana.

Ushindi huu wa watakatifu una maanisha kwamba watailinda imani yao na kisha kuuawa kama wafia-dini. Wakati huu utakapowadia, watakatifu watamshinda Shetani na Mpinga Kristo kwa kuvipokea vifo vya kuifia-dini kwa imani katika Yesu Kristo na kwa tumaini lao kwa Ufalme wa Mbinguni, watashiriki katika ufufuo na katika unyakuo, kisha watapokea Ufalme mpya wa Kristo, na kisha wataishi milele katika utukufu.

Aya ya 15: Kisha akaniambia, Yale maji uliyoyaona, hapo aketipo yule kahaba, ni jamaa na makutano na mataifa na lugha.”

Dini za ulimwengu zimewadanganya na kuwatawala watu wa mataifa yote kwa mafundisho ya Shetani. Aya hii inatueleza kwamba mafundisho ya kishetani yanayofanya kazi katikati ya dini za ulimwengu yamepenyeza katika mataifa yote na lugha za ulimwengu, na kwamba ushawishi wao umefikia kiwango kikubwa cha kuweza kuleta maangamizi katika roho za watu.

Aya ya 16: “Na zile pembe kumi ulizoziona, na huyo mnyama, hao watamchukia yule kahaba, nao watamfanya kuwa mkiwa na uchi, watamla nyama yake, watamtekeza kabisa kwa moto.”

Kifungu hiki kinatueleza kwamba mataifa ya ulimwengu huu yataungana na Mpinga Kristo katika kuwaua na kuwaangamiza watu wa kidini. Kwa maneno mengine, kifungu hiki kinatuleza kwamba watu wa ulimwengu huu na Mpinga Kristo watawachukia na kuwatukana watu wa kidunia, kisha watazifuta dini zote za ulimwengu machoni mwao. Pamoja na kuwa watu wa kidunia waliwaua watakatifu hapo zamani huku wakiungwa mkono na Mpinga Kristo, sasa wao nao wataangamizwa na Shetani na watu wa kidunia. Hatimaye itaonekana wazi kwamba Shetani alizitumia dini za ulimwenguni ili kujifanya kuwa ni Mungu.

Aya ya 17: “Maana Mungu ametia mioyoni mwao kufanya shauri lake, na kufanya shauri moja, na kumpa yule mnyama ufalme wao hata maneno ya Mungu yatimizwe.”

Aya hii inatueleza kwamba watu wa ulimwengu huu watazitoa nguvu na mamlaka yao kwa Shetani. Kwa hiyo, watakuwa ni watu wa Mpinga Kristo kwa kuwa wataipokea chapa yake kwa hiari, wataona fahari kuwa watumishi wa huyu Mpinga Kristo, pia watawaua wale watakaokataa kuipokea chapa yake. Hata hivyo, mateso yao kwa watakatifu yataruhusiwa kwa muda mfupi tu ambao Neno la Mungu limeruhusu. Katika kipindi hicho kilichoruhusiwa, Mpinga Kristo atayashusha maovu yote ya moyo wake na kwa uhuru wake atasimama dhidi ya Mungu na watakatifu wake.

Aya ya 18: “Na yule mwanamke uliyemwona, ni mji ule mkubwa, wenye ufalme juu ya wafalme wa nchi.”

Hapa Mungu anatueleza kwamba ulimwengu huu utazitengeneza sheria mpya ili kutawala na kuongoza kupitia wafalme wake, na kwamba wafalme wa ulimwengu watatawaliwa kwa kujifunga katika sheria hizi mpya. Hiyo nguvu kuu ya ulimwengu huu itatawala juu ya wafalme wote wa ulimwenguni, kama vile mtu awezavyo kutawala. Kwa maneno mengine, ulimwengu utazitengeneza sheria ambazo zitawafunga wafalme wote kikamilifu, na itakuwa ni kana kwamba mungu anawatawala.

Hili neno “*mji mkubwa*” lina maanisha ni taasisi za kisiasa ambazo kwa hizo Mpinga Kristo atatawala. Kila mtu katika ulimwengu huu ataishia kuitumikia taasisi inayotawala ulimwengu, ambayo Mungu amewapatia, kana kwamba taasisi hiyo ni Mungu Mwenyewe, na kisha watatawaliwa na taasisi hiyo. Watu wataangamizwa kwa kuwa watu wamefanyika kuwua watumishi wa Shetani.

Zaburi 49:20 inatueleza kwamba, “Mwanadamu mwenye heshima, iwapo hana akili, amefanana na wanyama wapoteao.” Kwa hiyo, watu wa ulimwengu huu wanapaswa kufahamu mapema jinsi mpango wa Shetani ulivyo, kisha waamini sasa katika injili ya maji na Roho inayohubiriwa na watakatifu wa nyakati hizi, na kisha kukwepa laana ya kugeuzwa kuwa watmishi wa Shetani na badala yake kuishi hali wakiwa wamevikwa baraka ya Ufalme wa Mungu wa milele. ☒

Umakini Wetu Uzingatie Mapenzi ya Mungu

< Ufunuo 17:1-8 >

Ufunuo 17:1-5 inasema, “Akaja mmoja wa wale malaika saba, wenye vile vitasa saba, akanena nami, akisema, Njoo huku, nitakuonyesha hukumu ya yule kahaba mkuu aketiye juu ya maji mengi, ambaye wafalme wa nchi wamezini naye, nao wakaao katika nchi wamelevywa kwa mvinyo ya uasherati wake. Akanichukua katika Roho hata jangwani, nikaona mwanamke, ameketi juu ya mnyama mwekundu sana, mwenye kujaa majina ya makufuru, mwenye vichwa saba na pembe kumi. Na mwanamke yule alikuwa amevikwa nguo ya rangi ya zambarau, na nyekundu, amepambwa kwa dhahabu, na kito cha thamani, na lulu, naye alikuwa na kikombe cha dhahabu mkononi mwake, kilichojawa na machukizo, na machafu ya uasherati wake. Na katika kipaji cha uso wake alikuwa na jina limeandikwa:

LA SIRI, BABELI MKUU, MAMA WA MAKAHABA NA MACHUKIZO YA NCHI.”

Kahaba anayetajwa katika kifungu hicho hapo juu anasimama kumaanisha juu ya dini za ulimwengu huu, kifungu hiki kinatueleza kuwa wanadini hao walikuwa wamejiingiza katika anasa za kutupwa kwa vitu vya ulimwengu na kwa vitu vingi ambavyo Bwana alikuwa amevitoa. Walijikita katika aina zote za anasa, kwa kuvaa mikufu ya dhahabu, na heleni za almasi, na kwa kujipaka mafuta yenye manukato mbalimbali. Kifungu hiki kinatueleza kuwa yule mwanamke alikuwa ameshika kikombe cha dhahabu mkononi mwake, ambacho

kilikuwa kimejaa machukizo na uchafu kwa sababu ya uasherati wake. Haya ndiyo ambavyo Mungu alimwonyesha Yohana.

Kifungu hiki kinatueleza kuwa Shetani anafanya uhaini katika nafsi za watu na anatafuta kuwafanya wamtii yeye kwa kuwafanya walewe kwa vitu vya hapa ulimwenguni. Pia wafalme wote wa ulimwengu, wameleweshwa na Shetani kwa kutumia vitu vya hapa ulimwenguni. Hivyo, kila mtu hapa duniani ameleweshwa kwa mvinyo wa uasherati wa ulimwengu.

Shetani anafikia malengo yake wakati watu wanapokuwa wameleweshwa na mawimbi ya ulimwengu huu, yaani starehe zake na tamaa ya vitu na mali. Ukweli ni kwamba lengo la Shetani ni kuwazuia watu ili wasimwangelie Mungu. Ili kufanya hivyo, basi Shetani anazifanya nafsi za watu kuleweshwa na vitu vya ulimwengu huu. Ni lazima tututambue ukweli huu.

Hakuna hata mmoja katika ulimwengu huu ambaye hawezi kuuangukia mtego wa tamaa ya vitu na mali. Kila mmoja anaangukia katika hali kupenda vitu na mali. Mielekeo yote ya mitindo ya kisasa hapa ulimwenguni inadhibitiwa na Shetani. Kila mmoja anafikiri kuwa ana mtindo wake wa kipekee. Lakini nyuma ya fikra kama hizo, yupo mmoja anayezitawala na kuziongoza, na huyo si mwingine bali ni Shetani. Hii ndio sababu kwamba hatupaswi kuishi maisha ya kuzama katika tamaa ya vitu na mali, badala yake tunapaswa kuishi kwa kulishika na kulimeza Neno la Mungu na kuzitenda kazi zake.

Neno la Ufunuo ambalo Mungu analifunua kwetu kwa kupitia Mtume Yohana ni ukweli. Sasa, ni jambo gani basi ambalo Mungu anataka kutueleza kwa kupitia Neno hili? Bwana wetu anataeleza kuwa hatupaswi kujilowanisha pamoja na ulimwengu huu, bali tunapaswa kusimama kinyume na ulimwengu. Kwa maneno mengine, Mungu anataeleza sisi watakatifu kumfikiria na kumwamini Mungu kwa mioyo yetu yote.

1 Yohana 2:15 inasema, *“Msiipende dunia, wala mambo*

yaliyomo katika dunia. Mtu akiipenda dunia, kumpenda Baba hakumo ndani yake.” Wakati mioyo yetu inapotokea kupenda vitu vya ulimwengu huu, basi ni hakika kuwa Mungu hawezi kukaa ndani ya mioyo yetu. Lakini wakati mioyo yetu inapotumbilia mbali vitu vya ulimwengu huu, basi hapo Mungu anaweza kukaa katika mioyo yetu. Hatupaswi kuishi maisha yetu hali tukiwa tumeloweshwa katika tamaa ya vitu vya ulimwengu. Tunaweza kuongozwa na mwongozo wa Mungu pale tu tutakapokuwa tukilitafakari Neno la Bwana wetu na dhumuni lake.


Tunaweza kuyabadilisha mawazo yetu wakati wowote ule. Wakati tamaa ya vitu vya ulimwengu inapojaribu kuingia katika mioyo yetu, basi tunapaswa kuikataa tamaa hiyo. Hapo ndipo tunapoweza kuyasukumia mbali mambo yote ya machafu ya ulimwengu huu toka katika mioyo yetu. Ni kitu gani ambacho Bwana wetu anakitaka toka kwetu? Na ni jambo gani ambalo Mungu anatueleza kulifanya? Ni kuhakikisha kuwa mawazo ya kimungu yanachipua katika mioyo yetu, na kwamba ni lazima tuyafute mambo ya kidunia katika mioyo yetu.

Mungu ametupatia baraka nyingi sana, na sasa tunatambua kuwa tunapaswa kuihubiri injili ya maji na Roho kwa watu wa ulimwengu mzima katika siku zetu zilizosalia. Hivyo, hatuuachi umakini wetu ili kuzingatia mapenzi ya Mungu. Tunaweza kuiondolea mbali tamaa ya vitu vya ulimwengu iliyo katika mioyo yetu kwa kuzifikiria kazi za kiroho.

Sisi watakatifu ni lazima tuiondolee mbali tamaa ya vitu vya ulimwengu. Tunapaswa kuishi maisha ya Kikristo kwa imani hadi Bwana atakaporudi tena. Tunapaswa kufanya kile ambacho Bwana ametukabidhi katika maisha yetu yaliyosalia, yaani hadi siku ile tutakaposimama mbele za Mungu. Pia tunapaswa kumpenda Bwana, na kisha kuishi kwa imani, na kufanya kazi yoyote ambayo atakuwa ameturuhusu kuifanya. ☒

SURA YA

18



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ulimwengu wa Babeli

Umeanguka

< Ufunuo 18:1-24 >

“Baada ya hayo nalionna malaika mwingine, akishuka kutoka mbinguni, mwenye mamlaka kuu; na nchi ikaangazwa kwa utukufu wake. Akalia kwa sauti kuu, akisema, Umeanguka, umeanguka Babeli ule mkuu; umekuwa maskani ya mashetani, na ngome ya kila roho mchafu, na ngome ya kila ndege mchafu mwenye kuchukiza; kwa kuwa mataifa yote wamekunywa mvinyo ya ghadhabu ya uasherati wake, na wafalme wa nchi wamezini naye, na wafanya biashara wa nchi wamepata mali kwa nguvu za kiburi chake. Kisha nikasikia sauti nyingine kutoka mbinguni, ikisema, Tokeni kwake, enyi watu wangu, msishiriki dhambi zake, wala msipokee mapigo yake. Kwa maana dhambi zake zimefika hata mbinguni, na Mungu amekumbuka maovu yake. Mlipeni kama yeye alivyolipa, mkamlipe mara mbili kwa kadiri ya matendo yake. Katika kikombe kile alichokichanganyisha, mchanganyishieni maradufu. Kwa kadiri alivyojitukuza na kufanya anasa, mpeni maumivu na huzuni kadiri iyo hiyo. Kwa kuwa husema moyoni mwake, Nimeketi malkia, wala si mjane, wala sitaona huzuni kamwe. Kwa sababu hiyo mapigo yake yatakuja katika siku moja, mauti, na huzuni, na njaa, naye atateketezwa kabisa kwa moto. Kwa maana Bwana Mungu aliyemhukumu ni mwenye nguvu. Na hao wafalme wa nchi, waliozini naye na kufanya anasa pamoja naye, watalia na kumwombolezea; wauonapo moshi wa

kuungua kwake; wakisimama mbali kwa hofu ya maumivu yake, wakisema, Ole, ole, mji ule ulio mkuu, Babeli, mji ule ulio na nguvu! Kwa kuwa katika saa moja hukumu yako imekuja. Nao wafanya biashara wa nchi walia na kumwombolezea, kwa sababu hapana mtu anunuaye bidhaa yao tena; bidhaa ya dhahabu, na fedha, na kito chenye thamani, na lulu, na kitani nzuri, na nguo ya rangi ya zambarau, na hariri, na nguo nyekundu; na kila mti wa uudi, na kila chombo cha pembe, na kila chombo cha mti wa thamani nyingi, na cha shaba, na cha chuma, na cha marimari; na mdalasini, na iliki, na uvumba, na marhamu, na ubani, na mvinyo, na mafuta ya mzeituni, na unga mzuri, na ngano, na ng'ombe, na kondoo, na farasi, na magari, na miili na roho za wanadamu. Na matunda yaliyotamaniwa na roho yako yamekuondokea; na vitu vyote vilivyo laini na vitu vya fahari vimekupotea; wala watu hawataviona tena kamwe. Na wafanya biashara ya vitu hivyo, waliopata mali kwake, watasimama mbali, kwa hofu ya maumivu yake; wakilia na kuomboleza, wakisema, Ole, ole, mji ule mkuu! Uliovikwa kitani nzuri, na nguo ya rangi ya zambarau, na nguo nyekundu, na kupambwa kwa dhahabu, na kito cha thamani, na lulu; kwa kuwa katika saa moja utajiri mwingi namna hii umekuwa ukiwa. Na kila nahodha na kila aendaye mahali popote kwa matanga, na mabaharia, nao wote watendao kazi baharini, wakasimama mbali; wakalia sana, walipouona moshi wa kuungua kwake, wakisema, Ni mji upi ulio mfano wa mji huu mkubwa! Wakatupa mavumbi juu ya vichwa vyao, wakalia, wakitokwa na machozi na kuomboleza, wakisema, Ole, ole, mji ule ulio mkuu! Ambao ndani yake wote wenye merikebu baharini walipata mali kwa utajiri wake; kwa kuwa katika saa moja umekuwa ukiwa. Furahini juu yake,

enyi mbingu, nanyi watakatifu na mitume na manabii; kwa maana Mungu amehukumu hukumu yenu juu yake. Na malaika mmoja mwenye nguvu akainua jiwe, kama jiwe kubwa la kusagia, akalitupa katika bahari, akisema, Kama hivi, kwa nguvu nyingi, utatupwa Babeli, mji ule mkuu, wala hautaonekana tena kabisa. Wala sauti ya wapiga vinanda, na ya wapiga zomari, na ya wapiga filimbi, na ya wapiga baragumu, haitasikiwa ndani yako tena kabisa; wala fundi awaye yote wa kazi yo yote hataonekana ndani yako tena kabisa; wala sauti ya jiwe la kusagia haitasikiwa ndani yako tena kabisa; wala nuru ya taa haitamulika ndani yako tena kabisa; wala sauti ya bwana-arusi na bibi-arusi haitasikiwa ndani yako tena kabisa; maana hao wafanya biashara wako walikuwa wakuu wa nchi, kwa kuwa mataifa yote walidanganywa kwa uchawi wako. Na ndani yake ilionekana damu ya manabii, na ya watakatifu, na ya wale wote waliouawa juu ya nchi.”

Mafafanuzi

Aya ya 1: “Baada ya hayo naliona malaika mwingine, akishuka kutoka mbinguni, mwenye mamlaka kuu; na nchi ikaangazwa kwa utukufu wake.”

Watu wanaweza kusikia mahubiri juu ya baraka na laana za Mungu kwa kupitia watumishi ambao Mungu amewatuma hapa duniani ili kuzifanya kazi zake. Hivyo, ili muweze kuwekwa huru toka katika dhambi zenu zote na hali ya kutokuwa na furaha, ninyi nyote mnapaswa kulipokea katika mioyo yenu na kuliadini Neno la baraka ya kiroho ya Mbinguni linalohubiriwa na watumishi wa Mungu.

Aya ya 2: “Akalia kwa sauti kuu, akisema, Umeanguka, umeanguka Babeli ule mkuu; umekuwa maskani ya mashetani, na ngome ya kila roho mchafu, na ngome ya kila ndege mchafu mwenye kuchukiza!”

Hii sentensi inayosema “*Umeanguka Babeli ule mkuu,*” inaonyesha kile ambacho mara nyingi Biblia imekuwa ikikitaja, ambapo neno Babeli limekuwa likihusianishwa na ulimwengu wa kidunia. Kwa mfano, katika Agano la Kale, tunakutana na habari juu ya Mnara wa Babeli, mnara ambao ulijengwa na wanadamu wakijaribu kumpinga Mungu kwa kuziunganisha nguvu zao binafsi, ambazo baadaye ziliangushwa na Mungu. Wakati kifungu hicho hapo juu kinaeleza kwamba Babeli ule mkuu umeanguka, basi ni dhahiri kwamba kifungu hiki kinatueleza kwamba ulimwengu huu utakuja kuanguka. Kuna baadhi ya watu ambao wanaweza kufikiria hivi, “kwa sasa ulimwengu huu upo vizuri, sasa inawezekanaje basi ulimwengu huu ukaanguka?” Lakini Mungu anatueleza hapa kwamba wakati mapigo ya mabakuli saba yatakapomiminwa moja baada ya jingine, basi hapo ndipo Mungu atakapouangusha ulimwengu huu kama alivyounganisha ujenzi wa Mnara wa Babeli.

Sasa, ni kwa nini basi Mungu atauangamiza ulimwengu huu kwa mapigo ya mabakuli saba? Ni kwa sababu watu wa ulimwengu huu watakuwa wamejiunga na Mpinga Kristo katika kuwaua watakatifu waliozaliwa tena upya na wanaoamini katika injili ya maji na Roho, pia ni kwa sababu watu hao watakuwa wamesimama kinyume na Mungu hadi mwisho wao. Pia Mungu atauangamiza ulimwengu huu kwa sababu utakuwa ni “mahali ambapo mashetani yanakaa.”

Kwa nini hali itakuwa hivi? Kwa nini ulimwengu huu utakuwa ni mahali ambapo mashetani yanakaa? Ni kwa sababu wakati nyakati za mwisho zitakapowadia, watu wengi

watasalimu amri kwa Mpinga Kristo na kugeuka na kuwa watumishi wa huyu mwovu kwa kuipokea chapa ya Shetani toka kwa huyo Mpinga Kristo.

Katika Maandiko, neno Mnyama linatumika kumaanisha Shetani, na mashetani kumaanisha watumishi wa Mnyama. Hivyo, kifungu hiki kinaeleza hapa kwamba ulimwengu umefanyika kuwa mahali pa mashetani, hii ina maanisha kwamba Mpinga Kristo, ambaye ni mtumishi wa Mnyama, ataukamata ulimwengu kikamilifu. Ulimwengu wa nyakati za mwisho utakabiliana na dhiki za kutisha wakati mapigo ya mabakuli saba yatakapomiminwa juu ya ulimwengu. Ulimwengu huu utakuwa ni ulimwengu wa Mnyama, na mashetani yatakuwa mengi kana kwamba ulimwengu huu uliumbwa kwa ajili yao. Na ulimwengu huu utaanguka kwa haraka sana, na utaangukwa kwa mapigo ya mabakuli saba yatakayomiminwa na Mungu.

Aya ya 3: “Kwa kuwa mataifa yote wamekunywa mvinyo ya ghadhabu ya uasherati wake, na wafalme wa nchi wamezini naye, na wafanya biashara wa nchi wamepata mali kwa nguvu za kiburi chake.”

Kama vile aya hii inavyoeleza hapa, “*mataifa yote*” hapa duniani wamelewa mvinyo ghadhabu ya uasherati wake. Kwa maneno mengine, watu wa ulimwengu huu wameufikiria ulimwengu huu kama ni Mungu, na wameamini na kufuata hivyo. Wameupenda ulimwengu kuliko kumpenda Mungu. Hivyo, ulimwengu huu umekuwa ni kitovu cha dhambi, na watu wake wameishi na wanaishi wakiwa wamelewa dhambi.

Hivyo, matokeo yake ni anguko la ulimwengu lililetwa na dhambi. Kwa kuwa watu wameupenda na kuufuata ulimwengu kana kwamba ni Mungu, basi Mungu atawaangamiza kwa adhabu yake ya mapigo ya mabakuli saba. Hatimaye kila mtu

anayeishi katika ulimwengu huu ataangamizwa kwa haya mapigo saba makuu yaliyoletwa na Mungu na kisha watatupwa Jehanamu.

Mungu anatupatia onyo la wazi kwamba kila mtu ambaye haamini sasa katika injili ya maji na Roho iliyotolewa na Bwana atakabiliana na mapigo ya mabakuli saba hapo mwishoni. Unapaswa kukumbuka kwamba ikiwa huamini katika injili hii na kisha ukaendelea kusimama kinyume na Mungu, basi unapaswa kutambua kwamba si tu kwamba utaadhibiwa kwa mapigo ya mabakuli saba, bali utapokea pia adhabu ya milele huko Jehanamu.

Hivyo, watu wanapaswa kutambua kwamba, wanapaswa kuamini injili ya maji na Roho hivi sasa, ili kwamba waweze kuyakwepa mapigo makuu na ya kutisha ya Mungu, na kwamba wanapaswa kuirudia imani katika injili ya kweli ya maji na Roho mara moja kadri iwezekanavyo.

Pamoja na kuwa wafalme wengi na wafanya biasara wa nchi watakuwa wamejilundia utajiri mkubwa kwa wingi wa mali, ukweli ni kwamba hao wote wataishia kulia, kuombelezwa, kuhuzunika, na kupiga yowe mara watakapouona ulimwengu huu ukivunjika kwa mapigo makuu yaliyoletwa na Mungu.

Hivyo, sisi sote tuisahau kamwe kwamba tunapaswa kuihubiri injili ya maji na Roho kwa kila mtu, na kwamba tunapaswa kuishi maisha yetu hali tukiitazamia milenia mpya. Tunapaswa kumwongoza kila mtu kuelekea katika injili ya maji na Roho, ili kwamba kila mwanadamu aweze kuyakwepa mapigo makuu.

Aya ya 4: “Kisha nikasikia sauti nyingine kutoka mbinguni, ikisema, Tokeni kwake, enyi watu wangu, msishiriki dhambi zake, wala msipokee mapigo yake.”

“Tokeni kwake, enyi watu wangu, msishiriki dhambi zake,

wala msipokee mapigo yake.” Hili ni Neno la Mungu linalozungumzwa kwa watakatifu wake. Kwa maneno mengine, watakatifu hawapaswi kujihusisha na ulimwengu wa nyakati za mwisho na kuishi maisha yao kama watumwa wa ulimwengu huo. Hata kwa wale ambao walikwishafanyika kuwa watakatifu, ukweli ni kwamba kama wataangukia katika dhambi za ulimwengu wa nyakati za mwisho, basi ni hakika kwamba hawatakwepa kuhukumiwa na mapigo ya kutisha ya Mungu. Kwa maneno mengine, Mungu anawaeleza watakatifu wote kutojirundikia hasira ya Mungu kwa kukubali kuwa watumwa wa ulimwengu.

Aya ya 5: “Kwa maana dhambi zake zimefika hata mbinguni, na Mungu amekumbuka maovu yake.”

Ni hakika kwamba Mungu anazikumbuka dhambi na matendo yote ya ulimwengu huu na anaisubiria tu siku yake ya hukumu. Maangamizi yataugubika ulimwengu mzima kama Mungu alivyopanga baada ya kuonekana kwa Mpinga Kristo. Hata hivyo bado kuna watu ambao wanaamini kwamba ulimwengu huu hautaangamizwa, na kwamba ulimwengu huu utadumu milele.

Hata hivyo, ulimwengu huu hautadumu milele kama wanavyofikiria, bali ulimwengu huu utaangamizwa mara baada ya mapigo ya matarumbeta saba na ya mabakuli saba yatakayoletwa na Mungu. Wakati nyakati za mwisho zitakapowadia, Mungu ataleta dhiki kila mahali hapa ulimwenguni na kisha kuuangamiza. Hivyo, ni lazima tuwe na subira na uvumilivu katika maisha yetu ya kiimani hadi mwisho, hali tukiishikiria kwa nguvu imani yetu kwamba ni hakika kuwa Ufalme wa Yesu Kristo utakuja.

Kabla ya Mungu kuwaamuru malaika zake kuyamimina mabakuli saba hapa duniani, ni wazi kuwa dhambi za

ulimwengu zitakuwa nyingi mno na zitakuwa zimeenea sana kiasi kuwa zitakuwa zinastahili kupokea adhabu ya Mungu. Hivyo, Mungu atazikumbuka dhambi za ulimwengu huu, na hatayazuia maangamizi yake tena. Zaidi ya yote, Mpinga Kristo na watu wa kidunia watawatesha watu wa Mungu, huku wakiwalazimisha watakatifu kuikana imani yao, na kisha watawaua wengi wao kama wafia-dini. Wakati mambo haya yatakapo tokea, ulimwengu huu utakabiliana na mapigo ya mabakuli saba.

Aya ya 6: “Mlipeni kama yeye alivyolipa, mkamlipe mara mbili kwa kadiri ya matendo yake. Katika kikombe kile alichokichanganyisha, mchanganyishieni maradufu.”

Hapa imeandikwa kwamba, “Mlipeni kama yeye alivyolipa.” Je, hiki kiwakilishi kinachowakilisha jinsia ya “kike” kinamhusu nani? Kina maanisha ni ulimwengu, yaani mahali ambapo wenye dhambi wanaishi ndani yake, ambao ni Mpinga Kristo na Shetani. Hii inatueleza kwamba Mungu atawalipa kama wao walivyoleta mateso, unyanyasaji, dhiki na vifo kwa watakatifu.

Aya ya 6 pia inasema, “Katika kikombe kile alichokichanganyisha, mchanganyishieni maradufu.” Hii ni amri ya Mungu iliyotolewa kwa malaika wake ili kuziadhibu dini zote za uongo za hapa ulimwenguni ambazo ziliwaongoza watu kwenda kuzimu kwa kuueneza uongo wa Ibilisi. Hii ina maanisha kwamba Mungu ataileta ghadhabu yake na adhabu juu ya Ukristo wa leo kwa dhambi yake ya kutoa mafundisho ya uongo, yaani kwa kulichanganya Neno la Mungu pamoja na mafundisho ya Shetani, na hatimaye kuwaongoza watu kwenda kwa Ibilisi. Hivyo, Wakristo wasioamini katika injili ya maji na Roho wataipokea adhabu iyo hiyo kwa ajili ya dhambi kama watu wa ulimwengu watakavyopokea.

Aya ya 7: “Kwa kadiri alivyojitukuza na kufanya anasa, mpeni maumivu na huzuni kadiri iyo hiyo. Kwa kuwa husema moyoni mwake, Nimeketi malkia, wala si mjane, wala sitaona huzuni kamwe.”

Hapa Mungu anataeleza kwamba atazilipa dhambi za watu hawa wenye majivuno kwa maumivu na huzuni. Mungu ataziulizia dhambi za kila mmoja wao na kuwaadhibu, yaani kwa watu wote wa kidini wa hapa ulimwenguni ambao hawajazaliwa tena upya, na kwa watu wa kidunia wasioamini.

Hata hivyo, watu hao bado ni wenye majivuno, hali wakijisemea hivi, *“Nimeketi malkia, wala si mjane, wala sitaona huzuni kamwe.”* Hivyo, Mungu atawaletea mapigo kwa ajili ya maangamizi yao. Watu hao wote watateseka kwa huzuni ya kupoteza mali zao zote za kidunia na wapendwa wao mara moja na kwa wakati mmoja kwa mapigo makuu yatakayolewa na Mungu.

Aya ya 8: “Kwa sababu hiyo mapigo yake yatakuja katika siku moja, mauti, na huzuni, na njaa, naye atateketezwa kabisa kwa moto. Kwa maana Bwana Mungu aliyemhukumu ni mwenye nguvu.”

Kwa ujio wa mapigo saba, ambayo ni mapigo ya kifo, kuomboleza na njaa vitafuatia katika ulimwengu huu kwa siku moja. Mpinga Kristo na wafuasi wake wote wa hapa ulimwenguni wataadhibiwa na kuchomwa katika moto wa Jehanamu milele yote.

Aya ya 9: “Na hao wafalme wa nchi, waliozini naye na kufanya anasa pamoja naye, watalia na kumwombolezea; wauonapo moshi wa kuungua kwake,”

Watu na wafalme wa ulimwengu huu watashuhudia kwa macho yao ulimwengu wao ukigubikwa na moto na

matetemeko ya ardhi na kuharibiwa na mapigo ya mabakuli saba. Hivyo, wafalme wa hapa ulimwenguni watalia na kuomboleza, na kupiga yowe kwa sababu ya hasara yao.

Aya ya 10: “wakisimama mbali kwa hofu ya maumivu yake, wakisema, Ole, ole, mji ule ulio mkuu, Babeli, mji ule ulio na nguvu! Kwa kuwa katika saa moja hukumu yako imekuja.”

Watu ambao hawakuamini kwamba ulimwengu huu utaanguka watashtushwa kwa hofu mara watakapouona ulimwengu mzima ukianguka mbele ya macho yao. Hukumu ya Mungu itashuka siku moja juu ya ulimwengu ambao unametameta kwa uzuri wake, na hivyo ulimwengu utaanguka mara moja.

Aya ya 11-13: “Nao wafanya biashara wa nchi walia na kumwombolezea, kwa sababu hapana mtu anunuaye bidhaa yao tena; bidhaa ya dhahabu, na fedha, na kito chenye thamani, na lulu, na kitani nzuri, na nguo ya rangi ya zambarau, na hariri, na nguo nyekundu; na kila mti wa uudi, na kila chombo cha pembe, na kila chombo cha mti wa thamani nyingi, na cha shaba, na cha chuma, na cha marimari; na mdalasini, na iliki, na uvumba, na marhamu, na ubani, na mvinyo, na mafuta ya mzeituni, na unga mzuri, na ngano, na ng’ombe, na kondoo, na farasi, na magari, na miili na roho za wanadamu.”

Ni nani atakayenunua au kuuza wakati maangamizi ya ulimwengu yatakapokuwa yamewadia? Wafanyabiashara wa nchi, pia, watalia na kuomboleza kwa hasara ya ulimwengu wao. Wakati Mungu atakapoyashusha mapigo ya mabakuli saba, hakuna mtu katika ulimwengu wote atakayekua akinunua kitu chochote. Ulimwengu huu hautaweza kujengwa tena, na badala yake Ufalme wa Kristo ujengwa juu yake.

Hapa kuna orodha ya wafanyabiashara ambao walijistarehesha hadi siku hii ilipowadia. Lakini mambo haya yote yatakuwa hayana maana kwa muda wa siku moja, na hakuna hata mmoja ambaye atakuwa akiyatafuta mambo hayo ya kidunia. Mambo haya yote ndio yale ambayo dini za kidunia zinayafanyia biashara. Dini za ulimwengu zimefanya mambo yasiyodhaniwa kwa ajili ya tamaa yao ya fedha, zikiwa hazihofii hata kuuza roho za binadamu kwa ajili ya fedha.

Aya ya 14-18: “Na matunda yaliyotamaniwa na roho yako yamekuondokea; na vitu vyote vilivyo laini na vitu vya fahari vimekupotea; wala watu hawataviona tena kamwe. Na wafanya biashara ya vitu hivyo, waliopata mali kwake, watasimama mbali, kwa hofu ya maumivu yake; wakilia na kuomboleza, wakisema, Ole, ole, mji ule mkuu! Uliovikwa kitani nzuri, na nguo ya rangi ya zambarau, na nguo nyekundu, na kupambwa kwa dhahabu, na kito cha thamani, na lulu; kwa kuwa katika saa moja utajiri mwingi namna hii umekuwa ukiwa. Na kila nahodha na kila aendaye mahali popote kwa matanga, na mabaharia, nao wote watendao kazi baharini, wakasimama mbali; wakalia sana, walipouona moshi wa kuungua kwake, wakisema, Ni mji upi ulio mfano wa mji huu mkubwa!”

Hivyo, watu hawataweza kuziona mali zao za kidunia kamwe.

Wafanyabiashara ambao walipata utajiri kwa kupitia ulimwengu huu watalia na kuomboleza mara watakapouona ulimwengu wao ukivunjika. Wataomboleza kwa huzuni sana, maana ulimwengu utakapoanguka, wao nao wataanguka pamoja na huo ulimwengu, na mali zao walizojilundikia zitatoweka kwa siku moja.

Wakati dini zilizojengwa katika misingi ya utajiri wa kidunia zitakapoanguka, watu wa ulimwengu huu watajikuta wakiomboleza, “ole, ole!” Pia wafanyabiashara wa kimataifa

na manahodha wanaouzunguka ulimwengu nao wataomboleza. Watu hawa watalia kwa huzuni, “ni ustaarabu upi uliowahi kujengwa na mwanadamu uliokuwa mkuu na mzuri kuliko huu wa sasa?”

Aya ya 19: “Wakatupa mavumbi juu ya vichwa vyao, wakalia, wakitokwa na machozi na kuomboleza, wakisema, Ole, ole, mji ule ulio mkuu! Ambao ndani yake wote wenye merikebu baharini walipata mali kwa utajiri wake; kwa kuwa katika saa moja umekuwa ukiwa.”

Wale wote ambao walifikiri kwamba ulimwengu huu utadumu milele watakuwa wakilia kwa huzuni mara watakapouona ulimwengu ukiangushwa kwa mapigo ya mabakuli saba. Wale watakaokuwa wamesalia katika ulimwengu huu watakuwa wakilia na kuomboleza baada ya kushuhudia ulimwengu mzima ukiangamizwa mara moja kwa mapigo ya mabakuli saba yakiletwa na Mungu, lakini kulia kwao kote hakutakuwa na maana yoyote, kwa kuwa wakati huo kila kitu katika ulimwengu huu kitakuwa kimeshafikia ukomo. Kama watakuwa na nguvu ya kulia wakati huo, basi wanapaswa kulia hivi sasa kwa ajili ya majaliwa yao, yaani kwamba wamepangwa kwenda kuzimu kwa sababu ya dhambi zao, na ili waweze kukombolewa toka katika maangamizi yao ya milele basi wanapaswa kuiamini injili ya maji na Roho.

Aya ya 20: “Furahini juu yake, enyi mbingu, nanyi watakatifu na mitume na manabii; kwa maana Mungu amehukumu hukumu yenu juu yake!”

Watakatifu walionyakuliwa angani watafurahia wakati mapigo ya mabakuli saba yatakapoletwa, maana Mungu atawalipia kisasi kwa mapigo haya. Ni jambo sahihi kwamba Mungu atayamimina mapigo makubwa na ya kutisha kwa

maadui zake.

Aya ya 21: “Na malaika mmoja mwenye nguvu akainua jiwe, kama jiwe kubwa la kusagia, akalitupa katika bahari, akisema, Kama hivi, kwa nguvu nyingi, utatupwa Babeli, mji ule mkuu, wala hautaonekana tena kabisa.”

Hapa Mungu anatueleza kwamba ulimwengu huu hautaonekana tena kama vile jiwe ka kusagia lilivyotupwa katika bahari. Kisha Bwana wetu ataufanya ulimwengu huu kuwa mpya pamoja na vitu vyote ndani yake, na ataitimiza kazi yake ya kuubadili ulimwengu huu kuwa Ufalme wa Kristo.

Aya ya 22: “Wala sauti ya wapiga vinanda, na ya wapiga zomari, na ya wapiga filimbi, na ya wapiga baragumu, haitasikiwa ndani yako tena kabisa; wala fundi awaye yote wa kazi yo yote hataonekana ndani yako tena kabisa; wala sauti ya jiwe la kusagia haitasikiwa ndani yako tena kabisa;”

Wakati mapigo ya mabakuli saba yatakapoisha, hakuna sauti ya muziki ambayo watu waliwahi kuisikia katika ulimwengu huu itakayosikiwa tena, wala hakutakuwa na sauti ya fundi wa aina yoyote ile itakayosikika.

Aya ya 23: “Wala nuru ya taa haitamulika ndani yako tena kabisa; wala sauti ya bwana-arusi na bibi-arusi haitasikiwa ndani yako tena kabisa; maana hao wafanya biashara wako walikuwa wakuu wa nchi, kwa kuwa mataifa yote walidanganywa kwa uchawi wako.”

Wakati mapigo ya mabakuli saba yatakapokamilika, ulimwengu huu hautaona tena mwanga wa taa, wala kusikia sauti ya bibi na bwana harusi. Pia uongo wa wachawi hapa ulimwenguni pia utaisha, maana ulimwengu utakuwa umeisha.

Aya ya 24: “Na ndani yake ilionekana damu ya manabii, na ya watakatifu, na ya wale wote waliouawa juu ya nchi.”

Sababu itakayomfanya Mungu kuyamimina mapigo makuu ya mabakuli saba juu ya dunia hii ni kwa sababu watumishi wa Shetani watakuwa wameimwaga damu ya manabii na watakatifu wake. ☒

“Tokeni Kwake, Enyi Watu Wangu, Wala Msipokee Mapigo Yake”

< Ufunuo 18:1-24 >

Katika sura ya 18 Mungu anatueleza kwamba atauangamiza mji ule mkubwa wa Babeli kwa mapigo yake makuu. Hii ni kwa sababu zitakapofikia nyakati za mwisho ulimwengu huu utakuwa umegeuka na kuwa mchafu na wenye dhambi sana mbele ya macho ya Mungu, na kwa kuwa Mungu hatakuwa na uamuzi mwingine zaidi ya kuuangamiza ulimwengu pamoja na kuwa aliuumba yeye mwenyewe, basi Mungu atayaruhusu mapigo makubwa ambayo yatauhitimisha ulimwengu. Hivyo, ulimwengu huu utafanywa ukiwa hadi pale utakapokuwa umeharibiwa kabisa.

Sababu halisi itakayomfanya Mungu kuuharibu ulimwengu huu huu ni kwa kuwa atakuwa ameiona damu ya manabii na watakatifu wake. Na kwa kuwa ulimwengu huu utakuwa umefanya dhambi nyingi na kubwa kwa kupitia vitu ambavyo Mungu aliupatia, basi ni hakika kuwa ulimwengu huu utakuwa ni mchafu sana kiasi kuwa Mungu hataweza kuvumilia. Kati ya sayari ambazo Mungu ameziumba, dunia ndio sayari nzuri zaidi kuliko zote. Hii ni kwa sababu Mungu aliuumba ulimwengu huu kwa uangalifu mkubwa sana, pia ni kwa sababu dunia ni mahali ambapo mipango ya Mungu ya kuwaokoa wenye dhambi katika Yesu Kristo imetimizwa.

Hivyo, Mungu amekwishapanga jinsi atakavyoangamiza

ulimwengu huu na jinsi atakavyofanya Ufalme wa Kristo kuja. Wakati ulimwengu huu utakapokuwa umejawa na kila aina ya uchafu, basi Mungu ataharibu kwa kupitia malaika zake kwa mapigo ya mabakuli saba. Kisha atayafanya yote kuwa mapya na kuwafanya watakatifu wake kutawala katika ulimwengu mpya.

Babeli Mji Ulio Anguka!

Wafalme wa dunia wamezini na vitu vya ulimwenguni na wakaishi katika anasa zake, wakati wafanya biashara wamekazana katika kuuza na kununua kila kitu ambacho Mungu amewapatia, na kwa sababu hiyo wamempoteza Mungu kwa kuzifuata tamaa zao. Mungu ataharibu kila kitu yaani—majengo, dini, bidhaa zote zinazopatikana katika dini, watu waliojitajirisha kupitia dini, wafalme, wanasiasa, watu walioelemewa na tamaa ya kumiliki vitu na mali, na zaidi—haya yote yataharibiwa na Mungu.

Mungu atalitikisa kila jengo duniani na kuliangusha chini na hataacha hata jengo moja likiwa limesimama, na ataharibu vitu vyote kwa moto, kuanzia watu hadi misitu na miti. Wakati kila kitu katika ulimwengu huu kitakapoanguka, watu wataomboleza na kulia. Hasahasa, Mungu atahakikisha kuwa anawaangamiza wale wote waliojitajirisha kupitia dini. Ni muhimu kufahamu mapema kwamba Mungu atauangamiza ulimwengu huu mzuri ambao aliumba yeye Mwenyewe.

Wakati huu, Mungu atawaruhusu watakatifu waliozaliwa tena upya na walioshiriki katika ufufuo wa kwanza wa Yesu Kristo kutawala hapa duniani kwa miaka elfu moja. Mungu atawafidia watakatifu kwa kazi ya kuitumikia injili ya maji na Roho na kwa kuuawa na kuifia-dini katika kuilinda imani yao

walipokuwa hapa duniani ambapo atawapatia Ufalme wa Mungu. Mungu atawapatia mamlaka juu ya miji kumi, juu ya miji mitano, na juu ya miji miwili na atawafanya kutawala kwa miaka elfu moja, na baada ya hayo, atawapatia Mbingu na Nchi Mpya ili waishi humo milele.

Kwa nini basi Mungu anakwenda kuiangamiza dunia, ambayo ni sayari nzuri zaidi ulimwenguni? Hii ni sayari pekee ambapo samaki wanaweza kuogelea katika mito, wanyama wa porini wanaweza kuzunguka misituni, na mwanadamu anaweza kuishi ndani yake. Lakini kwa kuwa Mungu hataweza tena kuuvumilia ulimwengu ambao dhambi imekuwa nyingi sana, basi Mungu ataufanya ulimwengu huu kwa mapigo yake kuwa mabaki. Mungu ameamua kuuangamiza ulimwengu.

Kila mtu anayeishi katika dunia hii, isipokuwa tu kwa wale waliookoka, wataangamizwa kwa mapigo ya mabakuli saba. Kwa kuwa wenye haki wote wa nyakati za mwisho watauawa kuifia-dini, watateswa na kunyanyaswa na ulimwengu huu, basi Mungu ataukanyaga ulimwengu ili kulipiza kisasi kwa matendo maovu ya ulimwengu huu. Wakati huu utakapowadia, viongozi wa kidini na wafanya biashara waliokuwa wakizifanyia biashara nafsi za watu wataangamizwa wote. Mungu hatawaua wale tu waliokuwa wakijifanya ni viongozi wa kidini ilhali hawajazaliwa tena upya, bali pia atawatupa viongozi hao pamoja na Ibilisi katika ziwa la moto na kibiriti.

Ni hakika kuwa Mungu atauangamiza ulimwengu huu. Hivyo, ni lazima tutambue na kuamini pasipo shaka kuwa ulimwengu huu utakuja angamizwa. Mungu atawaua wafanya biashara wanaojisifia kwa sababu ya vitu vyote vikubwa na wanaozifanyia biashara nafsi za watu katika dini zao. Hata hivyo, pamoja na kuwa mapigo ya Mungu yanakaribia, bado kuna watu ambapo hawafahamu chochote huku wakiwa na

ujasiri binafsi. Hebu jaribu kuwaangalia viongozi wa kidini wa dunia hii. Je, si watu wenye majivuno, kana kwamba wanatenda mambo sahihi mbele za Mungu? Je, ni kweli kuwa Mungu atawakubali watu wa jinsi hiyo?

Ikiwa Mungu amesema kuwa atauangamiza ulimwengu huu kwa sababu ya dhambi za watu, basi tunapaswa kuamini hivyo, hii ni kwa sababu mambo yote yatakuja kufanyika sawasawa kabisa na jinsi Mungu alivyosema. Pia ni lazima tuilinde imani yetu. Mimi sisemi hivi kama mmoja wa viongozi wa vikundi-dini ambao wanaunda nadharia zao za mafundisho ya kidini na kisha kuzungumzia juu ya unabii wa kiapokaliptik utakaokuja, bali mimi nasema tunapaswa kuamini kile ambacho Mungu ametuambia katika Maandiko —yaani, ni hakika kwamba Mungu aliyehai atauangamiza ulimwengu huu kwa mapigo makubwa ya mabakuli saba.

Hatupaswi Kujiendekeza Katika Ulimwengu Huu Ambao Utaangamizwa Hivi Punde

Hivyo, hatupaswi kushikilia tamaa ya kulimbikiza vitu na mali za ulimwengu huu ambao utaangamizwa hivi punde. Tunapaswa kuridhika na vitu ambavyo Mungu ametupatia, na kisha tuvitumie na kushiriki na wengine kama Mungu anavyotaka. Mali na vitu vya hapa ulimwenguni vinahitajika katika kumtumikia Mungu. Tunapaswa kuishi kama watumishi waaminifu ambao tunasimamia vile ambavyo Mungu ametupatia katika kuihubiri injili. Hatupaswi kujichanganya na kisha kutegwa na mali na vitu vya ulimwenguni, hii ni kwa sababu tunaamini kuwau Mungu atauangamiza ulimwengu huu.

Hatupaswi kujidanganya kwa kufikiri kwamba utajiri na thamani za ulimwengu huu vitadumu milele. Hivyo tunapaswa

kuishi tukiingojea siku ya kurudi Bwana hali tukifahamu kwamba Mungu atawakanyaga viongozi wa kidini na wafuasi wao pia. Tusipofanya hivyo, tutaishia kuanguka katika ulimwengu huu, ulimwengu ambapo utaangamizwa hivi punde. Kwa hiyo, ili tusiweze kuanguka katika ulimwengu huu unaokabiliwa na maangamizi yake, tunapaswa kuamini kwamba sayari hii ya dunia itaangamizwa kwa hakika.

Hadi sasa Mungu yuko macho, na wakati utakapowadia, Mungu atayatimiza yale yote aliyoyasema. Pamoja na ukweli kwamba hata miongoni mwa wale waliozaliwa tena upya wapo baadhi ambao imani yao haijakomaa, tunachopaswa kukifanya sisi ni kuamini pasipo shaka. Pia sisi sote sote ni lazima tuwe macho tena na tena. Hatupaswi kukatishwa tamaa na ulimwengu huu ambao utaangamizwa hivi punde, na badala yake tunapaswa kuishi maisha yetu kwa kuiweka imani yetu katika Neno la Mungu. Kwa nyakati fulani mioyo yetu inaweza kudhoofika, lakini bado tunapaswa kuishi kwa imani thabiti.

Ni jambo la kushangaza kwamba Mungu atayafanya mambo haya yote kwa ulimwengu huu. Ikiwa Mungu asingeliuharibu ulimwengu huu kisha akajenga Ufalme wa Kristo mahapa pake, basi ni hakika kuwa wenye haki wangelikatishwa tamaa sana. Hii ndio maana mpango wa Mungu ni wa ajabu sana na ndio maana unatoa tumaini kwa watakatifu wenye haki.

Ikiwa wasioamini wangelibakia katika kiburi chao na kisha wakaendelea kuishi kwa furaha hali wakiwa hapa duniani na hata wakaweza kuingia Mbinguni baada yetu, basi ni hakika kwamba kwetu sisi ingelionekana kuwa ni jambo lisilo la haki ambalo Mungu ameliruhusu. Ahadi ya Mungu, kwamba awahukumu na kuwaangamiza wote wanaowatesa wenye haki, wanaowanyanyasa kwa uongo wao, na wanaoimwaga damu ya watakatifu, ni ahadi yenye haki na sahihi.

Ikiwa kusingelikuwa na hukumu ya Mungu kwa wenye dhambi wa ulimwengu huu, je, si dhahiri kuwa isingelikuwa haki kwa wenye haki ambao wameishi maisha yote kwa ajili ya Bwana hali wakivumilia shida na magumu mbalimbali? Hivyo ni sahihi kabisa kwamba Mungu atauhukumu ulimwengu huu. Wakati ulimwengu huu utakapofikia hatua ya kuwa kama ulimwengu wa wakati wa Nuhu, basi ni hakika kabisa kwamba Mungu ataubinua ulimwengu huu na kuuangamiza.

Kwa kuwa tunamwamini Bwana, ni hakika kuwa hatuwaonei tamaa watu wa ulimwengu huu kabisa. Hii ni kwa sababu, Bwana amesema kuwa atauhukumu ulimwengu huu na kisha kumtupa Shetani, Mpinga Kristo na wafuasi wake katika moto wa kuzimu, na kwa sababu hiyo sisi sote tunaweza kuvumilia na kungojea.

Ulimwengu huu umebakiza dakika chache sana ili uangamizwe, hii ni kwa mujibu wa unabii wa Neno la Mungu. Katika ulimwengu mzima tumekwishaona dalili nyingi sana zinazoonyesha ujio wa mapigo ya nyakati za mwisho.

Hali ya hewa isiyo ya kawaida kama vile *El Nino* na magonjwa mapya kama vile Kichaa cha Ng’ombe yanausumbua ulimwengu huu wa sasa. Magonjwa yasiyo na tiba ambayo mwanadamu hana uwezo wa kuyatatua yanaendelea kuugubika ulimwengu, vivyo hivyo majanga makubwa ambayo hayatarajiwi kama vile njaa kali na matetemeko ya ardhi ya kutisha yanaendelea kuipiga dunia.

Mambo haya yote yanapotokea, tunapaswa kuamini kwamba Mungu yupo, na pia tunapaswa kuishi maisha yetu hali tukifahamu kuwa Mungu atawahukumu na kuwaangusha wale wote walioishi kwa matamanio yao hali wakijirundikia utajiri walipokuwa hapa ulimwenguni. Katika ulimwengu wa leo dhambi imetawanyika mahali pengi sana. Ulimwengu huu una matumizi ya ovyo sana kwa sababu ya starehe na anasa

zake. Watu wametingwa kwa kuoana, kula na kunywa, na kujenga majumba yao pasipo kukumbuka juu ya hali yao ya kiroho. Ulimwengu wa leo ni mahali ambapo mwanamume anafanya dhambi ya zinaa na mwanamume mwenzie, na wanawake wengi pia wakifanya tamaa na kuzini na wanawake wenzao (Warumi 1:27).

Je, wakati wa Nuhu ulimwengu haukuwa kama hivi? Unapaswa ufahamu vizuri juu ya maana ya neno ‘ufiraji.’ Wakati Sodom na Gomora zilizopoangamizwa, hali na utamaduni wao ulikuwa kama ulivyo katika ulimwengu tunaoishi sasa. Ulimwengu huu umekuwa ni mchafu sana na wenye dhambi, kiasi kwamba Mungu ataleta moto na kuuchoma kuwa majivu, pia umegeuka na kuwa ulimwengu ambao unamilikiwa na mashetani.

Manabii wa Uongo Watauawa

Mara nyingi manabii wa uongo wanatafuta kumiliki mali na vitu ili kujilimbikizia utajiri isivyo halali, hali wakiwa wamejificha katika tawala za taasisi zao za kidini. “Ikiwa unamwamini Yesu, utakuwa tajiri, utaishi vizuri, na utapona magonjwa yako”—ni lazima ufahamu kwamba nyuma ya uongo kama huo ipo nia ya kunyonya mali na vitu.

Hata hapa Korea, sasa ni muda mrefu tangu Ukristo ulipopoteza imani yake ya msingi na kuharibiwa na kila aina ya nguvu za mapepo kwa kisingizio cha jina la Yesu. Huu ni ukweli wa Ukristo wa leo. Lakini kwa wale manabii wa uongo ambao wanaipima imani kwa kiwango cha umiliki wa mali na vitu vya ulimwenguni, na ambao wanafanya ushirikina pamoja na Neno la Mungu, basi ni hakika kuwa hukumu ya Mungu ya kutisha ya kuzimu na mapigo makubwa ya mabakuli saba

vinawangojea.

Mungu anatueleza kwamba wale wote wanaowadanganya watu na watu wanaodanganywa na manabii wa uongo wote kwa pamoja watapokea hukumu. Hatupaswi kuuangalia ulimwengu huu na kisha kuufuata. Badala yake tunapaswa kuamini kwamba kwa kuwa Mungu yupo hai, basi wale wote wasiomwamini Yesu na wanaosimama kinyume naye na kuwatesa wenye haki watahukumiwa na kuadhibiwa mauti ya milele. Pia ni lazima tuamini kwamba baada ya kuuhukumu ulimwengu, ni hakika kwamba Mungu atawakirimu watakatifu kwa mateso na maumivu yao yote waliyoyapata kwa ajili ya jina la Kristo. ☒

SURA YA

19



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Ufalme Utakaomilikiwa Na Mwenyezi

< Ufunuo 19:1-21 >

“Baada ya hayo nikasikia sauti kama sauti ya makutano mengi, sauti kubwa mbinguni, ikisema, Haleluya; wokovu na utukufu na nguvu zina BWANA MUNGU wetu. kwa kuwa hukumu zake ni za kweli na za haki; maana amemhukumu yule kahaba mkuu aliyeiharibu nchi kwa uasherati wake, na kuipatiliza damu ya watumwa wake mkononi mwake. Wakasema mara ya pili, Haleluya. Na moshi wake hupaa juu hata milele na milele. Na wale wazee ishirini na wanne, na wale wenye uhai wanne, wakasujudu na kumwabudu Mungu, aketiye katika kile kiti cha enzi, wakisema, Amina, Haleluya. Sauti ikatoka katika kile kiti cha enzi ikisema, Msifuni Mungu wetu, enyi watumwa wake wote, ninyi mnaomcha, wadogo kwa wakuu. Nikasikia sauti kama sauti ya makutano mengi, na kama sauti ya maji mengi, na kama sauti ya radi yenye nguvu, ikisema, Haleluya; kwa kuwa Bwana Mungu wetu, Mwenyezi, amemiliki. Na tufurahi, tukashangilie, tukampe utukufu wake; kwa kuwa arusi ya Mwana-Kondoo imekuja, na mkewe amejitokea tayari. Naye amepewa kuvikwa kitani nzuri, ing'arayo, safi; kwa maana kitani nzuri hiyo ni matendo ya haki ya watakatifu. Naye akaniambia, Andika, Heri walioalikwa karamu ya arusi ya Mwana-Kondoo. Akaniambia, Maneno haya ni maneno ya kweli ya Mungu. Nami nikaanguka mbele ya miguu yake, ili nimsujudie; akaniambia, Angalia, usifanye hivi; mimi ni

mjoli wako na wa ndugu zako walio na ushuhuda wa Yesu. Msujudie Mungu. Kwa maana ushuhuda wa Yesu ndio roho ya unabii. Kisha nikazona mbingu zimefunuka, na tazama, farasi mweupe, na yeye aliyempanda, aitwaye Mwaminifu na Wa-kweli, naye kwa haki ahukumu na kufanya vita. Na macho yake yalikuwa kama mwali wa moto, na juu ya kichwa chake vilemba vingi; naye ana jina lililoandikwa, asilolijua mtu ila yeye mwenyewe. Naye amevikwa vazi lililochovywa katika damu, na jina lake aitwa, Neno la Mungu. Na majeshi yaliyo mbinguni wakamfuata, wamepanda farasi weupe na kuvikwa kitani nzuri, nyeupe, safi. Na upanga mkali hutoka kinywani mwake ili awapige mataifa kwa huo. Naye atawachunga kwa fimbo ya chuma, naye anakanyaga shinikizo la mvinyo ya ghadhabu ya hasira ya Mungu Mwenyezi. Naye ana jina limeandikwa katika vazi lake na paja lake, MFALME WA WAFALME, NA BWANA WA MABWANA.

Kisha nikaona malaika mmoja amesimama katika jua; akalia kwa sauti kuu, akiwaambia ndege wote warukao katikati ya mbingu, Njoni mkutane kwa karamu ya Mungu iliyo kuu; mpate kula nyama ya wafalme, na nyama ya majemadari, na nyama ya watu hodari, na nyama ya farasi na ya watu wawapandao, na nyama ya watu wote, waungwana kwa watumwa, wadogo kwa wakubwa. Kisha nikamwona huyo mnyama, na wafalme wa nchi, na majeshi yao, wamekutana kufanya vita na yeye aketiye juu ya farasi yule, tena na majeshi yake. Yule mnyama akakamatwa, na yule nabii wa uongo pamoja naye, yeye aliyezifanya hizo ishara mbele yake, ambazo kwa hizo aliwadanganya watu wale walioipokea ile chapa ya huyo mnyama, nao walioisujudia sanamu yake; hao wawili wakatupwa wangali hai katika lile ziwa la moto liwakalo kwa kiberiti; na wale

waliosalia waliuawa kwa upanga wake yeye aliyeketi juu ya yule farasi, upanga utokao katika kinywa chake. Na ndege wote wakashiba kwa nyama zao.”

Mafafanuzi

Aya ya 1: Baada ya hayo nikasikia sauti kama sauti ya makutano mengi, sauti kubwa mbinguni, ikisema, “Halleluya; wokovu na utukufu na nguvu zina BWANA MUNGU wetu.”

Kifungu hiki kinawaelezea watakatifu wakimsifu Bwana Mungu wakati siku yao ya harusi na Mwana-kondoo ikikaribia. Bwana, Mungu wetu amewapatia watakatifu wokovu wao na utukufu, ili kwamba waweze kumsifu Bwana kwa nia njema. Watakatifu walionyakuliwa angani wataendelea kumsifu Bwana Mungu, kwa kuwa neema zake ni kuu kwa kuwakomboa toka katika dhambi zao zote na adhabu ya dhambi hizo isiyokwepeka.

Neno “*Allehuya*” au “*Halleluya*” ni neno unganishi linalounganisha maneno mawili ya Kiebrania ya “*halal*,” lenye kumaanisha kusifu, na “*Yah*,” lenye kumaanisha “Yehova.” Hasahasa, Zaburi ya 113-118 katika Agano la Kale zinatajwa kuwa ni “Halle za Misri” yaani “Sifa za Misri” na Zaburi 146-150 zinatajwa kuwa ni “Zaburi za Hallel au Zaburi za Sifa.”

“Zaburi hizi za Sifa” ni nyimbo ambazo zinaendana na furaha na huzuni ya watu wa Kiyahudi, hali zikiwapatia nguvu nyakati za huzuni na dhiki, na wakati mwingine ziliimbwa kama nyimbo za furaha hasa katika nyakati za wokovu na ushindi. Pia sifa hizi za “*Halleluya*” zilikuwa zikiimbwa na kutolewa kwa Mungu tu. Hii ni kwa sababu hukumu ya Bwana ya mapigo makuu kwa ulimwengu huu ni ya kweli na ya haki, na kwa sababu wokovu, nguvu, na mamlaka ni vya Mungu tu.

Aya ya 2: “Kwa kuwa hukumu zake ni za kweli na za haki; maana amemhukumu yule kahaba mkuu aliyeiharibu nchi kwa uasherati wake, na kuipatiliza damu ya watumwa wake mkononi mwake.”

Kule kusema kwamba Mungu atawalipia kisasi watakatifu kwa kuyamimina mapigo ya mabakuli saba juu ya wanadini wote wa dunia hii na wasioamini, ni hukumu ya Mungu ya kweli na ya haki. Kwa kuwa wanadini wa ulimwengu huu waliwaua wasio na dhambi na watumishi wenye haki wa Mungu, basi sasa ni zamu yao kuhukumikiwa na Mungu kwenda katika mauti ya milele.

Kuna kitu chochote kibaya ambacho watakatifu wamekifanya hapa duniani ambacho kinawastahilisha kuuawa na hawa wanadini wa ulimwenguni? Kwa kweli hapana! Lakini wanadini wote wa hapa ulimwenguni wameungana ili kuwaua wana wa Bwana Mungu. Kwa hiyo, kitendo cha Mungu cha kuyamimina mapigo haya ya mabakuli saba juu ya hawa wauaji ni ya haki, na inadhihirisha haki ya Mungu.

Aya ya 3: “Wakasema mara ya pili, Halehuya. Na moshi wake hupaa juu hata milele na milele!”

Watakatifu wanamsifu Bwana Mungu angani kwa sababu siku ya harusi yao pamoja na Yesu, ambaye amefanyika kuwa Mwana-kondoo, imekaribia.

“Na moshi wake hupaa juu hata milele na milele.” Hii ina maanisha ni moshi unaotoka katika ulimwengu huu ulioangamizwa na kuunguzwa na mapigo makuu ya mabakuli saba yaliyomiminwa na Mungu. Hii inatuonyesha kwamba ulimwengu huu hautaweza kupona toka katika magofu yake, kwa kuwa maangamizi yake yatakuwa ni ya kutisha na ya milele.

Aya ya 4: “Na wale wazee ishirini na wanne, na wale

wenye uhai wanne, wakasujudu na kumwabudu Mungu, aketiye katika kile kiti cha enzi, wakisema, Amina, Haleluya.”

Ule ukweli kwamba siku ya harusi ya watakatifu na Bwana Yesu imekaribia ni tukio lenye utukufu kiasi kwamba wale wazee 24 na wale wenyeuhai wanne huko Mbinguni wanamwabudu na kumsifu Bwana Mungu aketiye katika kicha chake cha enzi. Hii ndio sababu watumishi wa Mungu wanamsifu Bwana Mungu wakiwa angani.

Aya ya 5: “Sauti ikatoka katika kile kiti cha enzi ikisema, Msifuni Mungu wetu, enyi watumwa wake wote, ninyi mnaomcha, wadogo kwa wakuu.”

Kwa kuwa siku ya harusi ya Mwana-kondoo pamoja na watakatifu ni siku ya furaha sana kwa watumishi na watakatifu wake wote ambao wameokolewa kwa kumwamini Bwana Mungu, basi ndio maana sauti toka katika kiti cha enzi inawaamuru kumsifu Bwana. Sasa, wakati umefika kwa watumishi wa Mungu na watakatifu wake wote kufurahi na kumsifu Bwana.

Aya ya 6: “Nikasikia sauti kama sauti ya makutano mengi, na kama sauti ya maji mengi, na kama sauti ya radi yenye nguvu, ikisema, Haleluya; kwa kuwa Bwana Mungu wetu, Mwenyezi, amemiliki.”

Aya hii inatueleza kwamba kwa kuwa wakati wa utawala wa Bwana Mungu umekaribia, basi sasa ni wakati wa watakatifu wake na watumishi kupokea amani, furaha, na baraka ya milele zinazotiririka kama mto. Na hii ndio sababu wanamsifu Bwana Mungu. Watakatifu wanamsifu Mungu wetu wakiwa angani ilhali mapigo makuu yakiendelea hapa duniani kwa kuwa wakati umefika wa wao kutawaliwa na Bwana Mungu—yaani, sasa ni wakati wa Mungu kuwatukuza

watakatifu wake. Sauti ya watakatifu wakisifu wakati huu ni kama sauti ya ngurumo ya maji mengi. Hivyo, chakula cha harusi ya Ufalme wa Mbinguni kinaanza kwa sifa nzuri za watakatifu.

Aya ya 7: “Na tufurahi, tukashangilie, tukampe utukufu wake; kwa kuwa arusi ya Mwana-Kondoo imekuja, na mkewe amejiweka tayari.”

Sasa, wakati ambapo mapigo ya mabakuli saba yaliyoletwa na Mungu yakiisha, aya hii inatueleza kwamba wakati umefika kwa watakatifu wote kushukuru na kushangilia. Watakatifu wanashukuru na kufurahia kwa sababu siku imewadia ya wao kufunga harusi na Bwana na kisha kuishi katika Ufalme wake. Ili aweze kuishi pamoja na watakatifu, Bwana Mungu wetu ameandaa Mbingu na Nchi Mpya, mji mtakatifu na bustani zake, na utukufu wote na utajiri, na kwamba hivi sasa Bwana anawangojea hao watakatifu. Kuanzia sasa na kuendelea, watakatifu watatawala pamoja na Bwana milele.

Aya ya 8: Naye amepewa kuvikwa kitani nzuri, ing'arayo, safi; kwa maana kitani nzuri hiyo ni matendo ya haki ya watakatifu.

Bwana amewapatia watakatifu mavazi mapya, ambayo yametengenezwa kwa kitani safi. Yeyote anayeishi huku akimtumikia Bwana Mungu anakuwa amevikwa mavazi haya. Kwa maneno mengine, Mungu anawavika watakatifu kwa mavazi ya Mbinguni. Mavazi haya ya kimbingu ya kitani safi hayawezi kulowanishwa na jasho. Hii inatueleza kwamba sisi tumefanyika kuwa mabibi harusi wa Mwana-kondoo si kwa sababu ya jitihada zetu binafsi, bali imewezekana hivyo kwa imani yetu katika injili ya maji na Roho iliyotolewa na Bwana Mungu.

Ikilinganishwa na vazi jekundu na la zambarau

linalovaliwa na Mpinga Kristo, hii kitani safi ni ya thamani sana na imekuwa ikitumika kutengeneza mavazi ya makuhani na wafalme. Hali ikitoa uhuru wa kuwa mbali na jasho, kitani safi inatuonyesha kwamba wale walivikwa na neema ya Mungu na haki yake sasa wamefanyika kuwa watu wake.

Sentensi hii inayosema, *“kwa maana kitani nzuri hiyo ni matendo ya haki ya watakatifu.”* Ina maanisha kwamba wale waliofanyika na kuwa watakatifu kwa neema ya wokovu iliyotolewa na Bwana Mungu walimpatia Mungu utukufu kwa kuuawa na kuifia-dini, yaani kwa kuuawa na Mpinga Kristo na wafuasi wake katika kuilinda imani yao. Kwa maneno mengine, *“Matendo ya haki,”* hayamaanishi ni haki ya Torati, bali ni vifo vya watakatifu wakiifia-dini ili kuilinda imani yao ya thamani. Vivyo hivyo, mabibi harusi wote wa Yesu Kristo wa nyakati za mwisho ni wafia-dini, ambao ili kuilinda imani yao katika Bwana, walisimama kinyume na kupambana na Mpinga Kristo na wafuasi wake wakati walipokuwa hapa duniani.

Ili kujiandaa kwa imani ya kuweza kuifia-dini, watakatifu wote ni lazima waimarishwe kwa kipindi cha miaka mitatu na nusu katika ile miaka ya Dhiki Kuu, kwa kuwa baada ya kuisha kwa hii miaka mitatu na nusu, ni hakika kwamba watauwawa na kuifia-dini.

Aya ya 9: Naye akaniambia, Andika, Heri walioalikwa karamu ya arusi ya Mwana-Kondoo. Akaniambia, Maneno haya ni maneno ya kweli ya Mungu.”

Wakati mapigo ya Mungu yatakapoisha hapa ulimwenguni, Bwana Mungu atawaalika watakatifu wote katika karamu ya harusi ya Mwana-kondoo (Ufalme utajengwa na kutawaliwa na Bwana), na atawaruhusu kuishi katika Ufalme wa Kristo. Wale walioalikwa katika karamu ya harusi ya Mwana-kondoo ni wale waliobarikiwa. Mungu wetu

ametueleza kwamba hatashindwa kulitimiza hili Neno la ahadi. Itafika siku ambapo watakatifu watafunga harusi na Bwana. Bwana wetu atakuja hapa duniani ili kuwachukua wanaharusi wake, yaani wale waliosafishwa dhambi zao zote kwa kuamini katika injili ya maji na Roho. Naye Bwana ataishi pamoja na wanaharusi wake milele na milele katika Ufalme wake.

Muungano wa watakatifu pamoja na Bwana utakamilika wakati watakatifu watakaponyakuliwa na Kristo, ambapo watapokea utukufu usioisha na thawabu ya Ufalme wa Milenia. Halleluya! Ninamsifu na kumshukuru Bwana Mungu ambaye ametufanya sisi kuwa watu wake.

Aya ya 10: Nami nikaanguka mbele ya miguu yake, ili nimsujudie; akaniambia, Angalia, usifanye hivi; mimi ni mjoli wako na wa ndugu zako walio na ushuhuda wa Yesu. Msujudie Mungu. Kwa maana ushuhuda wa Yesu ndio roho ya unabii.”

Watakatifu ni lazima wampatie utukufu wote Bwana Mungu pekee. Mungu wetu Utatu ndiye anayestahili kupokea sifa zote na kuabudiwa na watakatifu wote.

Sentensi inayosema, “Kwa maana ushuhuda wa Yesu ndio roho ya unabii,” ina maanisha kwamba ushuhuda na unabii wa Yesu unakuja kwa kupitia Roho Mtakatifu.

Aya ya 11: Kisha nikazona mbingu zimefunuka, na tazama, farasi mweupe, na yeye aliyempanda, aitwaye Mwaminifu na Wa-kweli, naye kwa haki ahukumu na kufanya vita.

Wakati nyakati za mwisho zitakapowadia, Bwana Mungu wetu, hali akiwa amepanda farasi mweupe, atapigana na Shetani kwa haki yake na kumfunga na kumtupa katika shimo la kuzimu lisilo na mwisho na katika ziwa la moto.

Hapa, jina la Yesu Kristo ni “Aminifu” na la “Kweli.”

Neno “Aminifu,” lina maanisha kwamba Kristo anastahili na anaaminika, linaelezea uaminifu wa Yesu na usahihi wake, wakati neno “Kweli,” lina maanisha kwamba Yesu yupo mbali na uongo, na linatueleza kwamba Kristo atamshinda Mpinga Kristo kwa hukumu ya haki ya Mungu.

Aya ya 12: Na macho yake yalikuwa kama mwali wa moto, na juu ya kichwa chake vilemba vingi; naye ana jina lililoandikwa, asilolijua mtu ila yeye mwenyewe.

Kule kusema kwamba macho ya Bwana yalikuwa “kama mwali wa moto” kunatueleza kwamba Yeye ana nguvu ya kuwahukumu wote. Kwa upande mwingine, sentensi inayosema “na juu ya kichwa chake vilemba vingi,” ina maanisha kwamba Bwana wetu anashinda wakati wote katika mapambano yake dhidi ya Shetani, kwa kuwa Yeye ni Mungu Mwenyezi na mwenye nguvu.

Aya ya 13: Naye amevikwa vazi lililochovywa katika damu, na jina lake aitwa, Neno la Mungu.

Bwana wetu atawalipia kisasi watakatifu dhidi ya adui zao kwa kuwahukumu maadui wake kwa ghadhabu kuu, yaani maadui ambao walisimama kinyume naye. Huyu Mungu si mwingine bali ni Yesu Kristo Mwenyewe. Kama alivyo ahidi kwa Neno lake, ni hakika kwamba Bwana wetu alikuja hapa duniani katika mwili wa mwanadamu, akabatizwa na Yohana ili kuzibeba dhambi zote za ulimwengu, akazibeba hizo dhambi hadi Msalabani, na akazifanya dhambi za wanadamu wote kutoweka.

Sentensi hii “vazi lililochovywa katika damu” haizungumzii damu ya Kristo. Inazungumzia juu ya damu ya maadui ikiwa imerukia katika vazi la Bwana hasa wakati akiileta hukumu yake ya kutisha ya ghadhabu kwa maadui hao na wakati ambapo akiwakanyaga kwa miguu yake yenye nguvu.

Hii sentensi “*Neno la Mungu*” ina onyesha juu ya tabia ya Yesu. Kwa kuwa Bwana wetu anafanya vitu vyote kwa kupitia Neno lake lenye nguvu, basi ndio maana anatajwa kuwa ni “Neno la Mungu.”

Aya ya 14-16: Na majeshi yaliyo mbinguni wakamfuata, wamepanda farasi weupe na kuvikwa kitani nzuri, nyeupe, safi. Na upanga mkali hutoka kinywani mwake ili awapige mataifa kwa huo. Naye atawachunga kwa fimbo ya chuma, naye anakanyaga shinikizo la mvinyo ya ghadhabu ya hasira ya Mungu Mwenyezi. Naye ana jina limeandikwa katika vazi lake na paja lake, MFALME WA WAFALME, NA BWANA WA MABWANA.

Jeshi la Bwana Mungu litazifanya kazi za Mungu wakati wote, hali likiwa limevikwa katika neema yake yenye utukufu.

Mungu atauhukumu ulimwengu huu kwa Neno linalotoka katika kinywa chake. Bwana wetu ametuahidi wakati wote kwa Neno la kinywa chake, na analitimiza hili Neno wakati wote kwa nguvu zake. Yeye atakaye uhukumu ulimwengu na kumuangamiza Shetani ni Yesu Kristo, Mfalme wa wafalme na Bwana wa mabwana.

Aya ya 17: Kisha nikaona malaika mmoja amesimama katika jua; akalia kwa sauti kuu, akiwaambia ndege wote warukao katikati ya mbingu, “Njoni mkutane kwa karamu ya Mungu iliyo kuu;”

Hatimaye ulimwengu huu pamoja na Shetani na wafuasi wake vitaangamizwa na Yesu Kristo. Biblia inaelezea kuangamizwa huku kwa ulimwengu kuwa ni karamu kuu ya Mungu.

Aya ya 18: “mpate kula nyama ya wafalme, na nyama ya majemadari, na nyama ya watu hodari, na nyama ya farasi na

ya watu wawapandao, na nyama ya watu wote, waungwana kwa watumwa, wadogo kwa wakubwa.”

Hili Neno linatueleza kwamba kwa kuwa ulimwengu mzima na kila mtu akaaye ndani yake atakuwa ameuawa mara baada ya mapigo makuu ya Bwana Mungu yatakapokuwa yameisha, basi ndege warukao angani watayajaza matumbo yao kwa kula mizogo ya watu hao. Hao ndege watafanya hivyo kwa kuwa Mungu atakuwa ameyamimina mapigo makuu ya mabakuli saba katika ulimwengu huu. Bwana wetu alitambua kwamba, *“Kwa kuwa popote ulipo mzoga, ndipo watakapokusanyika tai (Mathayo 24:28).”* Katika ulimwengu wa nyakati za mwisho, kutakuwa na maangamizi, vifo, na adhabu ya kuzimu kwa wenye dhambi. Lakini kwa watakatifu, kutakuwa na baraka ya kutawala katika Ufalme wa Kristo.

Aya ya 19: Kisha nikamwona huyo mnyama, na wafalme wa nchi, na majeshi yao, wamekutana kufanya vita na yeye aketiye juu ya farasi yule, tena na majeshi yake.

Mpinga Kristo, ambaye ni mtumishi wa Shetani, na wafuasi wake watasimama dhidi ya watumishi wa Mungu na watakatifu wake na watajaribu kuwashinda hadi mwisho wako utakapofikia. Lakini kwa kuwa Bwana wetu ni Mfalme wa wafalme, atamkamata Mpinga Kristo na yule nabii wa uongo, atawatupa katika ziwa la moto, na kisha atawaua watumishi wao kwa upanga wa Neno lake.

Aya ya 20: Yule mnyama akakamatwa, na yule nabii wa uongo pamoja naye, yeye aliyezifanya hizo ishara mbele yake, ambazo kwa hizo aliwadanganya watu wale walioipokea ile chapa ya huyo mnyama, nao walioisujudia sanamu yake; hao wawili wakatupwa wangali hai katika lile ziwa la moto liwakalo kwa kiberiti.

Hili neno “Mnyama” lina maanisha ni Mpinga Kristo. Na hili neno “nabii wa uongo” ni mtumishi wa Mpinga Kristo, ambaye kwa kufanya ishara na miujiza, atawageuza watu waiache imani katika Neno la kweli. Bwana Mungu wetu atamuangamiza Shetani, Mnyama (Mpinga Kristo), nabii wa uongo, na wafuasi wa Shetani ambao waliabudu sanamu ya Mpinga Kristo na wakasimama kinyume na Mungu, kinyume na watakatifu, na kinyume na injili ya maji na Roho.

Hili “*ziwa la moto liwakalo kwa kiberiti*” lina maanisha ni jehanamu. Jehanamu ni tofauti kidogo na shimo kuzimu lisilo na mwisho. Wakati shimo la kuzimu lisilo na mwisho ni mahali ambapo Shetani atafungwa kwa muda, “ziwa la moto” ni mahali ambapo watapata adhabu yao ya milele. Kimsingi, moto na kiberiti vimekuwa vikitumika katika Biblia mara kwa mara kama zana za Mungu za adhabu na hukumu.

Baada ya ulimwengu huu kuangamizwa, Bwana wetu atarudi hapa duniani pamoja na watakatifu wake, atamwangamiza kwanza Shetani na watumishi wake, kisha ataungua Ufalme wa Kristo. Kisha watakatifu wataishi na kutawala pamoja na Bwana ktika Ufalme wa Kristo kwa miaka elfu moja itakayofuata.

Aya ya 21: Na wale waliosalia waliuawa kwa upanga wake yeye aliyeketi juu ya yule farasi, upanga utokao katika kinywa chake. Na ndege wote wakashiba kwa nyama zao.

Ulimwengu huu uliumbwa na Neno toka katika kinywa cha Bwana Mungu wetu; vivyo hivyo, maadui wa Mungu wataangamizwa wote kwa Neno la hukumu toka katika kinywa cha Bwana. Kisha Ufalme wa Kristo utanzishwa hapa duniani. Hivyo, watakatifu wanapaswa kuliweka tumaini lao katika Ufalme wa Kristo na kisha kmpatia Mungu utukufu kwa kupigana dhidi ya Shetani, Mpinga Kristo na wafuasi wake, na kwa kuvipokea na kuvikubali vifo vya kuifia-dini kwa imani. ☒

Ni Wenye Haki Tu Ndio Wanaoweza Kusubiria Kurudi Kwa Kristo Katika Tumaini

< Ufunuo 19:1-21 >

Katika sura iliyopita, tuliona jinsi ambavyo Mungu atakavyoyaleta mapigo yake ya kutisha katika ulimwengu huu. Katika sura hii, sasa tunamwona Kristo na jeshi lake lenye utukufu likipigana na kulishinda jeshi la Mpinga Kristo, na kisha kumtupa Mnyama na watumishi wake katika ziwa la moto hali wakiwa hai, huku wakiua jeshi la Mpinga Kristo lililosalia kwa upanga wa Neno utokao katika kinywa cha Bwana, na hivyo kuhitimisha vita vyake dhidi ya shetani.

Yaliyomo katika sura hii yanaweza kugawanywa katika mada kuu tatu: 1) watakatifu walionyakuwali wanamsifu Mungu kwa kuileta hukumu ya mapigo makuu katika ulimwengu huu; 2) kutangazwa kwa ujio wa karamu ya harusi ya Mwana-Kondoo; na 3) kushuka kwa Bwana toka Mbinguni pamoja na jeshi la Yesu Kristo.

Sisi sote ni lazima tutambue kwa hakika kwamba Mungu atatimiza kila kitu kama alivyosema kwetu kupitia Kitabu cha Ufunuo.

Hukumu ya Mungu!

Wale wanaoamini katika injili ya maji na Roho na ambao wamefanyika kuwa watu wa Mungu kwa kupitia imani watakuwa wakimsifu Mungu kwa kuwaokoa toka katika dhambi zote za ulimwengu. Hebu tuangalie aya ya 3-5: *“Wakasema mara ya pili, Halehuya. Na moshi wake hupaa juu hata milele na milele. Na wale wazee ishirini na wanne, na wale wenye uhai wanne, wakasujudu na kumwabudu Mungu, aketiye katika kile kiti cha enzi, wakisema, Amina, Halehuya. Sauti ikatoka katika kile kiti cha enzi ikisema, Msifuni Mungu wetu, enyi watumwa wake wote, ninyi mnaomcha, wadogo kwa wakuu!”*

Waebrania 9:27 inatueleza kwamba, *“Na kama vile watu wanavyowekewa kufa mara moja, na baada ya kufa hukumu.”* Mwanadamu atahukumiwa mbele za Mungu mara moja, lakini maamuzi ya hukumu hii ni ya mwisho na wala hayatarudiwa. Kwa maneno mengine, Mungu ataitoa hukumu yake ya mwisho kwa kuwatupa wenye dhambi katika moto uwakao milele kwa kupitia hukumu yake hii ya mara moja kwa kila mtu. Hii ndio sababu Biblia inatueleza kwamba *“moshi wake hupaa juu hata milele na milele.”*

Baadhi ya watu wanaweza kufikiri na kusema, “Ukisha kufa, basi hapo ndio mwisho wa kila ktu.” Lakini haya ni mawazo binafsi ya mtu, na si mawazo ya Mungu. Kwa kuwa kila mtu ana mwili pamoja na nafsi, basi kila mtu anafahamu katika hali ya asili kwamba Mungu yupo, na kwamba muda si mrefu kila mtu atahukumiwa kwa dhambi zake mbele za Mungu, hii ni kwa watu wote bila kujalisha kwamba wanamwamini Mungu au la.

Kwa kuwa kuna uwepo wa roho za watu, basi ndio maana wanafahamu kwamba, pamoja na kuwa Mungu haonekani kwa

macho yao, ukweli ni kuwa Mungu yupo. Uwepo unaoweza kuonekana kwa macho ya kibinadamu hauwezi kudumu milele, na kwamba upo uwepo wa kweli na wa milele ambao hauonekani kwa macho yetu. Utajiri wa mali katika dunia hii ukiambatana na fikra juu ya fedha na utafutaji wa mali haviwezi kuwa ndio sababu ya mwanadamu kuwepo duniani; ukweli ni kwamba sababu ya msingi ya mwanadamu kuwepo hapa duniani ni kuingia katika uwepo wa milele wa baraka kwa kumfahamu Mungu, ambaye ni Muumbaji wa ulimwengu mzima, na kwa kuifahamu na kuiamini injili ya maji na Roho iliyotolewa na Bwana.

Sio kwamba tunapaswa kufahamu kile ambacho Mungu ametueleza, bali tunapaswa kuamini kile ambacho Mungu ametueleza. Hatupaswi kuishia kuzimu kwa kuamini kwa mujibu wa mawazo yetu binafsi tu. Kabla ya kukabiliana na mateso ya milele kwa ajili ya dhambi zetu, basi tunapaswa kusamehewa dhambi zetu zote na kupokea uzima wa milele kwa kuiamini injili ya maji na Roho iliyotolewa na Yesu wakati tukiwa hapa duniani.

Maisha hapa duniani ni mafupi sana kwa kila mtu. Ni kama vile jua linapochwea na kuwia kila siku, safari fupo ya maisha yetu inafikia ukomo kwa haraka, ikiwa haina matunda na isiyo na maana, kana kwamba tumekuwa tukikimbia kama nguchiro juu ya uwanda mfupi. Hata kama utaishi kwa miaka mia moja, bado huwezi kusema kwamba umeishi muda mrefu sana.

Ikiwa utatoa shughuli mbalimbali zinazojitokeza katika maisha yako ya kila siku, kama vile muda unaoutumia ukiwa umelala, ukila, ukienda bafuni, na kufanya vitu vya kidunia visivyo sisimua, yaani katika muda wote wa maisha yako, basi utajikuta kwamba umebakiwa na muda mfupi sana. Unapoviona vitu ambavyo umewahi kuviona tangu ulipozaliwa,

na unapokutana na watu ambao umewahi kukutana nao hapo zamani, na mara unapoziona nywele zako zikibadilika na kuwa na mvi, basi unajikuta ukikabiliana na mwisho wako.

Sababu inayofanya maisha yetu sisi watakatifu kutokuwa na maana ni kwa sababu, baada ya kuzaliwa katika ulimwengu huu, tumekutana na Bwana ambaye amekuja kwetu kwa kupitia maji na Roho, na hivyo tukamwamini, na hivyo kupokea ondoleo la dhambi zetu zote. Kwa kweli sisi ni watu wenye baraka na wenye shukrani! Kama isingelikuwa ni Bwana aliyekuja kwetu kupitia maji na Roho, basi ni hakika kwamba tungelikuwa tumefungwa kuingia katika moto wa milele na kuteseka ndani yake.

Ninapofikiria hili, kwa kweli naona bado linanitisha, na kwa sababu hiyo najikuta nikampatia Bwana shukrani zaidi na zaidi. Kwa kweli kuzimu, ambayo imetokea kwa sababu ya Shetani, ni mahali panapotisha sana na ambapo mateso yake ni makuu mnno kiasi kwamba mtu atatamani kufa, lakini kwa bahati mbaya hataweza kufa. Ni mahali ambapo moto na kibiriti vinawaka milele.

Ili kuweza kuifahamu kiusahihi injili ya maji na Roho iliyotolewa na Yesu, na ili kuweza kupokea Roho Mtakatifu, basi inampasa mtu kukutana kwanza na watumishi wa Mungu ambao wameshakutana na injili hii ya maji na Roho na ambao wameshazaliwa tena upya. Yeyote anayetaka kulipata jibu la swali la kuzaliwa tena upya kwa maji na Roho na kupokea Roho Mtakatifu anaweza kupata majibu yake kwa kuamini katika injili ya maji na Roho na kisha kuishi kama Mkristo.

Biblia inatueleza kwamba Roho wa Mungu anatolewa kama karama kwa wale wote wanapokea ondoleo la dhambi kwa kuamini katika injili ya maji na Roho (Matendo 2:38). Wale tu walio na Roho Mtakatifu katika mioyo yao kutokana na kusamehewa dhambi zao zote kwa kupitia imani yao katika

injili ya maji na Roho wanaweza kueleweka kwamba wana imani sahihi katika Yesu, na hao walio na imani hii ndio wanaoweza kuingia katika Ufalme wa Mungu wa milele (Yohana 3:5). Kubarikiwa au kulaaniwa kwa mtu kunatokana na ukweli ikiwa mtu huyo amepokea ondoleo la dhambi ka kuamini katika injili ya maji na Roho au la.

Wamevikwa Kitani Safi, Angavu na Inayong'aa

Wale wanaofikiria kuhusu hatma yao ya baadaye na wanaotaka kutatua tatizo la ondoleo la dhambi zao hao ndio wenye hekima na waliobarikiwa. Pamoja na kuwa mtu anaweza kuwa ameishi maisha yenye mapungufu mengi, ikiwa mtu huyo ameamini katika injili ya maji na Roho na amepokea ondoleo la dhambi na Roho Mtakatifu katika moyo wake, basi mtu huyo atakuwa ndiye aliyeishi maisha yenye mafanikio.

Ufunuo 19:4-5 says, *“Na wale wazee ishirini na wanne, na wale wenye uhai wanne, wakasujudu na kumwabudu Mungu, aketiye katika kile kiti cha enzi, wakisema, Amina, Halehuya. Sauti ikatoka katika kile kiti cha enzi ikisema, Msifuni Mungu wetu, enyi watumwa wake wote, ninyi mnaomcha, wadogo kwa wakuu!”*

Hapa, hii sentesi inayosema “mnaomcha Mungu” maana yake ni kulipokea Neno la Yesu Kristo katika moyo wa mtu na kisha kuishi kwa mujibu wa uongozi wa Mungu. Ni wale tu waliosamehewa dhambi zao ndio wanaoweza kuona na kumsifu Mungu katika Ufalme wa Mbinguni. Lakini wale ambao hawajapokea ondoleo la dhambi zao watateseka katika moto uwakao wa kuzimu na kisha kulaaniwa na Mungu.

Hebu tuendeleo na aya ya 6-9: *“Nikasikia sauti kama sauti ya makutano mengi, na kama sauti ya maji mengi, na*

kama sauti ya radi yenye nguvu, ikisema, Haleluya; kwa kuwa Bwana Mungu wetu, Mwenyezi, amemiliki. Na tufurahi, tukashangilie, tukampe utukufu wake; kwa kuwa arusi ya Mwana-Kondoo imekuja, na mkewe amejiweka tayari. Naye amepewa kuvikwa kitani nzuri, ing'arayo, safi; kwa maana kitani nzuri hiyo ni matendo ya haki ya watakatifu."

Hapa vifungu hivi vinaeleza kwamba Mtume Yohana aliisikia sauti ya kusifu, sauti kama ya makutano ya watu wengi, kama sauti ya maji mengi, na kama sauti ya radi kuu. Sauti hii si nyingine bali ni sauti ya wale waliopokea ondoleo la dhambi wakiwa wamekusanyika pamoja wakimsifu Mungu. Huu wimbo wa kusifu ulioundwa kwanza kwa sifa za kumsifu Mungu kwa kuwaruhusu kuwa chini ya utawala wa Mungu Mwenyezi, na kisha kutawaliwa na Mungu, na kisha kuishi na Mungu katika utukufu. Mambo haya yote yamewafanya watakatifu kuwa na furaha kuu na kisha kumpatia Mungu utukufu mkuu. Na ndio maana hawawezi kufanya lolote zaidi ya kumsifu Mungu huku wakipiga kelele, *"Na tufurahi, tukashangilie, tukampe utukufu wake"*

Pili, watakatifu wanaendelea na sifa zao: *"kwa kuwa arusi ya Mwana-Kondoo imekuja, na mkewe amejiweka tayari. Naye amepewa kuvikwa kitani nzuri, ing'arayo, safi; kwa maana kitani nzuri hiyo ni matendo ya haki ya watakatifu."* Hii ina maanisha nini? Ina maanisha kwamba kama Mungu alivyowaahidi wanadamu, Yesu atarudi hapa duniani, atafunga ndoa na wale waliopokea Roho Mtakatifu kwa kumwamini Yeye na kwa kuzaliwa tena upya, na kisha kuishi pamoja nao milele.

Ndoa ni muungano wa bwana harusi na bibi harusi. Kwa maneno mengine, wakati Yesu atakaporudi hapa duniani, atawapokea na kisha kuishi nao wale tu waliozaliwa tena upya kwa maji na Roho. Pia ina maanisha kwamba Yesu ataujenga

Ufalme wake wa Milenia na Mbingu na Nchi Mpya ili aweze kuishi pamoja na watakatifu milele na milele. Utukufu wa bibi harusi kuishi pamoja na Bwana harusi ni mkuu mno kiasi kwamba hauwezi kuelezewa vizuri. Mioyo yetu inajawa na furaha kila tunapoufikiria utukufu huo.

Wakati ulimwengu ambao Yesu atatawala utakapofika, mabibib harusi wake watakuwa na furaha sana ambayo haiwezi kuelezewa na maneno. Ni furaha kiasi gani watakuwa nayo wakati watakapokuwa wakitawaliwa na Mchungaji Mwema? Kwa kuwa Yesu Kristo ni Bibi harusi wa wema mkamilifu, basi hivyo ndivyo na utawala wake utakavyokuwa na wema na ukamilifu. Yesu atatawala katika Ufalme wa Mbinguni.

Injili Ya Pekee Ambayo Itakustahilisha Kwenda Mbinguni

Ili mtu aweze kupokea Roho Mtakatifu na kuingia Mbinguni, basi imempasa mtu huyo kuamini kikamilifu katika ubatizo wa Yesu na damu yake. Kwa kuwa Bwana wetu alikuja hapa duniani ili kuwaokoa wenye dhambi wote toka katika dhambi zao zote kwa kuzichukua dhambi hizo za mwanadamu katika mwili wake, basi ndio maana ilimpasa kubatizwa na Yohana. Hivyo, Yesu Mwenyewe alisulubiwa Msalabani kwa niaba yetu mara baada ya kuwa ameupokea ubatizo wake, alihukumiwa kwa ajili ya dhambi zetu zote, akafufuka tena toka kwa wafu, na akafanyika Bwana wa wokovu wa milele kwa wale wote wanaoamini.

Huyu Bwana atarudi hapa duniani, atawapokea watu wake ambao wamefanyika mabibi harusi wake kwa imani, kisha ataishi nao milele. Wale waliofanyika mabibi harusi wake sasa wataishi pamoja na Bwana katika nchi mpya yenye utukufu,

kwa baraka yenye utukufu kwa mabibi harusi. Hivyo, watoto wa Mungu waliookolewa watampatia Yesu Kristo utukufu kwa kumsifu milele. Watu hawa ambao watatawaliwa na Mungu watashangilia katika furaha yao. Na kwa furaha hii, watampatia Bwana harusi utukufu wote.

Wanadamu wote wamekuwa wakilisubiria tukio hili tangu wakati wa uumbaji. Tukio hili linatimizwa wakati Yesu atakaporudi, na kuwainua wale wote waliopokea Roho Mtakatifu, na kisha kuishi nao. Mungu amefanya ulimwengu mpya kwa ajili ya wanadamu na ulimwengu huu mpya unatungojea. Tunaishi kwa ajili ya hili, na tumezaliwa hapa ulimwenguni kwa ajili ya hili.

Kama kifungu kikuu kinavyotueleza, *“Na mkewe amejiweka tayari. Naye amepewa kuvikwa kitani nzuri, ing’arayo, safi,”* Mungu amewavika wale wanaomwamini Yesu Kristo kwa kitani safi na ing’arayo. Kwa maneno mengine, wale wanaoliadini Neno hili wamepokea ondoleo la dhambi na mioyo yao imegeuka na kuwa myeupe kama theluji.

Vivyo hivyo, mabibi harusi wa Yesu Krito wamekwishaandaliwa mapema kwa injili ya maji na Roho. Mtu anaweza kuzaliwa tena upya na kuwa bibi harusi wa Kristo kwa kuisikia na kuiadini injili ya maji na Roho wakati akiwa hapa duniani. Imani hii ndio inayoufanya uwe bibi harusi wa Kristo, na imani hii ndiyo inayokustahilisha kuingia Mbinguni.

Wale Wanaosubiria Katika Tumaini

Kifungu kikuu kinatueleza kwamba, *“Heri walioalikwa karamu ya arusi ya Mwana-Kondoo!”* Wale waliopokea ondoleo la dhambi zao wanapaswa kuishi kwa aina ipi ya

imani? Mabibi harusi waliokutana na Bwana harusi Yesu na wanaoishi aktika utukufu wanapaswa kuishi maisha yao katika imani na tumaini, hali wakitazamia siku ya kuunganishwa na Bwana harusi.

Kadri ulimwengu unavyozidi kuwa mweusi zaidi na zaidi, bado kuna tumaini kwa mabibi harusi waliookoka. Tumaini hili si jingine bali ni lile la kusubiria siku ambayo Yesu Kristo, baada ya kuwa ameiandaa Mbingu na Nchi Mpya kwa ajili ya mabibi harusi wake, atarudi ili kuja kuwachukua. Kisha, Bwana harusi atawafufua mabibi harusi wake wote, na kuwapatia uzima wa milele. Ulimwengu ambamo Bwana harusi na mabibi harusi wataishi milele ni mahali ambapo hapana maovu, hapana dhambi, na hawapungukiwi na chochote. Mabibi harusi wanaisubiria siku hii tu. Hii ndio sababu sisi sote tuliopokea ondoleo la dhambi tunaishi kwa imani na tumaini hilo.

Kimsingi, mabibi harusi wanaoishi katika wakati wa sasa, wana mapungufu mengi katika mwili. Lakini kama 1 Wakorintho 13:13 inavyotueleza, *“Basi, sasa inadumu imani, tumaini, upendo, haya matatu; na katika hayo lililo kuu ni upendo,”* kwa kuwa Bwana harusi anawapenda mabibi harusi wake, basi atazisafisha dhambi zao zote kwa ubatizo wake na kisha kuwapokea na kuwakubali kama mabibi harusi wakamilifu.

Ulimwengu huu unakimbilia kwenda katika hatma yake na hakuna tumaini lililosalia ndani yake. Lakini pamoja na kuwa kila kitu kinaelekea karibu na maangamizi, mabibi harusi wanapaswa kuishi maisha yao kwa tumaini lao maalumu. Wakati wa kutimizwa kwa tumaini hili sasa unatukaribia. Ulimwengu mzima sasa upo katika hatari ya kuanguka na kuvunjika kutokana na matetemeko. Siku imekaribia ambapo kila mtu katika ulimwengu huu atatoweka kama vile dinosauria

wa nyakati za kale walivyotoweka. Ulimwengu huu utaanguka hivi punde.

Hata hivyo, kila bibi harusi ana tumaini, kwa kuwa wakati utakapowadia, miili ya mabibi harusi itabadilishwa na kuwa katika miili mikamilifu, na wataishi pamoja na Bwana, ambaye amefanyika kuwa Bwana harusi milele na milele. Hivyo, mabibi harusi ni lazima waihubiri injili ya maji na Roho kwa uaminifu kwa watu wa ulimwengu wa wakati huu.

Hebu Tuliamini Neno la Kweli la Mungu!

Katika Yohana 3:5 Yesu anaeleza kwamba, *“Amin, amin, nakuambia, mtu asipozaliwa kwa maji na kwa Roho, hawezi kuingia ufalme wa Mungu.”* Sasa, injili ya maji na Roho ni kitu gani? Kwanza kabisa, Biblia inatueleza kwamba “maji” maana yake ni ubatizo wa Yesu na mfano wa wokovu (1 Petro 3:21).

Wakati Yesu alipofikisha umri wa miaka 30, alikwenda kwa Yohana, aliyekuwa akiwabatiza watu wa Israeli katika Mto Yordani. Yesu anatueleza kwamba Yohana Mbatizaji alikuwa ni mwakilishi wa wanadamu na Kuhani Mkuu wa mwisho wa Agano la Kale. Mara baada ya kukutana na Yohana, Yesu aliupokea ubatizo toka kwa Yohana, ubatizo ambao uliitimiza haki yote ya Mungu (Mathayo 3:15, 11:11-14). Hivyo, ubatizo ambao Yesu aliupokea ulikuwa ni sadaka ya milele ambao kwa huo dhambi zote za ulimwengu zilipitishwa kwenda kwa Kristo Mwenyewe.

Kitendo cha Yesu kufanyika mwili kupitia Roho Mtakatifu, ubatizo wake, damu yake na kifo chake Malabani, na ufufuo wako na kupaa—haya yote ni matendo ya Roho Mtakatifu. Wakati mtu anapoamini kwamba Yesu alikuja hapa duniani, na

kwa kupitia maji na Roho alizifanya dhambi zake zote kutoweka mara moja, basi mtu huyo anaweza kufanyika mwenye haki, aliye huru toka katika dhambi, na bibi harusi wa Kristo. Hiki si kitu au mambo yaliyokamilishwa kwa mawazo ya mwanadamu, bali ni mambo yanayotoka katika mawazo ya Mungu Mwenyewe.

Ukweli ni kwamba maji, damu, na Roho Mtakatifu ni vitu muhimu sana kwa wokovu wa mwanadamu toka katika dhambi, na hakuna kimoja wapo kinachoweza kuondolewa. Katika hili Biblia inaeleza vizuri na kwa wazi katika 1 Yohana sura ya 5. Inatueleza kwamba vitu hivi vitatu yaani maji, damu, na Roho Mtakatifu vyote ni umoja, na kwamba wokovu wetu toka katika dhambi hauwezi kukamilishwa na kuthibitishwa ikiwa kimoja wapo kati ya hivyo vitatu kinakosekana.

Tunapoufahamu na kuuamini ukweli huu, kwamba wokovu kamili ni kuamini katika hivi vitatu—maji, damu, na Roho Mtakatifu—basi hapo tunaweza kutambua na kuupokea upendo wa Yesu ambao umetuokoa, na kwa sababu hiyo mioyo yetu kwa hakika itakuwa haina dhambi kabisa. Katika Matendo 2:38 Biblia inatuahidi ikisema, *“Tubuni mkabatizwe kila mmoja kwa jina lake Yesu Kristo, mpate ondoleo la dhambi zenu, nanyi mtapokea kipawa cha Roho Mtakatifu.”*

Ni nini basi, je, hili Neno linatuwezesha kupokea Roho Mtakatifu? Hili si jingine bali ni Neno la Yesu la ubatizo (maji), na la kifo chake Msalabani (damu), na la yeye kuwa ni Mungu, ufufuo na kupaa (Roho Mtakatifu). Neno hili la wokovu lilikuwa limetabiriwa katika maandiko ya Musa na manabii wengine wa Agano la Kale, na lilitimizwa na kushuhudiwa katika injili zote nne za Agano Jipya. Pia “wokovu wa milele wa upatanisho umekamilishwa mara moja,” umeandikwa kwa kina katika Kitabu cha Waebrania, na habari hii inashuhudia tena na tena juu ya haki ya Mungu, ambayo tumeipokea kupitia

imani yetu.

Pamoja na kuwa kila mtu katika ulimwengu huu wenye dhambi anaishi maisha ya kimwili ambayo yana mapungufu sana mbele za Mungu, ukweli unabaki kwamba mtu huyo anapaswa kupokea ondoleo la dhambi linalotolewa na Mungu, na kisha kuishi hali akiliweka tumaini lake Mbinguni. Hii ni zawadi ambayo Mungu amewapatia wanadamu. Sisi sote tunapaswa kuipokea neema hii bure. Kuliamini Neno ya kwamba Bwana wetu atarudi, na kwamba ataujenga Ufalme wake mpya, na kwamba ataturuhusu kuishi ndani yake ni tumaini letu la kweli. Tunapaswa kuishi kwa tumaini hili, na hivi ndivyo ninavyoamini kwa nguvu zangu zote.

Je, unafahamu dhambi imeenea kwa kiasi gani hapa ulimwenguni? Ukilinganisha na wakati wa gharika ya Nuhu, dhambi za kipindi hiki zimeenea zaidi kuliko wakati huo. Wakati wa Nuhu, Mungu, baada ya kuona kwamba mawazo ya mwanadamu yalikuwa ni maovu wakati wote, aliamua kuuangamiza ulimwengu wa kwanza kwa gharika, akamwambia Nuhu kuijenga safina, na akawaokoa wale walioingia katika safina hii kwa kuliamini Neno lake.

Pamoja na kuwa Mungu alisema kwa hakika kwamba atauhukumu ulimwengu kwa maji, ni watu nane tu wa familia ya Nuhu ndio walioliamini Neno lake. Hivyo waliitengeneza safina kwa muda wa zaidi ya miaka mia moja, kisha wakaingia ili kuikwepa gharika. Baada ya kufanya hivyo, Mungu alianza kuileta hukumu yake kwa ulimwengu wa kwanza. Ghafla anga liligeuka na kuwa jeusi, kisha mvua yenye tufani ikaanza kunyesha. Pengine baada ya saa moja maji yalikuwa yameshafikia karibu ghorofa ya tatu. Hivyo mvua ikanyesha kwa siku 40, ikauzamisha ulimwengu wote chini ya maji.

Kama ambavyo Nuhu na familia yake walivyoingia katika safina huku wakiamini kwamba ulimwengu mpya unakaribia

kufunguliwa, wewe na mimi tunapaswa kuishi katika kipindi hiki kwa tumaini. Kama walivyoweza kuijenga safina kwa miaka mia moja kwa kuwa walimwamini Mungu, basi mimi ninaamini kwamba, sisi nasi, tunapaswa kuvumilia na kuihubiri injili. Mungu alimwambia Nuhu, “*Ujifanyie safina (Mwanzo 6:14).*” Neno hili linatueleza kwamba “ili sisi tuweze kuilinda imani yetu,” basi tunapaswa kwanza kujitoa sisi wenyewe kwa Bwana na katika kuihubiri injili.

Pamoja na kuwa waliozaliwa tena upya wana tumaini, hakuna tumaini kwa wale wasioamini katika injili hii. Kwa kweli kwa hawa wasioamini injili hii wana mahangaiko matupu. Bila kujali kwamba watu wanaamini injili ya maji na Roho au la, tunapaswa kuendelea kuihubiri injili hii kwao kwa imani. Wakati uliopo ni wakati ambapo watu ni lazima waamini katika injili hii ya kweli mapema kadri iwezekanavyo. Wale wanaoamini katika injili hii tunayoihubiri watapata furaha, lakini wale wasioamini injili hiyo watalaaniwa. Hawa wa mwisho—yaani, wale wasioamini katika injili—ni wajinga ambao watapokea hukumu ya Mungu ya milele na kisha kutupwa kuzimu.

Usiliache tumaini lako. Ikiwa wenye haki watalipoteza tumaini lao, basi ni hakika kuwa kifo kitakuwa kikiwangojea. Ikiwa hatuna tumaini, basi ni wazi kuwa hatutakuwa na nia wala hamu, wala sababu yoyote ya kuishi. Hivyo, hebu tuishi tukiwa na tumaini.

Katika wakati wa sasa, wale wanaomwamini Yesu na ambao wamezaliwa tena upya kwa kweli hao ndio wenye furaha. Kwa wanadamu, tumaini pekee lililobakia ni kupokea ondoleo la dhambi—yaani, hakuna tumaini jingine zaidi ya kupokea Roho Mtakatifu. Wakati watu wanaposamehewa dhambi zao zote, wanaweza kuwa na tumaini na kisha kuishi kwa furaha milele, lakini kama hawana tumaini, basi ni hakika


kuwa maangamizi yanawangojea, hii ni kwa sababu watakuwa hawajapokea Roho Mtakatifu.

Ninaishi katika ulimwengu huu nikiwa na tumaini kwa sababu nimepokea ondoleo la dhambi zangu zote. Ni matumaini yangu kwamba wewe nawe, utaishi maisha yako ukiwa na tumaini hili. Ninaomba ili kwamba usije ukajiungamanisha na mawazo ya ulimwengu huu, badala yake uishi maisha yako kama bibi harusi mwenye hekima, hali ukiwapenda ndugu zako wenye haki, hali ukiwasaidia kusimama imara katika Kristo, wala usiipoteze imani yako, uendeleo kumngojea Bwana harusi, na hatimaye uweze kuonana naye atakapokuja kukuchukua.

Ninamshukuru Mungu kwa kutuwezesha kuishi katika utukufu wake. ☒

SURA YA

20



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Joka Atafungwa Katika Shimo la Kuzimu Lisilo na Mwisho

< Ufufuo 20:1-15 >

“Kisha nikaona malaika akishuka kutoka mbinguni, mwenye ufunguo wa kuzimu, na mnyororo mkubwa mkononi mwake. Akamshika yule joka, yule nyoka wa zamani, ambaye ni Ibilisi na Shetani, akamfunga miaka elfu; akamtupa katika kuzimu, akamfunga, akatia muhuri juu yake, asipate kuwadanganya mataifa tena, hata ile miaka elfu itimie; na baada ya hayo yapasa afunguliwe muda mchache. Kisha nikaona viti vya enzi, wakaketi juu yake, nao wakapewa hukumu; nami nikaona roho zao waliokatwa vichwa kwa ajili ya ushuhuda wa Yesu, na kwa ajili ya neno la Mungu, na hao wasiomsujudia yule mnyama, wala sanamu yake, wala hawakuipokea ile chapa katika vipaji vya nyuso zao, wala katika mikono yao; nao wakawa hai, wakatawala pamoja na Kristo miaka elfu. Hao wafu waliosalia hawakuwa hai, hata itimie ile miaka elfu. Huo ndio ufufuo wa kwanza. Heri, na mtakatifu, ni yeye aliye na sehemu katika ufufuo wa kwanza; juu ya hao mauti ya pili haina nguvu; bali watakuwa makuhani wa Mungu na wa Kristo, nao watatawala pamoja naye hiyo miaka elfu. Na hiyo miaka elfu itakapokwisha, Shetani atafunguliwa, atoke kifungoni mwake; naye atatoka kuwadanganya mataifa walio katika pembe nne za nchi, Gogu na Magogu, kuwakusanya kwa vita, ambao hesabu

yao ni kama mchanga wa bahari. Wakapanda juu ya upana wa nchi, wakaizingira kambi ya watakatifu, na mji huo uliopendwa. Moto ukashuka kutoka mbinguni, ukawala. Na yule Ibilisi, mwenye kuwadanganya, akatupwa katika ziwa la moto na kiberiti, alimo yule mnyama na yule nabii wa uongo. Nao watateswa mchana na usiku hata milele na milele. Kisha nikaona kiti cha enzi, kikubwa, cheupe, na yeye aketiye juu yake; ambaye nchi na mbingu zikakimbia uso wake, na mahali pao hapakuonekana. Nikawaona wafu, wakubwa kwa wadogo, wamesimama mbele ya hicho kiti cha enzi; na vitabu vikafunguliwa; na kitabu kingine kikafunguliwa, ambacho ni cha uzima; na hao wafu wakahukumiwa katika mambo hayo yaliyoandikwa katika vile vitabu, sawasawa na matendo yao. Bahari ikawatoa wafu waliokuwamo ndani yake; na Mauti na Kuzimu zikawatoa wafu waliokuwamo ndani yake. Wakahukumiwa kila mtu kwa kadiri ya matendo yake. Mauti na Kuzimu zikatupwa katika lile ziwa la moto. Hii ndiyo mauti ya pili, yaani, hilo ziwa la moto. Na iwapo mtu ye yote hakuonekana ameandikwa katika kitabu cha uzima, alitupwa katika lile ziwa la moto.”

Mafafanuzi

Aya ya 1: Kisha nikaona malaika akishuka kutoka mbinguni, mwenye ufunguo wa kuzimu, na mnyororo mkubwa mkononi mwake.

Bwana Mungu wetu atawapatia watakatifu thawabu ya Ufalme wa Kristo kwa miaka elfu moja, atafanya hivyo kuwafidia kwa kazi waliyoifanya kwa ajili ya injili. Ili kufanya hivyo, Mungu ni lazima kwanza amwamuru malaika wake

kumkamata Joka na kumfunga katika shimo la kuzimu lisilo na mwisho kwa miaka elfu moja. Kwanza, Mungu ataifanya kazi hii, kwa sababu Joka ni lazima akamatwe na kisha kufungwa katika Lindi-kuu ili kuwawezesha watakatifu kuishi katiak Ufalme wa Milenia wa Kristo. Hivyo, Mungu anampatia malaika wake ufunguo wa shimo la kuzimu lisilo na mwisho na mnyororo mkubwa, na anamwamuru kuianza kazi ya kumshika na kumfunga Joja katika Lindi-kuu.

Aya ya 2: Akamshika yule joka, yule nyoka wa zamani, ambaye ni Ibilisi na Shetani, akamfunga miaka elfu;

Yeye aliyemjaribu na kuwafanya Adamu na Hawa kuanguka ni huyu huyu joka. Biblia inamta huyu joja kuwa ni Ibilisi na Shetani. Mungu atamshika huyu Joka na kumfunga katika shimo la kuzimu lisilo na mwisho kwa miaka elfu moja, ili kwamba watakatifu waweze kuishi pamoja na Kristo katika Ufalme wa Milenia kwa amani.

Aya ya 3: akamtupa katika kuzimu, akamfunga, akatia muhuri juu yake, asipate kuwadanganya mataifa tena, hata ile miaka elfu itimie; na baada ya hayo yapasa afunguliwe muda mchache.

Ili kuujenga Ufalme wa Kristo katika dunia hii na kuwafanya watakatifu watawale na Bwana kwa miaka elfu moja, Mungu atamfunga Joka katika Lindi-kuu kwa miaka elfu moja na kumzuia ili asiwadanganye watakatifu.

Kifungu hiki kinasema kwamba, “na baada ya hayo yapaswa afunguliwe muda mchache.” Baada ya kukamilika kwa miaka elfu moja, Mungu atamfungua yule Joka kwa muda mchache, ili kwamba atakapoanza kuwatesa watakatifu tena, basi Mungu atampeleka kuzimu milele, na hataonekana kamwe.

Aya ya 4: Kisha nikaona viti vya enzi, wakaketi juu yake, nao wakapewa hukumu; nami nikaona roho zao waliokatwa vichwa kwa ajili ya ushuhuda wa Yesu, na kwa ajili ya neno la Mungu, na hao wasiomsujudia yule mnyama, wala sanamu yake, wala hawakuipokea ile chapa katika vipaji vya nyuso zao, wala katika mikono yao; nao wakawa hai, wakatawala pamoja na Kristo miaka elfu.

Katiak Ufalme wa Kristo, Wakristo waliozaliwa tena upya watapokea mamlaka ya kuhukumu. Wakatifu, baada ya kufanywa kuwa makuhani wa Kristo, watatawala Ufalme wa Milenia pamoja na Bwana. Wale ambao hawakuipokea alama ya Mnyama wala kuiabudu sanamu yak, ndio watakaokuwa wakazi wa ufalme huu, ambao waliuawa na kuifia-dini kwa ajili ya kumshuhudia Yesu na kuilinda imani yao.

Hao ndio wale waliouawa na kuifia-dini wakati wa dhiki iliyokuwa imeletwa na Mpinga Kristo, naye Mungu atawafufua ili waishi tena na atawafanya watawale Ufalme wa Kristo kwa miaka elfu moja itakayokuja. Kwa kweli, wale walioshiriki katika ufufuo wa kwanza pia watapewa baraka iyo hiyo.

Kuna ufufuo mara mbili uliotolewa na Bwana: ufufuo wa kwanza na ufufuo wa pili. Watakatifu watakaoishi katika Ufalme wa Milenia ndio wale ambao watashiriki katika ufufuo wa kwanza. Wale wote watakaoshiriki katika ufufuo huu wa kwanza pia watashiriki katika utukufu wa kuishi katika Ufalme wa Milenia, ambao ni Ufalme wa Kristo. Ufufuo wa kwanza utatokea wakati Yesu Kristo atakaporudi ili kuwanyakua watakatifu wote (1 Wathesalonike 4:15-17). Lakini ufufuo wa pili utatokea wakati wa mwisho wa Ufalme wa Milenia kwa kuwa ufufuo huu umeandaliwa kwa ajili ya wenye dhambi ili kuwahukumu kifo cha milele.

Mamlaka kwa watakatifu ya kutawala miaka elfu moja imetolewa na Bwana Mwenyezi. Hao wamepewa Ufalme wa

Kristo kwa sababu waliiamini injili ya Bwana ya maji na Roho na waliyatoa maisha yao ili kuilinda imani hiyo.

Aya ya 5: Hao wafu waliosalia hawakuwa hai, hata itimie ile miaka elfu. Huo ndio ufufuo wa kwanza.

Wale ambao watakuwa hawakupokea ondoleo la dhambi zao toka kwa Bwana, na ambao watakwenda kwake baada ya kuishi hapa duniani kama wenye dhambi hawataweza kushiriki katika ufufuo wa kwanza ambao Bwana awatapatia watakatifu. Kwa hiyo, hata wakati ambapo watakatifu wataishi miaka elfu moja katika Ufalme wa Kristo katika hali ya kusherehekea, wale wengine hawatapokea ufufuo wa kwanza, bali watashiriki katika ufufuo wa pili. Hii ni kwa sababu watakatifu ambao watapokea baraka ya ufufuo wa kwanza watakuwa wamepokea pia mamlaka ya kuishi katika Ufalme wa Kristo, katika hali ya utajiri na utukufu, kwa miaka elfu moja.

Hata hivyo, Mungu ataruhusu “ufufuo wa pili” kwa wenye dhambi. Kwa nini? Kwa sababu wakati wa ufufuo wa pili, Mungu atawafufua toka katika kifo ili kwamba aweze kuwahukumu kwa ajili ya dhambi zao. Hilo ndilo jaliwa lao, kwamba wafufuliwe toka kwa wafu ili waweze kuhukumiwa kwa ajili ya dhambi zao. Na hii ndio sababu ufufuo wa wenye dhambi unatofautiana sana kwa mfuatano na kwa matokeo.

Mbali na wale ambao watashiriki katika ufufuo wa kwanza kwa sababu ya imani yao katika injili ya maji na Roho, Bwana hataruhusu mwingine yeyote kuishi tena hadi ile miaka elfu moja itakapokwisha. Hivyo, ufufuo wa wenye haki unakuja miaka elfu moja kabla ya ufufuo wa wenye dhambi. Ufufuo wa wenye haki ni kwa ajili ya kuwafanya wapokee uzima na baraka za milele, lakini ufufuo wa wenye dhambi ni kwa ajili ya wao kupokea adhabu ya milele kwa ajili ya dhambi zao.

Aya ya 6: Heri, na mtakatifu, ni yeye aliye na sehemu katika ufufuo wa kwanza; juu ya hao mauti ya pili haina nguvu; bali watakuwa makuhani wa Mungu na wa Kristo, nao watatawala pamoja naye hiyo miaka elfu.

Biblia inatueleza kwamba mauti ya pili haina nguvu juu yao watakaoshiriki katika ufufuo wa kwanza. Kwa hiyo, Biblia inatueleza kwamba washiriki hawa wa ufufuo wa kwanza wamebarikiwa, kwa kuwa watatawala katika Ufalme wa Milenia.

Aya ya 7-8: Na hiyo miaka elfu itakapokwisha, Shetani atafunguliwa, atoke kifungoni mwake; naye atatoka kuwadanganya mataifa walio katika pembe nne za nchi, Gogu na Magogu, kuwakusanya kwa vita, ambao hesabu yao ni kama mchanga wa bahari.

Baada ya kufunguliwa toka katika shimo la kuzimu alipokuwa amefungwa kwa miaka elfu moja, yule Joka atajaribu kusimama kinyume na watakatifu kwa mara nyingine tena, hivyo Mungu atamtupa katika ziwa la moto na kibiriti ili kwamba asiweze kutoka tena. Kutokana na hukumu hii, yule Joka ataweza kuonekana kuzimu tu, na si kwingineko.

Sasa tunaweza kujiuliza, “Je, hii ina maanisha kwamba wale ambao hawajazaliwa tena upya wataendelea kuwepo katika Ufalme huu wa Milenia?” Jibu ni “Ndio.” Ufunuo 20:8 inaeleza kwamba kuna watu wengi wa dunia katika Ufalme wa Kristo. Hatufahamu kwa hakika ikiwa watakuwa ni watu wapya walioumbwa na Mungu, au waliokuwa wakiishi hapa duniani kabla. Lakini tunachofahamu ni kwamba Mungu anawafahamu watu hao, na kwamba ili watakatifu waweze kutawala, basi inawabadi watu hao wawepo wengi sana kama mchanga wa bahari.

Ukweli ni kwamba wakati watakatifu wanapoishi katika

Ufalme wa Kristo, bado wataweza kuwaona watu wa hapa duniani. Watu wa dunia hii watakuwepo ili kuwatumikia watakatifu, na idadi yao itakuwa ni kubwa kama mchanga wa bahari. Pamoja na kuwa wataungana na Joka ili kusimama kinyume dhidi ya watakatifu kwa mara nyingine, watu hao wataangamizwa na moto utakaoletwa na Mungu, watapokea hukumu ya milele toka katika kiti kikuu cha enzi cha Mungu, kisha watatupwa katika moto wa milele. Baada ya tukio hili, Ufalme wa Milenia utafikia mwisho wake, na kuanzia hapo watakatifu wataenda katika Mbingu na Nchi Mpya ambako wataishi milele.

Aya ya 9: Wakapanda juu ya upana wa nchi, wakaizingira kambi ya watakatifu, na mji huo uliependwa. Moto ukashuka kutoka mbinguni, ukawala.

Joka ni Shetani ambaye amesimama wakati wote dhidi ya Mungu na watakatifu wake. Pamoja na kuwa awatawadanganya watu wa dunia wanaoishi katika Ufalme wa Kristo na kisha kuwatisha watakatifu, na kwa kuwa Mungu ni mkuu, basi ataleta moto toka angani na kisha moto huo utawala wote, na kisha atamtupa yule Joka katika moto wa milele ambapo hataweza tena kusimama kinyume na Mungu na watakatifu wake.

Aya ya 10: Na yule Ibilisi, mwenye kuwadanganya, akatupwa katika ziwa la moto na kiberiti, alimo yule mnyama na yule nabii wa uongo. Nao watateswa mchana na usiku hata milele na milele.

Kwa kumtupa yule Joka katika ziwa la moto na kibiriti, Mungu atahakikisha anateseka mchana na usiku. Hii ni hukumu ya Mungu ya haki, ni mateso ambayo Joka na wafuasi wake wanastahili.

Aya ya 11: Kisha nikaona kiti cha enzi, kikubwa, cheupe, na yeye aketiye juu yake; ambaye nchi na mbingu zikakimbia uso wake, na mahali pao hapakuonekana.

Baada ya kuwa amewapa thawabu watakatifu wake kwa miaka elfu moja, Mungu ataumba Mbingu na Nchi Mpya na kisha ataishi nao milele. Ili kuthibitisha hili, Mungu atazikamilisha kazi hizi zote na kuzihitimisha. Tendo la mwisho la Mungu ni pale ambapo ataketi katika kiti cheupe cha enzi akiwa kama Hakimu na kisha kuitoa hukumu yake ya mwisho kwa wenye dhambi wote, ambao matendo yao yameandikwa katika Kitabu cha Matendo, hukumu hii haitawahusu wale ambao majina yao yameandikwa katika Kitabu cha Uzima.

Hukumu ya Mungu kwa kwenye dhambi itaishia hivyo, na kuanzia hapo milki ya Nchi na Mbingu Mpya itafunguliwa. Bwana wetu ataifanya mbingu na nchi ya kwanza kutoweka, kisha ataumba ulimwengu wa pili wa Mbingu na Nchi Mpya, kisha atawaruhusu watakatifu kuishi ndani ya huu Ufalme wa kimbingu. Mungu ataitoa Nchi na Mbingu Mpya kwa kundi moja la watu na kisha atatoa adhabu ya kuzimu kwa kundi jingine kutokana na yale ambayo yameandikwa katika Kitabu cha Uzima na Kitabu cha Hukumu.

Aya ya 12: Nikawaona wafu, wakubwa kwa wadogo, wamesimama mbele ya hicho kiti cha enzi; na vitabu vikafunguliwa; na kitabu kingine kikafunguliwa, ambacho ni cha uzima; na hao wafu wakahukumiwa katika mambo hayo yaliyoandikwa katika vile vitabu, sawasawa na matendo yao.

Hukumu ya Kristo kwa wakati huu ndio itakayohitimisha hukumu ya mwisho—yaani, ataitoa hukumu yake ya mwisho kwa kwenye dhambi kwa kuwapatia adhabu ya kuzimu. Watahukumiwa kwa mujibu wa matendo yao, kama

ilivyoandikwa katika Kitabu cha Hukumu. Hivyo, wenye dhambi watakufa mara mbili. Mauti yao ya pili itakuwa ni ile ya mateso ndani ya kuzimu, ambapo Biblia inaelezea hali hiyo kama ni mauti ya milele. Wenye dhambi hawawezi kuikwepa adhabu ya kuzimu. Hivyo, ni lazima watafute kujifunza Neno la injili ya maji na Roho hivi sasa, yaani wakati huu wakiwa wanaishi hapa duniani, kisha waiamini, na hatimaye wapokee baraka ya majina yao kuandikwa katika Kitabu cha Uzima.

Aya ya 13: Bahari ikawatoa wafu waliokuwamo ndani yake; na Mauti na Kuzimu zikawatoa wafu waliokuwamo ndani yake. Wakahukumiwa kila mtu kwa kadiri ya matendo yake.

“Bahari ikawatoa wafu waliokuwamo ndani yake; na Mauti na Kuzimu zikawatoa wafu waliokuwamo ndani yake,” hii ni kwa sababu wenye dhambi wote ni lazima wapokee adhabu ya mwisho kwa ajili ya dhambi zao. Maeneo yanayotajwa katika kifungu hiki—Mauti na Kuzimu, ni mahali ambapo watumishi wa Shetani watakuwa wamefungwa, yaani wale ambao walidanganywa na Shetani na kisha kutawaliwa naye walipokuwa hai, na kisha wakasimama kinyume na Mungu. Aya hii inatueleza kwamba Mungu alikuwa ameisitisha hukumu yake kwa ajili ya dhambi zao kwa kitambo tu, sasa wakati umefika kwa ajili ya hukumu yao ya mwisho.

Kwa hiyo, mahali popote ambapo watu wanaweza kuishi, wanapaswa kutambua kwamba ni muhimu sana kuzingatia upande waliopo, yaani kwamba ni upande wa Mungu au la. Wale ambao watakuwa walifanya kazi kama watumishi wa Shetani wakati walipokuwa hapa duniani watafufuliwa toka kwa wafu kwa ufufuo wa adhabu ili kupokea adhabu yao ya mwisho, lakini wale ambao waliitumikia injili ya maji na Roho watahusishwa katika ufufuo wa uzima wa milele na baraka.

Hivyo, watu wanapokuwa hapa duniani wanapaswa

kutambua kwamba injili ya maji na Roho, ambayo kwa hiyo Bwana amezitoweshea mbali dhambi za wanadamu, ni ya muhimu sana. Wale ambao watakuwa walifanya kazi kama watumishi wa Shetani walipokuwa hapa duniani watafufuliwa kwa ufufuo wa adhabu, lakini wale ambao watakuwa wamezitumika kazi za haki za Bwana watafufuliwa kwa ufufuo wa uzima wa milele na baraka. Wenye dhambi wote watahukumiwa kwa makosa yao na kisha watapokea adhabu yao ya mwisho huko kuzimu. Na hii ndio sababu kwamba ni muhimu sana, hasa tunapokuwa hapa duniani, kuiamini injili ya maji na Roho, injili ambayo kwa hiyo Bwana ameziondolea mbali dhambi zetu zote.

Aya ya 14: Mauti na Kuzimu zikatupwa katika lile ziwa la moto. Hii ndiyo mauti ya pili, yaani, hilo ziwa la moto.

Hii inatueleza juu ya hukumu ya dhambi za wanadamu mbele ya Mungu, yaani dhambi ambazo wanadamu walizifanya kwa kusimama upande wa Shetani. Adhabu iliyowekwa kwa wale waovu ambao waliwaongoza watu kwenda kwa Shetani ni kutupwa katika ziwa la moto. Hii ni mauti ya pili ambayo Mungu ataileta kwa wenye dhambi, na ni adhabu ya ziwa la moto. Kifo ambacho Biblia inakizungumzia hapa si kifo cha kutoweka, bali ni adhabu ya mateso ya milele katika moto wa kutisha wa kuzimu.

Wokovu uliozungumzwa katika Maandiko si wa muda mfupi, bali ni wa kudumu na wa milele. Wale wanaoamini katika injili ya maji na Roho wanapokuwa hapa duniani wataingia katika Ufalme wa Mbinguni wa milele na kuishi humo kwa furaha milele. Tofauti kati ya thawabu ambayo waamini wa injili ya maji na Roho wataipata na hukumu kwa wale wasioamini ina tofauti kubwa kama vile mbingu na nchi zilivyo mbali.

Aya ya 15: Na iwapo mtu ye yote hakuonekana ameandikwa katika kitabu cha uzima, alitupwa katika lile ziwa la moto.

Neno “yeyote” katika aya hii linaifanya aya hii kutueleza kwamba, kuandikwa ama kutoandikwa kwa majina ya watu katika Kitabu cha Uzima kunategemea ikiwa watu hao wanaamini au hawaamini katika Neno la injili ya maji na Roho, injili ambayo kwa hiyo dhambi zao zote zimesamehewa, na kuwa nyeupe kama theluji, na bila kujalisha kwamba wanaenda kanisani au la, na bila kujalisha ikiwa makanisa yao ni yale ya Orthodoksi au la. Hivyo, wale ambao majina yao hayajaandikwa katika Kitabu cha Uzima cha Bwana watatupwa wote katika ziwa la moto pasipo shaka.

Watu wa kidini katika ulimwengu huu wana tabia ya kuweka mkazo zaidi katika desturi zao za kidini kuliko ukombozi toka katika dhambi. Lakini wanaposimama mbele za Mungu, ukweli ni kuwa kama injili ya maji na Roho iliyotolewa na Yesu haionekani katika mioyo yao, basi ni hakika kwamba majina yao hayataandikwa katika Kitabu cha Uzima, na kwa sababu hiyo wataishia kutupwa katika ziwa la moto hata kama walikuwa ni Wakristo wazuri.

Hivyo basi, wakati ukingali unaishi hapa duniani, unapaswa kuisikiliza kwa masikio yako injili ya Bwana ya maji na Roho ambayo imezifanya dhambi zako zote kutoweka, na unapaswa kuiamini injili hiyo kwa moyo wako wote. Hapo ndipo utakapopokea utukufu kwa jina lako kuandikwa katika Kitabu cha Uzima. ☒

Tutawezaje Kupita Toka Mautini Kwenda Uzimani?

< Ufunuo 20:1-15 >

Mungu anatueleza kwamba wakati atakapoufanya ulimwengu huu kutoweka na kisha kutupatia Mbingu na Nchi Mpya, basi atamfufua kila mwenye dhambi aliyewahi kuishi hapa duniani na atakayekuwa amelala katika kaburi lake. Aya ya 13 inasema, *“Bahari ikawatoa wafu waliokuwamo ndani yake; na Mauti na Kuzimu zikawatoa wafu waliokuwamo ndani yake.”* Mwili wa mwanadamu unaozama katika maji mara huliwa na samaki, na mwili wa mwanadamu aliyeungua hadi kufa mwili wake mara nyingi utakuwa hauna umbile lolote la kuweza kutambuliwa na yeyote. Hata hivyo, Biblia inatueleza kwamba nyakati za mwisho zitakapowadia, Mungu atawafufua watu wote kurudi na kuwa hai na kisha atawahukumu ili kuwapeleka Mbinguni au kuzimu, hii haitajalisha ikiwa watakuwa wamemezwa na Shetani au la, au ikiwa watakuwa wameuawa na Jehanamu, au ikiwa watakuwa wameunguzwa na moto.

Kabla Mungu hajakiweka Kitabu cha Uzima, ambamo majina ya wale watakaoingia katika Ufalme wa Mbinguni yameandikwa. Pia pale kuna Kitabu cha Matendo, ambacho kina majina na dhambi ya wale wote ambao watatupwa kuzimu. Dhambi zote ambazo mtu amezifanya alipokuwa anaishi hapa duniani zimeandikwa katika Vitabu vya Matendo. Mambo haya yote yamepangwa na Mungu kwa mujibu wa majaliwa yake.

Bwana Ana Vitabu vya Aina Mbili

Mungu amekwisha wapanga watu katika makundi mawili tofauti kulingana na vigezo vyake vya haki. Mungu amekwisha panga kwamba wafu wote watafufuliwa, na kisha watasimama mbele ya vitabu vyake viwili na kisha kuhukumiwa. Katika Kitabu cha Uzima yameandikwa majina ya wale to waliomwamini Yesu wakati walipokuwa hap aduniani, wakapokea ondoleo la dhambi zao, na kwa sababu hiyo wamepangiwa kuingia Mbinguni. Hivyo, hukumu ya Mungu ya mwisho itategemea mtu anaangukia katika kitabu gani, yaani jina lake limeandikwa katika kitabu gani. Kwa maneno mengine, Mungu amekwishapanga ni akina nani wataingia Mbinguni na akina nani watatupwa kuzimu.

Hivyo, Mungu atawainua wafu wote ili waweze kuishi tena, atavifungua Vitabu vyake, na kisha ataangalia majina yao yameandikwa katika kitabu gani kati ya hivyo viwili. Kisha atawapeleka Mbinguni wale ambao majina yao yameandikwa katika Kitabu cha Uzima, lakini wale ambao majina yao hayataonekana katika Kitabu cha Uzima, atawatupa kuzimu. Ni lazima tuhakikishe kwamba tunaifahamu na kuuamini ukweli huu ulioanzishwa na Mungu.

Mungu atawafufua wafu wote na kisha kuwahukumu ili kuamu ni akina nani watakwenda Mbinguni na akina nani watakwenda kuzimu. Imekwisha amuliwa kwamba Mungu atawahukumu watu kwa kuzingatia ikiwa majina yao yameandikwa katika Kitabu cha Uzima au katika Vitabu vya Matendo (yaani Vitabu vya Hukumu).

Kuna sehemu mbili ambazo Mungu amezitayarisha kwa ajili ya wale wote ambao watasimama mbele zake. Sehemu hizo si nyingine bali ni Mbinguni na kuzimu. Kuzimu ni ziwa la moto ambako moto na kibiriti vinawaka. Mungu ameazimia

kwamba wale ambao majina yao hayajaandikwa katika Kitabu cha Uzima watatupwa katika ziwa la moto, wakati wale ambao majina yao yameandikwa katika Kitabu cha Uzima watakaribishwa Mbinguni.

Huko Mbinguni, Mti wa Uzima upo pembeni mwa mto wa maji ya uzima, unazaa matunda kumi na mbili tofauti kulingana na kila muhula. Katika Mbingu hii nzuri, watakatifu hawataugua wala kuona maumivu, bali wataishi kwa furaha milele pamoja na Mungu. Tunapaswa kuuamini ukweli kwamba Mungu ameamua kuwapatia watakatifu hii Mbingu.

Kwa upande mwingine, wale wasiomwamini Yesu, majina yao yameandikwa katika Vitabu vya Matendo. Kwa kuwa matendo yote ambayo wenye dhambi wameyatenda wakati wakiwa hapa duniani yameandikwa vitabu hivi, basi ndio maana Mungu anathueleza kwamba atawatupa wenye dhambi hao wote katika ziwa la moto, ili kuwaadhibu kwa ajili ya dhambi zao zilizoandikwa katika Vitabu hivi, pia atawaadhibu kwa sababu ya kutomwamini Yesu. Jambo la msingi hapa ni ule ukweli kwamba majina yenu yameandikwa katika Vitabu gani.

Tunapoishi hapa ulimwenguni, tunapaswa kutambua kwamba maisha hapa duniani si kila kitu. Kama vile Zaburi ya 90:10 inavyotueleza, *“Siku za miaka yetu ni miaka sabini, na ikiwa tuna nguvu miaka themanini; na kiburi chake ni taabu na ubatili, maana chapita upesi tukatokomea mara.”* Hata kama tutaishi katika dunia hii kwa miaka 70 au miaka 80, ukweli ni kwamba muda si mrefu tutasimama mbele ya Mungu. Na hatimaye tutakaposimama mbele za Bwana wetu, basi jambo la msingi hapa ni kwamba majina yetu yameandikwa katika Kitabu gani, ama katika Kitabu cha Uzima au katika Vitabu vya Matendo (Vitabu vya Hukumu), kwa kuwa hilo ndilo litakalo amua ikiwa tunakaribishwa Mbinguni au tunatupwa

katika ziwa la moto. Tunapaswa kutambua kwamba maisha hapa dunini si kila kitu.

Wale Ambao Majina Yao Yameandikwa Katika Kitabu cha Uzima

Hebu tuangalie Luka 16:19-26: *“Akasema, Palikuwa na mtu mmoja, tajiri, aliyevaa nguo za rangi ya zambarau na kitani safi, na kula sikuzote kwa anasa. Na maskini mmoja, jina lake Lazaro, huwekwa mlangoni pake, ana vidonda vingi, naye alikuwa akitamani kushibishwa kwa makombo yaliyoanguka katika meza ya yule tajiri; hata mbwa wakaja wakamramba vidonda vyake. Ikawa yule maskini alikufa, akachukuliwa na malaika mpaka kifuni kwa Ibrahimu. Yule tajiri naye akafa, akazikwa. Basi, kule kuzimu aliyainua macho yake, alipokuwa katika mateso, akamwona Ibrahimu kwa mbali, na Lazaro kifuni mwake. Akalia, akasema, Ee baba Ibrahimu, nihurumie, umtume Lazaro achovye ncha ya kidole chake majini, auburudishe ulimi wangu; kwa sababu ninateswa katika moto huu. Ibrahimu akasema, Mwanangu, kumbuka ya kwamba wewe uliyapokea mambo mema yako katika maisha yako, na Lazaro vivyo alipata mabaya; na sasa yeye yupo hapa anafarijiwa, na wewe unaumizwa. Na zaidi ya hayo, kati yetu sisi na ninyi kumewekwa shimo kubwa, ili wale watakao kutoka huku kwenda kwenu wasiweze; wala watu wa kwenu wasivuke kuja kwetu.”*

Kwa kifungu hiki, Yesu anatufundisha kwamba ni kweli kuwa Mbingu na kuzimu vipo. Kama alivyo mtu tajiri katika kifungu hiki, vivyo hivyo watu wengi hawaamini juu ya uwepo wa Mbingu na kuzimu. Ibrahimu ni baba wa imani. Kifungu hiki kinaposema kwamba yule masikini Lazaro alipelekewa

kifuani mwa Ibrahimu, maana yake ni kwamba kama vile Ibrahimu alivyoliamini Neno la Mungu, vivyo hivyo Lazaro pia alimwamini Yesu kuwa ni Mwokozi wake, akapokea ondoleo la dhambi zake, na hivyo akaenda Mbinguni. Tunapoishi hapa ulimwenguni, tunapaswa kutafakari juu ya hatma ya Lazaro na yule mtu tajiri.

Mungu anatumie kwamba kila mtu hapa ulimwenguni, anapaswa kufahamu kwamba maisha si kila kitu kabisa. Haijalishi kamba mtu anafanya kazi gani hapa duniani, ukweli ni kuwa mtu huyo hataweza kuishi zaidi ya miaka 70-80, lakini hatimaye kitakachobakia kwa mtu huyo ni kiburi na huzuni.

Hivyo, tunapoishi maisha yetu ni lazima tujiandae kwa ajili ya yatakayojiri baada ya maisha haya. Pia tunapaswa kuirithisha imani yetu kwa watoto wetu, ili kwamba na wao waweze kwenda mahali pazuri. Je, halitakuwa jambo la kuhuzunisha kuona kuwa mtu ameishi hapa duniani hatimaye anasimama mbele za Mungu na kisha kuhukumiwa na kutupwa katika ziwa la moto?

Hakuna mtu anayeweza kubadili kile ambacho Mungu amekiamua, yaani kwamba wale ambao majina yao yameandikwa katika Vitabu vya Matendo watatupwa katika ziwa la moto. Hivyo kuna njia moja ya tu kwetu sisi ili tuweze kulikwepa ziwa la moto, na njia hiyo ni kuhakikisha kwamba majina yetu yanaandikwa katika Kitabu cha Uzima. Hakuna njia nyingine ya kuweza kulikwepa ziwa la moto zaidi ya majina yetu kuandikwa katika Kitabu cha Uzima.

Sasa, majina yetu yanawezaje kuandikwa katika Kitabu cha Uzima? Kama ambavyo Lazaro alivyochukuliwa hadi katika kifua cha Ibrahimu, vivyo hivyo sisi nasi ni lazima tupokee ondoleo la dhambi zetu kwa kulifahamu na kuliadini tendo la Mungu la haki (Warumi 5:18) kwa kupitia Neno lake. Ni hapo tu ndipo tunapoweza kuingia Mbinguni. Ili majina

yetu yaweze kuandikwa katika Kitabu cha Uzima, ni lazima tumwamini Yesu. Yesu ni Mungu Mwenyewe na Masihi wetu. Masihi maana yake ni Yeye anayewaokoa wale walioanguka katika dhambi. Ni Yesu tu ndiye anayeweza kutuokoa sisi ambao kwa sababu ya dhambi tumefungwa ili kuhukumiwa na Mungu na kisha kutupwa katika ziwa la moto.

Ni nani hapa duniani ambaye hawezi kutenda dhambi kabisa mbele za Mungu, na ni nani miongoni mwetu ambaye matendo yake kwa asilimia 100 ni matakatifu? Hakuna hata mmoja! Tunapaswa kutambua kwamba kwa kuwa sisi sote tuna mapungufu mengi, basi ni kweli kwamba hatuwezi kufanya lolote zaidi ya kuanguka katika dhambi, na kwa sababu ya dhambi hizi tumefungwa ili kutupwa katika ziwa la moto.

Lakini Mungu alimtuma Yesu kuja hapa duniani ili kutuokoa, sisi ambao hatukuweza kufanya lolote zaidi ya kutupwa katika ziwa la moto kwa sababu ya dhambi zetu. Jina ‘Yesu’ maana yake ni ‘Yeye atakayewaokoa watu wake toka katika dhambi zao’ (Mathayo 1:21). Hivyo, tunaweza kuingia Mbinguni pale tu tunapoamini katika ukweli kwamba Yesu alikuja hapa duniani na akatuokoa toka katika dhambi zetu zote kwa tendo lake la haki.

Ni Akina Nani Watakaotupwa Katika Ziwa la Moto?

Ufunuo 21:8 inatueleza juu ya wale ambao watatupwa katika ziwa la moto: *“Bali waoga, na wasioamini, na wachukizao, na wauaji, na wazinzi, na wachawi, na hao waabuduo sanamu, na waongo wote, sehemu yao ni katika lile ziwa liwakalo moto na kiberiti. Hii ndiyo mauti ya pili.”*

Kwanza kabisa, Biblia inapotumia neno “waoga” ina

maanisha akina nani? Hii ina maanisha ni wale Wakristo wa mazoea ambao wameshindwa kupokea ondoleo la dhambi zao kwa kupitia injili ya maji na Roho, na kwa sababu hiyo wanaogopa wanapokuwa mbele za Mungu pamoja na kuwa wanamwamini Yesu kwa kiasi fulani. Mungu ameamua kwamba watu wa jinsi hiyo watatupwa katika ziwa la moto. Pia Mungu ameazimia kwamba wale wasioamini, wenye machukizo, wauaji, wazinzi, wachawi, waabudu sanamu, na waongo wote hao watatupwa kuzimu.

Kwa asili, kumekuwapo na waabudu sanamu wengi sana nchini Korea. Hata sasa, si ajabu kuona watu wakiabudu sanamu za vitu ambavyo ni uumbaji wa Mungu na kisha kutoa maombi kwa sanamu hivyo. Watu wanafanya hivyo kwa sababu ni wajinga na wapumbavu. Mungu anachukia kuona watu wakiabudu vitu visivyo na uhai kana kwamba ni Mungu.

Mungu alimuumba mwanadamu kwa sura na mfano wake (Mwanzo 1:27). Mwanadamu pia ndiye msimamizi wa uumbaji wote. Hii ndio sababu ni lazima tumwamini Mungu. Kwa kuwa tumeumbwa kwa sura na mfano wa Mungu, basi sisi tunaishi milele, kama vile Mungu Mwenyewe anavyoishi milele. Upo ulimwengu wa milele kwa ajili yetu mara baada ya kifo. Hii ndio sababu Mungu ametueleza kumwabudu yeye, aliye Mungu wa milele. Nini kitatokea pale tunaposujudia vitu ambavyo ni uumbaji wa Mungu mwenyewe? Tutakuwa tunafanya dhambi kuu dhidi ya Mungu, kwa kuwa tutakuwa tunafanya kile ambacho Mungu anakichukia zaidi: yaani uabudu sanamu. Mwanadamu anaweza kuwa mjinga kiasi hicho na mpumbavu. Tunapaswa kutambua kwamba Mungu ameamua kwamba wale walio na imani hii iliyopotoshwa watatupwa wote katika ziwa la moto.

Watu wanaotupwa kuzimu watakufa mara mbili. Hivi ndivyo Mungu alivyoazimia. Mauti ya kwanza inakuja

mwishoni mwa maisha yao yenye shida hapa duniani, baada ya kutembea katika ulimwengu uliochoka. Mara nyingi husemwa kwamba wale wanaoishi na kutembea mwanzoni kwa kutumia miguu minne, kisha wakatumia miguu miwili, na hatimaye wakatumia miguu mitatu, na mwishowe kufa, si wengine bali ni wanadamu wenyewe.

Baada ya kufa mara moja kwa njia hii ya kawaida, basi watu watakaposimama mbele ya Mungu kama wenye d hambi, basi watakabiliana na hukumu yao, na ni wakati huu ndipo watakapokutana na mauti ya pili, mauti ambayo haitakoma bali itadumu milele kwa wao kutupwa katika ziwa la moto. Kama wangelikufa katika hili ziwa la moto basi wangekuwa wamewekwa huru toka katika mateso ya hilo ziwa. Lakini wakiwa katika ziwa hili, basi hata kama watatamani kufa, kifo kitawakimbia.

Kila mtu anatamani kuishi milele, ili asiweze kukutana na kifo kamwe. Ukweli ni kuwa uwepo wa mwanadamu ni wa milele kama vile watu wanavyotamani. Hii ndio maana wakati mtu anapokufa Biblia haisemi kuwa mtu huyo amekufa, bali inasema kuwa mtu huyo amelala. Hivi sisi sote ni lazima tuikwepe mauti ya pili ambayo itatutupa katika ziwa la moto. Sisi sote tunapaswa kufahamu tunachopaswa kukifanya ili majina yetu yaweze kuandikwa katika Kitabu cha Uzima. Na ili majina yetu yaweze kuandikwa katika Kitabu cha Uzima, basi tunapaswa kumwamini Yesu kiusahihi.

Mara nyingi watu wanafikiri na kusema kwamba Yesu, Budha, Konfusiasi, na Muhamad wote hao ni watu wa kawaida, na kwamba kinachotakiwa ni kuishi ukiwa mtu mwema. Hii ndio sababu hawawezi kuelewa ni kwanini tunakazia kwamba wanapaswa kumwamini Yesu peke yake. Lakini mawazo haya ni potofu. Wewe na mimi, pamoja na vitu vingine vyote hapa ulimwenguni, si chochote zaidi ya uumbaji na wanadamu

mbele za Mungu. Lakini tunapoangalia kuzaliwa kwa Yesu na yale ambayo ameyakamilisha alipokuwa hapa duniani, basi sisi sote tunaweza kutambua kwamba Yeye si mwanadamu wa kawaida kama walivyo hawa wanadamu wenye Hekima. Yeye ni Mungu Mwenyewe, ambaye ili kuwaokoa wanadamu alikuja hapa duniani katika mwili wa mwanadamu, akazichukua dhambi zetu kwa kupitia ubatizo wake, akaipokea adhabu yote ya dhambi zetu kwa niaba yetu, na hivyo akaitimiza kazi yake ya kuwakomboa wanadamu toka katika dhambi.

Kuzaliwa kwa Kristo kulikuwa tofauti kabisa na kuzaliwa kwa wanadamu wa kawaida. Watoto wanazaliwa kwa muungano wa mwanamume na mwanamke. Hivi ndivyo kila mtu anavyozaliwa hapa duniani. Lakini Yesu alizaliwa kwa bikira ambaye hakuwa amemjua mwanamume. Yesu, ambaye ni Mungu Mwenyewe alizaliwa hapa duniani katika mwili wa mwanadamu kwa kupitia mwili wa bikira ili kutuokoa wanadamu, na ili kulitimiza Neno la unabii lililokuwa limenenwa zaidi ya miaka 700 iliyopita kwa kupitia Nabii Isaya (Isaya 7:14). Na alipokuwa hapa duniani sio tu kwamba aliwafufua wafu na kuwaponya wagonjwa na waliokuwa walemavu, bali alizifanya dhambi zote za ulimwengu kutoweka.

Mungu, Bwana wa uumbaji aliyeuumba ulimwengu wote, alikuja hapa duniani na akafanyika kuwa mwanadamu kwa kitambo kifupi, alifanya hayo yote ili kuwaokoa wanadamu toka katika dhambi zao zote. Sababu inayotufanya tumwamini Yesu ni ule ukweli kwamba Yesu ni Mbungu Mwenyewe. Pili, ni kwa sababu Yesu alizichukulia mbali dhambi zetu zote, ili kwamba majina yetu yaweze kuandikwa katika Kitabu cha Uzima, na akatufanya sisi kuwa watoto wa Mungu tusio na dhambi. Tunapozaliwa hapa duniani, sisi sote ni lazima tufe mara moja, na baada ya kifo chetu sisi sote ni lazima tuhukumiwe.

Lakini Yesu alikuja hapa duniani, akazichukua dhambi zetu zote katika mwili wake kwa ubatizo alioupokea toka kwa Yohana, alihukumiwa Msalabani kwa niaba yetu, na kwa sababu hiyo ametuwezesha sisi tunaomwamini kuishi pamoja naye milele katika Ufalme wake wa Mbinguni na wa milele. Kwa maneno mengine, ili aweze kutukomboa toka katika hukumu yetu ya dhambi, Mungu Mwenyewe alitusafisha dhambi zetu zote. Hii ndio sababu tunapaswa kumwamini Yesu, Yeye aliyefanyika kuwa Mwokozi.

Yesu si mwanadamu wa kawaida. Kwa kuwa Mungu aliwaahidi wanadamu kwamba atawaokoa, na kwa kuwa ili kuitimiza ahadi hii alikuja hapa duniani katika mwili wa mwanadamu kwa kupitia mwili wa bikira, na kwa kuwa ni kweli kwamba aliwaokoa wote toka katika dhambi zao, basi sisi sote ni lazima tumwamini Yesu, ambaye ni Mungu Mwenyewe. Tunapomwamini Yesu kiusahihi, majina yetu yanaandikwa katika Kitabu cha Uzima. Mungu alitueleza kwamba mtu anaweza kuuona na kuingia katika Ufalme wa Mbinguni ikiwa atakuwa amezaliwa tena upya kwa maji na Roho. Sisi sote ni lazima tumwamini Yesu.

Yesu Aliyefanyika Kuwa Njia ya Mbinguni

Sasa, ni lazima tufahamu jinsi Yesu alivyozifanya dhambi zetu zote kutoweka. Baada ya kuja hapa duniani, Yesu alibatizwa na Yohana katika Mto Yordani (Mathayo 3:13-17). Yesu aliupokea ubatizo wake toka kwa Yohana ili aweze kuzichukua katika mwili wake dhambi zote za mwanadamu (zikiwemo dhambi zako na zangu). Kwa kupitia mikono ya Yohana Mbatizaji, ambaye ni mwakilishi wa wanadamu, basi kila dhambi ya mwanadamu ilipitishwa kwenda kwa Yesu.

Hivyo, baada ya kuzichukua dhambi za ulimwengu katika mwili wake kwa kupitia Yohaha, Yesu aliimwaga damu yake Msalabani na kufa juu yake. Kisha siku ya tatu alifufuka toka kwa wafu.

Bwana wetu ameahidi kwamba yeyote anayemwamini atapokea uzima wa milele. Mungu ameazimia kwamba yeyote anayeamini katika ukweli kwamba Yesu alizichukua dhambi zake zote katika mwili wake na kisha akapokea adhabu kwa ajili ya dhambi hizi Msalabani, basi mtu huyo hawezi kutupwa katika ziwa la moto, na badala yake jina lake litaandikwa katika Kitabu cha Uzima.

Katika Yohana 14:6 Yesu anasema, *“Mimi ndimi njia, na kweli, na uzima; mtu haji kwa baba ila kwa njia ya mimi.”* Wanadamu ni lazima wamwamini Yesu ambaye amefanyika kuwa njia ya kwenda Mbinguni. Yesu ni Mwokozi wetu. Yesu ni Mungu wetu. Yesu ndiye ukweli halisi hapa ulimwenguni. Na Yesu ndiye Bwana wa uzima. Sisi sote ni lazima tumwamini Yesu ili kuhakikisha kwamba majina yetu yanaandikwa katika Kitabu cha Uzima na kwamba tutakaribishwa kuingia katika Ufalme wa Mbinguni.

Kwa kuwa Yesu alizichukua katika mwili wake dhambi zote katika mwili wake kwa kuupokea ubatizo toka kwa Yohana Mbatizaji katika Mto Yordani, basi tunapaswa kumwamini Yesu, Yeye aliyefanyika kuwa Mwokozi wa upatanisho. Mimi na wewe tunaweza sasa kuingia Mbinguni kwa kuwa Yesu ameukamilisha wokovu wetu wote kwa kusulubiwa na kwa kuimwaga damu yake Msalabani kama adhabu kwa ajili ya dhambi zetu.

Yesu amekwisha amua ni nani atakayetupwa katika ziwa la moto. Wale wasioamini na waoga watatupwa wote katika ziwa la moto. Wale wasioamini sio tu kwamba watatupwa katika ziwa la moto kwa sababu ya kutokuamini kwao, ukweli

ni kuwa hata watoto wao na ukoo wao utakaofuata utatupwa pia katika ziwa la moto. Ili mtu aweze kufikia hali njema ya kiroho na kimwili, mtu huyo anapaswa kumwamini Yesu.

Vipi Kama Yesu Asingeliupokea Ubatizo Wake?

Ni Mungu pekee anayetoa baraka au laana kwa kila mwanadamu. Hii ndio sababu tunapaswa kumwamini Mungu. Unafahamu ni maisha mangapi ya watu ambayo ni ya kuhuzunisha na taabu, na kwamba ni kwanini mataifa ya dunia hii yanaanguka? Hii ni kwa sababu Mungu alisema kwamba atawalaani wale wanaomchukia na kuabudu sanamu kwa vizazi vitatu hadi vinne vitakavyofuata. Lakini pia alisema kwamba atawabariki kwa vizazi elfu wale wanaomtumikia na kumpenda Mungu na kuzishika amri zake (Kutoka 20:5-6).

Hii haimaanishi kwamba ikiwa mtu anamwamini Yesu kwa kiasi fulani basi atabarikiwa bila masharti. Mtu anapaswa kumwamini Yesu hali akiwa na ufahamu sahihi kumhusu Yesu. Kwa maneno mengine, ikiwa watu wanaamini kwamba Yesu ni Mungu Mwenyewe aliyekuja hapa duniani, na kwamba alizisafishilia mbali dhambi zao zote kwa kuzichukua dhambi hizo katika mwili wake kwa ubatizo wake, na kwamba amefanyika kuwa Mwokozi wao wa kweli kwa kusulubiwa kwa niaba yao—yaani kwa kifupi, kama wanaamini kwamba Yesu ni Mungu wao na Mwokozi wao—basi Mungu alisema kwamba atawabariki watu wanaoamini hivi kwa vizazi elfu vitakavyofuata.

Lakini kwa wakati huo huo, pia Mungu ameahidi kwamba atawalaani kwa vizazi vitatu hadi vinne wale wasiomwamini Yesu. Hii ndio sababu kila mtu bila kujalisha yeye ni nani, anapaswa kumwamini Yesu, na hii ndio sababu kwamba kila

mtu anapaswa kuufahamu na kuuamini ukweli wa kuzaliwa tena upya kwa maji na Roho. Wale walio na imani kama hiyo watasamehewa dhambi zao zote, watapokea uzima wa milele, wataingia Mbinguni, kisha wakiwa hapa duniani watapokea baraka baraka ambazo Mungu alimpatia Ibrahimu hapo zamani.

Sisi sote ni lazima tuishi katika ulimwengu huu ambao Mungu ametuamlika kwa ajili yetu, na imani yetu ni lazima iwe kwa mujibu wa Neno lililoandikwa. Tunapswa kutambua na kuamini katika ukweli kwamba wale wasiomwamini Mungu watatupwa katika ziwa la moto, na kwamba wale wanaoamini majina yao yataandikwa katika Kitabu cha Uzima na kisha kukaribishwa katika Mbingu na Nchi Mpya. Pia ni lazima tuamini kwamba sisi tunaoamini tutaishi tena. Na kule kusema kwamba tumezaliwa tena upya kumewezekana kwa sababu ya injili ya maji na Roho.

Kama ambavyo hakuna anayeweza kuishi pasipo maji, basi injili ya maji, pamoja na injili ya damu, ni muhimu sana kwa ajili ya wokovu wetu. Wakati Yesu alipobatizwa, alizichukua dhambi zetu zote katika mwili wake. Naye alizamishwa katika maji na kisha akachomoza toka katika maji. Hii ilimaanisha kifo chake Msalabani na ufufuo wake. Kwa maneno mengine, Bwana wetu alihukumiwa kwa ajili ya dhambi zetu zote kwa niaba yetu. Na kile kitendo cha Bwana kutokeza kwenye maji kuna maanisha ufufuo wake. Hii pia ina maanisha ni ufufuo wote, yaani kwetu sisi tunaoamini.

Tunaamini kwa undani kwamba Yesu alizichukua dhambi zetu katika mwili wake kwa ubatizo wake. Kama Yesu asingeliupokea ubatizo wake, ni nini kingetokea kwetu? Kusingelikuwa na njia ya sisi kulikwepa ziwa la moto. Kama ambavyo pasipo mvua hakuna mtu yeyote anayeweza kuishi katika ulimwengu huu, basi vivyo hivyo sayari hii ya dunia ipo kwa sababu ya uwepo wa maji. Vivyo hivyo, ubatizo wa Yesu

ni wa muhimu sana kwetu sisi. Pia kifo chake Msalabani ni cha muhimu sana, kwa kuwa hii ina maanisha kwamba Yesu alihukumiwa kwa ajili ya dhambi zetu. Ikiwa tunataka kukombolewa toka katika laana ya Mungu na hukumu, basi tunapaswa kumwamini Yesu kikamilifu. Na ikiwa tunataka kusafishwa dhambi zetu, basi tunapaswa kuamini kwamba dhambi zetu zote zilipitishwa kwenda kwa Yesu wakati alipobatizwa.

Imani ya Kikristo si aina ya dini inayowafanya watu kutetemeka kwa hofu. Kila mtu ni lazima amwamini Yesu. Wale waliozaliwa tena upya ni lazima waje katika Kanisa lililozaliwa tena upya ili waweze kulisikia Neno na kujengwa katika imani.

Baadhi ya watu wanaamini kwamba mtu anapaswa kumwamini Yesu na kisha kutenda matendo mema ili aweze kuokolewa na kupokea baraka, lakini haya ni madai ya kitapeli ya waongo. Ni kweli kwamba tunapaswa kuishi kama Wakristo wema hali tukitenda matendo mema, lakini kwa mujibu wa tatizo letu la msingi kuhusu wokovu, asili yetu ni yenye uovu sana kiasi kuwa hakuna hata mmoja wetu anayeweza kuishi kwa asilimia 100 akiwa mkamilifu. Hii ndio sababu wale wanaodai kamba mtu anapaswa kuokolewa kwa kupitia matendo mema ni waongo na hawaifahamu injili ya maji na Roho na kwa sababu hiyo wanawadanganya watu.

Tunatambua kwamba kimsingi tumefungwa ili kutenda dhambi, na tunapoutafakari ubatizo ambao Yesu Kristo aliupokea pamoja na Msalaba alioubeba kwa ajili yetu toka katika Neno la Mungu lililoandikwa, na tunapoyapokea mambo haya yote, basi ni hapo tu ndipo tunapoweza kuwa wenye haki, ambao mioyo yao haina dhambi, na kisha kustahilishwa kuingia Mbinguni. Kabla ya Roho Mtakatifu kukaa ndani yetu na kutuongoza, ukweli ni kuwa hakuna hata mmoja wetu

anayeweza kuwa mwema hata kama atajaribu kiasi gani.

Mungu alituokoa kwa kuzifanya dhambi zetu zote kutoweka. Badala ya kututupa katika ziwa la moto linalowaka milele, Mungu ameyaandika majina yetu katika Kitabu cha Uzima, ametupatia Mbingu na Nchi Mpya, na kama vile bibi harusi alivyojipanga kwa ajili ya Bwana harusi, Mungu ametupatia nasi nyumba nzuri zaidi, bustani, na maua mazuri. Pia Mungu atayaondoa magonjwa yote toka kwetu, naye ataishi pamoja nasi milele katika Ufalme wake. Tunapaswa kumwamini Yesu kwa ajili ya maisha yetu baada ya kufa, lakini tunapaswa pia kumwamini Yesu kwa ajili ya maisha yetu ya sasa. Pia tunapaswa kuamini kwa ajili ya watoto wetu pia.

Je, unapenda kukaribishwa Mbinguni, au unapenda kutupwa katika ziwa la moto? Ni aina gani ya urithi utawarithisha watoto wako mwenyewe? Hata kama unakabiliana na baadhi ya shida na mateso kwa ajili ya imani yako katika Yesu, ukweli ni kuwa bado unatakiwa kuendelea kumwamini, maana kwa kufanya hivyo baraka kuu zitakujia wewe pamoja na watoto wako.

Watakatifu wenzangu wapendwa, Mungu, kwa kupitia Neno lake ametueleza ni kwa nini tunapaswa kuihubiri injili ya maji na Roho, na kwamba ni kwa nini familia zetu pia zinapaswa kuokolewa. Ninampatia Mungu shukrani zangu. ☒

SURA YA

21



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Mji Mtakatifu Unaoshuka Toka Mbinguni

< Ufunuo 21:1-27 >

“Kisha nikaona mbingu mpya na nchi mpya; kwa maana mbingu za kwanza na nchi ya kwanza zimekwisha kupita, wala hapana bahari tena. Nami nikauona mji ule mtakatifu, Yerusalemu mpya, ukishuka kutoka mbinguni kwa Mungu, umewekwa tayari, kama bibi-arusi aliyekwisha kupambwa kwa mumewe. Nikasikia sauti kubwa kutoka katika kile kiti cha enzi ikisema, Tazama, maskani ya Mungu ni pamoja na wanadamu, naye atafanya maskani yake pamoja nao, nao watakuwa watu wake. Naye Mungu mwenyewe atakuwa pamoja nao. Naye atafuta kila chozi katika macho yao, wala mauti haitakuwapo tena; wala maombolezo, wala kilio, wala maumivu hayatakuwapo tena; kwa kuwa mambo ya kwanza yamekwisha kupita. Na yeye aketiye juu ya kile kiti cha enzi akasema, Tazama, nayafanya yote kuwa mapya. Akaniambia, Andika ya kwamba maneno hayo ni amini na kweli. Akaniambia, Imekwisha kuwa. Mimi ni Alfa na Omega, Mwanzo na Mwisho. Mimi nitampa yeye mwenye kiu, ya chemchemi ya maji ya uzima, bure. Yeye ashindaye atayarithi haya, nami nitakuwa Mungu wake, naye atakuwa mwanangu. Bali waoga, na wasioamini, na wachukizao, na wauaji, na wazinzi, na wachawi, na hao waabuduo sanamu, na waongo wote, sehemu yao ni katika lile ziwa liwakalo moto na kiberiti. Hii ndiyo mauti ya pili. Akaja mmoja wa wale malaika saba waliokuwa na vile

vitasa saba vilivyojaa yale mapigo saba ya mwisho, naye akanena nami, akisema, Njoo huku, nami nitakuonyesha yule Bibi-arusi, mke wa Mwana-Kondoo. Akanichukua katika Roho mpaka mlima mkubwa, mrefu, akanionyesha ule mji mtakatifu, Yerusalemu, ukishuka kutoka mbinguni kwa Mwenyezi Mungu; wenye utukufu wa Mungu, na mwangaza wake ulikuwa mfano wa kito chenye thamani nyingi kama kito cha yaspi, safi kama bilauri; ulikuwa na ukuta mkubwa, mrefu, wenye milango kumi na miwili, na katika ile milango malaika kumi na wawili; na majina yameandikwa ambayo ni majina ya kabila kumi na mbili za Waisraeli. Upande wa mashariki milango mitatu; na upande wa kaskazini milango mitatu; na upande wa kusini milango mitatu; na upande wa magharibi milango mitatu. Na ukuta wa mji ulikuwa na misingi kumi na miwili, na katika ile misingi majina kumi na mawili ya wale mitume kumi na wawili wa Mwana-Kondoo. Na yeye aliyesema nami alikuwa na mwanzi wa dhahabu, apate kuupima huo mji, na milango yake, na ukuta wake. Na ule mji ni wa mraba, na marefu yake sawasawa na mapana yake. Akaupima mji kwa ule mwanzi; ulikuwa kama maili elfu na mia tano; marefu yake na mapana yake na kwenda juu kwake ni sawasawa. Akaupima ukuta wake, ukapata dhiraa mia na arobaini na nne, kwa kipimo cha kibinadamu, maana yake, cha malaika. Na majenzi ya ule ukuta wake yalikuwa ya yaspi, na mji ule ulikuwa wa dhahabu safi, mfano wa kioo safi. Na misingi ya ukuta wa mji ilikuwa imepambwa kwa vito vya thamani vya kila namna. Msingi wa kwanza ulikuwa yaspi; wa pili yakuti samawi; wa tatu kalkedoni; wa nne zumaridi; wa tano sardoniki; wa sita akiki; wa saba krisolitho; wa nane zabarajadi; wa kenda yakuti ya manjano; wa kumi

krisoprasi; wa kumi na moja hiakintho; wa kumi na mbili amethisto. Na ile milango kumi na miwili ni lulu kumi na mbili; kila mlango ni lulu moja. Na njia ya mji ni dhahabu safi kama kioo kiangavu. Nami sikuona hekalu ndani yake; kwa maana Bwana Mungu Mwenyezi na Mwana-Kondoo, ndio hekalu lake. Na mji ule hauhitaji jua wala mwezi kuuangaza, kwa maana utukufu wa Mungu huutia nuru, na taa yake ni Mwana-Kondoo. Na mataifa watatembea katika nuru yake. Na wafalme wa nchi huleta utukufu wao ndani yake. Na milango yake haitafungwa kamwe mchana; kwa maana humo hamna usiku. Nao wataleta utukufu na heshima ya mataifa ndani yake. Na ndani yake hakitaingia kamwe cho chote kilicho kinyonge, wala yeye afanyaye machukizo na uongo, bali wale walioandikwa katika kitabu cha uzima cha Mwana-Kondoo.”

Mafafanuzi

Aya ya 1: Kisha nikaona mbingu mpya na nchi mpya; kwa maana mbingu za kwanza na nchi ya kwanza zimekwisha kupita, wala hapana bahari tena.

Hili Neno lina maanisha kwamba Bwana Mungu wetu ataitoa Mbingu na Nchi Mpya kama zawadi kwa watakatifu walioshiriki katika ufufuo wa kwanza. Kuanzia wakati huo, watakatifu hawataishi katika mbingu na nchi ya kwanza, bali wataishi katika mbingu na nchi ya pili. Baraka hii ni zawadi ya Mungu ambayo ataitoa kwa watakatifu wake. Mungu ataitoa baraka ya jinsi hiyo kwa watakatifu tu ambao wameshiriki katika ufufuo wa kwanza.

Kwa maneno mengine, wale ambao wataifurahia baraka hii ni watakatifu ambao wamepokea ondoleo la dhambi kwa

kuamini katika injili takatifu ya maji na Roho iliyotolewa na Kristo. Bwana wetu ni Bwana harusi wa watakatifu. Kuanzia sasa na kuendelea, kinachowangojea mabibi harusi ni kuvikwa ulinzi, baraka, na mamlaka ya Bwana harusi Mwana-Kondoo, na kisha kuishi kwa utukufu katika Ufalme wake wenye utukufu.

Aya ya 2: Nami nikauona mji ule mtakatifu, Yerusalemu mpya, ukishuka kutoka mbinguni kwa Mungu, umewekwa tayari, kama bibi-arusi aliyekwisha kupambwa kwa mumewe.

Mungu ameandaa mji mtakatifu kwa ajili ya watakatifu. Mji huu ni mji wa Yerusalemu Mpya, Kasri Takatifu ya Mungu. Kasri hii imeandaliwa kwa ajili ya watakatifu wa Mungu. Na hii imepangwa katika Yesu Kristo kwa ajili ya watakatifu, hata kabla ya Bwana Mungu wetu kuumba ulimwengu. Hivyo, watakatifu hawawezi kufanya lolote zaidi ya kumshukuru Bwana Mungu kwa zawadi yake ya neema na kisha kumpatia Mungu utukufu kwa imani yao.

Aya ya 3: “Nikasikia sauti kubwa kutoka katika kile kiti cha enzi ikisema, Tazama, maskani ya Mungu ni pamoja na wanadamu, naye atafanya maskani yake pamoja nao, nao watakuwa watu wake. Naye Mungu mwenyewe atakuwa pamoja nao.”

Kuanzia muda huu, watakatifu wataishi pamoja na Bwana katika Hekalu la Mungu milele. Hii yote ni kwa neema ya Bwana Mungu, ni zawadi ambayo watakatifu wataipokea kwa ajili ya imani yao katika Neno la wokovu la maji na Roho. Hivyo, wale wote waliovikwa katika baraka ya kuingia katika Hekalu la Bwana na kisha kuishi pamoja naye watampatia Bwana Mungu shukrani na utukufu milele.

Aya ya 4: “Naye atafuta kila chozi katika macho yao, wala mauti haitakuwapo tena; wala maombolezo, wala kilio, wala maumivu hayatakuwapo tena; kwa kuwa mambo ya kwanza yamekwisha kupita.”

Sasa, kwa kuwa Mungu anaishi pamoja na watakatifu, basi hakutakuwa na machozi tena na huzuni, wala hakutakuwa na maombolezo juu ya wapendwa wao waliopotea, wala hakutakuwa na kilio wala huzuni.

Huzuni zote za mbingi na nchi ya kwanza zitatoweka toka katika maisha ya watakatifu, na kitakachowangojea watakatifu ni kuishi maisha yaliyobarikiwa na kutukuzwa pamoja na Bwana Mungu wao katika Mbingu na Nchi Mpya. Bwana Mungu wetu, baada ya kunyika kuwa Mungu wa watakatifu, basi atafanya vitu vyote kuwa vipya, ili kwamba kusiwe na machozi ya huzuni tena, kusiwe na kulia, wala kifo, wala kuomboleza, wala magonjwa, wala kitu chochote ambacho kiliwatesa katika ile dunia ya kwanza.

Aya ya 5: “Na yeye aketiye juu ya kile kiti cha enzi akasema, Tazama, nayafanya yote kuwa mapya. Akaniambia, Andika ya kwamba maneno hayo ni amini na kweli.”

Sasa, Bwana atafanya vitu vyote kuwa vipya, ataiumba mbingu na nchi mpya. Ataufanya uumbaji wake wa mbingu na nchi ya kwanza kutoweka, Yeye atafanya mbingu na nchi mpya ya pili. Inachotueleza aya hii sio kwamba Mungu ataukarabati ulimwengu wa zamani, bali ataiumba ulimwengu mpya. Hivyo, Mungu atafanya Mbingu na Nchi Mpya na kisha kuishi humo pamoja na watakatifu. Watakatifu walioshiriki katika ufufuo wa kwanza watashiriki pia katika baraka hii. Hiki ni kitu ambacho mwanadamu hawezi hata kukiotea ndoto kwa mawazo yake ya kibinadamu, lakini hiki ndicho ambacho Mungu amekiandaa kwa watakatifu wake. Hivyo, watakatifu

na vitu vyote wanampatia Mungu utukufu, shukrani, heshima, na sifa kwa kazi hii kuu.

Aya ya 6: Akaniambia, “Imekwisha kuwa. Mimi ni Alfa na Omega, Mwanzo na Mwisho. Mimi nitampa yeye mwenye kiu, ya chemchemi ya maji ya uzima, bure.”

Bwana Mungu wetu amepanga na kuyatimiza mambo haya yote, tangu mwanzo hadi mwisho. Mambo yote ambayo Bwana ameyafanya, aliyafanya kwa ajili yake na kwa ajili ya watakatifu. Hivi sasa watakatifu wanaitwa “Wa-kristo” na wamefanywa kuwa watu wa Mungu. Wale waliofanyika kuwa watakatifu wa Mungu kwa kuamini katika injili ya maji na Roho sasa wanatambua kwamba ingawa wanampatia Mungu shukrani na sifa milele, ukweli ni kwamba hawana namna ya kuweza kumshukuru vya kutosha kutokana na upendo na matendo ya Bwana Mungu.

“Mimi nitampa yeye mwenye kiu, ya chemchemi ya maji ya uzima, bure.” Bwana wetu ametoa chemichemi ya maji ya uzima kwa watakatifu katika Mbingu na Nchi Mpya. Hii ni zawadi kubwa kulizo zote ambazo Mungu amewapatia watakatifu. Sasa, watakatifu wataishi milele katika Mbingu na Nchi Mpya na kisha kunywa katika chemichemi ya maji ya uzima, ambapo hawataona tena kiu mille. Kwa maneno mengine, sasa watakatifu wamefanyika kuwa watoto wa Mungu ambao watakuwa na uzima wa milele, kama vile Bwana Mungu alivyo, kisha wataishi katika utukufu wake. Ninamshukuru na kumpa Bwana Mungu utukufu kwa mara nyingine kwa kutupatia baraka hii kuu. Halleluya!

Aya ya 7: “Yeye ashindaye atayarithi haya, nami nitakuwa Mungu wake, naye atakuwa mwanangu.”

“Yeye ashindaye” hii sentensi ina maanisha ni wale

walioilinda imani yao iliyotolewa na Bwana. Imani hii inawaruhusu watakatifu wote kuushinda ulimwengu na maadui wa Mungu. Imani yetu katika Bwana Mungu na katika pendo la kweli kwa injili ya maji na Roho iliyotolewa na Bwana ndiyo inayotupatia ushindi dhidi ya dhambi zote za ulimwengu, na dhidi ya hukumu ya Mungu, na dhidi ya maadui zetu, na dhidi ya udhaifu wetu, na dhidi ya mateso ya Mpinga Kristo.

Ninatoa shukrani na kumpatia Bwana Mungu utukufu kwa kutupatia ushindi juu ya hayo yote. Watakatifu wanaomwamini Bwana Mungu wanamshinda Mpinga Kristo kikamilifu kwa imani yao. Bwana Mungu wetu amepatia kila mtakatifu imani hii ambayo kwa hiyo anaweza kushinda dhidi ya mapambano na adui zake.

Sasa Mungu amewaruhusu watakatifu, ambao wameushinda ulimwengu na Mpinga Kristo kwa imani yao, kuirithi Mbingu na Nchi Mpya. Bwana Mungu wetu amewapatia imani ya ushindi watakatifu wake ili kwamba waweze kuirithi Ufalme wa Mungu. Kwa kuwa Mungu ametupatia imani inayomshinda Mpinga Kristo, basi sasa Mungu ameshakuwa Mungu wetu, na sisi tumeshakuwa watoto wake. Ninamshukuru na kumsifu Bwana Mungu wetu kwa kutupatia imani hii ya ushindi dhidi ya maadui zetu wote.

Aya ya 8: “Bali waoga, na wasioamini, na wachukizao, na wauaji, na wazinzi, na wachawi, na hao waabuduo sanamu, na waongo wote, sehemu yao ni katika lile ziwa liwakalo moto na kiberiti. Hii ndiyo mauti ya pili.”

Katika uwepo wake, Bwana Mungu wetu ni Mungu wa kweli na Mungu wa upendo. Sasa, kimsingi, ni akina nani ambao ni waoga mbele ya macho ya Mungu? Hawa ni wale ambao wamezaliwa katika dhambi ya asili na ambao hawajazisafisha dhambi zao zote kwa Neno la injili ya maji na

Roho iliyotolewa na Bwana. Hii ni kwa sababu wao wanamwabudu mwovu kuliko kumwabudu Mungu, na ni hakika kwamba wamefanyika kuwa watumishi wa Shetani. Ni kwa sababu wanamwabudu mwovu mbele ya Bwana Mungu, na kwa sababu wanapenda na kuifuata giza kuliko nuru, na kwa sababu hiyo wanaishia kuwa waoga mbele za Bwana Mungu.

Katika hali yake Mungu ni nuru. Hivyo, huu ni ukweli kwamba watu hawa ambao wao wenyewe ni giza wataendelea kumwogopa Mungu. Kama ambavyo roho ambazo ni mali ya Shetani zinapande giza, basi ndio maana roho hizo zinakuwa na woga mbele za Mungu ambaye Yeye mwenyewe ni nuru. Hii ndio sababu wanapaswa kuyachukua maovu yao na udhaifu wao kwenda kwa Mungu na kisha kupokea ondoleo la dhambi zao toka kwa Mungu.

Wale “wasioamini,” ambao kimsingi mioyo yao haiamini juu ya upendo wa Bwana Mungu wetu na katika injili yake ya maji na Roho, ni maadui wa Mungu na watenda dhambi wakuu mbele za Mungu. Hivyo nafsi zao zipo kwenye machukizo, na wanasimama kinyume na Mungu, wanapenda na kutenda kila dhambi, wanazifuata ishara za uongo, wanaabudu kila aina ya sanamu, na wanazungumza kila aina ya uongo. Hivyo, kwa kuzingatia hukumu ya haki ya Mungu, watu hao watatupwa katika ziwa liwakalo moto na kibiriti. Hii ni adhabu yao ya kifo cha pili.

Mungu hajaruhusu Mbingu na Nchi Mpya kwa watu hawa ambao waoga mbele yake, yaani watu wasioamini injili ya maji na Roho, na ambao baada ya kugeuzwa na kuwa watumishi wa Shetani, wamekuwa machukizo. Badala yake, Bwana wetu amewaruhusu kuingia katika adhabu yake ya milele, hali akiwatupa wote (wakimo wauaji, wazinzi, wachawi, waabudu sanamu, na waongo wote) katika ziwa la moto na

kibiriti. Hivyo, kuzimu, ambayo Mungu atawapatia itakuwa ndio mauti yao ya pili.

Aya ya 9: “Akaja mmoja wa wale malaika saba waliokuwa na vile vitasa saba vilivyojaa yale mapigo saba ya mwisho, naye akanena nami, akisema, Njoo huku, nami nitakuonyesha yule Bibi-arusi, mke wa Mwana-Kondoo.”

Mmoja wa malaika aliyekuwa ameleta moja ya mapigo ya mabakuli saba alimwambia Yohana, “Njoo huku, nami nitakuonyesha yule Bibi-arusi, mke wa Mwana-Kondoo.” Hapa, sentensi “mke wa Mwana-Kondoo” ina maanisha ni wale waliofanyika kuwa mabibi harusi wa Yesu Kristo kwa kuamini kwa mioyo yao katika injili ya maji na Roho iliyotolewa na Mungu.

Aya ya 10-11: Akanichukua katika Roho mpaka mlima mkubwa, mrefu, akanionyesha ule mji mtakatifu, Yerusalemu, ukishuka kutoka mbinguni kwa Mwenyezi Mungu; wenye utukufu wa Mungu, na mwangaza wake ulikuwa mfano wa kito chenye thamani nyingi kama kito cha yaspi, safi kama bilauri.

“Mji mkubwa, mji mtakatifu Yerusalemu” hii ina maanisha ni Mji Mtakatifu ambapo watakatifu wataishi pamoja na Bwana harusi. Mji huu ambao Yohana aliuona kwa kweli ulikuwa ni mzuri sana na wenye kupendeza sana. Kwa kipimo ulikuwa ni mji wenye fahari, ukiwa umepambwa kwa vito vingi vya thamani ndani na nje, ulikuwa safi na ung’aa. Malaika alimwonyesha Yohana mahali ambapo mabibi harusi wa Yesu Kristo wataishi pamoja na Bwana harusi wao. Huu Mji Mtakatifu wa Yerusalemu ushakao toka mbinguni ni zawadi ya Mungu ambayo atampatia mke wa Mwana-Kondoo.

Mji wa Yerusalemu unang’aa sana, na mwanga wake ni kama kito cha thamani sana, ni kama kito cha Yakuti, na nuru

yake ni angavu kama bilauri. Hivyo, kwa wale wote wanaoishi ndani ya mjiti huo, basi utukufu wa Mungu utakuwa pamoja nao milele na milele. Ufalme wa Mungu ni ule wa nuru, kwa hiyo ni wale tu waliosafishwa giza lao lote, udhaifu nadhambi ndio wanaoweza kuingia katika Mji huu. Kwa hiyo, sisi sote ni lazima tuamini kwamba ili sisi tuweze kuingia katika huu Mji Mtakatifu, tunapaswa kujifunza, kuifahamu, na kuiamini kweli ya Neno la injili ya maji na Roho ambayo Bwana wetu ametupatia.

Aya ya 12: Ulikuwa na ukuta mkubwa, mrefu, wenye milango kumi na miwili, na katika ile milango malaika kumi na wawili; na majina yameandikwa ambayo ni majina ya kabila kumi na mbili za Waisraeli.

Milango ya Mji huu inalindwa na malaika kumi na mbili, na juu ya milango hiyo kuliandikwa majina ya makabila kumi na mbili ya wana wa Israeli. Mji huu ulikuwa na “ukuta mkubwa na mrefu,” na hii inatueleza kwamba kuingia katika mji hii ni vigumu sana. Kwa maneno mengine, kuokolewa toka katika dhambi zao hakuwezekani kwa kuzitegemea jitihada za kibinadamu au kwa kutegemea fedha na mali za hapa ulimwenguni zitokanazo na uumbaji wa Mungu.

Ili tuweze kuokolewa toka katika dhambi zetu zote na kisha kuingia katika Mji Mtakatifu wa Mungu, tunapaswa kuwa na imani ile ile waliyokuwa nayo wanafunzi wa Yesu, yaani imani inayoamini katika ukweli wa injili ya maji na Roho. Kwa hiyo, hakuna yeyote asiyekuwa na imani hii katika injili ya maji na Roho anayeweza kuingia katika Mji Mtakatifu. Hii ndio sababu malaika kumi na mbili wamewekwa na Bwana ili kuilinda milango ya mji huu.

Sentesi inayosema, “na majina yameandikwa,” kwa upande mwingine inatueleza kwamba wamiliki wa Mji huu

wamekwisha amuliwa. Na wamiliki wake si wengine zaidi ya Mungu Mwenyewe na watu wake, kwa kuwa Mji huu ni mali ya watu wa Mungu ambao sasa wamefanyika kuwa wana wa Mungu.

Aya ya 13: Upande wa mashariki milango mitatu; na upande wa kaskazini milango mitatu; na upande wa kusini milango mitatu; na upande wa magharibi milango mitatu.

Kwa kuwa milango mitatu iliwekwa upande wa mashariki wa Mji, na kaskazini, kusini, na magharibi kulikuwa na milango mitatu katika kila upande. Hii inatuonyesha kwamba wale tu waliopokea ondoleo la dhambi kwa kuamini katika injili ya maji na Roho kwa mioyo yao yote ndio wanaoweza kuingia katika Mji huu.

Aya ya 14: Na ukuta wa mji ulikuwa na misingi kumi na miwili, na katika ile misingi majina kumi na mawili ya wale mitume kumi na wawili wa Mwana-Kondoo.

Miamba mikubwa hutumika kama misingi ya kujengea au kuimarisha jengo. Neno ‘mwamba’ linatumika katika Biblia kumaanisha imani katika Bwana Mungu wetu. Aya hii inatueleza kwamba ili kuweza kuingia aktika Mji Mtakatifu wa Bwana Mungu, basi tunapaswa kuwa na imani ambayo Bwana amewapatia wanadamu, yaani imani inayoamini katika ukombozi wake mkamilifu toka katika dhambi zetu zote. Imani ya watakatifu ni ya thamani sana kuliko hata vito vya thamani ya huu Mji Mtakatifu. Aya hii inatueleza kwamba ukuta wa Mji huu umejengwa juu ya misingi kumi na mbili, na juu ya misingi hiyo yameandikwa majina ya mitume kumi na mbili wa Mwana-Kondoo. Hii inatueleza kwamba Mji wa Mungu unaruhusiwa kwa wale tu ambao wana imani kama ile waliyokuwa nayo mitume kumi na mbili wa Yesu Kristo.

Aya ya 15: Na yeye aliyesema nami alikuwa na mwanzi wa dhahabu, apate kuupima huo mji, na milango yake, na ukuta wake.

Neno hili lina maanisha kwamba ili kuweza kuingia katika Mji uliojengwa na Mungu, basi inampasa mtu kuwa na aina ya imani ambayo imekubaliwa na Mungu, yaani aina ya imani ambayo itampatia mtu huyo ondoleo la dhambi zake. Hapa andiko linasema kwamba malaika aliyezungumza na Yohana alikuwa na mwanzi wa dhahabu ili kuupima ule Mji. Hii ina maanisha kwamba tunapaswa kuamini kwamba Bwana wetu ametupatia baraka hizi zote ndani ya injili ya maji na Roho. Kwa kuwa “*imani ni kuwa na hakika na mambo yatarajiwayo (Waebrania 11:1),*” basi ni hakika kwamba Mungu ametupatia Mji Mtakatifu na Mbingu na Nchi Mpya, vitu ambavyo ni vikubwa zaidi kuliko yale tunayoyatarajia.

Aya ya 16: Na ule mji ni wa mraba, na marefu yake sawasawa na mapana yake. Akaupima mji kwa ule mwanzi; ulikuwa kama maili elfu na mia tano; marefu yake na mapana yake na kwenda juu kwake ni sawasawa.

Mji ule ulikuwa umejengwa kama mraba, ambapo urefu wake, upanda, na kimo chake ni sawa. Hii inatueleza kwamba sisi sote tunapaswa kuwa na imani ya kuzaliwa tena upya kama watu wa Mungu kwa kuamini katika injili ya maji na Roho. Kusema kweli, Bwana wetu hatamruhusu mtu yeyote yule ambaye hana imani katika injili ya maji na Roho kuingia katika Ufalme wa Mungu.

Kuna watu wengi sana walio na ufahamu mbovu kwamba wataingia katika Mji Mtakatifu ati kwa kuwa wao ni Wakristo, hata kama wana dhambi. Lakini Bwana wetu ametoa wokovu toka katika dhambi na Roho Mtakatifu na amewafanya kuwa watu wake wale wanaoamini katika ukweli kwamba Bwana

amewasamehe dhambi zao zote kwa kupitia ubatizo wake hapa duniani na damu yake Msalabani. Hii ni imani ambayo Bwana wetu anataka tuwe nayo.

Aya ya 17: Akaupima ukuta wake, ukapata dhiraa mia na arobaini na nne, kwa kipimo cha kibinadamu, maana yake, cha malaika.

Maana ya kibiblia ya namba nne ni mateso. Imani ambayo Bwana anaihitaji toka kwetu si kitu ambacho kila mtu anaweza kuwa nacho, lakini imani hii inaweza kuwapo kwa wale wanaolipokea Neno la Mungu, hata kama hawawezi kulielewa vizuri Neno hilo kwa fikra zao binafsi. Kama Mkristo, ukweli ni kwamba haiwezekani kuingia katika Mji Mtakatifu wa Mungu kwa kuuamini Msalaba wa Yesu peke yake, na kuamini kwamba Bwana Mungu ni Mwokozi. Unafahamu ni kitu gani Bwana alimaanisha wakati aliposema katika Yohana 3:5, kwamba, “*Amin, amin, nakuambia, mtu asipozaliwa kwa maji na kwa Roho, hawezi kuingia ufalme wa Mungu*”? Je, unafahamu maana ya Bwana wetu kuja hapa duniani, kubatizwa na Yohana, kuzibeba dhambi za ulimwengu kwenda nazo Msalabani, na kuimwaga damu yake juu yake? Ikiwa utalijibu swali hili, basi utaweza kufahamu kuwa nazungumzia kitu gani hapa.

Aya ya 18: Na majenzi ya ule ukuta wake yalikuwa ya yaspi, na mji ule ulikuwa wa dhahabu safi, mfano wa kioo safi.

Aya hii inatueleza kwamba imani inayoturuhusu kuingia katika Mji Mtakatifu wa Mungu ni safi na haina kitu chochote cha kiulimwengu.

Aya ya 19-20: Na misingi ya ukuta wa mji ilikuwa imepambwa kwa vito vya thamani vya kila namna. Msingi wa

kwanza ulikuwa yaspi; wa pili yakuti samawi; wa tatu kalkedoni; wa nne zumaridi; wa tano sardoniki; wa sita akiki; wa saba krisolitho; wa nane zabarajadi; wa kenda yakuti ya manjano; wa kumi krisopraso; wa kumi na moja hiakintho; wa kumi na mbili amethisto.

Misingi ya ukuta wa Mji ilikuwa imepambwa kwa aina nyingi za vito vya thamani. Hili Neno linatueleza kwamba tunaweza kujengwa kwa mitazamo mbalimbali toka katika Neno la Bwana wetu. Na hivi vito vya thamani vinatuonyesha aina ya baraka ambayo Bwana wetu atawapatia watakatifu wake.

Aya ya 21: Na ile milango kumi na miwili ni lulu kumi na mbili; kila mlango ni lulu moja. Na njia ya mji ni dhahabu safi kama kioo kiangavu.

Katika Biblia Lulu ina maanisha ni ‘Ukweli’ (Mathayo 13:46). Mtafutaji halisi wa Ukweli ataziacha mali zake zote ili aweze kuumiliki Ukweli ambao unampatia uzima wa milele. Aya hii inatueleza kwamba watakatifu ambao wataingia katika Mji Mtakatifu wanapaswa kuwa na uvumilivu mwingi wanapokuwa hapa duniani, hali wakiwa wamesimama imara na katikati ya imani yao katika ukweli. Kwa maneno mengine, wale wanaoamini katika Neno la kweli lililozungumzwa na Bwana Mungu, wanapaswa kuwa na uvumilivu mkuu ili kuilinda imani yao.

Aya ya 22-23: Nami sikuona hekalu ndani yake; kwa maana Bwana Mungu Mwenyezi na Mwana-Kondoo, ndio hekalu lake. Na mji ule hauhitaji jua wala mwezi kuuangaza, kwa maana utukufu wa Mungu huutia nuru, na taa yake ni Mwana-Kondoo.

Kifungu hiki kina maanisha kwamba watakatifu wote

watapokelewa katika mikono ya Yesu Kristo, Mfalme wa wafalme. Na kwamba Mji Mtakatifu wa Yerusalemu hauhitaji nuru ya jua wala mwezi, kwa kuwa Yesu Kristo, ambaye ni nuru ya ulimwengu, atauangazia mjia huo.

Aya ya 24: “Na mataifa watatembea katika nuru yake. Na wafalme wa nchi huleta utukufu wao ndani yake.”

Kifungu hiki kinatueleza kwamba watu walioishi katika Ufalme wa Milenia sasa wataingia katika Mbingu na Nchi Mpya. Hii sentensi inayosema “*Wafalme wa nchi*” ina maanisha ni watakatifu waliokuwa wakiishi katika Ufalme wa Milenia. Kuhusu hawa wafalme wa nchi, aya hii inaendelea kusema kwamba, “*huleta utukufu waona heshima ndani yake.*” Hii inatueleza kwamba watakatifu ambao wamekuwa wakiishi katika miili yao yenye utukufu sasa watatoka katika Ufalme wa Milenia na kwenda katika Ufalme wa Mungu mpya, yaani Mbingu na Nchi Mpya.

Kwa hiyo, ni wale tu ambao walizaliwa tena upya kwa kuamini katika injili ya maji na Roho walipokuwa hapa duniani na hivyo kuweza kunyakuliwa na kuishi katika katika Ufalme wa Kristo wa miaka elfu moja ndio watakaoweza kuingia katika Mji Mtakatifu wa Yerusalemu.

Aya ya 25: Na milango yake haitafungwa kamwe mchana; kwa maana humo hamna usiku.

Kwa kuwa Mbingu na Nchi Mpya, mahali ambapo Mji Mtakatifu upo, imeshajawa na mwanga mtakatifu, basi hakutakuwa na usiku ndani yake, wala hakutakuwa na waovu ndani yake.

Aya ya 26: Nao wataleta utukufu na heshima ya mataifa ndani yake.

Hii inatueleza kwamba kwa kupitia nguvu za Bwana Mungu za ajabu, wale waliokuwa wakiishi katika Ufalme wa Kristo kwa miaka elfu moja sasa wanastahili kuhamia katika Ufalme wa Mbingu na Nchi Mpya, Ufalme ambao ndani yake upo Mji Mtakatifu.

Aya ya 27: Na ndani yake hakitaingia kamwe cho chote kilicho kinyonge, wala yeye afanyaye machukizo na uongo, bali wale walioandikwa katika kitabu cha uzima cha Mwana-Kondoo.

Wale wote wasiufahamu ukweli wa injili ya maji na Roho miongoni mwa Wakristo na wasio Wakristo katika ulimwengu huu ni wanyonge, wafanya machukizo, na waongo. Hivyo hawataingia katika Mji Mtakatifu.

Hapa Neno la Mungu linaturuhusu kuthibitisha jinsi injili ya maji na Roho ambayo Bwana ametupatia hapa duniani ilivyo na nguvu. Pamoja na kuwa injili ya maji na Roho imeshahubiriwa kwa watu wengi katika dunia hii, ukweli ni kwamba kulikuwa na wakati ambapo injili hii ilidharauliwa na kudhihakiwa hata na wale wanaojiita Wakristo. Lakini injili ya maji na Roho iliyotolewa na Bwana ndiyo ufunguo pekee kwenda Mbinguni.

Kuna watu wengi ambao bado hawafahamu juu ya ukweli huu, lakini upaswa kufahamu kwamba yeyote anayetambua na kuamini kwamba Bwana amempatia funguo za Mbinguni na ondoleo la dhambi kwa kupitia injili ya maji na Roho ambayo Bwana ameitoa, basi ni hakika kwamba jina lake litaandikwa katika Kitabu cha Uzima.

Ikiwa unaukubali na kuuamini ukweli wa injili ya maji na Roho, basi ni hakika kwamba utavikwa baraka ya kuingia katika Mji Mtakatifu. ☒

Ni Lazima Tuwe na Imani Iliyothibitishwa na Mungu

< Ufunuo 21:1-27 >

Mungu ametupatia Mbingu na Nchi Mpya. Mungu anatumaeleza kwamba kile unachokiona hivi sasa, yaani mbingu hii na nchi ya kwanza, pamoja na vitu vyake vyote vitatoweka, na kwamba atatupatia badala yake mbingu mpya, nchi mpya, na bahari mpya, na kisha atavifanya vitu vyote kuwa vipya katika ulimwengu mpya ulioundwa. Hii ina maanisha kwamba Bwana Mungu atatupatia Mbingu na Nchi Mpya kama zawadi yake kwa watakatifu ambao wameshiriki katika ufufuo wa kwanza. Baraka hii ni thamani toka kwa Mungu ambayo atawapatia wale watakatifu wake, ambao wamepokea ondoleo la dhambi.

Hivyo, Mungu atawapatia baraka hii watakatifu walioshiriki katika ufufuo wa kwanza. Baraka hii imeruhusiwa kwa watakatifu tu, ambao kwa kuamini katika injili takatifu ya maji na Roho iliyotolewa na Yesu Kristo, wamepokea ondoleo la dhambi zao. Hivyo Bwana wetu atafanyika kuwa Bwana harusi wa watakatifu. Kuanzia sasa na kuendelea, kile kilichobakia kwa mabibi harusi ni kuvikwa ulinzi wa Bwana harusi na kuzipata baraka na nguvu zake kama wake za Mwana-kondoo, na kisha kuishi kwa utukufu katika Ufalme wake wenye utukufu.

Kifungu hiki pia kinatumaeleza kwamba Mji Mtakatifu, Yerusalemu Mpya ulishuka kutoka Mbinguni. Huu haukuwa mji wa kawaida, kwa kuwa kifungu kinaeleza kwamba Mji huu

ulikuwa ni mzuri sana kama vile bibi harusi alivyojimba kwa ajili ya mumewe, ukitoka toka Mbinguni.

Mungu ameuandaa mji mtakatifu kwa ajili ya watakatifu. Mji huu ni mji wa Yerusalemu ambao ni Hekalu la Mungu. Hekalu hili limeandaliwa kwa ajili ya watakatifu wa Mungu. Pia hili lilikuwa limepangwa kwa ajili ya watakatifu pamoja na Yesu Kristo, hata kabla ya Bwana Mungu hajauumba ulimwengu huu. Hivyo, watakatifu hawawezi kufanya lolote zaidi ya kumshukuru Bwana Mungu kwa imani yao na kisha kumpatia Mungu utukufu kwa zawadi hii ya neema.

Mambo haya yote—kwamba watakatifu wamefanywa kuwa watu wa Mungu na kwamba Yeye amefanyika kuwa Mungu wao—ni neema ambayo imetolewa na Mungu na ni zawadi ambayo watakatifu wameipokea toka kwake kwa kuliadini Neno la wokovu la maji na Roho.

Hivyo, wale wote waliobarikiwa kuingia katika Hekalu la Bwana na kuishi pamoja naye watampatia Mungu shukrani na utukufu milele, hii ni kwa sababu Maandiko yanatueleza kwamba atayafuta machozi yao, na kwamba hakutakuwa na kifo tena, wala kilio, wala kuteseka na kwamba mambo yote ya kale yatakuwa yamepita. Pamoja na kuwa huzuni, vilio, maumivu, vifo, na majonzi vimejaa katika ulimwengu huu kwa sasa, ukweli ni kuwa katika Mbingu na Nchi Mpya mambo hayo yote yatakuwa yamepita. Wale wanaoishi katika Mbingu na Nchi Mpya iliyotolewa na Bwana hawatamwaga machozi yao tena kwa sababu ya majonzi au kulia kwa huzuni kwa sababu ya kuwapoteza wanaowapenda.

Wakati muda wa watakatifu kuingia katika Mbingu na Nchi Mpya utakapowadia, basi mbingu ya kwanza, na nchi ya kwanza, pamoja na huzuni zake zote zitatoweka, na kwamba kitakachokuwa kikiwangojea watakatifu ni kuishi maisha yao yenye utukufu na baraka zote pamoja na Mungu katika Mbingu

na Nchi Mpya milele. Wakati huo Mungu atakuwa amekwishayaondolea mbali mapungufu yote ya ulimwengu wa kwanza na atakuwa ameufanya ulimwengu huu mpya ukiwa mkamilifu zaidi.

Kifungu kikuu cha sura ya 21 kinatueleza juu ya Mbingu na Nchi Mpya, ambavyo vitafuatia baada ya kuondolewa kabisa kwa ulimwengu huu, na hii ni baada ya kupita kwa Ufalme wa Milenia unaotajwa katika sura ya 20. Mambo yote katika ulimwengu huu hata yale yaliyo mbali sana yanahusiana na dunia hii yatakuwa yamekwisha. Wakati huo nyakati za Mpinga Kristo (Mnyama), manabii wa uongo, watumishi wake, na wale wote ambao hawakumwamini Mungu badala yake wakasimama kinyume na Mungu hapa ulimwenguni, watakuwa wamepita. Hii ni kwa sababu watakuwa wametupwa katika moto bara baada ya kufungwa kwa Ufalme wa Milenia, hivyo wakati huo wataweza kuonekana wakiwa kuzimu tu.

Hivyo, katika sura ya 21, Mungu anatueleza juu ya Mbingu na Nchi Mpya ambayo ataitoa kwa watakatifu, mahali ambapo ni pakamilifu ambapo hakuna mwenye dhambi anayeweza kuonekana humo. Ni kama vile unapotaka kuangalia wanyama wa porini itakubidi uende katika bustani ya kufugia wanyama, basi wakati huu utakapowadia, basi yeyote anayetaka kumwona Shetani na wafuasi wake atapaswa kwenda kuzimu.

Mahali ambapo Mungu atatupatia Mbingu na Nchi Mpya, ni mahali ambapo Bwana wetu ataishi pamoja nasi. Pia Mungu ametufanyia Mji Mtakatifu ukiwa na asili ya kupendekeza sana na bustani za kupendekeza za kijani. Wakati Mbingu na Nchi Mpya vitakapowadia, basi vitu vyote vya ulimwengu wa kwanza na mapungufu yake yote vitakuwa vimeshatoweka, na ukweli tu ndio utakaokuwepo, kisha watakatifu wakamilifu watautawala Ufalme wote wa Mbinguni milele na milele.

Usivunjwe Moyo na Hali Yako ya Sasa

Kipindi hiki cha sasa ni kipindi cha giza na hali ya kutokuwa na tumaini. Katika nyakati hizi tumaini haliweza kupatikana popote pale, siku za mbele za nyakati hizi zimejawa na hali ya kutokuwa na hali ya mashaka. Na hii ndio sababu kwa baadhi ya nyakati tunajisikia kama tumechanganyikiwa na wadhaifu pamoja na kuwa tunaihubiri injili. Mimi mwenyewe, kwa baadhi ya nyakati moyo wangu umekuwa na huzini kwa sababu ya hali hii, lakini ninapolisoma Neno la Ufunuo na kuelezea vifungu vyake, nimetambua kwamba watakatifu na watumishi wa Mungu wanaokabiliana na nyakati za mwisho hawana cha kuwatia huzuni. Mungu ameuimarisha moyo wangu na kuufanya usipate shinda tena kwa kunifanya kutambua kwamba dhiki za sasa na mateso ni vya muda tu, na kwamba ulimwengu mzuri na angavu zaidi upo mbele yangu.

Ikiwa tutaiangalia hali yetu ya sasa, ukweli ni kuwa maisha yetu yanatia huzuni sana, na hayafurahishi, kiasi kuwa tunashawishika kufa moyo kutokana na matatizo yasiyoisha yanayotupitia wakati tunapoitumikia injili. Lakini kwa sababu ya baraka zote za Bwana zinazotukaribia, ingawa baraka hizo zinaweza zisionekane kwa macho ya kimwili, basi mioyo yetu inawekwa huru kutokana na huzuni na badala yake inajazwa na tumaini kuu na furaha. Sababu inayofanya kwamba kusiwe na sababu ya sisi kuishi katika huzuni ni kwa kuwa Mungu wetu amekwisha tupatia Mbingu na Nchi Mpya.

Je, unaamini katika Mbingu na Nchi Mpya? Pamoja na kuwa hujaweza kupata uzoefu wa vitu hivyo, je umewahi kuvitafakari?

Dunia hii pia ina sehemu ambazo ni nzuri sana. Tunapozungumzia juu ya mazingira mazuri ya kuishi katika ulimwengu huu, mara nyingi huwa tunazungumzia kuhusu miti,

malisho mazuri ya kijani kando ya mito, maua mashambani, na watu wema. Pia ni lazima kuwe mtiririko mzuri wa maji, na kwamba kusiwe na watu wabaya, wala kusiwe na mapungufu yoyote yale. Wakati mazingira hayo yote yanapokuwa yametimia, basi mara zote huwa tunasema hayo ni mazingira bora kabisa. Lakini huko Mbinguni, kila kitu ni kikamilifu, ni kwema na kuzuri zaidi kupitia mahali popote hapa duniani panapoweza kujisifu.

Swali ni hili, Mungu ameuandaa Mji Mtakatifu uliojengwa kikamilifu toka Mbinguni ambao ataleta hapa duniani kwa ajili ya akina nani? Ukweli ni kuwa Mungu amufanya huu Mji si kwa watu wengine bali ni kwa ajili ya watakatifu. Na hii ndio sababu tunaweza kusahau kila kitu kuhusu dunia ya kwanza. Pamoja na kuwa tutaishi kwa utukufu katika Ufalme wa Milenia, ukweli ni kuwa katika ulimwengu ujao, yaani katika Mbingu na Nchi Mpya vinavyoelezwa katika sura ya 21, ambavyo Mungu anataka kutupatia, huko tutaishi pamoja na Bwana kwa utukufu mkuu zaidi. Ili kufanya hivyo, Mungu ametuokoa kwa kumtuma Yesu Kristo, kisha atatufufua na kutunyakua. Kuishi pamoja na Bwana katika miili iliyofanywa kuwa mikamilifu kama Mwili wa Yesu Mfufuka kunatoa picha kamilifu ya utukufu na maisha yaliyobarikiwa yanayotungojea.

Ili kutupatia Ufalme wa Mbingu na Nchi Mpya, basi Mungu ametufanya wewe na mimi kuzaliwa katika dunia hii, na ametuokoa. Ikiwa watakatifu wanaishi katika ulimwengu huu hali wakiyatambua majaliwa ya Mungu, basi wataishi vizuri sana, tena pasipo kukutana na magumu, mateso, huzuni, na pasipo majonzi. Kwa kuangalia yale ambayo Bwana ameyafanya, na yale ambayo atayafanya kwetu sisi hapo baadaye, basi sisi sote tunaweza kuishi kwa ujasiri na kwa mtazamo chanya.

Lakini ikiwa tutajiangalia sisi wenyewe na kisha kuiangalia hali isiyo na tumaini ya kisiasa, kiuchumi, na kijamii hapa duniani, tutaona wazi kwamba hakuna chaguo zaidi ya kuangukia katika hali ya huzuni. Wewe na mimi ni hatupaswi kusahau kwamba Mungu ametupatia Mbingu na Nchip Mpya kuwa vyetu. Huu ndio uhalisia. Huu ndio ukweli. Hata kama ulimwengu huu unajaribu kukufanya uwe na huzuni, kwa kweli usihuzunishwe na ulimwengu huu, wala usikasirishwe, bali umwangelie Bwana tu. Kisha uishi maisha yako kwa tumaini, hali ukiamini kwa hakika kwamba Bwana amewapatia Mbingu na Nchi Mpya watakatifu wake.

Mungu alisema kwamba atavifanya vitu vyote kuwa vipya. Alimwambia Yohana kuyaandika Maneno haya, kwamba atafanya vitu vyote kuwa vipya, “*ya kwamba maneno hayo ni amini na kweli.*” Wale watakaoshiriki katika ufufuo wa kwanza pia watashiriki katika baraka hizi zote za kuishi mahali ambapo Mungu amefanya vitu vyote kuwa vipya. Hiki ni kitu ambacho hatuwezi hata kukiota kwa kutumia mawazo ya kibinadamu, bali ni kitu ambacho Mungu ameandaa kwa ajili ya watakatifu wake. Hivyo, watakatifu na vitu vyote vitampatia Mungu utukufu wote, shukrani, heshima, na kisha kumsifu Mungu milele kwa kulitimiza hili tendo kuu.

Biblia inasema kwamba “*imani ni kuwa na hakika na mambo yatarajiwayo, ni bayana ya mambo yasiyoonekana (Waebrania 11:1).*” Kwa maneno mengine, pamoja na kuwa hatuwezi kuyaona mambo haya kwa macho yetu, ukweli ni kuwa mambo hayo yote ni amini na kweli. Tilitumaini kuokolewa toka katiak dhambi zetu zote, na kwa kuamini katika wokovu wetu basi ni hakika kuwa tumeokolewa. Na kwa kuwa, baada ya kuokolewa, tumetamani na tumetumaini kuishi milele katika ulimwengu mkamilifu usiopungukiwa kitu, basi ni hakika kwamba Mungu ametimiza kila kitu kwa ajili

yetu. Kila kitu ambacho tulikitamani na kukitumainia kitakuja kuwa halisi, hii ni kwa sababu matumaini yetu yote ni ya kweli.

Katika sura ya 10 ya Kitabu cha Ufunuo, wakati Bwana alipozungumza na Yohana kwa kupitia malaika wake aliyekuwa amesimama katika nchi na katika bahari, na wakati Yohana alipojaribu kuyaandika mambo hayo, Mungu alimwambia asiyaandike. Kati ya vitu ambavyo Bwana alivizungumza, kuna vitu ambavyo ni vya uhakika ambavyo Mungu hakuviruhusu kuandikwa, kwa kuwa mambo hayo ni siri ambayo ataifunua kwetu sisi watakatifu.

Siri hii si nyingine bali ni unyakuo. Ili kufahamu kuwa ni lini hasa unyakuo utatokea, basi tunapaswa kwanza kutambua kuwa tarumbeta la saba la Mungu ndio kigezo kinachoamua na kuifumbua siri hii. Sasa, ni lini basi ambapo tarumbeta la saba litapigwa? Tarumbeta la saba litapigwa wakati miaka mitatu na nusu kati ya ile miaka saba ya Dhiki Kuu kuwa imepita kidogo. Hapo ndipo ufufuo na unyakuo wa watakatifu utakapotokea. Baada ya unyakuo huo kuisha, basi hapo yatafuatia mapigo ya mabakuli saba.

Miaka kadhaa iliyopita, niliusikia mkutano mmoja wa uamsho uliokuwa na mada isemayo “Makanisa Saba ya Asia Ndogo.” Pia niliandika kitabu juu ya haya makanisa saba ya Asia Ndogo, na maelezo yake yanaendana vizuri na maelezo niliyoyaeleza katika kifungu hiki. Ninapoyaangalia yale mahubiri katika kile kitabu, ninaona wazi kwamba nyakati zimebadilika sana, lakini Neno la Mungu halijabadilika hata kidogo pamoja na kuwa muda mrefu umepita.

Je, unataka kuishi katika Mbingu na Nchi Mpya, mahali ambapo Mungu amepaandaa kwa ajili yako wewe na mimi? Mapungufu ya ulimwengu huu hayapo katika ulimwengu huo mpya. Wakati Mungu aliposema kwamba atafanya vitu vyote kuwa vipya, baadhi ya watu wanaweza kutafsiri kwamba

Mungu alisema kwamba atavibadilisha vile ambavyo tayari vipo katika ulimwengu huu, yana kwamba atavigeuza upya. Lakini kuanzia sura ya 21 na kuendelea, tunachoweza kukona hapo ni ulimwengu mpya kabisa, ulimwengu ambao ni tofauti kabisa na ulimwengu wa zamani. Wale waliozaliwa tena upya watashiriki katika Mbingu na Nchi Mpya vilivyofanywa upya na Mungu, hii ni kwa sababu wao ndio washiriki wa tabia-sifa za kimungu. Kwa maneno mengine, ni kwa sababu wamefanyika kuwa washiriki wa uwepo wa kimungu.

Badala ya kuyaweka mawazo yetu yote katika dhana ya mali na vitu, sasa tunapaswa kufikiri katika vipimo vya kiroho. Ninaomba kwamba ninyi nyote muwe ni watakatifu na watumishi mnaoamini katika kile ambacho Mungu amezipatia roho zetu, na mnaoamini katika imani kwamba, ingawa mambo haya bado hayajatimizwa, basi ipo siku mambo haya yatakuwa halisi. Mungu ametupata baraka kuu.

Mungu alisema kwamba atatoa chemichemi ya maji ya uzima bure kwa wale walio na kiu. Neno hili halimaanishi juu ya injili ya maji na Roho. Wakati watu wanapoamini kwamba Mungu amewakomboa toka katika kiu yao kwa kuwapatia injili yake hapa duniani na kwa kuwaokoa toka katika dhambi zao, na kwamba hii ni sawa na kuyanywa maji ya uzima. Lakini kifungu hiki hakimaanishi hilo tu, bali ina maanisha ni maji halisi ya uzima ambayo watu watayanywa katika Mbingu na Nchi Mpya, ambapo yeyote atakayeyanywa maji haya ya uzima hatakufa kamwe, mwili wake utabadilishwa na kuwa kama wa Bwana, naye ataishi na Bwana milele.

Bwana Mungu wetu amepanga na kuyatimiza haya mambo yote, kuanzia mwanzo hadi mwisho. Mambo yote ambayo Bwana ameyafanya, ameyafanya kwa ajili yake na kwa ajili ya watakatifu wake. Kwa hiyo, watakatifu wanaitwa na Mungu kuwa ni watu wa Kristo na wamefanyika kuwa

watoto wa kweli wa Mungu kwa mujibu wa mpango wake. Wale waliofanyika kuwa watakatifu kwa kuamini injili ya maji na Roho sasa wanaweza kutambua, toka katika imani yao katika upendo mkuu wa Mungu na matendo yake ya ajabu, kwamba hakuna wanachopungukiwa katiak kumshukuru na kumsifu Bwana milele.

Kama Bwana alivyosema, *“Mimi nitampa yeye mwenye kiu, ya chemchemi ya maji ya uzima, bure.”* Ni hakika kwamba Mungu ametupatia chemichemi ya maji ya uzima kwa watakatifu wake na amewaruhusu kufurahia uzima wa milele. Hii ni zawadi kuu ambayo Mungu amewapatia watakatifu wake. Sasa watakatifu wataishi milele katika Mbingu na Nchi Mpya na kisha kunywa katika chemichemi ya maji ya uzima, ambapo hawataona kiu tena milele. Kwa maneno mengine, watakatifu wamefanyika kuwa watoto wa Mungu ambao watakuwa na uzima wa milele, yaani kama vile Bwana Mungu, kisha wataishi katika utukufu. Ninampatia Bwana Mungu shukrani na utukufu tena kwa kutupatia baraka hii kuu.

Imani Katika Injili ya Kweli Inatuwezesha Kuushinda Ulimwengu

Mtume Yohana sasa anarudi katika wakati wake. Aya ya 7 inasema, *“Yeye ashindaye atayarithi haya, nami nitakuwa Mungu wake, naye atakuwa mwanangu.”* *“Yeye ashindaye”* ina maanisha ni wale wanaoilinda imani iliyotolewa na Bwana. Imani hii inawaruhusu watakatifu wote kuyashinda matatizo yote na majaribu. Imani yetu katika Bwana Mungu na katika upendo wa kweli wa injili ya maji na Roho iliyotolewa na Mungu ndivyo vinavyotupatia ushindi dhidi ya dhambi zote za ulimwengu, na dhidi ya hukumu ya Mungu, na dhidi ya maadui

zetu, na dhidi ya udhaifu wetu binafsi, na dhidi ya mateso ya Mpinga Kristo.

Ninatoa shukrani na kumpatia Bwana Mungu wetu utukufu kwa kutupatia ushindi dhidi ya hayo yote. Wakatifu wanaomwamini Bwana Mungu wanaweza kumshinda Mpinga Kristo kwa imani yao, hii ni kwa sababu, Bwana Mungu wetu amepatia kila mmoja wao imani hii ambayo kwa hiyo anaweza kushinda katika mapambano yao dhidi ya maadui zao wote. Sasa, Mungu amewaruhusu watakatifu, ambao wameushinda ulimwengu na Mpinga Kristo kwa imani yao kuirithi Mbingu na Nchi Mpya. Ninatoa shukrani na kumsifu Mungu wetu kwa kutupatia imani hii imara.

Mungu alisema kwamba kwamba kwa wale watakaoshinda, basi atawapatia Mbingu na Nchi Mpya kuwa urithi wao, mahali ambapo hakuna machozi, wala huzuni, wala mashaka. Ni wale tu watakaoshinda ndio watakaostahili kuipokea hiyo Mbingu na Nchi Mpya. Imani ya ushindi huu ni imani katika injili ya maji na Roho ambayo Bwana ametupatia. Hii ndio imani ambayo kwa hiyo tunaweza kuushinda ulimwengu, dhambi zetu, madhaifu yetu binafsi, na pia kumshinda Mpinga Kristo.

Kama thawabu ya imani yetu inayomshinda Mpinga Kristo, basi hivi punde tutapokea Mbingu na Nchi Mpya toka kwa Mungu. Kwa kuwa tutapokea baraka hizi zote kwa ajili ya imani yetu, basi wakati Mpinga Kristo atakaposimama kinyume nasi na kujaribu kuichukua imani yetu, basi ni hakika kwamba tutaishinda mipango yote ya maadui zetu kwa imani. Wale wanaoshinda wanaliadini Neno la Mungu bila kujalisha kile ambacho wengine wanasema juu yao, na wanailinda imani yao katika ukweli kwamba Bwana amezichukulia mbali dhambi zao zote. Sisi, ambao tumepokea ondoleo la dhambi zetu na ambao tumezaliwa tena upya, na ambao tunaishi katika

nyakati hizi za mwisho, ni lazima tuishinde mipango ya Mpinga Kristo kwa imani.

Tunaweza kuishinda dhiki itakayodumu kwa muda mfupi kwa imani yetu katika ukweli kwamba Bwana ametupatia Mbingu na Nchi Mpya, pamoja na utajiri, heshima na utukufu. Wakati ulimwengu bora ukiwa unatuongojea, je, ni kweli kuwa tunaweza kuikana injili ya imani hii? Wakati mambo mema yatatujia kesho, na wakati ambapo vitu vingi vya kushangaza na kupendeza vinatungojea hiyo kesho, basi si hakika kwamba tutavumilia leo, yaani kuvumilia magumu ya siku ya leo? Ukweli ni kwamba sisi sote tunaweza kuvumilia.

Biblia inatueleza mara kwa mara kuhusu ‘imani, tumaini na upendo’ kama vitu vya muhimu sana ambavyo watakatifu wanapaswa kuvitunza na kuvishikilia katika akili zao. Wale walio na tumaini wana uwezo zaidi wa kuishinda dhiki yao ya sasa kwa kuamini kwamba baraka hizi zote ambazo Mungu ametupatia ni vitu halisi. Na kwa kuwa mapigo ya nyakati za mwisho yatadumu kwa muda mfupi, na kwa kuwa Mungu atawapatia watakatifu wake njia ya kuyakwepa mapigo hayo, basi ni hakika kwamba sisi sote tunaweza kuvumilia. Ninatumaini kwamba kuanzia wakati huu na kuendelea, wewe nawe utaweza kuvumilia, na kwamba utakuwa tayari kuingia katika Mbingu na Nchi Mpya na kisha kuishi ndani yake kwa imani.

Katika himaya ya imani, Neno hili lote ni lazima liuguse moyo wako kwa kupitia imani, na sio kugusa ngozi ya mwili wako. Linapofanya hivyo, basi moyo wako utakuwa imara kwa kuwa utapata nguvu mpya, na pia utakuwa na tumaini.

Watakatifu wote watauwawa na kuifia-dini katika nyakati za mwisho. Hali tukiliangalia tumaini ambalo tumeliweka katika Mbingu na Nchi Mpya, basi ndio maana tunaweza tena zaidi kuyapokea mauaji ya kuwa wafia-dini hali tukiwa na nguvu

mpya.

Katika uwepo wake, Bwana Mungu Wetu ni Mungu wa ukweli na Mungu wa upendo. Sasa, ni akina nani ambao basi kimsingi ni waoga mbele za Mungu? Ni wale ambao wamezaliwa wakiwa na dhambi ya asili na ambao hawajaziosha dhambi zao zote kwa Neno la injili ya maji na Roho iliyotolewa na Bwana. Kwa kuwa katika hali yao ya kimsingi wanamwamini yule mwovu kuliko kumwamini Mungu, na kwa sababu hiyo wamefanyika kwa wazi kuwa watumishi wa Shetani. Kwa kuwa wanamwabudu mwovu mbele za Mungu, na kwa kuwa wanaipenda giza na kuifuata kuliko kuipenda nuru, basi ndio sababu watu hao ni waoga mbele za Bwana Mungu. Wale wote ambao ni waoga mbele za Mungu watashiriki katika kuunguzwa katika ziwa la moto na kibiriti.

Ni ukweli usio na shaka kwamba watu hawa, ambao wao wenyewe ni giza kwa sababu ya dhambi katika mioyo yao, basi ndio maana hawana uchaguzi mwingine zaidi ya kumwogopa Mungu. Wakati roho za wale walio mali ya Shetani wanapoipenda giza, basi ndio maana wanakuwa waoga mbele za Yesu ambaye amefanyika kuwa nuru. Na hii ndio sababu tunapaswa kuyachukua maovu na udhaifu wao kwenda kwa Mungu ili wapokee ondoleo la dhambi zao toka kwa Mungu. Wale wasioiamini injili ya maji na Roho iliyotolewa na Bwana ni wenye dhambi wakuu mbele za Mungu na ni maadui zake.

Kwa kuwa nafsi zao ni machukizo, na kwa kuwa wanasimama kinyume na Mungu, huku wakipenda na kuzitenda dhambi nyingi, na kwa kuwa wanazifuata ishara za uongo, huku wakiabudu kila aina ya sanamu, na kusema maneno yote ya uongo, basi kwa kupitia hukumu ya Mungu ya haki watu hao wote watatupwa katika ziwa liwakalo kwa moto na kibiriti. Hii ndio adhabu yao ya mauti ya pili.

Mauti ya pili itakuwa maalumu kwa wale ambao watakuwa wamepelekwa kuzimu, na hawa ndio wale waoga, wasioamini, wenye machukizo, wauaji, wazinzi, wachawi, na waabudu sanamu ambao pamoja na Mpinga Kristo na wafuasi wake, ambao kwa sasa hawaupokei upendo wa Mungu. Wale wasiomwamini Mungu ndio waovu zaidi. Biblia inatueleza kwamba hawa waovu wote watatupwa katika ziwa liwakalo kwa moto na kibiriti. Hii ndio sababu Biblia inayataja mauti hayo kuwa ni mauti ya pili.

Wale watakaoshiriki katika ufufuo wa pili hawatakufa hata baada ya kuwa wametupwa katika moto, hii ndio sababu watafufuliwa katika miili ambayo itaishi milele ili waweze kutupwa katika moto.

Wasiomwamini Mungu watainuliwa tena ili waweze kutupwa katika ziwa la moto na kibiriti. Ufufuo wa pili, ambao utaleta mateso ya milele katika moto wa kuzimu pasipo kufa, umehifadhiwa kwa ajili ya hawa watu wote wasioamini.

Muda mfupi baada ya kumiminwa kwa mabakuli yenye mapigo saba, basi Ufalme wa Milenia utakamilishwa, na baada ya kupita miaka elfu moja, watakatifu watahamia katika Mbingu na Nchi Mpya. Na katika sentensi inayosema, *“Nami nitakuonyesha yule Bibi-arusi, mke wa Mwana-Kondoo,”* hili neno mke wa Mwana-kondoo lina maanisha ni wale waliookolewa kwa injili ya maji na Roho iliyotolewa na Yesu Kristo na kwa kuamini injili hiyo.

Utukufu na Uzuri wa Mji Mtakatifu Ni Zaidi ya Maelezo

Mji wa Yerusalemu una maanisha ni Mji Mtakatifu ambako watakatifu wataishi pamoja na Bwana-harusi wao.

Huu Mji ambao Yohana aliuona kwa kweli ulikuwa ni mzuri sana na wa ajabu. Ulikuwa ni mji mkubwa, uliokuwa umepambwa kwa vito vya thamani ndani na nje, hali ukiwa safi na angavu. Malaika alimwonyesha Yohana mahali ambapo mabibi-harusi wa Yesu Kristo wataishi pamoja na Bwana-harusi wao.

Hebu fikiria suala la kuishi mahali ambapo pamejengwa kwa vito vya dhamani. Katika Mji huu ambao umejengwa kwa aina kumi na mbili tofauti za vito vya thamani, ni mahali ambapo mabibi-harusi wa Mwana-kondoo wataishi milele. Mji huu ni zawadi ya Mungu ambayo ataitoa kwa mke wa Mwana-kondoo. Kifungu hiki kinatueleza kwamba mji wa Yerusalem unang'ara sana, na kwamba mwanga wake ni kama ule wa vito vya thamani, kama vile kito cha yaspi, kilicho angavu kama kioo.

Hivyo, utukufu wa Mungu upo katika huo Mji na wale wote wanaoishi ndani yake. Mamlaka ya Mungu ni ile ya nuru, hivyo ni wale tu ambao wamesafishwa giza lote, udhaifu na dhambi zote ndio wanaoweza kuingia na kuishi katika Mji huu. Kwa hiyo, ili kuweza kuingia katika Mji huu Mtakatifu, basi inatupasa sisi sote kuliadini Neno la kweli la injili ya maji na Roho ambalo Bwana wetu ametupatia.

Hiki kifungu kinaeleza kwamba Mji huu umezungukwa kwa ukuta mkubwa na mrefu wenye malango kumi na mbili. Pia kifungu hiki kinaeleza kwamba majina yameandikwa katika malango hayo, na majina hayo ni yale majina kumi na mbili ya kabila za wana wa Israeli. Mungu anatueleza kwa hakika kwamba ameuandaa mji huu kwa ajili ya watakatifu wake, na ameuzungushia ukuta mkubwa na mrefu.

Hii ni alama ya kiroho kwamba njia ya kuingia katika huu Mji Mtakatifu ni ngumu sana. Kwa maneno mengine, kifungu hiki kinatueleza kwamba kuokolewa mbele za Mungu kwa

kutegemea jitihada za kibinadamu au kutegemea mali na vitu vya ulimwengu huu ambavyo Mungu aliviumba ni jambo lisilowezekana. Ili kuweza kukombolewa toka katika dhambi zetu zote na kisha kuingia katika Mji Mtakatifu wa Mungu, basi ni muhimu sana kuwa na imani ambayo wanafunzi kumi na mbili wa Yesu walikuwa nayo, yaani imani inayoamini katika ukweli wa injili ya maji na Roho. Kwa hiyo, hakuna hata mmoja asiye na imani hii katika injili ya maji na Roho anayeweza kuingia katika huu Mji Mtakatifu.

Mji huu unalindwa na malaika kumi na mbili waliosimama kama walinzi wa malango huku wakiwa wametumwa na bwana Mungu. Kwa upande mwingine, hii sentensi inayosema, “majina yameandikwa [milango],” inatueleza kwamba wamiliki wa Mji huu wamekwisha amuliwa, maana yake ni kwamba wamiliki wa Mji huu ni Mungu Mwenyewe pamoja na watu wake, na Mji huu ni mali ya watu wa Mungu ambao sasa wamefanyika kuwa watoto wake.

Huu Mji Mtakatifu una malango matatu katika kila uelekeo wake wa kaskazini, kusini, mashariki, na magharibi. Nina hakika kwamba Bwana aliyataja haya malango matatu ili kutueleza kwamba yanahusiana hasa na injili ambayo tunaamini. 1 Yohana 5:7-8 inaeleza kwamba kuna watatu wanaoishuhudia injili ya kweli huko Mbinguni na duniani. Ni wale tu wanaowaamini hawa mashahidi watatu Mbinguni na duniani ndio wanaoweza kuingia Mbinguni. Sisi, tuliozaliwa tena upya, tunamwamini Mungu Utatu na matendo yake ya haki ya kutuokoa kupitia maji, damu, na Roho.

Ule ukweli kwamba majina ya mitume kumi na mbili yameandikwa katika misingi kumi na mbili ya huu Mji unatueleza kwamba Bwana amefanya kwa usahihi kabisa kama vile alivyoahidi, kwamba hatayatoweshea mbali majina yao

kamwe katika Kitabu cha Uzima.

Yadi, au ‘*Stadion*’ kwa Kiyunani, ni kipimo cha kupimia umbali, ni sawa na futi 600 (Mita 185) kwa vipimo vya sasa. Biblia inapotueleza kwamba kila upande wa ule Mji wa Mbinguni una yadi 12,000, basi hii inatueleza kwamba kila upande wa ule mji una urefu wa kilomita 2,220 sawa na (maili 1,390). Tunaambiwa kwamba urefu wake, upana, na kimo na sawa. Ukubwa wa Mji huu unatueleza jinsi Ufalme wa Mungu ulivyo mkuu na wa kushangaza.

Maana ya kibiblia ya namba nne ni mateso. Imani ambayo Bwana anaihitaji kutoka kwetu si kitu ambachoa kila mtu anaweza kuwa nacho, bali ni imani ambayo wanaweza kuwa nayo wale tu wanaolipokea Neno la Mungu kama lilivyo, hata kama hawawezi kulielewa vizuri kwa ufahamu wao wa kibinadamu.

Ukiwa kama Mkristo, haiwezekani kuingia katika Mji Mtakatifu wa Mungu kwa kuuamini Msalaba wa Yesu tu, huku ukisema Yesu ni Mungu na Mwokozi. Kama Bwana wetu alivyosema, hakuna anayeweza kuingia katika Ufalme wa Mungu hadi awe amezaliwa tena upya kwa maji na kwa Roho. Watu wanaweza kuzaliwa tena upya pale tu wanapoamini kwamba dhambi zote za ulimwengu zilizipitishwa kwenda kwa Yesu wakati alipobatizwa na Yohana Mbatizaji, na kwamba Yesu alizipatanisha dhambi zao zote kwa kuimwaga damu yake na kufa Msalabani kwa niaba yao.

Sentensi inayosema, “*na mji ule ulikuwa wa dhahabu safi, mfano wa kioo safi,*” inatueleza kwamba ni wale tu ambao imani yao ni kama dhahabu—yaani, wale wanaomwamini Mungu kwa kweli—ndio wanaoweza kuingia katika ule Mji. Sentesi hii inatueleza pia kwamba imani inayomruhusu mtu kuingia katika Mji Mtakatifu wa Bwana ni ile imani inayoliamini Neno la Mungu kama lilivyo andikwa, imani

ambayo ni safi na iliyo mbali na mambo ya kidunia. Kwa maneno mengine, sentensi hii inatueleza kwamba imempasa mtu kulipokea Neno la Mungu la kuzaliwa tena upya kwa maji na Roho katika usafi wake wote, kisha kuliadini Neno hili kwa kweli, na hatimaye kuwa na imani iliyofanywa upya.

Misingi ya ule ukutwa wa Mji imepambwa kwa aina zote za vito vya thamani, na hii inatueleza kwamba tunaweza kutiwa faraja na kuimarishwa kwa namna mbalimbali za kiimani toka katika hili Neno la Bwana wetu. Ni lazima tuwe na imani yenye nidhamu, na si bora imani katika injili ya maji na Roho au tumaini katika Mbingu na katika Ufalme wa Milenia. Imani hii ya kufundishwa pia inatujia kupitia Neno la Mungu wakati ambapo tukiyavumilia mateso ya sasa.

Sio kwamba Bwana amewapatia watakatifu wake baraka ya ondoleo la dhambi zao tu, bali amewapatia pia baraka ya kuyatimiza matumaini yao, kwamba wale wote waliosamehewa dhambi zao wataingia katika Ufalme wa Milenia na Mbinguni. Sisi, watakatifu, tunaweza kumshukuru Mungu kwa kuturuhusu kuingia katika Mbingu na Nchi Mpya, mahali ambako hakuna huzuni wala majonzi.

Watakatifu ambao watauingia Mji Mtakatifu wanapaswa kuwa na uvumilivu wa kutosha wanapokuwa hapa duniani, hali wakiwa wamesimama imara katika kiini cha imani yao. Kwa maneno mengine, wale wanaoliamini Neno la kweli lililozungumzwa na Bwana Mungu, wanahitaji kuwa na uvumlifu mkuu katika kuilinda imani yao. Nyakati za mwisho zitakapowadia, basi kipindi cha Mpinga Kristo, ambaye ni mpinzani wa imani, kitawasili.

Huyu Mpinga Kristo, akiwa kama mtumishi wa Shetani, ataleta mateso kwa watu wengi wa kiimani, huku akiwataka waikane imani yao. Ikiwa watu watasimama upande wa Mpinga Kristo na kisha kuiacha imani yao, basi ni dhahiri

kwamba watashindwa kuufikia Ufalme wa Milenia na Mbinguni, na watatupwa kuzimu pamoja na Shetani.

Hivyo, tutakapokuwa katikati ya majaribu, mateso, na mapigo ya nyakati za mwisho, basi ni dhahidi kwamba tutahitaji uvumilivu utakaoturuhusu kuilinda imani yetu kikamilifu, kwa kuwa uvumilivu huu wa kutoshtushwa na usioyumba ndio utakaotupatia Mbingu na Nchi Mpya.

Kuishi katika Mbingu na Nchi Mpya ni sawa na kuishi ukiwa umekumbatiwa katika mikono ya Bwana. Kwa kuwa Yesu Kristo, ambaye amefanyika kuwa nuru ya ulimwengu mpya, anang'aa katika nchi hii takatifu akiwa ndio nuru yake, na kwa sababu hiyo hakuna haja ya kuwa na mwanga wa jua wala mwezi. Yesu Kristo ni Mwokozi wetu, Muumbaji, na Hakim, na katika Mbingu na Nchi Mpya, Yesu ni Mungu ambaye anaishi pamoja nasi. Tunaingia Mbinguni kupitia Yeye, na kwa yeye huyo baraka zote zinatiririka. Watakatifu hawatakuwa na la kufanya zaidi ya kumsifu Bwana wakati wote.

Katika toleo la Biblia la Mfalme Yakobo, aya ya 24 imeandikwa kama ifuatavyo: *“Na mataifa watatembea katika nuru yake. Na wafalme wa nchi huleta utukufu wao ndani yake.”* Andiko hili linaposema utukufu wa duniani unaletwa Mbinguni, hii haimaanishi kwamba wale waliokuwa wametawala katika dunia ya kwanza, ati kwa kuwa walikuwa matajiri, wataleta utajiri wao katika Mbingu na Nchi Mpya. Dunia inayotajwa hapa ni dunia ya Ufalme wa Milenia.

Pamoja na kuwa watakatifu wameokolewa na kwamba wataingia katika Ufalme wa Milenia kwa namna moja, ukweli ni kwamba watapewa mamlaka mbalimbali, wengine watatawala juu ya miji kumi, na wengine juu ya miji mitano, hii itategemea na jitihada zao katika kuihubiri injili wakati walipokuwa wakiishi katika ulimwenguni wa kwanza.

Kile ambacho aya ya 24 inatueleza ni kwamba hawa wafalme ambao walikuwa na mamlaka mbalimbali watahamia katika Mbingu na Nchi Mpya. Kwa maneno mengine, wale waliotawala katika Ufalme wa Milenia wataingia katika Mbingu na Nchi Mpya wakiwa kama wafalme huku wakiileta imani yao katika Bwana pamoja na heshima na utukufu. Hivyo, aya hii haijishughulishi na dunia hii ya kwanza ambapo sisi sote tunaishi hivi sasa.

Kwa kuwa Mbingu na Nchi Mpya, mahali ambapo Mji Mtakatifu upo, imekwishajazwa na na mwanga mtakatifu, basi huko hakuwezi kuwa na giza au usiku kamwe, wala hakuan mwovu hata mmoja. Wale wote wasiufahamu ukweli wa injili ya maji na Roho miongoni mwa Wakristo na wasio Wakristo, kwa ujumla wao hao wote ni watenda maovu, ni wenye machukizo, na waongo. Hivyo hawawezi kuingia katika Mji Mtakatifu. Kwa kuwa yeyote anayeamini injili ya maji na Roho anaweza kuingia Mbinguni, basi hii injili ya maji na Roho ni ufunguo wa kuingia Mbinguni na ufunguo wa ondoleo la dhambi. Unapaswa kuelewa kuwa unapotambua na kuamini kwamba Mungu amekupatia funguo hii, basi ni hakika kwamba jina lako litaandikwa katika Kitabu cha Uzima. Na unapoupokea ukweli wa injili hii, basi ni wazi kuwa utavikwa baraka ya kuingia katika huu Mji Mtakatifu.

Amini kwamba tumeshapewa Mji Mtakatifu. Na kisha uishi maisha yako kwa imani kama ipasavyo hali ukiwa na tumaini.

Kwa kuwa kila kitu tunachokabiliana nacho katika wakati huu kinapimwa kwa mfumo wa thamani wa ulimwengu huu wa kimwili, basi ndio maana hatuwezi kuipima kikamilifu furaha ya kweli. Lakini tunapopima kwa kutumia kipimo cha Mungu, basi hapo tunaweza kutambua kwamba wale walio na milki ya Mbinguni ndio wenye furaha ya kweli. Kwa nini? Kwa kuwa

hivi punde au baadaye, mambo ya ulimwengu huu yatatoweka yote. Mambo hayo ya kidunia yatatoweka na kutuacha bila mahali pa kuliweka tumaini letu, mambo hayo yatatoweka mara baada ya kuletwa kwa dhiki na mapigo kwa mujibu wa mpango wa Mungu. Hakuna kitu kitakachokuwa cha kijinga kama kuweka tumaini katika vitu hivyo vya kimwili ambavyo vitaoza na kisha kuungua na kuwa majivu.


Lakini kwa upande mwingine, wale wanaoliweka tumaini lao katika Ufalme wa Mbinguni wa milele ambao hauwezi kuoza wala kuungua ndio waliobarikiwa. Ni wale tu wasio na dhambi ndio wanaoweza kuingia Mji Mtakatifu wa Yerusalemu ulioandaliwa na Mungu. Watu walio na furaha zaidi katika ulimwengu huu ni wale ambao Mbingu ni urithi wao, watu ambao dhambi zao zote zimesamehewa na kusafishiliwa mbali.

Tunapaswa kuishi maisha yetu hali tukiwa tumebarikiwa na Mungu, tukiwa wale tunaompatia Mungu utukufu kwa kutupatia Mbingu na Nchi Mpya, na ambao tumejitoe katika kuihubiri injili ya kweli inayoiwezesha kila nafsi kuingia Mbinguni.

Hebu sisi sote tuishi kwa baraka hizo, hebu tupendwe na Mungu, ili kwamba siku moja tutakaposimama mbele za Bwana, tuishi milele tukiwa tumekumbatiwa katika mikono ya Mungu. ☒

SURA YA

22



Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Mbingu na Nchi Mpya, Ambapo Maji ya Uzima Yanatiririka

< Ufunuo 22:1-21 >

“Kisha akanionyesha mto wa maji ya uzima, wenye kung’aa kama bilauri, ukitoka katika kiti cha enzi cha Mungu, na cha Mwana-Kondoo, katikati ya njia kuu yake. Na upande huu na upande huu wa ule mto, ulikuwapo mti wa uzima, uzaao matunda, aina kumi na mbili, wenye kutoa matunda yake kila mwezi; na majani ya mti huo ni ya kuwaponya mataifa. Wala hapatakuwa na laana yo yote tena. Na kiti cha enzi cha Mungu na cha Mwana-Kondoo kitakuwamo ndani yake. Na watumwa wake watamtumikia; nao watamwona uso wake, na jina lake litakuwa katika vipaji vya nyuso zao. Wala hapatakuwa na usiku tena; wala hawana haja ya taa wala ya nuru ya jua; kwa kuwa Bwana Mungu huwatia nuru, nao watatawala hata milele na milele. Kisha akaniambia, Maneno haya ni amini na kweli. Naye Bwana, Mungu wa roho za manabii, alimtuma malaika wake uwaonyesha watumwa wake mambo ambayo hayana budi kuwako upesi. Na tazama, naja upesi; heri yeye ayashikaye maneno ya unabii wa kitabu hiki. Nami Yohana ndimi niliyeyasikia na kuyaona mambo hayo. Na hapo nilipoyasikia na kuyaona nalianguka, ili nisujudu mbele ya miguu ya malaika yule mwenye kunionyesha hayo. Naye akaniambia, Angalia, usifanye hivi; mimi ni mjoli wako, na wa ndugu zako

manabii, na wa wale wayashikao maneno ya kitabu hiki. Msujudie Mungu. Akaniambia, Usiyatie muhuri maneno ya unabii wa kitabu hiki, kwa maana wakati huo umekaribia. Mwenye kudhulumu na azidi kudhulumu; na mwenye uchafu na azidi kuwa mchafu; na mwenye haki na azidi kufanya haki; na mtakatifu na azidi kutakaswa. Tazama, naja upesi, na ujira wangu u pamoja nami, kumlipa kila mtu kama kazi yake ilivyo. Mimi ni Alfa na Omega, mwanzo na mwisho, wa kwanza na wa mwisho. Heri wazifuao nguo zao, wawe na amri kuuendea huo mti wa uzima, na kuingia mjini kwa milango yake. Huko nje wako mbwa, na wachawi, na wazinzi, na wauaji, na hao waabuduo sanamu, na kila mtu apendaye uongo na kuufanya. Mimi Yesu nimemtuma malaika wangu kuwashuhudia ninyi mambo hayo katika makanisa. Mimi ndimi niliye Shina na Mzao wa Daudi, ile nyota yenye kung'aa ya asubuhi. Na Roho na Bibi-arusi wasema, Njoo! Naye asikiaye na aseme, Njoo! Naye mwenye kiu na aje; na yeye atakaye, na ayatwae maji ya uzima bure. Namshuhudia kila mtu ayasikiaye maneno ya unabii wa kitabu hiki, Mtu ye yote akiyaongeza, Mungu atamwongezea hayo mapigo yaliyoandikwa katika kitabu hiki. Na mtu ye yote akiondoa lo lote katika maneno ya unabii wa kitabu hiki, Mungu atamwondolea sehemu yake katika ule mti wa uzima, na katika ule mji mtakatifu, ambao habari zake zimeandikwa katika kitabu hiki. Yeye mwenye kuyashuhudia haya asema, Naam; naja upesi. Amina; na uje, Bwana Yesu. Neema ya Bwana Yesu na iwe pamoja nanyi nyote. Amina.”

Mafafanuzi

Aya ya 1: Kisha akanionyesha mto wa maji ya uzima, wenye kung'aa kama bilauri, ukitoka katika kiti cha enzi cha Mungu, na cha Mwana-Kondoo.

Kifungu hiki kinaeleza kwamba Yohana alionyesha “mto safi wa maji ya uzima, wenye kung'aa kama bilauri.” Neno maji linatumika katika ulimwengu huu kama chanzo cha uhai na uzima. Aya hii inatueleza kwamba maji haya ya uzima yanatiririka katika Mbingu na Nchi Mpya mahali ambako watakatifu wataishi milele. Hali ukitiririka toka katika kiti cha enzi cha Mwana-kondoo, mto wa maji ya uzima unaulowanisha Ufalme wa Mbinguni na uvifanya vitu vyote kuwa vipya. Na katika hii sentensi inayosema, “*kiti cha enzi cha Mwana-Kondoo,*” neno “Mwana-Kondoo” ina maanisha ni Yesu Kristo, ambaye amewaokoa wanadamu kwa injili ya maji na Roho wakati alipokuwa hapa duniani.

Maji ya uzima yanatiririka katika Mbingu na Nchi Mpya ambayo Mungu amewapatia watakatifu. Kwa kuwa bustani hii ni safi na dhahiri kama vile rangi ya maji, basi ndio maana bustani hiyo inatajwa kuwa ni ya kushangaza. Maji ya uzima ambayo Mungu ametupatia si kama mto wa kawaida, bali ni maji ambayo yanatoa uzima kwa viumba hai vyote. Kwa hiyo, maisha yanachanua kwa kila kitu kitakachokutana na mto huu wa uzima. Watakatifu ambao wataishi pembezoni mwa mto huu wa maji ya uzima watakuwa maji haya, watafurahia uzima wa milele na kisha wataishi milele.

Mto wa maji ya uzima unatiririka toka katika kiti cha enzi cha Mungu na cha Mwana-Kondoo. Watakatifu hawawezi kufanya lolote zaidi ya kuisifu neema ya Mungu na ile ya Mwana-Kondoo katika Ufalme mpya wa Mbinguni, kwa kuwa Mungu amewapa neema ya uzima. Ninashukuru sana kwa

kuwa neema yote ya maisha mapya inatiririka toka katika kiti cha enzi cha Bwana.

Aya ya 2: Katikati ya njia kuu yake. Na upande huu na upande huu wa ule mto, ulikuwapo mti wa uzima, uzaao matunda, aina kumi na mbili, wenye kutoa matunda yake kila mwezi; na majani ya mti huo ni ya kuwaponya mataifa.

Kusanyiko la baraka za Bwana za kushangaza kwa watakatifu wake huko Mbinguni zinaendelea, kwa kuwa Neno linatueleza kwamba Bwana atatupatia mti wa uzima upande mmoja wapo wa mto na kisha ataturuhusu kula matunda ya mti huo wa uzima. Mti wa uzima, ambao unazaa aina kumi na mbili za matunda, unazaa matunda yake kila mwezi, na kwa sababu hiyo unaleta nguvu ya uzima mpya. Pia kifungu hiki kinaeleza kwamba majani ya mti huo ni dawa ya kuyatibu mataifa.

Kwa kuwa neema ambayo Bwana amewapatia watakatifu wake ni kubwa mno, basi kile tunachoweza kukifanya ni kumsifu Bwana na Mungu Baba. Sasa, kitu ambacho watakatifu wanapaswa kukifanya si kujaribu kufanya kitu cha thamani kwa Bwana kwa jitihada zao binafsi, bali wanapaswa kumsifu Bwana kwa mioyo yao yenye shukrani kwa kuwapatia Mbingu na Nchi Mpya na maisha mapya. Ninamsifu Bwana kwa kuifanya mioyo ya watakatifu kuweza kushangilia kwa kusema “Asante Bwana! Halleluya!”

Aya ya 3: Wala hapatakuwa na laana yo yote tena. Na kiti cha enzi cha Mungu na cha Mwana-Kondoo kitakuwamo ndani yake. Na watumwa wake watamtumikia.

Mungu ametoa baraka ya kuiondoa laana milele kwa watakatifu wanaoishi katika Ufalme wa Mbinguni. Kule kusema kwamba kiti cha enzi cha Mungu na cha Mwana-

Kondoo kipo miongoni mwa watakatifu kinatuonyesha kwamba watakatifu wanaoishi katika Ufalme wa Mbinguni wamemweka Mwana-kondoo katikati ya mioyo yao. Hivyo, mioyo ya watakatifu imefurika kwa uzuri na ukweli, na maisha yao yamejawa na furaha.

Kutokana na sentensi hii, “*Na watumwa wake watamtumikia,*” tunaona kwamba watakatifu wanaoishi katika Ufalme wa Mbinguni wamevikwa utukufu wa kumtumikia Bwana huku wakiwa karibu naye. Ufalme wa Mbinguni, mahali ambapo Bwana wetu anaishi, ni Ufalme mzuri na bora zaidi.

Kwa hiyo, watumishi wake wanaomtumikia karibu na Bwana wanaweza kuufurahia utukufu wake kwa ukaribu. Hii inatueleza kwamba katika Ufalme wa Mbinguni, kutakuwepo pia na watumishi wa Bwana. Neno mtumishi ni neno linaloonyesha hali ya kuwa chini, lakini watumishi wanaoweza kumtumikia Bwana wetu mwenye utukufu hali wakiwa karibu naye ni wale waliobarikiwa sana katika Ufalme wa Mbinguni, kwa kuwa wamefunikwa katika fahari kuu isiyoweza kuelezeka. Wale waliofanyika kuwa watumishi wa Bwana katika Ufalme wa Mbinguni na katika dunia hii ni wale ambao watavikwa utukufu wote wa Mbinguni na hao ndio wenye furaha kuliko wengine wote.

Aya ya 4: Nao watamwona uso wake, na jina lake litakuwa katika vipaji vya nyuso zao.

Je, watakatifu na watumishi wote wa Bwana ni mali ya nani? Ni mali ya Bwana. Wao ni watu wa Bwana na wana wa Mungu. Hivyo, wale wanaomtumikia Bwana katika Ufalme wa Mbinguni, jina la Bwana limeandikwa katika vipaji vya nyuso zao. Bwana anawalinda na kuwabariki wakati wote, kwa kuwa wamefanyika kuwa watu wake. Kule kusema kwamba

watakatifu wamefanyika kuwa watu wake kuna maanisha kwamba wamevikwa moja ya fahari yenye furaha na utukufu zaidi. Wale wanaoona aibu kuwa watu wake na kuwa watumishi wa Bwana ndio wale wasioifahamu fahari yake, na kwa sababu hiyo hawawezi kamwe kuwa wenyeji wa Mbinguni.

Jina la Bwana limeandikwa katika vipaji vya nyuso za watakatifu wanaoishi Mbinguni. Hii ni baraka iliyotolewa na Bwana. Kuanzia sasa na kuendelea, watakatifu wamefanyika kuwa watu wake. Kwa hiyo, hata Shetani hawezi kuwadhuru watakatifu ambao wamefanyika kuwa watu wa Bwana. Watakatifu pamoja na Bwana wataishi milele katika fahari yote ya Mbinguni. Kule kusema kwamba watakatifu watauona uso wa Bwana wenye utukufu kila siku maana yake ni kwamba wataishi katika upendo wa Bwana na baraka zake za ajabu milele na milele.

Kuna kitu kimoja ambacho watakatifu wanapaswa kukifahamu: Sambamba na Bwana Yesu, Mungu Baba na Roho Mtakatifu watakuwa pamoja nao kama familia. Hatupaswi kusahau kwamba katika Ufalme wa Mbinguni, Mungu Baba, Mwanae Yesu, Roho Mtakatifu, Watakatifu, na malaika na vitu vyote wataishi pamoja kama familia moja katika amani kamilifu. Ninamsifu Bwana kwa kutufanya sisi kuwa watu wake.

Aya ya 5: Wala hapatakuwa na usiku tena; wala hawana haja ya taa wala ya nuru ya jua; kwa kuwa Bwana Mungu huwatia nuru, nao watatawala hata milele na milele.

Kama Biblia inavyotueleza hapa, watakatifu watatawala katika Mbingu na Nchi Mpya pamoja na Bwana. Wale waliofanyika watakatifu wake kwa kuamini katika injili ya maji na Roho wamepokea wokovu utakaowawezesha kutawala

Mbinguni pamoja na Bwana na kisha kuishi katika utajiri, fahari, na mamlaka milele. Kwa kweli kwa mara nyingine tunashangazwa na injili hii, kwa kuwa injili hii tuliyonayo ina nguvu na baraka za ajabu!

Ninamsifu Mungu wetu wa Utatu kwa baraka hizi zote na utukufu. Watakatifu walioamini katika injili ya maji na Roho wakati walipokuwa hapa duniani watautawala Ufalme wa Mbinguni. Baraka hii ya kuyashangaza sana! Hatuwezi kufanya lolote zaidi ya kumsifu Bwana. Na kwa sababu hiyo ni sahihi na haki kumsifu Mungu.

Katika Mbingu na Nchi Mpya mahali ambapo watakatifu wanaishi, hakuna haja ya taa, balbu za umeme, au jua. Kwa nini? Kwa kuwa Mungu Mwenyewe amefanyika kuwa mwanga wa Mbingu na Nchi Mpya, na huko hakutakuwa na giza kamwe. Mungu amewaruhusu watakatifu kutawala huko milele wakiwa kama watoto wake. Baraka hii inatukumbusha tena jinsi neema ambayo watakatifu wameipokea toka kwa Bwana ilivyo kubwa.

Sisi watakatifu ni lazima tutambue jinsi baraka ya Mbinguni iliyowekwa kwetu ilivyo kuu hasa baada ya wokovu wetu. Neema ambayo Bwana wetu amewapatia watumishi wake ipo juu na kuu kuliko anga. Watakatifu hawapaswi kuiachia baraka hii kubwa ambayo Bwana ameitoa kuwapita. Hivyo, watakatifu wanachoweza kukifanya ni kutoa shukrani na kumsifu Bwana kwa ukuu wake, utukufu, na kwa baraka yake ambayo amewapatia, na kisha kuishi katika utajiri na fahari milele. Amin! Halleluy! Ninamsifu Mungu wetu!

Aya ya 6: Kisha akaniambia, Maneno haya ni amini na kweli. Naye Bwana, Mungu wa roho za manabii, alimtura malaika wake kuwaonyesha watumwa wake mambo ambayo hayana budi kuwako upesi.

“Maneno haya ni amini na kweli.” Ni hakika kwamba Bwana atazitimiza ahadi zake zote ambazo amezifunua kwa watakatifu kwa kupitia Ufunuo. Hii ndio sababu Bwana wetu ameelezea kabla kila kitu kwa watakatifu wake akiongea kama Roho Mtakatifu kupitia watumishi wa Mungu. Je, ni neno gani ambalo limebarikiwa zaidi katika Kitabu cha Ufunuo? Kuna Maneno mengi sana yaliyobarikiwa katika Kitabu cha Ufunuo, lakini Neno lililobarikiwa zaidi ni hili kwamba Mungu atawaruhusu watakatifu kutawala pamoja na Bwana katika Mbingu na Nchi Mpya na kisha kuishi kwa mamlaka na utukufu.

Kwa kuwa Mungu atalitimiza hili tendo hivi karibuni, basi watakatifu hawawezi kuiruhusu imani yao kuanguka na kuangukia katika mtego wa kukata tamaa. Watakatifu ni lazima wayashinde majaribu yote na dhiki kwa imani yao yenye tumaini. Bwana wetu hatashindwa kuutimiza unabii wake na kuzitimiza ahadi zake zote kwa watakatifu na Kanisa la Mungu. Bwana wetu aliwatuma watumishi wake hapa duniani na akawafanya kuyazungumza Maneno ya unabii, ili kwamba aweze kuwaeleza watakatifu na Kanisa lake kuhusu baraka hizi zote.

Aya ya 7: “Na tazama, naja upesi; heri yeye ayashikaye maneno ya unabii wa kitabu hiki.”

Kwa kuwa Maneno ya unabii wa Kitabu hiki cha Ufunuo yanatueleza juu ya mauaji ya watakatifu wakiifia-dini, basi kitabu hiki kinatudhihirishia kwamba utafika wakati ambapo watakatifu watateswa na Mpinga Kristo na kisha watapaswa kuilinda imani yao hadi kifo. Watakatifu ni lazima wayapokee mauaji ya kufia-dini kwa kuwa ni mapenzi ya Mungu. Kisha watashiriki katika ufufuo na unyakuo wao, watatawala katika Ufalme wa Kristo kwa miaka elfu moja itakayofuata, kisha

wataishi katika Mbingu na Mchi Mpya milele. Kwa hiyo, watakatifu ni lazima waliamini Neno lote la Mungu ambalo Bwana wetu amezungumza nao na kisha wanapaswa kuilinda imani yao. Wale waliobarikiwa zaidi katika nyakati za mwisho ni wale wanaoamini katika Neno la Bwana wetu na wanaoishi kwa imani.

Mungu amewaeleza watakatifu wake kwamba atakuja haraka. Bwana atakuja kwetu pasipo kukawia. Bwana wetu atakuja hapa duniani haraka ili kuzitimiza baraka zote za Mungu zinazotoka katika Neno la maji na Roho, Neno ambalo linawaletea watakatifu wokovu toka katika dhambi.

Baada ya kuokolewa, watakatifu ni lazima walishikilie Neno la baraka za Bwana zilizoahidiwa kwao, na kisha wanapaswa kuilinda imani yao. Ikiwa mioyo yao itaipoteza imani katika Neno la Bwana, basi ni hakika kwamba watapoteza kila kitu, na hii ndio sababu wanapaswa kuilinda imani yao katika Neno la Bwana. Kwa maneno mengine, Mungu anawaeleza watakatifu kuilinda imani yao katika Bwana.

Aya ya 8: Nami Yohana ndimi niliyeyasikia na kuyaona mambo hayo. Na hapo nilipoyasikia na kuyaona nalianguka, ili nisujudu mbele ya miguu ya malaika yule mwenye kunionyesha hayo.

Neno la Mungu la unabii linaenezwa na manabii na watakatifu. Hivyo ni lazima tumsifu Mungu anayetenda kama alivyoongea na hao manabii na watakatifu, na tunapaswa kumwabudu yeye tu. Katika nyakati fulani, baadhi ya watu hujaribu kujiinua juu kama Mungu. Wao hufanya hivyo kwa sababu wao ni matapeli au manabii wa uongo. Ni Mungu tu ndiye anayestahili kupokea sifa, kuabudiwa, kutukuzwa, na kutumikiwa.

Aya ya 9: “Naye akaniambia, Angalia, usifanye hivi; mimi ni mjoli wako, na wa ndugu zako manabii, na wa wale wayashikao maneno ya kitabu hiki. Msujudie Mungu.”

Tufanye nini ili tuweze kuwa manabii wa kweli wa Mungu? Kwanza ni lazima tuliamini fumbo la injili ya maji na Roho iliyotolewa na Bwana. Hapo ndipo tutakapofanywa kuwa watu wa Mungu, watakatifu, na kaka na akina dada kati yetu. Ni baada ya kufanya hivi ndipo Mungu anapoweza kutubadilisha kwa matendo yake. Wale waliofanyika kuwa watumishi wa Bwana ni lazima waliamini Neno lake na kisha kulitunza kwa imani yao. Hawa ndio wale ambao wanampatia Mungu utukufu wote badala ya kukaa nao wenyewe. Bwana wetu anastahili kupokea ibada zote na utukufu toka kwa kila mtu hapa ulimwenguni. Halleluya!

Aya ya 10: “Akaniambia, Usiyatie muhuri maneno ya unabii wa kitabu hiki, kwa maana wakati huo umekaribia.”

Neno la ahadi lililoandikwa katika Ufunuo halipaswi kufichwa. Kwa kuwa Neno hili litatimizwa hivi punde, na kwa sababu hiyo Neno hili linapaswa kushuhudiwa kwa kila mtu. Amini! Hebu sisi sote tuliamini Neno la unabii wa Kitabu cha Ufunuo na kisha tulihubiri.

Aya ya 11: “Mwenye kudhulumu na azidi kudhulumu; na mwenye uchafu na azidi kuwa mchafu; na mwenye haki na azidi kufanya haki; na mtakatifu na azidi kutakaswa.”

Wakati siku ya Bwana itakapokaribia, Bwana atawaruhusu wale wanaotafuta dhambi kuendelea kufanya dhambi, wale walio watakatifu kuendelea kuwa watakatifu, na wale walio wachafu kuendelea kuwa wachafu. Wakati nyakati za mwisho zitakapowadia, wale ambao mioyo yao imekuwa haina dhambi kwa kuamini katika injili ya Bwana ya maji na Roho

wataendelea kuitumikia injili hapa duniani, na wale walioutunza utakatifu wao uliotolewa na Bwana na walioyaishi maisha yao kwa imani wataendelea kuishi hivyo. Bwana wetu anatushauri kuilinda imani tuliyonayo sasa.

Aya ya 12: “Tazama, naja upesi, na ujira wangu u pamoja nami, kumlipa kila mtu kama kazi yake ilivyo.”

Kwa maneno mengine, Bwana wetu atakuja hivi punde, na kisha atawapatia watakatifu paradiso hapa duniani na katika Mbingu na Nchi Mpya, yaani kwa watakatifu ambao walifanya kazi ya kuieneza injili ya maji na Roho, na kisha kuwapa ujira kwa kujitoa kwao. Wakati watakatifu wanapoamini katika Neno la unabii wa kitabu cha Ufunuo, basi wataweza kuilinda imani yao hadi mwisho, kwa kuwa watakuwa wameiweka imani yao katika Bwana. Tunapaswa kutambua na kuamini kwamba Bwana atawapa ujira watakatifu kwa kazi yao pamoja na baraka kuu, hii ni kwa sababu Bwana wetu ni mwenye utukufu na mwenye rehema.

Aya ya 13: “Mimi ni Alfa na Omega, mwanzo na mwisho, wa kwanza na wa mwisho.”

Bwana wetu ndiye mwanzo na mwisho wa kila kitu. Yeye ni Mwokozi wetu na Mungu wetu, ni yeye ambaye ataleta ukamilifu wa wokovu ambao ni yeye tu ndiye anayeweza kutupatia. Historia yote katika ulimwengu mzima, historia ya Mbingu na dunia, ilianza na Bwana na itahitimishwa na Bwana.

Aya ya 14: Heri wazifuao nguo zao, wawe na amri kuuendea huo mti wa uzima, na kuingia mjini kwa milango yake.

Kwa kuwa kile ambacho Bwana amekiongea kwetu ni uzima, basi watakatifu wanaliamini Neno lake, wanalihubiri na

kulilinda. Wanafanya hivyo kwa sababu Neno ambalo Bwana wetu amelizungumza kwa watakatifu wake na kwa vitu vyote hapa ulimwenguni ni vya kweli. Hii ndio sababu watakatifu na watumishi wa Mungu wanalitunza Neno la Bwana katika akili zao. Wanailinda imani yao kwa kuliadini Neno la Mungu kwa nguvu zaidi, ili kwamba hatimaye wawe na haki ya kula matunda ya mti wa uzima uliopandwa katika Mbingu na Nchi Mpya.

Watakatifu waliofanyika kuwa wasio na dhambi kwa kuamini katika injili ya maji na Roho iliyotolewa na Bwana wanajaribu kuilinda imani yao, kwa kuwa wana haki ya kula matunda ya mti huu wa uzima huko Mbinguni.

Aya ya 15: Huko nje wako mbwa, na wachawi, na wazinzi, na wauaji, na hao waabuduo sanamu, na kila mtu apendaye uongo na kuufanya.

Wale wanaotajwa katika kifungu hicho hapo juu ndio wale wasioamini katika injili ya maji na Roho, na kwa sababu hiyo hawajazaliwa tena upya hadi nyakati za mwisho. Mpinga Kristo na wafuasi wake, hali akiwapotosha watu kwa ishara zake na miujiza, atakuwa amewadanganya kwa kitambo fulani huku akitoa madai ya uongo kuwa yeye Mpinga Kristo ni Mwokozi. Watakuwa wamewaongoza watu kuelekea katika maangamizi kwa kuwafanya waiabudu sanamu ya Mpinga Kristo. Bwana wetu atawaweka watu wa jinsi hiyo nje ya lango la Mji Mtakatifu, ili kwamba wasiweze kuingia katika Mbingu na Nchi Mpya. Mji wa Bwana upo wazi kwa ajili ya watakatifu tu ambao wameilinda imani yao inayoaminni katika injili ya maji na Roho.

Aya ya 16: “Mimi Yesu nimemtuma malaika wangu kuwashuhudia ninyi mambo hayo katika makanisa. Mimi ndimi

niliye Shina na Mzao wa Daudi, ile nyota yenye kung'aa ya asubuhi."

Bwana wetu ametutumia watumishi wa Mungu, na amewafanya washuhudia mambo yote ambayo yatakuja kutokea, amefanya haya yote kwa ajili ya Kanisa la Mungu na watakatifu wake. Yeye aliyewafanya waweze kushuhudia mambo haya yote ni Yesu Kristo, Mungu Mwenyewe ambaye amefanyika kuwa Mwokozi wa watakatifu.

Aya ya 17: Na Roho na Bibi-arusi wasema, Njoo! Naye asikiaye na aseme, Njoo! Naye mwenye kiu na aje; na yeye atakaye, na ayatwae maji ya uzima bure.

Kwa wale wote hapa duniani wanaoona njaa na kiu juu ya haki ya Mungu, basi Bwana wetu anawaalika katika Neno la maji ya uzima. Yeyote anayeona kiu na njaa juu ya haki ya Mungu basi mtu huyo amepewa baraka ya kuja kwa Bwana, amepewa baraka ya kuamini katika injili ya maji na Roho iliyotolewa na Bwana, na hivyo kuyanywa maji ya uzima. Hii ndio sababu Bwana wetu anamwambia kila mtu kuja kwa Yesu Kristo. Mtu yeyote anaweza kupokea ukweli wa injili ya maji na Roho bure. Lakini maji ya uzima hayatapatikana kwa wale ambao hawana tamani hili. Ikiwa unaitamani injili hii, wewe nawe, unaweza kuyanywa maji ya uzima yaliyotolewa na Bwana kwa kuamini katika injili ya maji na Roho.

Aya ya 18: Namshuhudia kila mtu ayasikiaye maneno ya unabii wa kitabu hiki, Mtu ye yote akiyaongeza, Mungu atamwongezea hayo mapigo yaliyoandikwa katika kitabu hiki.

Maandiko ni Neno la Mungu. Kwa hiyo, watu wanapoliamini Neno hili, basi ni hakika kwamba hatuwezi kuliongeza au kulipunguza. Aya hii inatueleza kwamba kwa kuwa Neno la Maandiko ni Neno la Mungu, hakuna anayeweza

kuliamini kwa kuongeza au kupunguza Neno la kweli lililo andikwa, wala hakuna anayeweza kuamini kwa kuuacha ukweli ulioandikwa. Hivyo ni lazima tuwe waangalifu. Kila Neno lililozungumzwa na Mungu ni la muhimu; hakuna linaloweza kuachwa kana kwamba si la muhimu.

Hata hivyo, bado watu wanaendelea kuidharau injili ya maji na Roho iliyotolewa na Bwana. Hii ndio sababu watu hao bado hawajakombolewa toka katika dhambi zao, na ndio sababu bado wamebakia ni wenye dhambi, na ndio maana wanaingia katika maangamizi yao—pamoja na kuwa wanadai kumwamini Yesu kuwa ni Mwokozi wao. Bwana wetu amewapatia maji na damu yake ili kuwakomboa wenye dhambi toka katika dhambi (1 Yohana 5:4-5, Yohana 3:3-7). Hata hivyo bado kuna watu wengi wanaiwekea umuhimu damu ya Yesu ya Msalaba tu; na kwa sababu hiyo bado hawajakombolewa toka katika dhambi zao, na hivyo watakabiliana na mapigo yote yaliyoandikwa katika Kitabu hiki cha Ufunuo.

Wale wanaodai kumwamini Yesu na huku wakiudharau ukweli kwamba Kristo alizishughulikia dhambi zote za ulimwengu kwa ubatizo wake toka kwa Yohana watakabiliana na adhabu ya kutisha zaidi huko kuzimu. Kwa nini? Kwa sababu hawaiamini injili ya maji na Roho ambayo Bwana amewapatia, na kwa sababu hiyo bado hawajazaliwa tena upya. Yeyote anayeidharau injili ya maji na Roho iliyotolewa na Bwana ataingia katika ziwa la moto unaowaka milele na atakabiliana na mateso ya milele—kwa kweli siku ya kujuta itawajia watu wote wa jinsi hiyo.

Aya ya 19: Na mtu ye yote akiondoa lo lote katika maneno ya unabii wa kitabu hiki, Mungu atamwondolea sehemu yake katika ule mti wa uzima, na katika ule mji mtakatifu, ambao habari zake zimeandikwa katika kitabu hiki.

Je, kuna yeyote miongoni mwetu ambaye imani yake ya Kikristo inaliacha Neno la kweli, kwamba Yesu alizichukua katika mwili wake dhambi zote za mwanadamu kwa kuupokea ubatizo toka kwa Yohana, na kwamba alizisafishilia mbali dhambi hizo mara moja wakati aliposulubiwa? Ikiwa ni hivyo, basi ni hakika kwamba watu wa jinsi hiyo watapoteza haki ya kuingia katika Mji Mtakatifu wa Mungu, kwa kuwa hawaamini katika ubatizo ambao Bwana wetu aliupokea toka kwa Yohana ili kuzichukua dhambi zote za mwanadamu katika mwili wake mara moja. Na kwa kufanya hivyo wanafanya dhambi ya kuidharau injili ya maji na Roho iliyotolewa na Bwana.

Kwa hiyo, Wakristo ni lazima wauchukue katika mioyo yao ukweli kwamba Yesu alizichukua katika mwili wake dhambi za mwanadamu kwa ubatizo wake aliupokea toka kwa Yohana. Pasipo kuamini hivyo, watu hao wataondolewa toka katika utukufu wa kuingia katika Mji Mtakatifu uliotolewa na Bwana. Ikiwa unaamini kwamba Yesu ni Mwokozi wako, basi ni lazima usafishwe dhambi zako zote kwa kuamini kwa moyo wako wote kwamba Yesu alikuja hapa duniani, alibatizwa na Yohana katika Mto Yordani ili kuwaokoa wanadamu kikamilifu toka katika dhambi za ulimwengu, na kwamba kwa sababu hiyo alizisafisha dhambi zote zilizotendwa na mwanadamu kwa kuzichukua dhambi hizo katika mwili wake. Kijito ambacho unaweza kusafishwa uchafu wako wote ni ubatizo ambao Bwana wetu aliupokea. Baada ya kuzichukua katika mwili wake dhambi zetu za ulimwengu, Bwana wetu aliimwaga damu yake na kufa Msalabani ili kulipa mshahara wa dhambi zetu zote kwa kifo chake.

Ubatizo ambao Yesu aliupokea toka kwa Yohana ni ushahidi uliothibitishwa juu ya wokovu wetu toka katika dhambi. 1 Petro 3:21 inatueleza kwamba, *“Mfano wa mambo hayo ni ubatizo, unaowaokoa ninyi pia siku hizi; (siyo kuwekea*

mbali uchafu wa mwili, bali jibu la dhamiri safi mbele za Mungu), kwa kufufuka kwake Yesu Kristo.” Ni lazima tutambue kwamba Yesu alizichukua dhambi za ulimwengu kwenda Msalabani na akaimwaga damu yake ili kulipa mshahara wa dhambi za wanadamu kwa kifo chake, alifanya hayo yote kwa ajili yetu.

Hii ndio sababu Mungu anatupatia tena Neno lake la kutuonya wanadamu wote katika aya ya 19. Ni lazima tuliamini Neno la injili ya maji na Roho kama lilivyo, pasipo kuliongeza au kulipunguza.

Aya ya 20: Yeye mwenye kuyashuhudia haya asema, Naam; naja upesi. Amina; na uje, Bwana Yesu!

Hivi punde Bwana wetu atakuja hapa ulimwenguni. Na watakatifu, waliopokea ondoleo la dhambi zao kwa kumwamini Bwana na waliofunikwa utukufu wa Mbinguni, wanasubiria kwa hamu zaidi ujio wa Bwana mara ya pili. Kwa kuwa wale wanaoamini katika injili ya maji na Roho wamejiandaa wote kukutana na Bwana anayekuja, wanasubiria ujio wa Bwana ili awavike baraka yake iliyoahidiwa kwa watakatifu. Kwa hiyo, watakatifu wanasubiri kwa shauku ujio wa Bwana mara ya pili katika imani na shukrani.

Aya ya 21: Neema ya Bwana Yesu na iwe pamoja nanyi nyote. Amina.

Mtume Yohana anahitimisha Kitabu cha Ufunuo kwa sala ya baraka kwa neema ya Bwana wetu Yesu Kristo kuwa pamoja na wale wanaotamani kuingia katika Mji Mtakatifu uliotolewa na Mungu. Hebu sisi nasi, tuwe watakatifu wanaoingia Mji Mtakatifu uliotolewa na Yesu Kristo kwa imani pasipo kushindwa. ☒

Uwe na Furaha na Thabiti Katika Tumaini la Utukufu

< Ufunuo 22:1-21 >

Ufunuo 22:6-21 inatuonyesha juu ya tumaini la Mbinguni. Sura ya 22, ambayo ni aya ya mwisho katika Kitabu cha Ufunuo, inashughulikia juu ya uthibitisho na uaminifu unabii wa Maandiko na juu ya mwaliko wa Mungu katika Yerusalemu Mpya. Sura hii inatueleza kwamba Yerusalemu Mpya ni zawadi ya Mungu iliyotolewa kwa watakatifu ambao wamezaliwa tena upya kwa kuamini katika injili ya maji na Roho.

Mungu aliwafanya watakatifu waliozaliwa tena upya kumsifu Mungu katika nyumba ya Mungu. Katika hili ninamshukuru sana Bwana. Maneno hayawezi kuelezea jinsi tunavyoshukuru kwa kitendo cha Mungu kuturuhusu kuwa watakatifu, ambao kwa kuamini katika injili ya maji na Roho tumesamehewa dhambi zetu zote mbele ya Bwana. Ni nani ambaye hapa duniani ataweza kupokea baraka kubwa kuliko hii tuliyoipokea? Hakuna hata mmoja!

Kifungu kikuu cha leo ni sura ya mwisho ya kitabu cha Ufunuo. Katika Kitabu cha Mwanzo, tunaona Mungu akitengeneza miundo mbinu yote kwa ajili ya mwanadamu, na katika Kitabu cha Ufunuo, tunaomuona Mungu akiitimiza mipango hii yote. Neno la Ufunuo linaweza kuelezewa kuwa ni mchakato wa kuharibu ulimwengu huu ili kuyakamilisha matendo yote kwa ajili ya mwanadamu kwa mujibu wa mpango wake. Kwa kupitia Neno la Ufunuo, tunaweza kuona Ufalme wa Mbinguni, tunaweza kuuona Ufalme wa Mbinguni

mapema kama ulivyofunuliwa na Mungu.

Muundo wa Mji wa Mungu na Bustani Yake

Sura ya 21 inazungumzia juu ya Mji wa Mungu. Aya ya 17-21 inatueleza hivi: *“Akaupima ukuta wake, ukapata dhiraa mia na arobaini na nne, kwa kipimo cha kibinadamu, maana yake, cha malaika. Na majenzi ya ule ukuta wake yalikuwa ya yaspi, na mji ule ulikuwa wa dhahabu safi, mfano wa kioo safi. Na misingi ya ukuta wa mji ilikuwa imepambwa kwa vito vya thamani vya kila namna. Msingi wa kwanza ulikuwa yaspi; wa pili yakuti samawi; wa tatu kalkedoni; wa nne zumaridi; wa tano sardoniki; wa sita akiki; wa saba krisolitho; wa nane zabarajadi; wa kenda yakuti ya manjano; wa kumi krisopraso; wa kumi na moja hiakintho; wa kumi na mbili amethisto. Na ile milango kumi na miwili ni lulu kumi na mbili; kila mlango ni lulu moja. Na njia ya mji ni dhahabu safi kama kioo kiangavu.”*

Hili Neno la Ufunuo linaielezea Yerusalemu Mpya mji ambao Mungu ataupatia kwa watu wake waliozaliwa tena upya. Tunaambiwa kwamba, huu Mji wa Yerusalemu huko Mbinguni umejengwa kwa aina kumia na mbili za vito vya thamani, huku ukiwa na milango kumi na miwili ya lulu.

Kisha sura ya 22 inazungumzia juu ya hali inayoonekana katika bustani ya Mji wa Yerusalemu. Aya ya kwanza inasema hivi, *“Kisha akanionyesha mto wa maji ya uzima, wenye kung’aa kama bilauri, ukitoka katika kiti cha enzi cha Mungu, na cha Mwana-Kondoo.”* Katika Mji wa Mungu, mto wenye kungaa kama bilauri unatiririka na kupita katika bustani yake, ni kama vile Mungu alivyoumba mito minne ili itiririke katika Bustani ya Edeni. Mungu anatueleza kwamba hii ni bustani ambayo wenye haki wataifurahia hapo baadaye.

Kifungu kikuu pia kinatueleza kwamba mti wa uzima upo katika bustani hii; na kwamba unazaa aina kumi na mbili za matunda, na kutoa matunda yake kila mwezi; na kwamba majani ya huo mti ni dawa ya kuwatibu mataifa. Inaonekana kwangu mimi kwamba hali ya Mbinguni ni mahali ambapo sio tu watu wanakula matunda tu, bali hata majani yake yanatumika, hii ni kwa sababu majani haya yana nguvu ya uponyaji.

Baraka Zinazopokelewa na Wenye haki!

Biblia inatueleza kwamba katika Mji wa Mungu, *“Wala hapatakuwa na laana yo yote tena. Na kiti cha enzi cha Mungu na cha Mwana-Kondoo kitakuwamo ndani yake. Na watumwa wake watamtumikia; nao watamwona uso wake, na jina lake litakuwa katika vipaji vya nyuso zao.”* Biblia inatueleza kwamba sisi ambao tumesamehewa dhambi zetu zote tutatawala milele pamoja na Mungu ambaye ametuokoa.

Wale ambao dhambi zao zimetoweshewa mbali kwa kuamini katika injili ya maji na Roho wakati walipokuwa wakiishi hapa duniani sio tu kwamba watapokea baraka ya kutoweshewa dhambi zao zote, bali watakuwa pia ni wana wa Mungu, watakuwa na malaika wengi wakiwatumikia watakapokuwa wameingia katika Ufalme wa Mungu, kisha watatawala na Bwana milele. Kifungu hiki kinatueleza kwamba wenye haki watapokea toka kwa Mungu baraka za milele kama vile kusimama kando ya mto wa uzima na kula matunda ya uzima, na kwamba kama sehemu ya baraka hii hakutakuwa na magonjwa tena.

Pia kifungu hiki kinatueleza kwamba pia hawatahitaji mwanga wa dunia hii wala jua, kwa kuwa wataishi milele pamoja na Mungu katika Ufalme wa Mungu wenye utukufu,

wataishi na Mungu ambaye yeye mwenyewe ni nuru. Kwa maneno mengine, watoto wa Mungu waliopokea ondoleo la dhambi zao kwa kupitia injili ya maji na Roho, wataishi kama Mungu. Hii ndio baraka ambayo wenye haki wanaipokea.

Mtume Yohana, mmoja kati ya wanafunzi kumi na mbili wa Yesu ambaye aliandika Kitabu cha Ufunuo, pia ndiye aliyeandika Injili ya Yohana na Nyaraka tatu za Agano Jipya—yaani Waraka wa Kwanza wa Yohana, Waraka wa pili wa Yohana, na Waraka wa tatu wa Yohana. Yohana alipelekwa uhamishoni katika Kisiwa cha Patmo kwa sababu ya kukataa kumtambua Mtawala wa Rumi kuwa ni Mungu. Akiwa katika uhamisho huu, Mungu alimtuma malaika wake kwa Yohana na akamwonyesha yale ambayo yatakuja kutokea hapa duniani, huku akimfunulia na kumwonyesha juu ya maangamizi ya ulimwengu na mahali ambapo hatimaye watakatifu wataingia na kuishi ndani yake.

Ikiwa tutakielezea Kitabu cha Mwanzo kama msingi wa uumbaji, basi tunaweza pia kukielezea Kitabu cha Ufunuo kama ni ukamilifu wa msingi wa uumbaji. Kwa miaka 4,000, Bwana wetu amewaeleza wanadamu kwamba atazifanya dhambi zao zote kutoweka kwa kupitia Yesu Kristo. Na katika kipindi cha Agano Jipya, basi wakati ulipowadia, Mungu alizimitiza ahadi zake zote, kwamba atamtuma Yesu Mwokozi hapa duniani, na kwamba atamfanya Yesu abatizwe na Yohana, na kwamba atazifanya dhambi zote za ulimwengu kutoweka kwa kupitia damu ya Yesu Msalabani.

Wakati mwanadamu alipoangukia katika uongo wa Ibilisi na kisha kunaswa katika uharibifu wake kwa sababu ya dhambi, basi Bwana wetu aliahidi kwamba atamkomboa mwanadamu toka katika dhambi zake. Kisha akamtuma Yesu Kristo, akamfanya abatizwe na kuimwaga damu yake, na kwa sababu hiyo amemwoko mwanadamu kikamilifu toka katika dhambi zake.

Kwa kupitia Neno la Ufunuo, Mungu ameandika kwa kina juu ya aina ya utukufu unaowangojea wale waliopokea ondoleo la dhambi zao, na juu ya aina ya adhabu inayowangojea wenye dhambi. Kwa maneno mengine, Mungu anatueleza kwamba, kuna watu wengi sana ambao wataishia kuzimu pamoja na kuwa wanadai kumwamini Mungu kwa uaminifu (Mathayo 7:21-23).

Bwana wetu amewaokoa wenye dhambi toka katika dhambi zao, na ametueleza kutolitia muhuri Neno la baraka ambalo ameliandaa kwa ajili ya wenye haki.

Ni Akina Nani Wenye Kudhulumu na Wachafu?

Aya ya 11 inasema, *“Mwenye kudhulumu na azidi kudhulumu; na mwenye uchafu na azidi kuwa mchafu; na mwenye haki na azidi kufanya haki; na mtakatifu na azidi kutakaswa.”* Ni akina nani hawa wenye “kudhulumu”? Wenye kudhulumu si wengine zaidi ya wale wasioamini katika upendo wa injili ya maji na Roho iliyotolewa na Bwana. Kwa kuwa watu wanatenda dhambi wakati wote, basi wanapaswa kuamini katika injili ya maji na Roho ambayo Bwana amewapatia na hivyo kuishi maisha yanayomtukuza Mungu. Kwa kuwa ni Mungu tu ndiye anayepaswa kupokea utukufu toka kwa mwanadamu, na kwa kuwa ni yeye ndiye aliyetuvika katika neema yake ya wokovu, basi sisi sote tunapaswa kuishi maisha ambayo yanamtukuza Mungu. Wale wasiomtii Mungu ni wachafu, hii ni kwa sababu hawaliamini Neno lake wakati wote.

Katika Mathayo 7:23, Bwana wetu aliwaambia watu wa dini wanaodai kumwamini Yeye kwa midomo tu akisema, *“Ndipo nitawaambia dhahiri, Sikuwajua ninyi kamwe; ondokeni kwangu, ninyi mtendao maovu!”* Bwana wetu

aliwaita watu hao kuwa ni *“ninyi mtendao maovu.”* Aliwakemea kwa sababu watu hawa wanamwamini Yesu kwa kupitia matendo yao tu, badala ya kuamini katika injili ya maji na Roho kwa mioyo yao yote. Kutenda maovu ni dhambi, pia kutoliamini Neno la Mungu kwa moyo pia ni dhambi. Hivyo basi, watu wanapotenda maovu mbele za Mungu, ina maanisha kwamba hawauamini upendo na wokovu wa maji na Roho ambao Mungu amewapatia. Kutenda maovu si kitu kingine zaidi ya kulibadilisha Neno la Mungu ili kukidhi matakwa ya mtu binafsi na kisha kuamini katika kile mbacho mtu anafikiri kuwa ni sahihi.

Wale wanaomwamini Yesu kwa kweli ni lazima wakipokee kile ambacho Mungu ameshakianzisha kama kilivyo. Tunamwamini Yesu, lakini huku kumwamini Yesu hakuturuhusu kwa namna yoyote ile kubadili mpango wa Mungu na ukamilifu wake wa wokovu. Ujumbe wa kifungu hiki kikuu ni kwamba Mungu atatoa uzima wa milele kwa wale wote wanaamini katika wokovu wake kama unavyojitegemea, lakini atawapelekea kuzimu wale wote wanaoifanyia mabadiliko Sheria ya Mungu na kisha kuamini kwa namna zile zinazoridhisha nia zao binafsi.

“Mwenye kudhulumu na azidi kudhulumu.” Hii inatueleza kwamba watu wa jinsi hiyo, hali wakiwa katika ugumu wao, hawauamini wokovu uliopangwa na Mungu. Wao ni wenye kudhulumu, na hii ndio sababu wakati wote wenye dhambi ni wadhulumaji.

Kifungu hiki kinaendelea kusema, *“na mwenye uchafu na azidi kuwa mchafu.”* Hii inawangumzia wale ambao, pamoja na kuwa ni wenye dhambi, na mbali na ukweli kwamba Yesu amezifanya dhambi zao zote kutoweka kwa maji na kwa Roho, watu hao hawana dhamira yoyote ile ya kuzisafisha dhambi zao kwa imani. Kwa hiyo, Mungu atawaacha kivyao hawa

watu wasio na imani kama walivyo, kisha atawahukumu. Mungu amewafanya wanadamu waweze kuzitambua dhambi katika mioyo yao kwa kuwapatia dhamiri. Lakini bado hawana dhamira ya kuzisafisha dhambi katika mioyo yao, wala kuifahamu injili ya maji na roho. Mungu anatuueleza kwamba atawaacha watu hawa wawe kama walivyo.

Mithali 30:12 inasema kuwa, *“Kuna kizazi cha watu walio safi machoni pao wenyewe; Ambao hawakuoshwa uchafu wao.”* Wakristo-wakidini wa siku hizi ni watu ambao hawataki kusafishwa dhambi zao. Hata hivyo, Yesu, ambaye yeye mwenyewe ni Mungu, alikuja hapa duniani kuwaokoa wenye dhambi, alizisafishilia mbali dhambi zao zote kwa kuzichukua dhambi za mwanadamu katika mwili wake kwa ubatizo wake mara moja, alihukumiwa mara moja kwa ajili ya dhambi hizo zote kwa kusulubiwa, na kwa sababu hiyo ametuokoa toka katika dhambi sisi tunaoamini.

Kwa yeyote anayefahamu na kuamini katika Neno la injili ya maji na Roho ambayo kwa hiyo Yesu Kristo amewaokoa wenye dhambi, basi Bwana wetu amemruhusu mtu huyo kusamehewa dhambi zake zote bila kujalisha aina ya dhambi husika. Hata hivyo, kuna watu wengi ambao bado hawajapokea ondoleo la dhambi kwa kupitia imani. Hawa ndio wale ambao wameamua kutojaribu kuzisafishilia mbali dhambi zao. Mungu atawafanya wawe kama walivyo.

Huku ni kuitimiza haki ya Mungu. Hii ni kuonyesha kuwa Mungu ni Mungu wa haki. Watu hawa watatupwa katika moto wa kibiri na kuungua milele. Ndipo watakapotambua jinsi Mungu wa haki alivyo. Pamoja na kuwa wanamkiri Yesu kuwa ni Mwokozi, basi ukweli ni kuwa hawazidanganyi dhamiri zao bali pia wanazichafua dhamiri za wengine. Kwa kuwa wameikataa injili ya maji na Roho, basi Mungu atawalipa sawasawa na walivyofanya. Siku itakapowadia, Mungu ataileta

ghadhabu yake kwa wale wote wanaostahili.

Mpe Kila Mtu Sawa na Matendo Yake

Kuna aina mbili za watu hapa duniani: wale waliokutana na Bwana, na wale ambao hawajakutana naye. Bwana wetu atamlipa kila mtu kulingana na matendo yake.

Hakuna mtu anayeweza kuhesabiwa haki kwa kutegemea haki yake binafsi, lakini kuhesabiwa haki kunatoka kwa Yesu. Yesu alizichukua dhambi zetu zote za mwanadamu katika mwili wake kwa ubatizo wake mara moja na kwa wote, alizichukua dhambi za ulimwengu kwenda Msalabani, na hali akiwa Msalabani alikabiliana na hukumu ya dhambi ambayo mwanadamu alipaswa kukabiliana nayo. Mwanadamu anaweza kuwa mwenye haki kwa kuuamini ukweli huu. Wale wanaouamini ukweli huu ndio wale waliokutana na Bwana.

Mungu anawataka wale wasio na dhambi, yaani wale wanaofahamu na kuamini katika ukweli huu, kuihubiri injili hapa duniani na kulitunza Neno lake takatifu kadri wanavyoendelea kuishi. Mungu anasema, *“na mtakatifu na azidi kutakaswa.”* Ni lazima tuishike amri hii katika mioyo yetu, tuilinde imani yetu takatifu, na kisha kuihubiri injili kamilifu. Kwa nini? Kwa sababu kuna watu wengi sana hapa ulimwenguni ambao hawaifahamu injili hii ya kweli, na kama matokeo imani yao inakuwa si sahihi.

Wapo wengine hapa duniani ambao pasipo masharti yoyote wanaunga mkono fundisho la kiimani la utakaso unaozidi. Pamoja na kuwa Bwana amekwisha kuzifanya dhambi za mwanadamu kutoweka, watu wanaoamini katika fundisho hilo bado wanaendelea kuomba sala za toba kila siku, hata hivi sasa. Wanajaribu kuzisafishilia mbali dhambi zao kwa

kutoa sala za toba kila siku, wanafanya hivyo ili kupata utakaso unaozidi ili kwamba hatimaye waweze kuwa wenye haki ambao hawatendi dhambi yoyote, na hivyo kuwa mfano wa Yesu. Lakini Yesu Kristo, Mwana wa Mungu, ni Mfalme, Nabii na Kuhani Mkuu.

Watumishi wa kweli wa Mungu si tu wanafanya kazi ya kuhakikisha kwamba kila mtu anasamehewa dhambi zake, bali wanamwongoza kila mtu kuelekea katika ukweli kama watenda kazi wa Mungu. Watumishi wa Mungu, ni wale ambao, kwa kupitia Neno lililoandikwa wana ufahamu sahihi wa mambo ambayo yatakuja kutokea.

Aya ya 12-13 inasema, *“Tazama, naja upesi, na ujira wangu u pamoja nami, kumlipa kila mtu kama kazi yake ilivyo. Mimi ni Alfa na Omega, mwanzo na mwisho, wa kwanza na wa mwisho.”* Kwa hakika Bwana wetu ni Alfa na Omega, Mwanzo na Mwisho, Wakwanza na Wamwisho. Tunapaswa kuamini kila kitu ambacho Bwana ametuambia tena kwa hofu.

Bwana wetu atawazawadia watakatifu kwa baraka ambazo ni kubwa sana kuliko matendo yao, hii ni kwa sababu Bwana ni mwenye utukufu na mwenye rehema. Bwana ni mwenye rehema na mwenye upole ambaye ametuokoa toka katika dhambi zetu zote, na kama vile Neno la Ufunuo linavyosema kuwa, Mungu ni wa mamlaka na haki ambaye ataitimiza kazi yake ya wokovu. Na ukamilifu huu wa wokovu, ambao utakuja hivi punde, unawaruhusu watakatifu kuingia kwa utukufu katika Mji wa Yerusalemu Mpya, ambao ni zawadi ya kutosha ya Bwana wetu kwa ajili ya kazi zao.

Wamebarikiwa Wale Wanaozifanya Amri Zake

Tukiendelea na aya ya 14, kifungu kikuu kinatueleza

kwamba, *“Heri wazifuao nguo zao, wawe na amri kuuendea huo mti wa uzima, na kuingia mjini kwa milango yake.”* Kwa kuzingatia aya hii, kuna watu wengi sana wanaodai kwamba wokovu unakuja kwa matendo—kwa maneno mengine, ni kwa kufuata amri zake.

Lakini ni kweli kwamba, “kuzifanya amri zake” maana yake ni kuamini na kulishika Neno la Mungu lililoandikwa kwa imani. Mtume Yohana aliandika, *“Na hii ndiyo amri yake, kwamba tuliadini jina la Mwana wake Yesu Kristo, na kupendana sisi kwa sisi, kama alivyotupa amri”* (1 Yohana 3:23). Hivyo, tunapoamini katika injili ya kweli ya maji na Roho, na kisha kujitoa katika kuihubiri injili ili kuziokoa nafsi zote zilizopotea katika ulimwengu wote, basi hapo tunakuwa tukizifanya amri zake mbele ya uwepo wa Mungu.

Ukweli ni kwamba dhambi zote tunazozitenda katika maisha yetu yote zimekwisha toweshewa mbali kwa kupitia ubatizo wa Yesu alioupokea toka kwa Yohana Mbatizaji. Baada ya ubatizo huu, inafuatia damu ya Bwana Msalabani, ufufuo wake, na kupaa kwake mbinguni, vitua ambavyo vimetufanya kuzaliwa tena upya na kuishi maisha mapya katika ukweli huu.

Wakati wowote tunapoangukia katika dhambi baada ya kuwa tumezaliwa tena upya, basi hapo tunapaswa kulirudia Neno la kweli ambalo limetusafisha dhambi zetu zote; hali tukitambua kwamba mizizi yetu ipo hivyo na kwamba hatuwezi kukwepa kufanya dhambi; na kisha kurudi tena katika imani ya Mto Yordani ambapo Bwana wetu aliuchukua udhaifu wetu wote, mapungufu yote, na dhambi, kisha tukabatizwa pamoja na ubatizo wa Yesu na kisha tukazikwa pamoja na Kristo aliyekufa Msalabani. Tunapofanya hivyo, basi hatimaye tunaweza kuwekwa huru toka katika dhambi tulizozifanya baada ya kuzaliwa tena upya, na kisha kuoshwa dhambi zetu na kuwa safi. Pia tunapaswa kuishikilia haki ya Mungu kwa

kuukiri wokovu wetu wa milele wa upatanisho na kwa kumshukuru Mungu kwa wokovu wake unaodumu na mkamilifu.

Yesu amekwishazioshelea mbali dhambi zote za ulimwengu huu. Tatizo lipo katika dhamiri zetu. Ingawa Bwana wetu amekwisha zishughulikia dhambi zote za ulimwengu kwa ubatizo wake, na kwa kuwa sisi wanadamu hatufahamu kwamba Bwana amekwisha zisafishilia mbali dhambi zetu zote kwa ubatizo wake na kwa kusulubiwa kwake, basi ndio maana dhamiri zetu zinaendelea kupata shida kama vile ni watenda dhambi. Hivyo ndio maana wakati mwingine tunajaribiwa kufikiri kwamba bado tuna dhambi ndani yetu, wakati tunachopaswa kukifanya ni kuamini kwamba dhambi zetu zimekwisha oshelewa mbali kwa kupitia injili ya maji na Roho iliyotolewa na Yesu Kristo.

Ikiwa mioyo yetu imeumizwa kwa dhambi zetu, basi tutayatibu vipi majeraha ya dhambi hizi?

Ukweli ni kwamba majeraha haya yote, yanaweza kuponywa kwa kuamini katika injili ya maji na Roho—yaani kwa kuamini kwamba Bwana wetu alizichukua dhambi zote za ulimwengu katika mwili wake kwa kubatizwa na Yohana katika Mto Yordani, na kwamba alizifanya dhambi zote kutoweka kwa kuzichukua dhambi hizo kwenda Msalaba wa Kalvari na kuimwaga damu yake Msalabani. Kwa maneno mengine, dhambi za matendo yetu yote tunayoyafanya baada ya kupokea ondoleo la dhambi zinaweza pia kuoshwa tunapoikiri tena imani yetu katika injili kwamba Yesu Kristo amekwisha zisafishilia mbali dhambi zetu zote, zikiwemo dhambi hizo za matendo yetu.

Dhambi za ulimwengu huu zilisafishiliwa mbali mara moja wakati Yesu Kristo alipoupokea ubatizo wake na kusulubiwa. Kwa hiyo, hakuna dhambi ya ulimwengu au

dhambi binafsi ambayo inahitaji kuoshelewa mbali mara mbili au tatu, kana kwamba zinapaswa kusafishwa katika hali ya mwendelezo. Ikiwa mtu anafundisha kwamba ondoleo la dhambi linapatikana kidogo kidogo, basi injili ambayo mtu huyo anaihubiri ni injili ya uongo.

Mungu amezifanya dhambi za ulimwengu kutoweka mara moja. Waebrania 9:27 inatueleza kwamba, *“Na kama vile watu wanavyowekewa kufa mara moja, na baada ya kufa hukumu”* Kama tunavyokufa mara moja kwa sababu ya dhambi, basi ni mapenzi ya Mungu kwamba tuweze kupokea ondoleo la dhambi mara moja. Kwa kuja hapa duniani, Yesu alizichukua dhambi zetu zote katika mwili wake mara moja, akafa mara moja, kisha akahukumiwa kwa niaba yaetu mara moja pia. Hakufanya mambo haya yote mara kadhaa.

Tunapokea ondoleo la dhambi kwa kumwamini Yesu Kristo kwa mioyo yetu yote, basi ni sahihi pia kuamini mara moja na kisha kupokea ondoleo la milele la dhambi zetu zote. Kwa kuwa dhambi tunazozifanya kuanzia hapo na kuendelea zinaidhuru mioyo yetu katika nyakati mbalimbali, basi tunachopaswa kukifanya ni kwenda mbele ya Neno hili la wokovu, kwamba Bwana wetu amezioshelea mbali dhambi zetu zote mara moja, na hivyo tutaweza kuiponya mioyo yetu iliyodhoofu kwa imani: “Bwana, nina mapungufu mengi sana. Nimefanya dhambi tena. Sikuweza kuishi maisha makamilifu kwa mujibu wa mapenzi yako. Lakini wakati ulipobatizwa na Yohana katika Mto Yordani na kisha kuimwaga damu yake Msalabani, je hukuzishughulikia dhambi zangu hizi zote? Haleluya! Ninakusifu Ewe Bwana!”

Kwa imani hiyo, tunaweza kulithibitisha na kulikiri ondoleo la dhambi zetu na kisha kumshukuru Bwana wakati wote. Sura hii ya mwisho ya Ufunuo inatueleza kwamba kwa kwenda mbele za Yesu Kristo, ambaye ni mti wa uzima, na

kwa kuamini kwamba Bwana amekwishazioshelea mbali dhambi zote za ulimwengu, basi wale waliopokea ondoleo la dhambi wamepata haki ya kuingia katika Ufalme wa Mungu, na katika Mji Mtakatifu kwa kupitia imani yao.

Yeyote anayetaka kuingia katika mji wa Mungu ni lazima aamini kwamba Yesu Kristo amezipatanisha dhambi za mwanadamu milele kwa kuupokea ubatizo wake mara moja na kwa kuimwaga damu yake. Pamoja na kwamba sisi sote tuna matendo yenye mapungufu, kwa kuamini katika ubatizo na damu ya Yesu Kristo Mwokozi wetu, basi imani yetu inaweza kuthibitishwa na Mungu kuwa ni kweli, na sisi sote tunaweza kwenda mbele ya mti wa uzima.

Ni kwa kuamini tu katika ubatizo wa Kristo na damu yake ndipo tunapoweza kupata haki ya kunywa maji ya uzima yanayotiririka toka katika Yerusalemu Mpya na pia kuyala matunda ya mti wa uzima. Kwa kuwa sifa ya kuingia katika Mbingu na Nchi Mpya, ambayo haiwezi kutwaliwa na yeyote yule, inatoka katika injili ya maji na Roho, basi sisi tunapaswa kuilinda imani yetu na kisha kisha kuihubiri kwa watu wengine. Vivyo hivyo, sentensi inayosemae “(ku) zitenda amri zake” ina maanisha ni kwa sisi kuushinda ulimwengu kwa imani—yaani ni kuamini na kuishika injili ya maji na Roho, na kisha kujitoa katika kuihubiri injili ya kweli ulimwenguni mwote.

Katika Mathayo 22, Yesu anathua juu ya “mfano wa sherehe ya harusi.” Hitimiso la mfano huu ni kwamba wale wasio na mavazi ya harusi watatupwa katika giza la nje (Mathayo 22:11-13). Tunawezaje kuyavaa mavazi yetu ya harusi ili kushiriki katika karamu ya harusi ya Mwana-kondoo, na mavazi hayo ya harusi ni yapi? Mavazi ya harusi ambayo yanatuwezesha kuingia katika karamu ya harusi ya Mwana-kondoo ni haki ya Mungu tunayopewa kupitia injili ya maji na Roho. Je, unaamini katika injili ya maji na Roho? Ikiwa ni hivyo,

basi ni wazi kuwa umevikwa katika haki ya Mungu ili uweze kuingia Mbinguni ukiwa bibi harusi wa Mwana usiye na dhambi.

Sisi tuliozaliwa tena upya, pia tunatenda dhambi kila siku. Hata hivyo, ni watakatifu tu waliosamehewa dhambi zao mbele ya Mungu ndio wanaostahilishwa kuzioshelea mbali dhambi zao za kila siku katika mavazi yao ya haki kwa imani. Kwa kuwa wale wanaotenda dhambi hawajasamehewa basi hawastahilishwi kuzioshelea mbali dhambi zao, hii ni kwa sababu hawataweza kujiosha kutokana na dhambi zao kwa kutegemea sala za toba za kila siku. Ule kweli kwamba tumeokolewa toka katika dhambi za ulimwengu kwa kumwamini Bwana kumewezekana kwa kufahamu na kuamini kwamba Bwana amezioshelea mbali dhambi zetu zote za ulimwengu kwa kuja hapa ulimwenguni, kwa kubatizwa, na kwa kuimwaga damu yake.

Kwa maneno mengine, tunaweza kuthibitisha kwamba dhambi zetu za kila siku zimekwisha oshelewa mbali katika injili yake ya kweli. Wale waliopokea ondoleo la dhambi zao toka kwa Bwana kwa kupitia Neno la maji na damu wanaweza pia kuwa na uhakika wa wokovu wao toka katika dhambi ambazo wanazifanya kadri wanavyoendelea kuishi katika maisha yao.

Kwa kuwa Bwana amezifanya dhambi zetu zote kutoweka mara moja, basi ndio maana tunaweza kuzioshelea mbali dhambi tunazozifanya kwa matendo yetu kwa kuuamini wokovu huu wa upatanisho wa milele. Kwa maneno mengine, kama isingelikuwa hivi, ikiwa Bwana wetu asingelikuwa amezioshelea mbali dhambi zetu zote mara moja, basi tungeliwezaje kuwa tusio na dhambi?

Tutawezaje kuingia katika Mji Mtakatifu wa Mbinguni? Tutawezaje kwenda mbele za Yesu Kristo, ambaye ni mti wa uzima? Tunaweza kuingia katika Ufalme wa Mbinguni tukiwa watu safi na wasio na mawaa kwa kumwamini Bwana wetu

ambaye amezifanya dhambi zetu kutoweka, na wakati tunapofanya dhambi katika maisha yetu, basi tunaweza kwenda mbele za Bwana na kuthibitisha kwamba Bwana amezifanya dhambi hizi pia kutoweka, na kwa kufanya hivyo tunaweza kuwekwa huru toka katika dhambi hizo. Hii ndio sababu ninawaeleza kwamba wale waliozaliwa tena upya wana fursa ya kusamehewa dhambi zao za kila siku kwa imani.

Mfalme Daudi, pamoja na kuwa alikuwa ni mtumishi wa Mungu bado alifanya dhambi kuu mbele za Mungu. Alifanya uzinzi na mke wa mtu aliyekuwa ameolewa, kisha akamuua mume wake aliyekuwa mtumishi wake mwaminifu. Hata hivyo, alimsifu Mungu kwa msamaha na rehema zake kama hivi:

“Heri aliyesamehewa dhambi zake,

Na kusitiriwa makosa yake.

Heri BWANA asiyemhesabia upotovu,

Ambaye rohoni mwake hamna hila (Zaburi 32:1-2).”

Ni nani aliyebarikiwa zaidi katika ulimwengu huu mbele za Mungu? Walibarikiwa si wengine bali ni sisi tuliozaliwa tena upya; ambao tumeokolewa; na ambao kila inapotendwa dhambi katika maisha yetu, tunauangalia ukweli kwamba Bwana amezifanya dhambi zetu zote kutoweka, kisha tunaenda katika chemichemi ya uzima kila siku, kisha tunaiosha mioyo yetu iliyochafuka kila siku. Huku ni kufikiria kwa kina juu ya ukombozi wetu na kuuthibitisha neema kuu ya Bwana wetu ya wokovu.

Ni wenye haki tu ndio waliopokea ondoleo la dhambi, na kuyafanya mapungufu yao kuwa ukamilifu. Matendo yao ni makamilifu, na pia hata mioyo yao ni mikamilifu. Baada ya kufanyika wenye haki pasipo mawaa, basi tunaweza kuingia katika Ufalme ambao Mungu ametuandalia, ambao ni Ufalme wa Mbinguni. Ikiwa tutakipokea kile ambacho Yesu Kristo, ambaye ni lango la wokovu na mti wa uzima amekifanya kwa ajili yetu, basi nguvu na mamlaka yake vitafunuliwa, na kwa

sababu hiyo sisi sote tutapokea ondoleo la dhambi na kisha kuingia Mbinguni.

Wale Wanaokwenda Mbele ya Mti wa Uzima

Sababu inayotufanya sisi tuliopokea ondoleo la dhambi kwenda mbele za Bwana wakati wote ni kuthibitisha kwamba Bwana wetu amezifanya dhambi zetu zote kutoweka, kuitafakari neema ya wokovu kwa mara nyingine, kuikumbuka neema hiyo, na kisha kumsifu Mungu kwa sababu ya neema hiyo, ili kwamba sisi sote tuweze kuingia katika Ufalme wa Mungu. Hii ndio sababu tunaihubiri injili.

Kuna idadi kubwa ya Wakristo ambao wameshindwa kuonana na watumishi wa Mungu ili kuwaongoza na kuwafundisha Biblia kiusahihi, na kwa sababu hiyo wamebanwa katika kutolielewa Neno na hivyo kuwa na imani isiyo sahihi. Hata sasa, kuna watu ambao wametingwa sana kwa sababu ya matendo yao, huku wakitoa sala za toba kila asubuhi na usiku wote. Kwa nini wanafanya mambo hayo? Kwa sababu wanaamini kwamba kwa kufanya hivyo, basi dhambi zao zitasamehewa. Wanaamini hivyo kwa kuwa wamefundishwa mafundisho ya kidini yenye makosa. Lakini matendo hayo ni mateso yasiyo ya haki mbele za Mungu. Watu wa jinsi hiyo ni wa kuhurumiwa sana maana hawaifahamu haki ya Mungu wala upendo wake usio na masharti.

Biblia si kitu ambacho kinaweza kuchukuliwa kwa wepesi, yaani kana kwamba inaweza kufafanuliwa kadri mtu anavyotaka. Lakini kwa kuwa watu wameifafanua, wameifundisha, na wameiamini kwa kuzingatia mawazo yao binafsi, basi ndio maana matokeo yamekuwa kama yalivyoelezwa hapo juu—yaani, wamebakia kutoifahamu haki

na upendo wa Mungu. Kila kifungu katika Biblia kina maana kamili, na vifungu hivi vinaweza kufafanuliwa kiusahihi na manabii wa Mungu tu waliopokea ondoleo la dhambi.

Kitendo cha kwenda mbele ya mti wa uzima ni kumwamini Bwana hapa duniani, na kukumbuka kila siku kwamba Bwana wetu amezifanya dhambi zetu kutoweka, na kisha kumsifu Bwana, na kuihubiri injili hii. Sisi tuliozaliwa tena upya, tunapaswa kukumbuka pia kwamba Bwana alizichukua dhambi zetu katika mwili wake, na tunapaswa kuuthibitisha ukweli huu kila siku, na kisha kumwabudu Yeye kwa furaha na shukrani.

Hata hivyo, ni sahihi kusema kwamba Wakristo ulimwenguni kote wamekifafanua vibaya kifungu hiki na kisha kuamini kimakosa kwamba wanaweza kuingia katika Ufalme wa Mungu kwa kuzifanya dhambi zao kuoshelewa mbali kwa kutegemea sala za toba za kila siku. Lakini kifungu hiki hakimaanishi hivyo.

Baada ya kupokea ondoleo la dhambi zetu, basi mioyo yetu inaweza kuwa na amani kwa kuthibitisha kwamba Bwana wetu amezifanya dhambi tunazozifanya kila siku kwa matendo yetu kutoweka. Kwa kulithibitisha ondoleo la dhambi zetu ZOTE, basi hapo tunakuwa hatujafungwa na dhambi. Hii ndio njia ya kwenda mbele ya mti wa uzima huko Mbinguni.

Maandiko ni tofauti kabisa na mawazo ya mwanadamu. Kwa hiyo, ili kuufahamu ukweli, basi tunapaswa kwanza kujifunza na kuusikia ukweli toka kwa watumishi wa Mungu waliozaliwa tena upya.

Wale Walio Nje ya Mji

Aya ya 15 inasema, *“Huko nje wako mbwa, na wachawi,*

na wazinzi, na wauaji, na hao waabuduo sanamu, na kila mtu apendaye uongo na kuufanya.” Neno hili linawahusu wale wote wa nyakati za mwisho ambao hawajazaliwa tena upya. Ni jambo la kushangaza kuona Mungu akiwaelezea watu hao kwa usahihi kiasi hicho.

Tabia mojawapo ya mbwa ni kucheua na kutapika—yaani ni kucheua kile ambacho wamekila na kisha kukila tena, na kisha kutapika kile ambacho wamekila na kisha kukila tena. Bwana wetu anasema hapa kwamba hawa “mbwa” hawataweza kuingia katika Mji.

Je, hili neno kuhusu mbwa linawahusu akina nani? Kuna watu ambao huwa wanaomba kwa sauti wakisema “Bwana, mimi ni mwenye dhambi; tafadhali naomba uzioshelee mbali dhambi zangu,” kisha wanamsifu Mungu wakiimba, “Mimi nimesamehewa, wewe umesamehewa, sisi tumesamehewa!” Lakini muda mfupi baadaye, watu hawa wanaanza tena kuomba, “Bwana, mimi ni mwenye dhambi; ukinisamehe walau mara moja zaidi, basi sintafanya dhambi tena.” Kisha wanaimba tena sifa wakisema, “Mimi nimesamehewa kwa damu ya Kalvari!”

Watu hawa huenda mbele na nyumba kama hivi mara kadhaa kiasi kwamba mtu hawezi kufahamu ikiwa watu hao wamesamehewa au la. Hawa si wengine bali ndio hao “mbwa” ambao Biblia inawazungumzia. Mbwa hubwekwa kila siku. Mbwa hubweka asubuhi, hubweka mchana, na hubweka jioni. Watu hawa hawabweki kama wanavyobweka hao mbwa, bali wanapiga kelele huku wakisema kuwa wao ni wenye dhambi, pamoja na kuwa wamesamehewa dhambi zao. Wanafanyika kuwa wenye haki kwa dakika moja, kisha wanageuka na kuwa wenye dhambi dakika moja baadaye.

Kwa namna hii, wanakuwa kama vile mbwa ambao hutapika kilicho ndani yao kisha kukila tena, na kisha kukitapika na kukila tena zaidi ya mara moja. Kwa kifupi,

Biblia inawataja Wakristo ambao bado wana dhambi katika mioyo yao kuwa ni “mbwa.” Hawa mbwa hawawezi kuingia Mbinguni, bali wanaweza kuwa nje ya Mji.

Ni akina nani ambao ni “wachawi?” Hawa ndio wale ambao hali wakitumia fursa za hisia za waenda makanisani, huwaibia fedha zao kwa maneno mazuri, na ndio wale wanaowadanganya watu kwa ishara na miujiza ya uongo huku wakidai kuwaponya magonjwa yao. Kwa kuwa wanalitumia jina la Mungu kwa utupu, basi ni hakika kwamba hawawezi kuingia katika Mji Mtakatifu.

Pia, wazinzi, wauaji, waabudu sanamu, na wale wanaoupenda na kuufanya uongo hawawezi kuingia katika huo Mji. Nyakati za mwisho zitakapowadia, mbwa na wachawi watawadanganya watu, na Mpinga Kristo atatokea. Mpinga Kristo anayewadanganya watu wengi kwa ishara na miujiza ya uongo, ataziiba roho zao, atasimama kinyume na Mungu, na atatafuta kujiinua juu kama vile Mungu ili aabudiwe, hivyo wafuasi wake wote hawataweza kuingia katika Mji huo.

Kwa hiyo, ikiwa tutaangukia katika uongo wa wale wanaodai kuwa bado wana dhambi, au ikiwa tutaangukia katika uongo wa ishara na miujiza ambavyo vinaamsha hisia zetu, basi sisi sote tutaishia kuwa nje ya Mji pamoja na Mpinga Kristo na Shetani, huku tukiomboleza na kusaga meno, kama Neno linavyotuonya.

Aya ya 16-17 inasema, *“Mimi Yesu nimemtuma malaika wangu kuwashuhudia ninyi mambo hayo katika makanisa. Mimi ndimi niliye Shina na Mzao wa Daudi, ile nyota yenye kung’aa ya asubuhi. Na Roho na Bibi-arusi wasema, Njoo! Naye asikiaye na aseme, Njoo! Naye mwenye kiu na aje; na yeye atakaye, na ayatwae maji ya uzima bure.”*

Je, umepokea ondoleo la dhambi bure? Bwana wetu ametupatia injili ya maji na Roho inayotuwezesha kuyanywa

maji ya uzima kupitia Roho Mtakatifu na Kanisa la Mungu. Yeyote anayeona njaa kwa ajili ya haki ya Mungu, yeyote anayeona kiu ya Neno la kweli, na yeyote anayetaka kwa nguvu kupokea ondoleo la dhambi—basi Mungu ameahidi, kwa watu kama hao, kuwafunika kwa rehema yake na anautoa mwaliko huo kupitia Neno lake, ambalo ni maji ya uzima ya wokovu wake. Kupokea ondoleo la dhambi ni njia pekee ya kuutikia mwaliko huu katika Mbingu na Nchi Mpya mahali ambapo maji ya uzima yanatiririka.

Amina, Na Uje Bwana Yesu!

Aya ya 19 inasema, *“Na mtu ye yote akiondoa lo lote katika maneno ya unabii wa kitabu hiki, Mungu atamwondolea sehemu yake katika ule mti wa uzima, na katika ule mji mtakatifu, ambao habari zake zimeandikwa katika kitabu hiki.”* Hatuwezi kuamini kwa namna yoyote ile tunayoitaka kwa kutegemea mawazo yetu binafsi mbele za Mungu. Kama imeandikwa katika Neno la Mungu, basi tunachoweza kusema ni “ndiyo,” kwa kuwa kama mtu yeyote atasema “hapana” kwa Neno, basi Bwana wetu atamtupilia mbali akisema, “Wewe si mtoto wangu.” Hii ndio sababu inatupasa kumwamini Bwana kwa mujibu wa Neno. Hatuwezi kuongeza wala kupunguka chochote katika Neno la Mungu, bali tunapaswa kuliamini hilo Neno kama lilivyoandikwa.

Kuwashikilia watumishi wa Mungu na kuamini kile ambacho Roho Mtakatifu anaongea kupitia Kanisa la Mungu ndio vitu muhimu vya imani ya kweli. Hata hivyo, watu wengi, kwa kuwa wameiondoa injili ya maji na Roho toka katika imani yao, wamebakia kuwa na dhambi katika mioyo yao. Hata wakati Neno linapowaeleza mara kwa mara kwamba wasio na

dhambi ndio wanaoweza kuingia katika ule Mji Mtakatifu wa Mungu, inashangaza kuona kwamba watu hao bado wameuacha ubatizo wa Yesu katika imani yao, na badala yake wanatilia mkazo matendo yao kama vile kusali sala za toba na kutoa sadaka za mali na vitu.

Wale wanaomwamini Yesu kuwa ni Mwokozi wako wanapaswa kuikiri imani yao kwamba dhambi zote za mwanadamu zilipitishwa kwenda kwa Yesu kwa kupitia ubatizo ambao Yesu aliupokea toka kwa Yohana Mbatizaji katika Mto Yordani. Ikiwa utauondoa ubatizo wa Yesu basi ni dhahiri kuwa unaiondoa imani yako. Kwa maneno mengine, ikiwa hauiamini injili ya maji na Roho, basi kwako wewe damu ya Msalaba haina maana na hata ufufuo wa Kristo ni bure tu. Ni wale tu wanaoamini kwamba Mungu amezifanya dhambi zao zote kutoweka ndio wanaoona maana juu ya ufufuo wa Yesu, na ndio hao wanaoweza kushangilia kwa sauti ujio wa Bwana Yesu, yaani kama Mtume Yohana alivyofanya katika aya ya 20.

Aya ya 20 inasema, *“Yeye mwenye kuyashuhudia haya asema, Naam; naja upesi. Amina; na uje, Bwana Yesu!”* Ni wenye haki tu ndio wanaoweza kusema hivi. Hivi punde Bwana wetu atarudi tena hapa duniani, na hii ni kwa mujibu wa maombi ya wenye haki. Ni wenye haki tu, ambao wamepokea ondoleo la dhambi kamilifu kwa kuamini katika injili ya maji na Roho, ndio watakaofurahia na kusubiri kwa hamu ujio wa Bwana. Hii ni kwa sababu wale wanaojiandaa kumpokea Bwana ni wale tu ambao wamevikwa vazi la injili ya maji na Roho—yaani, wale wasio na dhambi.

Bwana wetu anaingojea siku ambayo ataitikia wito wa watakatifu wanaongoja, yaani siku ambayo atakuja hapa duniani. Atatuzawadia Ufalme wa Milenia, na atatuvika sisi wenye haki, kwa baraka yake kuu ya kuingia katika Mbingu na Nchi Mpya mahali ambapo maji ya uzima yanatiririka. Huku kumsubiri

Bwana wetu hakutakawia sana. Kwa hiyo, kile tunachoweza kukisema ni “Amina, na uje, Bwana Yesu!” Hivyo, kwa imani na shukrani tunakusubiria kurudi kwa Bwana.

Hatimaye, aya ya 21 inasema, “*Neema ya Bwana Yesu na iwe pamoja nanyi nyote.*” Mtume Yohana alimalizia Kitabu cha Ufunuo kwa sala yake ya mwisho ya baraka kwa kila mtu. Aliitoa sala hii ya baraka mwishoni, huku moyo wake ukitarajia kila mtu kumwamini Yesu, kuokolewa, na hatimaye kuingia katika mji wa Mungu.

Wapendwa wenzangu watakatifu, kule kusema kwamba tumeokolewa na Mungu maana yake ni kwamba Mungu ametupenda, ametukomboa toka katika dhambi zetu zote, na ametufanya kuwa watu wake. Kwa kweli ni jambo la kushangaza na kushukuru kwamba Mungu ametufanya sisi kuwa wenye haki ili tuweze kuingia katika Ufalme wake.

Hiki ndicho kiini ambacho Biblia inazungumza nasi. Mungu ameturuhusu wewe na mimi kuzaliwa tena upya kwa kuisikia injili hii ya kweli, na ametuokomboa toka katika dhambi zetu zote na hukumu ili kutufanya sisi tuishi milele katika Ufalme wake. Ninamsifu na kumshukuru Bwana kwa wokovu wake.

Ni bahati nzuri kwamba tumepokea ondoleo la dhambi zetu. Sisi ni watu ambao tumebarikiwa sana na Mungu. Na sisi ni manabii wake. Kwa hiyo, ni lazima tuieneze injili ya ondoleo la dhambi kwa zile roho ambazo bado hazijaisikia injili hii, na pia ni lazima tuwahubirie Neno la Ufunuo, ambalo ni ukamilifu wa injili.

Ninatumaini na kuomba ili kwamba kila mtu amwamini Yesu, ambaye ni Muumbaji, Mwokozi na Hakim, na nyakati za mwisho zitakapowadia, aweze kuingia katika Mbingu na Nchi Mpya iliyotolewa na Bwana. Neema ya Bwana Yesu na iwe nanyi nyote. ☒

Kiambatanisho

Maswali & Majibu

Unaweza Kupakua Vitabu vya Kikristo vya Mchungaji Paul C. Jong
katika Kompyuta, Kompyuta-Kibao, au kwenye Simu-Mahiri

Maswali & Majibu

1) Je, namba 144,000 katika sura ya 7 ina maanisha kiuhalisia juu ya watu wa Israeli ambao wataokolewa, au ni namba katika lugha ya picha?

Namba 144,000 inayoonekana katika sura ya 7 inatueleza kiuhalisia kwamba ni Waisraeli wangapi ambao wataokolewa katika nyakati za mwisho, watu 12,000 toka katika kila kabila katika makabila kumi na mbili ya Israeli kwa ujumla wa 144,000. Hata yatatimizwa kwa majaliwa maalumu ya Mungu ambapo baadhi ya wana wa Ibrahimu, ambao Mungu aliwapaenda, wataokolewa. Mungu aliikumbuka ahadi aliyoifanya kwa Ibrahimu, hivyo ili kuitimiza ahadi hii, sasa ameiruhusu injili ya maji na Roho kuenezwa sio tu kwa wamataifa, bali pia kwa watu wa Israeli, ambao ni wana wa kimwili wa Ibrahimu.

Kwa hiyo, Mungu ameazimia kwamba kwa kupitia dhiki ya nyakati za mwisho na kwa kupitia mashahidi wawili ambao Mungu atawainua kipekee kabisa kabisa kwa ajili ya Waisraeli, basi hapo ndipo Waisraeli watakapofikia hatua ya kumwamini Yesu Kristo, ambaye walimtesa na kumsulubisha, ndipo watatambua kwa hakika kuwa ni Mwokozi wao wa kweli. Waisraeli wamefanyika kuwa wapokeaji wa upendo maalumu wa Mungu kwa kupitia Mungu na imani ya Ibrahimu.

Mungu ameamua kwamba atawakomboa watu 12,000 toka katika kila kabila ya Israeli toka katika dhambi zao na maangamizi, na kwa sababu hiyo amewawekea muhuri ya Mungu kwa kupitia malaika wake. Hivyo, watu 144,000 kati ya watu wa Israeli wamepokea alama inayowaonyesha kuwa

wamefanyika kuwa watu wa Mungu. Idadi hii inagawanyika sawa miongoni mwa kabila kumi na mbili za Israeli, hii ni kwa sababu upendo wa Mungu kwa Waisraeli haupo katika misingi ya upendeleo kwa kabila fulani, bali anawavika wote kwa neema ile ile inayowafanya kuwa watu wake. Ingawa kwa baadhi ya nyakati watu huruhusu hisia zao kutawala hukumu na maamuzi yao, ukweli ni kuwa Mungu hutenda katika mambo haya yote kwa haki kamilifu na usawa.

Baada ya kuwawekea muhuri wa wokovu watu 144,000 wa Israeli, basi hapo ndipo Mungu atakapoyamimina mapigo makuu hapa duniani. Mungu amefanya jumla ya Waisraeli 144,000 kuwa watu wake, watu 12,000 toka katika makabila kumi na mbili ya Israeli—yaani kuanzia kabila la Yuda, Rubeni, Gadi, Asheri, Naftali, Manase, Simioni, Lawi, Isakari, Zabuloni, Yusufu, na Benyamini. Mungu amefanya hili kuitunza ahadi aliyomwapa Ibrahimu na wana wake kwamba atakuwa Mungu wao.

Hivyo, Mungu ameamua kuwaokoa watu 144,000 wa Israeli. Hii namba 14 kama inavyoonekana katika Mathayo 1:17 ina maana maalumu kwetu, inatueleza kwamba Mungu ataianza kazi yake mpya miongoni mwa Waisraeli. Namba hii inajumuisha mapenzi ya Mungu kwamba sasa ataihitimisha historia ya ulimwengu wa kwanza hapa duniani na kisha kuwaruhusu Waisraeli waliookolewa kuishi katika Mbingu na Nchi Mpya.

Tunapoangalia mtiririko wa ukoo toka kwa Ibrahimu hadi kwa Yesu Kristo, tunaweza kuona kwamba kuanzia Ibrahimu hadi Daudi kuna vizazi 14, na kutoka Daudi hadi wakati wa kuchukuliwa utumwamini Babeli kuna vizazi vingine 14, na toka kuchukuliwa utumwani Babeli hadi kuzaliwa kwa Kristo kuna vizazi vingine 14. Kwa maneno mengine, tunaweza kuona kwamba Mungu anaanza kazi mpya kila baada ya vizazi

14. Mungu amewatia muhuri Waisraeli 144,000 kwa mapenzi yake kwamba atawafanya waishi maisha mapya, si katika ulimwengu wa sasa, bali katika Ufalme wa Mungu. Kama inavyoweza kuonekana, Mungu ni mwaminifu anayezitimiza ahadi zake alizowahi kumwahidi mwanadamu.

2) Mashahidi Wawili Wanaoonekana Katika Sura ya 11 Ni Akina Nani?

Mashahidi wawili wanaoonekana katika sura ya 11 ni watumishi wawili wa Mungu ambao Mungu atawainua kipekee ili kuwaokoa Waisraeli katika nyakati za mwisho. Ili kuitimiza ahadi yake aliyoifanya kwa Ibrahimu, basi Mungu atawafanya manabii hawa wawili, ambao wametumwa kuwakomboa Waisraeli toka katika dhambi, kufanya ishara na miujiza, na kisha kuwafanya Waisraeli huku wakiongozwa na wao kumrudia Yesu Kristo na kisha kumwamini Yesu kuwa Mwokozi wao. Hawa mashahidi wawili watawalisha Neno la Mungu watu wa Israeli kwa siku 1,260—yaani miaka mitatu na nusu ya kwanza katika ile miaka saba ya Dhiki Kuu. Kwa kueneza injili ya maji na Roho kwa Waisraeli na kwa kuwafanya waiamini injili hii kwa kupitia mashahidi hawa wawili, basi hapo Mungu atawapatia Waisraeli wokovu ule ule ambao amewapatia Wamataifa, yaani ni kama vile Wamataifa walivyookolewa toka katika dhambi zao kwa imani.

Ufunuo 11:4 inasema, *“Hao ndio ile mizeituni miwili na vile vinara viwili visimamavyo mbele za Bwana wa nchi.”* Kuna mafafanuzi tofauti kuhusu mizeituni hiyo miwili; baadhi ya watu wanadiriki kusema kwamba wao ndio ile mizeituni miwili. Lakini mizeituni hii miwili inawamaanisha wale waliotiwa mafuta. Katika nyakati za Agano la Kale, mtu alitiwa

mafuta wakati alipofanywa kuwa nabii, mfalme, au kuhani. Wakati mtu alipowekwa mafuta Roho Mtakatifu alishuka juu yake. Kwa hiyo, mti wa mzeituni una maanisha ni Yesu Kristo ambaye alitungwa mimba kwa uwezo wa Roho Mtakatifu (Warumi 11:17).

Hata hivyo, tukiangalia Ufunuo 11:1—“*Nikapewa mwanzi kama fimbo; na mmoja akaniambia, Inuka, ukalipime hekalu la Mungu, na madhabahu, na hao wasujuduo humo.*”—tunapaswa kutambua kwamba lengo la sura ya 11 ni juu ya wokovu wa watu wa Israeli. Kwa maneno mengine, kuanzia wakati huo itaanza kazi ya kuieneza injili ya maji na Roho kwa Waisraeli, yaani juu ya ukombozi toka katika dhambi zao zote kwa kupitia neema ya wokovu iliyotolewa na Yesu Kristo, na kwa wao kufanyika watu wa Mungu wa kweli. Hivyo, mashahidi wawili ni manabii wawili wa Mungu ambao watainuka katika nyakati za mwisho ili kuwaokoa watu wa Israeli.

Katika Biblia, kinara cha taa kina maanisha ni Kanisa la Mungu. Kwa hiyo, vinara viwili vya taa vina maanisha ni Kanisa la Mungu miongoni mwa Wamataifa na Kanisa lililoruhusiwa miongoni mwa Waisraeli. Mungu si Mungu wa Waisraeli tu, bali pia ni Mungu wa Wamataifa, kwa kuwa Yeye ni Mungu wa kila mtu. Kwa hiyo, Mungu amelianzisha Kanisa lake miongoni mwa Waisraeli na Wamataifa pia, na Mungu anafanya kazi ya kuziokoa nafsi za watu toka katika dhambi hadi siku ya mwisho kwa kupitia Kanisa lake.

Kuanzia wakati wa Agano la Kale, Waisraeli walikuwa na manabii waliowekwa kwa Sheria ya Mungu, na kwa kupitia manabii hao Waisraeli walilisikia Neno la Mungu. Waisraeli wanayo Sheria ya Musa na Manabii. Kwa hiyo, wanafahamu kila kitu kuhusu utaratibu wa sadaka ya kuteketezwa na unabii wa Agano la Kale, na hii ndio sababu wanahitaji manabii wa

Mungu waliochaguliwa toka katika watu wao wenyewe.

Pia wanaamini kwamba wao ni watu wa Mungu waliochaguliwa, hivyo huwa hawazingatii wala kuwekea mkazo wanapoelezwa Neno la Mungu na Wamataifa. Hivyo, ni hadi pale manabii wanaoamini katika injili ya maji na Roho wanapokuwa wamechaguliwa na Mungu toka miongoni mwa Waisraeli, hapo ndipo Waisraeli wanapoweza kumkubali na kumwamini Yesu Kristo kuwa ni Mwokozi wao.

Hii ndio sababu Mungu mwenyewe atawaleta manabii wawili toka katika watu wa Israeli na kisha kuwatuma kwa Waisraeli. Kwa kweli manabii hawa watafanya maajabu mengi ambayo watumishi wa Mungu wanaofahamika katika Angalo la Kale wameyafanya. Ufunuo 11:5-6 inatueleza kwamba, *“Na mtu akitaka kuwadhuru, moto hutoka katika vinywa vyao na kuwala adui zao. Na mtu akitaka kuwadhuru, hivyo ndivyo impasavyo kuuawa. Hao wana amri ya kuzifunga mbingu, ili mvua isinyeshe katika siku za unabii wao. Nao wana amri juu ya maji kuyageuza kuwa damu, na kuipiga nchi kwa kila pigo, kila watakapo.”*

Pasipo hawa watumishi wa Mungu kuwa na nguvu na mamlaka kama hayo, watu wa Israeli wasingeliweza kutubu, hivyo Mungu atawavika mashahidi hawa wawili kwa nguvu zake. Mungu atawapatia mashahidi hawa wawili nguvu zake maalumu, ili waweze kulihubiri Neno la unabii kwa Waisraeli, na kuwashuhudia na kuwafanya waweze kuamini kwamba Yesu Kristo ndiye Masihi waliyemngojea kwa muda mrefu. Baada ya kuyaona maajabu yakifanywa na hawa mashahidi wawili, basi hapo ndipo Waisraeli watakapowasikia na kisha kumrudia Yesu Kristo.

Baada ya mashahidi wawili kuikamilisha kazi yao ya kuieneza injili kwa Waisraeli, Mpinga Kristo atatokea katika ulimwengu huu, atasimama kinyume na kazi yao kuihubiri

injili, kisha atawafanya wawe wafia-dini. Ufunuo 11:8 inatueleza kuwa, *“Na mizoga yao itakuwa katika njia ya mji ule mkuu, uitwao kwa jinsi ya roho Sodoma, na Misri, tena ni hapo Bwana wao aliposulibiwa.”*

Baada ya kuwa wameihubiri injili kwa Waisraeli woe na hivyo kuitimiza kazi ya wito wao, mashahidi wawili watauawa mahali ambapo Yesu alisulubiwa hapo zamani. Ukweli huu unakazia ufafanuzi kwamba hawa mashahidi wawili ni kutoka miongoni mwa Waisraeli. Kwa kuwa wao ni watumishi wa Mungu wa watu wa Israeli.

Kwa kuhitimisha, Mungu atawainua watumishi wake wawili ili kuwashuhudia Waisraeli, ambao wamekataa kumwamini Yesu Kristo, na ambao kiroho ni kama vile Sodoma na Misri, kwamba kwa hakika Yesu ni Masihi wao waliyemsubiri kwa muda mrefu, na kwa kupitia mashahidi hawa wawili waliovikwa nguvu za Mungu, basi Mungu atawafanya Waisraeli wamwamini Yesu.

3) Mwanamke Katika Sura ya 12 Ni Nani?

Mwanamke katika sura ya 12 ana maanisha ni Kanisa la Mungu katikati ya Dhiki Kuu. Kwa kupitia mwanamke anayeteswa na Mnyama, sura ya 12 inatuonyesha kwamba Kanisa la Mungu litadhuriwa sana na Shetani nyakati za mwisho zitakapowadia. Hata hivyo, kwa kupitia ulinzi maalumu wa Mungu, Kanisa la Mungu litamshinda Shetani na Mpinga Kristo kwa imani yake, kisha litapokea utukufu wa kuvikwa baraka kuu za Mungu.

Kwa kuwa watakatifu wanaodumu katika Kanisa la Mungu watapokea maboresho ya imani hata katika nyakati za Dhiki, basi watamshinda Mpinga Kristo kwa kuyapokea mauaji

ya kuwa wafia-dini kwa imani katika injili ya maji na Roho. Mungu anatueleza ukweli huu kwa kupitia lugha ya picha ya mwanamke katika sura ya 12.

Ufunuo 12:13-17 inatueleza kwamba, *“Na joka yule alipoona ya kuwa ametupwa katika nchi, alimwudhi mwanamke yule aliyemzaa mtoto mwanamume. Mwanamke yule akapewa mabawa mawili ya tai yule mkubwa, ili aruke, aende zake nyikani hata mahali pake, hapo alishwapo kwa wakati na nyakati na nusu ya wakati, mbali na nyoka huyo. Nyoka akatoa katika kinywa chake, nyuma ya huyo mwanamke, maji kama mto, amfanye kuchukuliwa na mto ule. Nchi ikamsaidia mwanamke; nchi ikafunua kinywa chake, ikaumeza mto ule alioutoa yule joka katika kinywa chake. Joka akamkasirikia yule mwanamke, akaenda zake afanye vita juu ya wazao wake waliosalia, wazishikao amri za Mungu, na kuwa na ushuhuda wa Yesu; naye akasimama juu ya mchanga wa bahari.”*

Shetani, ambaye mara nyingi katika Biblia anatajwa kuwa ni Mnyama, kwa asili yake alikuwa ni malaika aliyefukuzwa toka Mbinguni kwa kutaka kuchukua nafasi ya Mungu. Kwa kuwa kama matokeo ya uasi huo, Ibilisi, pamoja na malaika wengine waliomfuata walitupwa toka Mbinguni, na huku akifahamu kuwa hivi karibuni atafungwa katika shimo la kuzimu lisilo na mwisho, basi alikuja hapa duniani na kisha kulitesa Kanisa la Mungu na watakatifu wa Mungu.

Ingawa Shetani alijaribu kumzuia Yesu Kristo asikifanye kile ambacho alikuja kukifanya hapa duniani—yaani kuwaokoa wanadamu toka katika dhambi—hata hivyo Kristo alizichukua dhambi za ulimwengu kwa ubatizo wake, akaimwaga damu yake Msalabani, akafufuka tena toka kwa wafu, na kwa sababu hiyo amewaokoa wanadamu toka katiak dhambi zao zote. Hivyo, Yesu aliyatimiza mapenzi ya Baba. Pamoja na Shetani

kujaribu kuingilia kazi ya Yesu ya kuyatenda mapenzi ya Mungu ili kuwaokoa wanadamu toka katika dhambi, Kristo alizishinda vurugu za Ibilisi na akayatimiza mapenzi yote ya Baba.

Hata hivyo, kwa kuwadanganya watu wengi na kuwafanya kuwa washirika wake, Shetani amewafanya wasimame kinyume na Yesu Kristo na kinyume na watakatifu. Hali akijua kuwa siku zake zinahesabika, anawashawishi watu wa hapa duniani kusimama kinyume na Mungu na anawatesa watakatifu. Kwa kuhakikisha kwamba ulimwengu unajawa na dhambi, Shetani amemfanya kila mtu kukimbilia dhambi na ameifanya mioyo yao kuwa migumu ili kusimama kinyume na Mungu kwa sababu ya maovu yao.

Shetani anawashambulia watakatifu wapendwa wa Mungu kwa dhambi bila kikomo, kwa kuwa anafahamu kuwa ana muda mchache. Shetani amemfanya kila mtu katika ulimwengu huu kuikimbilia dhambi na ameifanya mioyo yao kuwa migumu ili kusimama kinyumena Mungu na watakatifu wa Mungu kwa dhambi zao. Kwa hiyo, nyakati za mwisho zitakapowadia, watakatifu ni lazima wailinde imani yao kwa kupambana na kumshinda Shetani.

Lakini Mungu ameihifadhi baraka maalumu kwa ajili ya watakatifu wake, hii ni kwa sababu anawapenda watakatifu wanaodumu ndani ya Kanisa lake. Baraka hii ni kwamba atawatunza watakatifu kwa kuwajenga kiimani katika Kanisa la Mungu katika ile miaka mitatu na nusu ya kwanza katika ile miaka ya Dhiki, yaani kabla Mpinga Kristo hajatokea hapa ulimwenguni, na kisha kuwadanganya watu na kuwafanya kuwa watumishi wake ili kusimama kinyume na Mungu na watumishi wa Mungu. Kwa nini? Kwa sababu wakati wa dhambi nyingi utakapowadia na wakati Mpinga Kristo atakapotokea, basi ni lazima watakatifu watauwawa na kuwa

wafia-dini. Ili kufanya hivyo, Mungu atawatunza watakatifu wake kwa kupitia Kanisa lake na atawawezesha kuwa wafia-dini kwa imani yao kwa mika mitatu na nusu—yaani, *“kwa wakati na nyakati na nusu ya wakati”* (Ufunuo 12:14).

4) Je, Babeli ni Nini?

Neno Babeli linatumika katika Biblia kuumanisha ulimwengu huu ambao umeachana na Mungu. Habari kuhusu “Mnara wa Babeli” inapatikana katika Agano la Kale. Kadri watu walivyoziumanisha pamoja nguvu zao ili kuujenga Mnara wa Babeli ili kumwacha Mungu, Mungu aliwazuia ili wasiujenge mnara, aliharibu kazi yao kwa kuivuruga lugha yao, kisha akawatawanya.

Vivyo hivyo, ulimwengu huu ni kama wakati wa Mnara wa Babeli. Wafalme wa nchi wamefanya ukahaba na wameishi kwa starehe kwa vitu hapa ulimwenguni, na wafanyabiashara wote wamemdharau Mungu katika maisha yao, wametingwa kwa kuuza na kununua vitu vyote ambavyo Mungu amewapatia. Kwa kutumia dini, manabii wa uongo wameishi maisha yao huku wakiongea kwa sauti, na kujibadilisha kuwa wafanya biashara wanaozifanyia biashara roho za watu, huku wakijirundia baraka ya utajiri wa mali na vitu vya ulimwengu huu. Wameupenda ulimwengu, huku wakisema hakuna ulimwengu uliojengwa na mwanadamu ambao umekuwa bora zaidi kuliko huu wa sasa.

Vivyo hivyo, nyakati za mwisho zitakapowadia, ulimwengu huu utakuwa mchafu sana mbele za Mungu na dhambi itakuwa imeenea sana ndani yake kiasi kuwa Mungu hatakuwa na la kufanya zaidi ya kuuharibu ulimwengu huu ambao yeye mwenyewe aliumba. Huku wakiupenda mno

ulimwnegu, watu wa ulimwengu huu wameuhesabu ulimwengu huu kuwa ndio Mungu wao, huku wakiamini na kuufuata. Hivyo, ulimwengu huu umefanyika kuwa kitanda cha dhambi, watu wanaoishi katika kitanda hiki cha dhambi wamelewa kwa aina mbalimbali za dhambi, na hivyo dhambi hizi zimesababisha anguko la ulimwengu. Hivyo hatimaye ulimwengu utakabiliana na mwisho wake utakaoletwa na mapigo ya mabakuli saba ya Mungu.

Sababu nyingine itakayofanya ulimwengu huu ukabiliane na mapigo ya mabakuli saba toka kwa Mungu ni kwa sababu, watu wake kwa vile wanavyoupenda ulimwengu, wamegeuka na kuwa watumishi wa Shetani na wa Mpinga Kristo, na huku wakiziunganisha juhudi zao na Mpinga Kristo, wamewaua watakatifu waliozaliwa tena upya wanaoamini katika injili ya maji na Roho iliyotolewa na Bwana.

Nyakati za mwisho zitakapowadia, watu watasalimu amri kwa Mpinga Kristo, wataipokea alama ya Shetani itakayotolewa na Mpinga Kristo, na hivyo watageuka na kuwa watumishi wa huyo mwovu. Kwa kuwa watu wa ulimwengu huu, wakiwa wamefanya uhaini pamoja na Mpinga Kristo, watakuwa wamesimama kinyume na Mungu na kuwaua wataktifu wa Mungu, basi Mungu atawalipa sawasawa na walivyowaletea mateso, dhiki, na vifo kwa watakatifu.

5) Ufalme wa Milenia Utaanza Lini? (Je, ni Ufalme Kabla ya Dhiki au Baada ya Dhiki?)

Watu wengi wanaamini kwamba watakatifu watanyakuliwa kabla ya ujio wa Dhiki Kuu ya miaka saba, na kwamba wakati wa Dhiki Kuu watakuwa tayari wapo katika Ufalme wa Kristo wa Milenia, badala ya hapa duniani. Hata

hivyo, tunapoithibitisha imani hii kwa Neno la Mungu, basi tunaweza kuona kwa urahisi kwamba imani hii si sahihi.

Bwana Mungu wetu anautoa Ufalme wa Kristo kwa watakatifu wake kwa miaka elfu moja kama thawabu kwa ajili ya kufanya kazi na kuutoa uhai wao kwa ajili ya injili. Kama vile Ufunuo 20:4 inavyotueleza, *“Kisha nikaona viti vya enzi, wakaketi juu yake, nao wakapewa hukumu; nami nikaona roho zao waliokatwa vichwa kwa ajili ya ushuhuda wa Yesu, na kwa ajili ya neno la Mungu, na hao wasiomsujudia yule mnyama, wala sanamu yake, wala hawakuipokea ile chapa katika vipaji vya nyuso zao, wala katika mikono yao; nao wakawa hai, wakatawala pamoja na Kristo miaka elfu.”*

Kifungu hicho hapo juu kinatuelezea sisi ambao tutaweza kuingia katika Ufalme wa Milenia. Hawa ndio wale ambao pamoja na Dhiki Kuu, walipigana dhidi ya Mpinga Kristo, wakauawa ili kuilinda imani yao, wala hawakuipokea chapa ya Mnyama wala kuiabudu sanamu yake. Ili kutenganisha kati ya ngano na makapi, Mungu amewaruhusu wanadamu kuwa na chaguo la kuipokea au kutoipokea alama ya Mnyama. Mungu anataka kutenganisha ngano na makapi kwa kuwanyakua watakatifu na kisha kuwapa thawabu ya Ufalme wa Kristo kwa sababu ya imani na ushindi wao dhidi ya Shetani.

Kwa kuwa watu wa Mungu watakuwa ndio kikwazo kikuu kwa Mpinga Kristo ili asisimame kinyume na Mungu, na kujifanyia sanamu yake, na ili asiweze kuwafanya watu kuipokea alama yake. Basi, Mpinga Kristo atazitoa juhudi zake zote ili kuwaondolea mbali. Lakini watakatifu hawatasalimu amri kwa yule Mnyama, watapambana naye kwa imani, watayapokea mauaji ya kuwa wafia-dini, na kwa sababu hiyo watamtukuza Mungu. Idadi kubwa ya watakatifu, huku wakiangalia zaidi juu ya maisha yao baada ya kifo, wayapokea kwa hiari mauaji ya kuwa wafia-dini ili kuilinda imani yao

katika Mungu. Kwa kuwa Mpinga Kristo ataleta mateso mengi kiasi hicho kwa watakatifu katika kipindi cha Dhiki Kuu, basi ndio maana Mungu amemwandalia Mpinga Kristo na wafuasi wake mapigo ya mabakuli saba na adhabu ya kuzimu ambako wataungua milele.

Kwa hiyo, ulimwengu huu utaangamizwa kikamilifu na utavunjwawunjwa kwa mapigo ya mabakuli saba, kwa tetemeko kuu, kwa kiasi ambacho hakijawahi kuonekana. Kama matokeo, ulimwengu wa kwanza utatoweka bila hata kuacha alama yake. Kisha Mungu atawaamuru malaika zake kumkamata Mnyama na kisha kumfunga katika shimo la kuzimu lisilo na mwisho kwa miaka elfu moja, Bwana wetu atamfunga kwanza Mnyama katika shimo la kuzimu kabla ya kuwaruhusu watakatifu wake kuishi katika Ufalme wa Kristo wa Milenia.

Kwa kuwa shetani hatakuwepo katika Ufalme wa Milenia mahali ambapo watakatifu watatawala pamoja na Kristo, basi huko hakuna waongo wala laana tena. Isaya 35:8-10 inaelezea juu ya Ufalme wa Kristo ambao utawajia watakatifu walioshiriki katika ufufuo wa kwanza kama ifuatavyo: *“Na hapo patakuwa na njia kuu, na njia, nayo itaitwa, Njia ya utakatifu; wasio safi hawatapita juu yake; bali itakuwa kwa ajili ya watu hao; wasafirio, wajapokuwa wajinga, hawatapotea katika njia hiyo. Hapo hapatakuwa na simba, wala mnyama mkali hatapanda juu yake; hawataonekana hapo; bali waliokombolewa watakwenda katika njia hiyo. Na hao waliokombolewa na Bwana watarudi, watafika Sayuni wakiimba; na furaha ya milele itakuwa juu ya vichwa vyao; nao watapata kicheko na furaha, huzuni na kuugua zitakimbia.”*

Ufalme wa Kristo, utakaodumu kwa miaka elfu moja kama hapo juu, utakuja baada ya dunia kupitia Dhiki Kuu ya

miaka saba na baada ya kupita na kuangamizwa kwa ulimwengu unaoongozwa na Shetani na Mpinga Kristo. Hivyo, ufalme huu, ni zawadi ambayo Bwana wetu atawapatia watakatifu wake kwa kuteswa na kuwa wafia-dini ili kuilinda imani yao katika injili ya maji na Roho, na kwa kufanya kazi ili kuihubiri injili hii.

6) Mji wa Yerusalemu Mpya ni Kitu gani?

Mji wa Yerusalemu Mpya ni Mji Mtakatifu katika Mbingu na Nchi Mpya ambayo Mungu amewaandalia watakatifu ambao watashiriki katika ufufuo wa kwanza. Baada ya kuyahitimisha mapigo ya mabakuli saba hapa duniani, Mungu atamfunga Shetani katika shimo la kuzimu lisilo na mwisho kwa miaka elfu moja, kisha atawapatia watakatifu walioshiriki katika ufufuo wa kwanza baraka ya kutawala milele pamoja na Bwana katika Ufalme wa Milenia, baada ya kuisha kwa miaka elfu moja, Mungu ataifanya mbingu na nchi ya kwanza kutoweka kisha atawapatia watakatifu zawadi ya Mbingu na Nchi Mpya.

Wale ambao watazipokea baraka hizi ni watakatifu ambao wamepokea ondoleo la dhambi zao kwa kuamini katika injili takatifu ya maji na Roho iliyotolewa na Yesu Kristo. Bwana atafanyika kuwa Bwana-harusi wa watakatifu, na watakatifu watakuwa ni mabibi-harusi wa Mwana-kondoo ambaye amefanyika kuwa Bwana-harusi, watakatifu katika utukufu wakiwa wamevikwa ulinzi, baraka, na mamlaka ya Bwana-harusi katika Ufalme wake wenye utukufu.

Mungu amewaandalia watakatifu hawa Mji Mtakatifu katika Mbingu na Nchi Mpya. Mji huu si mwingine bali ni Mji Mpya wa Yerusalemu. Mji huu umeandaliwa maalumu kwa

watakatifu wa Mungu. Na mambo haya yote yamepangwa kwa watakatifu katika Yesu Kristo hata kabla Bwana Mungu hajauumba ulimwengu. Wale ambao kwa kuzitegemea nguvu za ajabu za Bwana Mungu, wataishi katika Ufalme wa Kristo wa Milenia basi hao wanastahilishwa kuingia katika Mbingu na Nchi Mpya ambapo Mji Mtakatifu unapatikana.

Kuanzia wakati huu na kuendelea, watakatifu wataishi pamoja na Bwana milele katika Hekalu la Mungu. Kwa kuwa Mungu yupo pamoja nao, basi hakutakuwa na kifo tena, wala huzuni, wala kuomboleza, wala mateso, kwa kuwa mbingu na nchi ya kwanza vitakuwa vimepita, naye Mungu atafanya vitu vyote kuwa vipya.

Mji wa Yerusalemu Mpya unang'ara, kwa kuwa una utukufu wa Mungu, na mwanga wake ni kama wa kito cha thamani, kama kito cha yakuti, kilicho angavu kama kioo. Hivyo, utukufu wa Mungu upo pamoja na mji na wale wote wanaoishi ndani yake. Mji una ukuta mkubwa na mrefu wenye milango kumi na mbili, milango mitatu kila upande; milango hii inalindwa na malaika kumi na mbili, na majina ya makabila kumi na mbili ya Israeli yameandikwa katika milango hiyo. Ukuta wa mji una misingi kumi na mbili, na juu yake yameandikwa majina ya mitume kumi na mbili wa Mwanakondo.

Mji umewekwa kama mraba mkubwa, huku upande wake mmoja ukiwa na yadi 12,000—sawa na kilomita 2,220 (maili 1,390). Ukuta wake una dhira 144, ambazo ni takribani mita 72. Ukuta huu umejengwa kwa yakuti, na Mji ni wa dhahabu safi, kama vile kioo angavu. Misingi ya ukuta imepambwa kwa aina mbalimbali za vito vya thamani, na milango kumi na mbili ya mji imejengwa kwa lulu.

Kwa kuwa Bwana Mungu na Mwana-kondoo wapo katika Mji, basi hakuna sababu ya mwanga wa jua wala mwezi. Pia

mto wa maji ya uzima unatiririka toka katika kiti cha enzi cha Mungu na cha Mwana-kondoo, huku ukiumwagilia Ufalme wa Mbinguni na kuvifanya vitu vyote kuwa vipya. Kila upande wa huo mto kuna mti wa uzima, unaozaa matunda kumi na mbili na kutoa matunda yake kila mwezi, na majani yake ni dawa ya kuwaponya mataifa. Katika mji huo hakuna tena laana, bali baraka za milele zinapatikana humo.

7) Alama au Chapa ya Mnyama ni Kitu Gani?

Wakati wa Dhiki Kuu, ili kumfanya kila mtu awe chini ya mamlaka yake, basi Mpinga Kristo atawalazimisha watu wote kuipokea alama au chapa yake katika mikono yao ya kuume au katika vipaji vya nyuso zao. Alama hii ni alama ya Mnyama. Mpinga Kristo atawataka watu kuipokea alama yake ili aweze kumfanya kila mtu kuwa mtumishi wake. Mpinga Kristo ataendelea na mipango yake ya kisiasa huku akitumia maisha ya watu kama nguvu yake. Ikiwa watu hawana alama inayoonyesha kuwa wao wapo upande wa Mnyama, basi atawazuia wasiweze kununua au kuuza chochote kile. Alama hii ni namba au jina la Mnyama. Wakati Mnyama atakapoonekana hapa ulimwenguni, watu walazimishwa kuipokea alama hii itakayokuwa imeundwa ama kwa jina lake au kwa namba yake.

Ikihesabiwa, basi namba ya Mnyama katika alama hii ni 666. Hii ina maanisha kwamba Mnyama, ambaye ni Mpinga Kristo, anajitangaza kuwa yeye ni Mungu. Kwa maneno mengine, inaonyesha kiburi cha mwanadamu cha kujaribu kuwa kama Mungu. Kwa hiyo, yeyote atakayeipokea alama hii katika mkono wake wa kuume au katika kipaji cha uso wake atakuwa akimtumikia na kumwabudu Mpinga Kristo Mnyama

kama ni Mungu.

Wakati ulimwengu unapokabiliana na magumu mengi toka katika mapigo ya matarumbeta saba, Mpinga Kristo, hali akitiwa nguvu na Shetani, ataufanya ulimwengu wote kuwa chini ya utawala wake kwa nguvu kuu. Huku akijitibu jeraha lake la mauti na kufanya miujiza mingi ikiwemo kuleta moto toka angani, basi atawafanya watu wengi wa ulimwengu huu kumfuata. Kama vile mashujaa wanavyotokea wakati wa shida, Mpinga Kristo, mtu aliyepokea nguvu toka kwa Shetani, atayatatia matatizo magumu ambayo ulimwengu utakuwa ukikabiliana nayo kwa mamlaka makuu, na kwa sababu hiyo ataheshimiwa na watu wote wa ulimwengu kana kwamba ni Mungu. Kwa kuwa Shetani atawafanya watu wengi wamtumikie Mpinga Kristo kana kwamba ni Mungu, basi watu wengi wataishia kumwabudu kana kwamba ni Mungu.

Hatimaye, Mpinga Kristo ataifanya kazi yake ya mwisho kwa msaada wa mnyama mwingine atakayetoka katika nchi. Mnyama wa pili atawalazimisha watu kutengeneza sanamu ya Mnyama, ambaye ni Mpinga Kristo; ataipatia sanamu hiyo pumzi kwa nguvu za Shetani na kuifanya iweze kuongea; na atamuua kila ambaye hataiabudu sanamu ya huyo Mnyama. Atamfanya kila mtu kuipokea alama au chapa ya huyu Mnyama katika mikono yao ya kuume au katika vipaji vya nyuso zao, na atamzuia yeyote yule asiye na alama hiyo kununua wala kuuza chochote.

Kupokea alama ya Mnyama maana yake ni kusalimu amri na kuwa mtumishi wa mnyama huyo. Alama hiyo haitapokelewa kwa kulazimishwa kimwili, bali kwa kuwafanya watu wafanye maamuzi binafsi kuipokea. Lakini, kwa kuwa pasipo kuwa na alama hii hakuna anayeweza kukunua au kuuza kitu chochote kile, basi watu wote hapa ulimwenguni ambao hawajapokea ondoleo la dhambi watasimama upande wa

Mnyama na wataishia kusalimu amri mbele zake.

Hivyo, wale watakaosalimu amri kwa Mnyama na kisha kuipokea alama yake watatupwa pamoja na Ibilisi, katika ziwa liwakalo kwa moto na kibiriti. Wakristo wa mazoea ambao hawajazaliwa tena upya, na kwa kuwa mioyo yao haina Roho Mtakatifu, hatimaye watasalimu amri mbele ya Shetani, wataipokea alama katika mikono yao ya kuume au katika vipaji vya nyuso zao, kisha watamwabudu huyu Shetani kana kwamba ni Mungu. Wakati huo, ni wale tu waliopokea ondoleo la dhambi na walio na Roho Mtakatifu katika mioyo yao ndio watakaoweza kuyapinga matakwa ya kuipokea alama ya Mnyama, kisha watapambana na kumshinda Mpinga Kristo kwa imani.

8) Viumbe Wanne Wenye Uhai Wanaosimama Mbele ya Kiti cha Enzi cha Mungu ni Akina Nani?

Ufunuo 4:6-9 inaelezea juu ya viumbe wanne wenye uhai kama ifuatavyo: *“Na mbele ya kile kiti cha enzi kulikuwa na mfano wa bahari ya kioo, kama bilauri; na katikati ya kile kiti cha enzi, na pande zote za kile kiti, walikuwako wenye uhai wanne, wamejaa macho mbele na nyuma. Na huyo mwenye uhai wa kwanza alikuwa mfano wa simba; na mwenye uhai wa pili alikuwa mfano wa ndama; na mwenye uhai wa tatu alikuwa na uso kama uso wa mwanadamu; na mwenye uhai wa nne alikuwa mfano wa tai arukaye. Na hawa wenye uhai wanne, kila mmoja alikuwa na mabawa sita; na pande zote na ndani wamejaa macho, wala hawapumziki mchana wala usiku, wakisema, Mtakatifu, Mtakatifu, Mtakatifu, Bwana Mungu Mwenyezi, aliyekuwako na aliyeko na atakayekuja. Na hao wenye uhai wanapompa yeye aketiye juu ya kiti cha enzi*

utukufu, na heshima, na shukrani, yeye aliye hai hata milele na milele,.... ”

Wale viumbe wanne wenye uhai waliokizunguka kiti cha enzi cha Mungu, pamoja na wale wazee 24, ni watumishi waaminifu wa Mungu ambao wanaoyatenda mapenzi yake na kisha kuutukuza utakatifu wake na utukufu. Wakati Mungu anapotenda kazi, hatendi peke yake, bali anatenda wakati wote kupitia watumishi wake. Viumbe wanne wenye uhai, ni watumishi walio karibu zaidi na Mungu, wamepokea uwezo wa kuyatenda mapenzi ya Mungu wakati wote.

Kila moja kati ya wale viumbe wanne wenye uhai ana umbo la peke yake, jambo linaloonyesha kwamba kila kiumbe hai anamtumikia Mungu kwa viwango tofauti. Viumbe hao wana macho pande zote ndani na nje, hii ina maanisha kwamba wakati wote wapo makini kuyaangalia madhumuni ya Mungu. Kwa hiyo, viumbe wanne wenye uhai ni watumishi waaminifu wa Mungu ambao wakati wote wanayatenda mapenzi yake.

Kwa nyongeza, viumbe wanne wenye uhai hawapumziki katika kuusifu utukufu wa Mungu na utakatifu wake, ni kama vile Mungu asivyolala. Wanausifu utakatifu wa Mungu Baba na Bwana Yesu, ambaye ni Mwana-kondoo wa Mungu, pia wanazisifia nguvu zake kuu. Kwa namna hii, wale viumbe wanne wenye uhai wanaosimama mbele ya kiti cha Mungu cha enzi wanamsifu Mungu toka katika mioyo yao yenye unyenyekevu, na hawafanyi hivyo kama sehemu ya kulazimishwa. Kwa nini? Kwa sababu ya kile ambacho Yesu Kristo amekifanya—yaani, kwa kitendo chake cha kujishusha katika umbile la kibinadamu na kwa kuzaliwa hapa ulimwenguni kwa kupitia mwili wa Bikira Mariamu; kwa kuzichukua dhambi zote za mwanadamu katika mwili wake kwa kuupokea ubatizo toka kwa Yohana; kwa kuzichukua dhambi hizo hadi Msalabani na kisha kufa juu yake; na kisha

kuwakomboa wanadamu toka katika dhambi—sasa, Yesu ameketi katika kiti cha enzi cha Mungu, na kwa sababu ya matendo haya mema anastahili kupokea utukufu toka kwa viumbe hawa wenye uhai milele na milele.

Hivyo hawa viumbe wanne wenye uhai wakiwa pamoja na wazee 24 wanamwinua Mungu, kwa kumpatia sifa za kweli toka katika mioyo yao.

9) Lipi ni Sahihi: Kunyakuliwa Kabla ya Dhiki, au Kunyakuliwa Baada ya Dhiki? Je, Watakatifu Watakuwepo Hapa Duniani Wakati wa Dhiki Kuu?

Tukiangalia historia ya Ukristo, tunaweza kuona kwamba idadi kubwa ya waongo wamekuwa wakiinuka hadi wakati huu wa sasa. Huku wakikifafanua Ktiabu cha Ufunuo na huku wakipigia hesabu muda wa unyakuo kwa kutumia mbinu yao binafsi, waongo hawa wamepanga tarehe maalumu ya unyakuo na wamekuwa wakifundisha kwamba Bwana atarudi na watakatifu watanyakuliwa siku hii ya kuchaguliwa kwao.

Hata hivyo, madai hayo yote yaliishia kuwa ni uongo. Tabia moja ambayo inafanana sana miongoni mwao wote ni kwamba wanaitetea nadharia ya kunyakuliwa kabla ya dhiki. Wanawaeleza wafuasi wao kwamba mali walizo nazo hazitakuwa na maana yoyote ile kwa kuwa watanyakuliwa na kuinuliwa angani kabla ya Dhiki Kuu, hawa waongo waliwadanganya watu wengi na hivyo kuwaibia mali na vitu vyao.

Tunapaswa kutambua kwamba hii ni mbinu ya Shetani, akijaribu kuwadanganya watu wote wa ulimwengu huu ili kuwageuza wawe wafuasi wake kwa kupitia uongo huu.

Jambo muhimu zaidi kwa watakatifu, na jambo ambalo

watakatifu wengi wanajiuliza, ni swali kwamba unyakuo wa watakatifu utatokea lini. Ufunuo 10:7 inatueleza kwamba, *“isipokuwa katika siku za sauti ya malaika wa saba atakapokuwa tayari kupiga baragumu; hapo ndipo siri ya Mungu itakapotimizwa, kama alivyowahubiri watumishi wake hao manabii.”* Je, aya hii inaposema kwamba, *“siri ya Mungu itakapotimizwa”* ina maanisha nini? “Siri ya Mungu” si kitu kingine bali ina maanisha ni unyakuo wa watakatifu.

Baada ya mapigo sita kati yale mapigo ya matarumbeta saba ya Mungu kuisha, Mpinga Kristo atatokea hapa duniani, atautawala ulimwengu, na atamtaka kila mtu kuipokea alama ya Mnyama. Watakatifu watauwawa na kuwa wafia-dini kutokana na mateso yake. Hii itafuatiwa mara na mlio wa tarumbeta la saba, ambapo watakatifu waliouawa kama wafia-dini pamoja watakatifu walio hai walioilinda imani yao watafufuliwa na kunyakuliwa.

Wakati tarumbeta la saba litakapolia, Mungu hataleta pigo hapa duniani; bali, huu ni wakati ambapo unyakuo wa watakatifu utatokea. Baada ya unyakuo, basi Mungu ataendelea kuyamimina mapigo yake ya mabakuli saba hapa duniani. Kwa hiyo, kuwadia wakati wa mapigo ya mabakuli saba, watakatifu hawatakuwepo hapa duniani, bali watakuwa angani pamoja na Bwana. Sisi sote tunapaswa kutambua kwamba unyakuo wa watakatifu utakuja wakati malaika wa saba atakapolipiga tarumbeta la mwisho.

Hata hivyo, hata sasa Wakristo wengi bado wanaendelea kuamini katika nadharia ya kunyakuliwa kabla ya dhiki. Kwa kuwa imani yao haijajiandaa kwa ujio wa majanga ya kiasili na kutokea kwa Mpinga Kristo, basi hatimaye watashindwa vita yao ya kiroho dhidi ya Shetani na Mpinga Kristo, watageuka na kuwa watumishi wake, kisha wataangamizwa pamoja na ulimwengu.

Miaka mitatu na nusu ya kwanza katika ile miaka ya saba ya Dhiki Kuu ni wakati wa mapigo ya matarumbeta saba, wakati ambapo dunia itaharibiwa na majanga ya kiasili. Theluthi ya jua na theluthi ya nyota zitatiwa giza; theluthi ya misitu ya hapa duniani itaunguzwa; theluthi ya bahari itageuka na kuwa damu, huku ikiua theluthi ya viumbe hai ndani yake; vimwondo vitaanguka toka angani, na kuyageuza theluthi ya maji kuwa pakanga; na kama matokeo ya hayo, watu wengi sana watakufa. Ulimwengu utaangukia katika machafuko kutokana na mapigo haya, huku mataifa yakiinuka ili yapigane na mataifa mengine, huku falme zikipigana na falme, huku vita ikitokea sehemu mbalimbali.

Kwa hiyo, wakati Mpinga Kristo atakapotokea na kuyatatua matatizo hayo yote katika hali yenye machafuko kama hiyo, basi watu wengi sana watamfuata, na kwa sababu hiyo watayaleta mapigo ya kutisha zaidi hapa duniani.

Hivyo, ulimwengu huu utashuhudia kuinuka kwa asasi zenye mafungamano ya kisiasa ya kimataifa, utaratibu wa kiutawala ambao unashughulikia maslahi ya jumla ya mataifa yote. Muungano huu wa mataifa duniani utaangukia katika mikono ya Shetani huku Mpinga Kristo akitokea, kisha muungano huo utageuzwa kua ni muungano unaosimama kinyume na Mungu na watakatifu wake. Mtawala wa muungano huu wa kimataifa atayatawala mataifa yote, kisha atatenda kama Mpinga Kristo. Yeye, anayefanya kazi kwa kutumia nguvu za Shetani ni adui wa Mungu na ni mtumishi wa Ibilisi.

Wakati huo, Mpinga Kristo atazionyesha rangi zake halisi, huku akiwazuia watu kutomwamini Mungu a kweli na kuwalazimisha wamwabudu yeye kana kwamba ni Mungu. Na ili kulitimiza hili, atafanya ishara nyingi mbele yao, atatatua matatizo mengi ya hapa ulimwenguni huku akitumia nguvu za

Shetani, na kwa sababu hiyo ataukamata moyo wa kila mtu.

Mwishoni, Mpinga Kristo atatengeneza sanamu yake na kuwataka watu wote waiabudu kana kwamba ni Mungu. Na ili kumweka kila mtu chini ya uongozi wake wakati huo wa dhiki, basi Mpinga Kristo atawalazimisha watu kuipokea alama yake katika mikono yao ya kulia au katika vipaji vya nyuso zao, na kisha atawazuia wote wasio na alama hii kufanya biashara yoyote ile. Pia atawaua wale wote ambao watakataa kumwabudu yeye, atawaua bila kujalisha idadi yao. Kwa hiyo, yeyote ambaye jina lake halijaandikwa katika Kitabu cha Uzima ataishia kuipoka alama hii na kisha kumwabudu Mnyama.

Hata hivyo, watakatifu hawatasalimu amri kwa Mpinga Kristo wala kuipokea alama yake. Kwa kuwa Roho Mtakatifu anakaa katika mioyo yao, basi hakuna mwingine yeyote zaidi ya Mungu Mwenyezi wanayeweza kumwabudu kwa kuwa ni Bwana wao. Hivyo, watakatifu watakataa kumwabudu Shetani na Mpinga Kristo na kuwa watumishi wao, bali watauawa na kuwa wafia-dini kwa imani yao, na kwa sababu hiyo watawashinda Shetani na Mpinga Kristo.

Kama vile Ufunuo 13:10 inavyotueleza, *“Mtu akichukua mateka, atachukuliwa mateka. Mtu akiua kwa upanga, atauawa kwa upanga. Hapa ndipo penye subira na imani ya watakatifu.”* Wakati Mpinga Kristo atakapoonekana na kisha kuwalazimisha watu kuipokea alama yake, wakati huo miaka mitatu na nusu ya Dhiki Kuu itakuwa imeshapita, na kipindi cha miaka mingine mitatu na nusu kitakuwa kimeanza. Wakati huu watakatifu watateswa na Mpinga Kristo na kisha kuuawa kama wafia-dini.

Lakini kitendo cha Mpinga Kristo kutwaa madarakana kuwatesa watakatifu ni mambo yaliyoruhusiwa na Mungu kwa kipindi cha muda mfupi tu, kwa kuwa Bwana atakifupisha

kipindi cha Dhiki kwa watakatifu wake. Wakati huo, watakatifu watampatia Mungu utukufu kwa kupambana na Mpinga Kristo ili kuilinda imani yao na kisha kumshinda kwa wao kuwa wafia-dini.

Baada ya kukipitia kipindi cha kwanza cha miaka mitatu na nusu katika ile miaka saba ya Dhiki Kuu, watakatifu waliozaliwa tena upya watakuwepo hapa duniani hadi watakapouawa na kuwa wafia-dini wakati ambapo kipindi cha pili dhiki kitakapokuwa kimeanza. Hivyo, watakatifu ni lazima wapambane na Shetani na Mpinga Kristo na kuwashinda kwa imani yao. Hii ndio sababu Ufunuo inatueleza kwamba Mungu atawapatia Mbingu wale watakaoshinda. Kwa hiyo, kabla ya kupita kwa miaka mitatu na nusu ya ile Dhiki Kuu na kabla ya kuonekana kwa Mpinga Kristo, basi imani ya watakatifu itatunzwa katika Kanisa la Mungu, yaani chini ya ulinzi na uongozi wa Bwana wetu.

Hivyo, watu wanapaswa kuwekwa huru toka katika haya mafundisho mabaya ya kidini ambayo Shetani ameyaeneza katika jumuiia za Kikristo, mafundisho hayo ni nadharia ya kunyakuliwa kabla ya dhiki, pia wanapaswa kupokea ondoleo la dhambi zao zote kwa kuamini katika injili ya maji na Roho na kisha kujiunga katika Kanisa la Mungu. Ni kwa kufanya hivyo tu ndipo imani yao inapoweza kujengwa kwa kupitia Kanisa la Mungu kwa miaka mitatu na nusu ya kwanza katika ile miaka ya Dhiki Kuu, na ni hapo ndipo wanapoweza kuwa imani inayoweza kupambana dhidi ya Mpinga Kristo na kisha kuyapokea mauaji yao wa kuwa wafia-dini utakapowadia wakati mgumu wa dhiki.

10) Unaposema kwamba unyakuo utakuja baada ya malaika wa saba kulipiga tarumbeta lake, je, hujichanganyi kutokana na kile ambacho Bwana amekisema, kwamba hakuna mtu anayeijua siku wala saa ya unyakuo, akiwamo Bwana Mwenyewe?

Hapana kabisa! Alichotueleza Bwana wetu si juu ya siku na saa ambapo watakatifu watanyakuliwa, bali ametueleza juu ya habari za utangulizi na ishara ambazo zitapelekea kutokea kwa tukio hili muhimu. Ni kwa kufahamu hivyo ndipo watakatifu wanaompenda Bwana wanapoweza kuiandaa imani yao, na hapo ndipo wanapoweza kushiriki katiak unyakuo kwa kupambana dhidi ya Mpinga Kristo na kuyapokea mauaji yao ya kuwa wafia-dini wakati utakapowadia.

Kwa kupitia ufunuo wake, Mungu alimwonyesha Mtume Yohana, aliyekuwa uhamishoni katika Kisiwa cha Patmo mambo yote ambayo yatakuja kutokea nyakati za mwisho za ulimwengu huu. Vivyo hivyo, Mungu anapopanga na kuzitimiza kazi zake, basi huwa anahakikisha kuwa watumishi wake wanafahamu.

Katika Neno la Mungu lote, Kitabu cha Ufunuo ndio kinachoongoza kwa kuandikwa kwa lugha ya picha. Kwa sababu hii, ni watumishi wa Mungu tu ambao wameokolewa toka katika dhambi zao zote kwa kuamini katika injili ya maji na Roho na hivyo kuwa na Roho Mtakatifu ndani ya mioyo yao ndio wanaoweza kuzielezea vizuri lugha hizo za picha kwa watu. Neno la Ufunuo linawafunulia kwa kina watumishi wa Mungu na watakatifu wake kuhusu mapigo ya matarumbeta saba, kuonekana kwa Mpinga Kristo, watakatifu kufia-dini, kufufuka na kunyakuliwa kwa wataktifu, Ufalme wa Kristo wa Milenia, na Mbingu na Nchi Mpya.

Kunyakuliwa kwa watakatifu kunahusiana kwa karibu

kabisa na vifo vya wafia-dini. Ufunuo 11:10-12 inatueleza kuhusu kifo cha manabii wawili, na juu ya ufufuo na kunyakuliwa kwao kwa muda wa siku tatu na nusu. Mashahidi hawa wawili watauawa na Mpinga Kristo kisha baada ya siku tatu na nusu watafufuliwa toka mauti. Tunachoweza kukiona katika maelezo haya ni kwamba wakati Mpinga Kristo atakapoonekana hapa duniani na kisha kuwafanya watu wamwabudu Mnyama kwa kuipokea alama yake katika mikono yao ya kuume au katika vipaji vya nyuso zao, basi watakatifu watapambana dhidi ya Mpinga Kristo na kisha kuuawa na kuwa wafia-dini kwa imani yao, lakini kufuatia kurudi kwa Bwana muda mfupi baada ya kuuawa kwao na kuwa wafia-dini, watashiriki katika ufufuo wa kwanza na kisha kunyakuliwa.

Pia Paulo alizungumzia juu ya unyakuo katika 1 Wathesalonike 4:16-17: *“Kwa sababu Bwana mwenyewe atashuka kutoka mbinguni pamoja na mwaliko, na sauti ya malaika mkuu, na parapanda ya Mungu; nao waliokufa katika Kristo watafufuliwa kwanza. Kisha sisi tulio hai, tuliosalia, tutanyakuliwa pamoja nao katika mawingu, ili tumlaki Bwana hewani; na hivyo tutakuwa pamoja na Bwana milele.”*

Wakati utawala wa Mpinga Kristo utakapoanza katika ulimwengu huu, wakati atakapojaribu kutulazimisha ili tuipokee alama yake, na wakati atakapodai aabudiwe kana kwamba ni Mungu, basi sisi watakatifu ni lazima tutambue kwamba wakati wa kuuawa kwetu na kuwa wafia-dini umewadia, pia ni lazima tuamini kwamba mara baada ya kuuawa kama wafia-dini utafuatia ufufuo na unyakuo wetu. Hatufahamu kuwa ni mwezi upi na ni siku ipi mambo haya yatatokea. Lakini tunachofahamu ni kwamba unyakuo wa watakatifu utakuja baada ya malaika wa saba kulipiga tarumbeta lake. Watakatifu wote ni lazima wajiandae kuipokea Siku ya Bwana kwa kuuamini ukweli huu.

11) Unasema kwamba Yesu atakuja ili kuwanyakua watakatifu wake, na kwamba atashuka hapa duniani ili kupigana vita ya Harmagedoni. Je, una maanisha kwamba Bwana atakuja hapa duniani mara mbili? Je, tofauti ya mambo hayo mawili ni ipi?

Kushuka kwa Yesu toka Mbinguni ili kuwanyakua watakatifu wake na kurudi kwake duniani ili kumhukumu Ibilisi kwa kupitia vita ya Harmagedoni ni mambo mawili tofauti.

Baaba ya ile miaka mitatu na nusu ya kwanza katika ile Dhiki Kuu kuisha, na mara baada ya mauaji wa watakatifu kutoka kwa Mpinga Kristo, basi Bwana atashuka toka Mbingunini. Wakati huu, watakatifu ambao watakuwa wamelala katika makaburi yao na watakatifu ambao watakuwa wamestahimili katika kipindi cha Dhiki pasipo kuipokea alama ya Mnyama na hivyo kuilinda imani yao watafufuliwa na kuinuliwa angani na kisha kuonana na Bwana angani. Kuanzia wakati huo na kuendelea, watakatifu watakuwa wakati wote pamoja na Bwana. Wakati huu, Bwana hatashuka hapa duniani. Kwa nini? Kwa sababu mapigo ya mabakuli saba ambayo yatamhukumu Shetani na Mpinga Kristo yatakuwa bado hayajamiminwa hapa duniani.

Hivyo, Mtume Paulo katika 1 Wathesalonike 4:17 alitueleza kwamba, *“Kisha sisi tulio hai, tuliosalia, tutanyakuliwa pamoja nao katika mawingu, ili tumlaki Bwana hewani; na hivyo tutakuwa pamoja na Bwana milele.”* Watakatifu waliopambana na Mpinga Kristo na kisha kuuawa kama wafia-dini ili kuilinda imani yao watashiriki katika ufufuo wa kwanza, kisha watakutana na Bwana angani na wala si hapa duniani, kisha wataingia katika karamu ya harusi ya Mwana-kondoo huko Mbinguni pamoja na Yesu Kristo,

ambaye amefanyika kuwa Bwana-harusi wao.

Baada ya hili, Mungu atawaamuru malaika wake kuyamimina mapigo ya mabakuli saba yaliyojazwa ghadhabu ya Mungu, mapigo ambayo alikuwa ameyahifadhi kwa uvumilivu tangu wakati wa uumbaji, kwa ajili ya Mpinga Kristo na wafuasi wake, na wenye dhambi wote wa ulimwengu huu watakaokuwa wapo duniani. Hivyo, ulimwengu utakabiliana na mapigo makubwa sana ambayo hakuna mfano wake uliowahi kuonekana hapo kabla. Watakatifu watakaokutana na Bwana angani watakuwa wakimsifu Bwana angani kwa ajili ya mapigo ya mabakuli saba yatakayokuwa yakimiminwa hapa duniani.

Baada ya kuwa wameshiriki katika ufufuo na unyakuo kupitia Bwana, basi watasimama katika bahari ya kioo iliyochangamana na moto ili kuisifu hukumu ya haki ambayo Mungu anaileta duniani. Hivo, watakatifu ambao waliuawa na kuwa wafia-dini na walioshiriki katika ufufuo na unyakuo wao kwa kupitia nguvu za Bwana watamsifu Bwana bila kukoma, watamsifu kwa ajili ya wokovu ambao amewapatia, na kwa hukumu yake kwa Mpinga Kristo na watumishi wake kutokana na nguvu zake kuu na zisizo na kikomo.

Kila mtu hapa ulimwenguni atateseka sana wakati malaika watakapokuwa wakiyamimina mapigo yao, yaani kuanzia pigo la vidonda na majipu, pigo la bahari kugeuka na kuwa damu; pigo la bahari kugeuka na kuwa damu; pigo la maji kugeuka na kuwa damu; pigo la kuunguzwa na joto kali la jua; na pigo la giza na maumivu. Wakati malaika wa sita atakapolimimina bakuli lake katika ule mkubwa wa Frati, maji yake yatakauka, ili kuiandaa njia ya wafalme toka mashariki. Kutokana na pigo hili kutakuwa na njaa kubwa sana itakayoikumba dunia, njaa ambayo italetama mateso makubwa kwa wanadamu. Mapepo yatakuwa mengi sana, huku yakishawishi roho za watu kupitia

Mpinga Kristo na nabii wa uongo.

Kisha, roho za mashetani zitawashawishi wafalme wa duniani kwa ajili ya vita na kuwakusanya mahali panapoitwa Harmagedoni ili kupigana na Mungu Mwenyezi. Hapa ndipo mahali ambapo vita ya mwisho kati ya Shetani na Mungu itapiganwa. Lakini kwa kuwa Yesu ni Mungu Mwenyezi, atashuka toka angani akiwa ameketi katika farasi mweupe pamoja na jeshi lake, atamshinda shetani, na kisha kumtupa Mnyama katika ziwa liwakalo kwa moto na kibiriti (Ufunuo 19:11-21). Kwa kuwa hivi sasa Yesu Kristo ana nguvu kamili kama Bwana anayekuja mara ya pili, basi ataonekana hapa duniani ili kuuhukumu ulimwengu na kumwangamiza Mnyama.

Kwa hiyo, tunapaswa kutambua kwamba wakati Yesu Kristo atakaposhuka toka Mbinguni wakati wa unyakuo wa watakatifu, hatashuka hadi hapa duniani, bali atakuja angani na kuwachukua watakatifu kwenda mahali alipo, atawaruhusu kukutana nao angani na kuwaingiza katika karamu ya harusi Mbinguni. Wakati Bwana atakaporudi hapa duniani, atafanya hivyo ili kumshinda Shetani na jeshi lake wanaosimama kinyume na Mungu, atawashinda kwa Neno lake lenye nguvu katika Vita ya Harmagedoni, atafanya hivyo ili kumtupa Ibilisi katika ziwa la moto na kibiriti, na kisha kuwaua wafuasi wake wote watakaokuwa wamesalia. Huu ndio ujio wa Bwana wa mara ya pili. Tunapaswa kuwa na ufahamu na imani sahihi ambayo inaweza kutofautisha kati ya kushuka kwa Bwana angani na ujio wake wa mara ya pili hapa duniani.

Hata hivyo kuna watu wengi wanaofikiri kwamba Bwana atashuka moja kwa moja hapa duniani wakati unyakuo utakapotokea. Kwa kweli hiyo si sahihi. Unyakuo utakapotokea, Bwana hatakuja hapa duniani, bali atakuwepo angani. Kwa maneno mengine, atawainua na kuwapokea watakatifu angani.

Kwa hiyo, unapaswa kuondokana na fikra kwamba Bwana atakuja tena hapa duniani wakati wa unyakuo, na badala yake unapaswa kwa kuzingatia Neno lililoandikwa, uanapaswa kufahamu kwamba unyakuo wa watakatifu utatokea wakati malaika wa saba atakapolipiga tarumbeta lake.

12) Je, “mkutano mkubwa ambao hakuna anayeweza kuuhesabu (Ufunuo 7:9)” una maanisha ni watakatifu walionyakuliwa?

Ndiyo, hiyo ni sahihi kabisa. Ufunuo 7:9 inaeleza, *“Baada ya hayo nikaona, na tazama, mkutano mkubwa sana ambao hapana mtu awezaye kuuhesabu, watu wa kila taifa, na kabila, na jamaa, na lugha, wamesimama mbele ya kile kiti cha enzi, na mbele za Mwana-Kondoo, wamevikwa mavazi meupe, wana matawi ya mitende mikononi mwao,”* hapa tunaweza kuona kwamba kwa imani yao katika injili ya maji na Roho, idadi kubwa ya makutano miongoni mwa Wamataifa watapambana na kumshinda Mpinga Kristo, halafu wauawa na kuwa wafia-dini, kisha watashiriki katika ufufuo wa kwanza na kunyakuliwa.

Ingawa katika siku hizi za mwisho Mpinga Kristo atacharuka pasipo kuhofia adhabu, basi tunaweza kuona kwamba katika nyakati hizo kutainuka idadi kubwa ya watu wanaoamini katika injili ya maji na Roho iliyotolewa na Mungu. Kwa hiyo, mkutano mkuu utatokea miongoni mwa Wamataifa, mkutano ambao ni mkubwa kiasi kuwa hakuna hata mmoja anayeweza kuuhesabu, huo utakuwa ni mkutano wa watu ambao wameokolewa toka katika dhambi kwa kuamini katika injili ya maji na Roho na kisha kupokea vifo vya kuwa wafia-dini kwa imani.

Ufunuo 7:14 inasema, *“Nikamwambia, Bwana wangu, wajua wewe. Akaniambia, Hao ndio wanatoka katika dhiki ile iliyo kuu, nao wamefua mavazi yao, na kuyafanya meupe katika damu ya Mwana-Kondoo.”* Wakati Dhiki Kuu ilipokuja hapa duniani, watu hawa waliokolewa toka katika dhambi kwa kuamini kwa mioyo yao yote katika injili ya maji na Roho iliyokuwa ikihubiriwa na Kanisa la Mungu. Hivyo waliuawa na kuwa wafia-dini, kwa kuwa hawakumwabudu Mpinga Kristo wala kuipokea alama ya Mnyama katika mikono yao ya kulia au katika vipaji vya nyuso zao, hivyo wakajiunga katika ufufuo wa watakatifu na unyakuo. Hii ndio maana wanasimama mbele ya kiti cha enzi na mbele ya Mwana-kondoo huku wakisifu; *“Wakilia kwa sauti kuu wakisema, Wokovu una Mungu wetu akitiye katika kiti cha enzi, na Mwana-Kondoo!”*

Hivyo, Mungu, si Mungu wa Wayahudi, bali ni Mungu pia wa Wamataifa. Kwa hiyo, Mungu atahakikisha kwamba wakati siku za Dhiki Kuu zitakapowadia, idadi kubwa ya Wamataifa toka mataifa mbalimbali, makabila, watu, na lugha mbalimbali wataamini injili ya maji na Roho, watapokea ondoleo la dhambi, kisha watasimama miongoni mwa orodha ya wafia-dini.

13) Mashahidi wawili wanafufuliwa na kunyakuliwa mbinguni baada ya kuukamilisha ushuhuda wao. Hii ina utofauti gani na kunyakuliwa kwa watakatifu kwa ujio wa Kristo mara ya pili?

Kama nilivyoeleza kwa majibu yangu kwa swali la 2, mashahidi hawa wawili ni watumishi maalumu wa Mungu ambao atawainua toka kwa watu wa Israeli ili kuwaokoa Waisraeli. Kuna kazi muhimu ambayo ni lazima Mungu

ataifanya kabla ya kuuangamiza ulimwengu huu, na kazi hiyo ni kuwaokoa watu wa Israeli toka katika dhambi na kuwafanya washiriki katika ufufuo wa kwanza na unyakuo.

Katika Warumi 3:29-30 Mtume Paulo anasema, *“Au je! Mungu ni Mungu wa Wayahudi tu? Siye Mungu wa Mataifa pia? Naam, ni Mungu wa Mataifa pia; kama kwa kweli Mungu ni mmoja, atakayewahesabia haki wale waliotahiriwa katika imani, nao wale wasiotahiriwa atawahesabia haki kwa njia ya imani iyo hiyo.”* Njia ya kuokolewa toka katika dhambi mbele za Mungu ni sawa kwa Wayahudi na kwa Wamataifa pia. Kwa Wayahudi na kwa Wamataifa pia, wokovu unawajia kwa njia ya imani tu katika injili ya maji na Roho. Ili waweze kuokolewa toka katika dhambi zao zote, basi Wayahudi ni lazima wampokee Yesu Kristo kuwa ni Mwokozi wao na waweze kuamini, yaani kama Wamataifa walivyoamini, kwamba Yesu Kristo alizichukua dhambi zao zote katika mwili wake kwa ubatizo wake, na kwamba alikufa Msalabani ili kuhukumiwa kwa ajili ya dhambi kwa niaba yao.

Mungu anawatendea Wayahudi pamoja na Wamataifa sawia, na amewaruhusu kupata wokovu kwa njia ya imani. Hii ndio sababu Mungu aliwaruhusu mashahidi wake wawili kwa watu wa Kiyahudi wakati wa miaka mitatu na nusu ya kwanza ya ile Dhiki Kuu, na ndio sababu Mungu aliwaruhusu mashahidi hawa kuihubiri injili ya maji na Roho kwao.

Sura ya 11 ya Ufunuo inaelezea juu ya mizeituni miwili na vinara viwili vya taa ambavyo vinahusianishwa na mashahidi hawa wawili. Mizeituni miwili ina maanisha ni watumishi wawili wa Mungu ambao Mungu atawaruhusu kwa ajili ya wokovu wa Waisraeli, na vinara viwili vya taa vina maanisha ni makanisa mawili ya Mungu, ambayo ni kwa ajili ya Waisraeli na kwa ajili ya Wamataifa. Kwa maneno mengine, Mungu atayaruhusu Makanisa yake mawili kwa pamoja

kuihubiri injili ya maji na Roho kwa Waisraeli na Wamataifa katika kipindi cha miaka mitatu na nusu ya kwanza katika ile miaka ya Dhiki Kuu.

Hivi sasa, Kanisa la Mungu linapatikana kati ya Waisraeli. Lakini wakati Mungu anapoiangalia mioyo yao na wakati wake utakapowadia, Mungu ataiandaa mioyo yao kulipokea Neno lake, atawainua watumishi wawili kwa ajili yao, na atawafanya wampokee Yesu Kristo kuwa ni Mwokozi wao.

Hivyo, Mungu atawaokoa Waisraeli na Wayahudi katika wakati wa Dhiki Kuu. Pia ataruhusu mateso na mauaji ya wafia-dini kwa watakatifu waliozaliwa tena upya kwa Waisraeli na kwa Wamataifa pia. Ule ukweli kwamba mashahidi wawili watauawa na kuwa wafia-dini baada ya kuutumiza ushuhuda wao na kisha kufufuliwa na kunyakuliwa mbinguni kwa siku tatu na nusu—basi, kama ilivyotokea kwa mashahidi hawa, vivyo hivyo watumishi wa Mungu na watu wake miongoni mwa Wamataifa watapambana dhidi ya Mpinga Kristo, watauawa na kuwa wafia-dini, na hivyo watashiriki katika ufufuo wao na katika unyakuo.

14) Ninaamini kwamba watakatifu watanyakuliwa kabla ya Dhiki Kuu. Lakini Biblia inaeleza mara nyingi juu ya watakatifu watakaokuwa wamebakia hapa duniani wakati wa Dhiki Kuu. Je, hao ndio wale waliokubaliana na ulimwengu, na ambao imani yao iligeuka na kuwa ya vuguvugu?

Kwanza kabisa, unapaswa kutambua kwamba nadharia ya kunyakuliwa kabla ya dhiki unayoimani ni mafundisho ya uongo. Hii ndio sehemu ambayo Wakristo wengi wameielewa vibaya. Wanafikiri kwamba kwa kuwa watakatifu watakuwa

wamekwisha nyakuliwa kabla ya Dhiki Kuu, basi wakati huo utakapowadia utawakuta wenye dhambi peke yao hapa duniani. Hata hivyo, tatizo ni kwamba Biblia inataja mara nyingi juu ya watakatifu ambao, walipokuwa hapa duniani wakati wa Dhiki Kuu, waliyashinda mateso kwa uvumilivu na kisha kuuawa kama wafia-dini.

Hivyo, watu wengi wanafikiri kimakosa kwamba watakatifu hawa ambao wameachwa duniani na kisha kuteswa wakati wa Dhiki ndio wale ambao walikubaliana na ulimwengu na ambao imani yao ilikuwa ya vuguvugu.

Watu wanaoshikilia mtazamo huu wanaishi katika hali ya kuchanganyikiwa kwa kuwa hawaufahamu wakati maalum wa unyakuo kama unavyoelezwa katika Neno la Mungu. Sasa, wakati hasa wa unyakuo ni lini? Paulo katika 2 Wathesalonike 2:1-4 anazungumza nasi kuhusu jambo hili kama ifuatavyo: *“Basi, ndugu, tunakusihini, kwa habari ya kuja kwake Bwana wetu Yesu Kristo, na kukusanyika kwetu mbele zake, kwamba msifadhaishwe upesi hata kuiacha nia yenu, wala msisitushwe, kwa roho, wala kwa neno, wala kwa waraka unaodhaniwa kuwa ni wetu, kana kwamba siku ya Bwana imekwisha kuwapo. Mtu awaye yote asiwadanganye kwa njia yo yote; maana haiji, usipokuja kwanza ule ukengeufu; akafunuliwa yule mtu wa kuasi, mwana wa uharibifu; yule mpingamizi, ajiinuaye nafsi yake juu ya kila kiitwacho Mungu ama kuabudiwa; hata yeye mwenyewe kuketi katika hekalu la Mungu, akijionyesha nafsi yake kana kwamba yeye ndiye Mungu.”*

“Mtu wa kuasi... mwana wa uharibifu” maana yake ni Mpinga Kristo ambaye atatokea katikati ya Dhiki Kuu. Kwa maneno mengine, Mpinga Kristo atatokea hapa ulimwenguni kabla ya unyakuo na atajiinua kana kwamba ni Mungu. Hivyo atafanyika sanamu yake na kuwalazimisha watu waiabudu na kumtumikia yeye. Ili kumfanya kila mtu kuwa chini ya utawala

wake, basi Mpinga Kristo atawafanya watu kuipokea alama au jina la Mnyama katika mikono yao ya kuume au katika vipaji vya nyuso zao, na atamzuia yeyote asiye kuwa na alama hii kutonunua au kuuza chochote.

Wakati Mnyama huyu atakapoonekana hapa ulimwenguni, watu wa ulimwengu huu watalazimishwa kuipokea alama iliyotengenezwa kwa jina lake au kwa namba ya jina lake. Kwa hiyo, yeyote ambaye jina lake halijaandikwa katika Kitabu cha Uzima tangu uumbaji ataishia kuipokea alama na kumwabudu Mnyama.

Hata hivyo, kwa kuwa watakatifu ambao wamefanyika kuwa watu wa Mungu wana Roho Mtakatifu ndani ya mioyo yao, wao hawataweza kumwabudu kiumbe yeyote yule mbali ya Bwana Mungu wao kana kwamba ni Mungu. Hivyo, Roho Mtakatifu anayekaa ndani yao atawapa nguvu ya kupinga shuruti za Shetani na za Mpinga Kristo na nguvu ya kuilinda imani yao kwa kuwa wafia-dini. Pia Roho Mtakatifu atawapatia maneno ambayo kwa hayo wanaweza kusimama kinyume na maadui zao.

Ufunuo 17:12-13 inatueleza kwamba, *“Na zile pembe kumi ulizoziona ni wafalme kumi, ambao hawajapokea ufalme bado, lakini wapokea mamlaka kama wafalme muda wa saa moja pamoja na yule mnyama. Hawa wana shauri moja, nao wampa yule mnyama nguvu zao na mamlaka yao.”* Mpinga Kristo atapokea mamlaka ya kuwatesa watakatifu na kuyatawala mataifa ya ulimwenguni kwa kipindi kifupi tu. Hivyo, madai ya Mpinga Kristo ya kuipokea alama yake yatafuatiwa muda si mrefu na mauaji ya watakatifu ya kuwa wafia-dini.

Kwa upande mwingine, Ufunuo 11:11-12, inatueleza kwamba, *“Na baada ya siku hizo tatu u nusu, roho ya uhai itokayo kwa Mungu ikawaingia, wakasimama juu ya miguu*

yao; na hofu kuu ikawaangukia watu waliowatazama. Wakasikia sauti kuu kutoka mbinguni ikiwaambia, Pandeni hata huku. Wakapanda mbinguni katika wingu, adui zao wakiwatazama.” Kutokana na ukweli huu, kwamba mashahidi wawili waliouawa kama wafia-dini walifufuliwa na kunyakuliwa baada ya siku tatu na nusu, basi tunaweza kuona kwamba kipindi kati ya mauaji yetu ya kuwa wafia-dini na kunyakuliwa kwetu si mbali sana pia. Mashahidi hawa wawili walinyakuliwa mara walipofufuliwa. Wakati Bwana atakaporudi, watakatifu waliouawa kama wafia-dini na watakatifu watakaokuwa hai ambao hawakuipokea alama ya Mnyama watafufuliwa wote, watanyakuliwa angani, kisha watamlaki Bwana angani.

Hivyo, tunaweza kutambua kwamba kuonekana kwa Mpinga Kristo, mauaji ya watakatifu ya kufia-dini na kufufuliwa kwao, na unyakuo, vyote hivyo vinahusiana. Paulo na Yohana walituelezea kwa kina juu ya wakati wa unyakuo wa watakatifu. Watakatifu wote watakipitia kipindi cha miaka mitatu na nusu ya kwanza katika ile Dhiki Kuu. Kwa maneno mengine, watakatifu watakuwepo hapa duniani hadi mapigo ya matarumbeta saba yatakapoisha.

Baada ya kuonekana kwa Mpinga Kristo, watakatifu wataingia katika kipindi cha pili cha miaka mitatu na nusu katika ile miaka ya Dhiki Kuu, na watakuwepo hapa duniani hadi pale watakapouawa na kuwa wafia-dini kwa kukataa kuipokea alama ya Mnyama. Hali tukilitambua hili, basi sisi sote tunapaswa kupokea malezi ya imani katika Kanisa la Mungu, yaani wakati huu wa sasa. ☒

Vitabu na vitabu vya sauti vya Mchungaji Paul C. Jong
kwenye simu yako mahiri, kompyuta kibao au PC kwenye
wavuti yetu. Unaweza kusoma na kusikiliza mahali popote,
hata wakati hauna muunganisho wa mtandao.



vitabu

vyā

Vitabu pepe



Rev. PAUL. C. JONG

Mwandishi amekuwa akihubiri injili ya maji na Roho kwa nafsi zilizopotea katika ulimwengu huu kwa takribani miongo miwili sasa.

Kama mwanzilishi wa Huduma ya Utume wa Maisha Mapya (The New Life Mission), kwa sasa anawaelekeza na kuwatia moyo wanafunzi wengi wa Yesu katika shule ya kimissionari ya Utume wa Maisha Mapya (The New Life Mission School).

Baada ya kuanzisha makanisa ya kimissionari, kwa sasa anaieneza injili kwa kupitia kazi zake za kiuandishi.

Kwa sasa vitabu vyake vimetafsiriwa na vinasomwa katika zaidi ya lugha kuu 96 ulimwenguni.

Je, Unafahamu ni Lini Ufufuo Na Kunyakuliwa kwa Watakatifu Vitatokea?



Wakristo wengi siku hizi wanaamini nadharia ya kunyakuliwa kabla ya dhiki. Kwa kuwa wanaamini nadharia hii potofu, inayowadzea kuwa watanyakuliwa kabla ya kuja kwa ile Dhiki Kuu ya miaka saba, ndio maana wanaendelea kuishi maisha ya kidini na ya kiviwani yanayojongwa katika haki binafsi.

Lakini kunyakuliwa kwa watakatifu kutatoka baada ya mapigo yatakayotokana na tarumbeta la saba, yaani hadi pigo la sita litakapokuwa limesimamiwa—yaani, kunyakuliwa kutatoka baada ya kuonekana kwa Mpinga Kristo katikati ya madhafuko ya kidunia, wataki ambapo watakatifu waliozaliwa tena upya watakuwa wameuwa kwa kuifia dini, na wataki ambapo tarumbeta la saba litakapokuwa limeshapigwa. Ni wataki huu ndipo Yesu atakaposhuka toka mbinguni, na hapo ndipo ufufuo na kunyakuliwa kwa waliozaliwa tena upya kutakapotoka (1 Wathesalonika 4:16-17).

Siku hii, kila mtu katika ulimwengu huu atakuwa amesimama katika njia panda kuhusiana na hatma yake ya milele. Watakatifu waliozaliwa tena upya kwa kuamini katika “injili ya maji na Roho” watafufuliwa na kunyakuliwa, kisha watakuwa warithi wa Ufalme wa Milenia na Ufalme wa Mbinguni wa milele, lakini wenye dhambi ambao hawakuweza kushiriki katika ufufuo huu wa kwanza watakutana na adhabu kuu ya mabakuli saba yatakayomiminwa na Mungu na kisha watatupwa katika moto wa milele wa kuzimu.

Hivyo, ni lazima sasa uachane na nadharia potofu za kidini pamoja na tamaa na miiko potofu ya ulimwengu huu, na kisha uingie katika Neno la Mungu la kweli. Ninatumaini na kuomba ili kwamba kwa kusoma mfululizo wa vitabu vyangu juu ya injili ya maji na Roho, basi ninyi nyote mtabarikiwa kwa dhambi zenu zote kuoshelewa mbali, na kisha kuupokea ujio wa Bwana wetu mara ya pili pasipo hofu.

-Paul C. Jong-